


101

14-31-4-15



5-5-1

V1E 57 b2a





DE LIBERO  
ARBITRIO  
ET MERITIS  
BONORVM  
OPERVM

Affertio Catholica:

Ad GREGORIUM XIII. Pont. Max.

*Authore R.<sup>mo</sup> P. F. C. de Capite Fontium, totius  
ordinis Minorum generali Ministro.*

Ex epistola ad Lectorem, quæ ex hoc libro & quam  
expectanda sint, intelliges.



ROMÆ,

Apud Hæredes Antonij Bladij Impressores  
Camerales. M D LXXVI.

DE LIBRO

ANALYTICIS

ET METAPHYSICIS

ET PHILOSOPHICIS

ET POLITICIS

ET JURIS

ET MEDICINAE

ET AGRICULTURAE

ET COMMERCIJ

ET MANUFACTURARUM

ET OMNIVM

ARTIUM ET MISTERIORUM

ET OMNIVM

ARTIUM ET MISTERIORUM

ET OMNIVM

ARTIUM ET MISTERIORUM

ET OMNIVM

ARTIUM ET MISTERIORUM


ET OMNIVM

ARTIUM ET MISTERIORUM

ET OMNIVM



P A T R I  
 ET SANCTISSIMO  
 D. GREGORIO XIII.  
 PONTIFICI MAXIMO.



NTER errores, Gregori  
 Pont. Max. & piissime,  
 quibus hoc infelici sæ-  
 culo ad hominum per-  
 niciem antiqui serpen-  
 tis malitia recto & occulto furore graf-  
 satur, peruersissimi ac periculosissimi  
 semper ij mihi uisi sunt, quos à callidif-  
 simis ministris suis Luthero, Caluino,  
 Beza, cæterisq. eiusdem farinae pseu-  
 \* 2 dopro-

doprophetis, contra liberum arbitriū  
ac bonorum operum merita, ab infe-  
ris excitatos aut certè reuocatos, in-  
uito reluctantiq. orbi Christiano dia-  
bolus conatur obtrudere. Quid enim  
ad Christianam religionem funditùs  
euertendam his duobus dogmatibus  
efficacius? Quid ita nō solū à bono-  
rum operū studio reuocat ac retrahit,  
uerū etiam summam peccandi licen-  
tiam subministrans, homines alioqui  
in uitia satis pronos, laxatis habenis in  
omnium flagitiorum ac scelerum gene-  
ra præcipitat? Olim siquidem antequā  
huius pestilētissimi erroris hydra mul-  
torum pectoribus illaberetur, facile  
coërcebatur improbitas, cū hinc præ-  
mij spes studium uirtutis accenderet,  
inde supplicij metus cupiditatē ad pec-  
cata currentem refrenaret: nunc autē  
sublato ab hæreticis liberæ uoluntatis  
arbitrio, quid aliud restat, nisi ut fra-  
ctis omnibus modestiæ repagulis, ho-  
mines

mines tanquã brutæ pecudes in omnia  
peccata & crimina cõcitatisimè rapiã-  
tur? hinc latrocinia, cædes, sacrilegia,  
seditiones, reipub. tempestates atque  
naufragia, cæterorumq. malorum, qui-  
bus orbis urgetur & premitur, lerna,  
quæ ex hæresi nata, & in bonorũ adul-  
ta perniciem, ad Christianæ religionis  
interitum & fidei euersionẽ haud ob-  
scurè grassatur. Quid enim nobis cum  
operibus bonis, si nullum iis præmium,  
nulla merces proposita est? Imò uerò  
si illa nobis, ut aduersarij garriunt, non  
solum inutilia, sed etiam impossibilia,  
inimica, perniciofa sunt? Quod autem  
iudicium de hominum operibus relin-  
quitur Deo, si ij liberum non habent  
arbitrium? Obiectũ enim iustitię diui-  
næ exercẽdæ liberum arbitriũ est, quo  
qui carent, neque bene neq; malè ope-  
rari possunt, neque mereri aut comme-  
reri, neq; quicquam laude uel præmio,  
uituperio uel supplicio dignũ admit-

tere queunt. Non patent iudicio aut  
examine cuiusquam iudicis cæterorum  
animantiũ opera, quoniã absq; liber-  
tate, deliberatione, consilio facta sunt,  
soli hominis libero uoluntatis arbi-  
trio præditi opera, Dei iudicio ponde-  
rantur, & aut supplicio aut præmio di-  
gna censentur. Quòd si is, quemadmo-  
dum reliqua animantia, libero careret  
arbitrio, iustitiæ Dei obiectum nullo  
modo posset esse. Otiosa enim & uana  
esset quodammodo Dei iustitia, si ob-  
iecto careret. Quæ autem necessitate  
agūt, in diuinæ iustitiæ leges impinge-  
re nulla ratione possunt. Tollit ergo &  
diuinā iustitiam & religionem omnem  
atque pietatem pestiferum istud de ser-  
uo arbitrio dogma. Adeò siquidē col-  
ligata inter seseque connexa sunt hæc  
axiomata, diuinam esse prouidentiam,  
quæ iure & iustè res humanas regat, ho-  
minem libero arbitrio præditum esse,  
animam rationalem esse immortalem,

Deo sincera religione adherendū esse,  
piè & iustè esse uiuendum; è quibus si  
unum sustuleris, reliqua corruat neces-  
se est. Quare dum diabolus per suos mi-  
nistros deblaterat, homines liberum ar-  
bitrium non habere, quibus hoc per-  
suaserit, ij cōsequenter credant neces-  
se est, religionem omnem esse uanam  
ac superfluam, non esse expectandam  
aliam uitam, animam esse mortalem.  
Antiqua sententia est: Nemo repentè  
fuit turpissimus. Quemadmodū enim  
ad uirtutis fastigium nullus repentè cō-  
scendit, ita paulatim per gradus quos-  
dam ad impietatis ima descenditur.  
Proinde qui desertis Ecclesiæ castris  
ad hereticorū conuenticula deficiunt,  
ex Christianis Epicurei repentè non  
fiunt. Prior enim Lutheri occurrit in-  
fania, hinc in Caluini furorem, inde in  
atheismi barathrū, de calcæia scilicet  
in carbonariam præceps impietas ruit.  
Sed dicet aliquis: Aduersarij sacræ scri-



pturæ auctoritatem opponunt, quasi liberum arbitrium cum diuinæ prouidentię ueritate stare nõ possit. Proinde atque eodem argumento, neque Deum ipsum, neque angelos arbitrij libertatem habere credemus. Consequens est igitur iuxta istorum insaniã, nihil usquam contingenter agi, sed fatali Stoicaq. necessitate cuncta euenire. Ad hæc nullam esse uirtutem, non solum in hominibus, sed ne in Deo quidem. Nihil esse beatum, ne Deum quidem ipsum, sed omnia tristi obscuraq. miseria tegi, inuolutaque latere. Quare qui liberum arbitrium negant, tandem Deum ipsum fati necessitate constrictum, è cælo deturbare conantur. Sed non est mihi propositum in præsentia uultum draconis euoluere, neq; quantæ sub hoc errore blasphemię lateant, epistolæ breuitate ostendere. Fecimus hoc alibi, & scorpiones sub illis lapidibus latitantes non solum extraximus,



mus, uerum etiam artem certamq. rationem, qua facile à quouis extrahi atque obteri possint, pluribus uerbis, digitoq. monstrauiamus.

Quid autem dicam de istorum, qui liberum arbitrium negant, impietate, cum singulari & in Deum ingratitudine, & in homines crudelitate coniuncta? Certe hæc etiam tacentibus nobis sese ultro fatis ostendat & iactitat. Quid enim aut quale est illud, quod isti usqueadeo nobilem orbis ciuem, quale Deus hominem fecit, uile mancipium, cunctisque creaturis miserabiliorem facere conantur? Cum enim illum hac spoliant libertatis arbitrij ingenuitate ac nobilitate, quid illi relinquunt, in quo cæteris animantibus antecellat? Dispeream nime truncum aut stipitem creatum malim, quam hominem, si libero carerem arbitrio, iisque quæ illo posito consequuntur, humanæ nobilitatis priuilegiis. Iam enim unde prodibit hominis uirtus?

uirtus? unde futurus est aliquando beatus, si libera caret uoluntate? Quando quicquam facturus est laude uel uituperio dignum? Cur ullis legibus coercetur, imò discruciatum potius quàm cætera animantia? Cur aut minis deterretur, aut promissis allicitur, si liberò caret arbitrio, & ad maiora bona destinatus non est, quàm ad hæc corporalia & fugientia, quæ brutis animantibus nobiscum cōmunia sunt, quibus illa æquè ac nos, imò liberius quàm nos, utuntur, potiuntur, fruuntur? Quid sibi uolunt tot exhortationes, deliberationes, consilia, prædicationes, iudicia, leges, edicta, si nihil homines facere possunt, nisi fati necessitate compulsi? Omnia uana, inutilia, ridicula sunt, si liberum tollas arbitrium. Quo sublato, quid aliud restat, nisi scelerum omnium impunitas, cuius uel sola spes, maxima peccandi illecebra est? Qua semel proposita, quid erit tutum in rebus humanis? Re-

ctè igitur maiorum sententia, legibus  
præmia proposita sunt uirtutibus, &  
supplicia uitiiis. Neque enim domus,  
neque respub. stare potest, si in ea nec  
rectè factis præmia extent ulla, nec sup-  
plicia peccatis. Cæterū quid ei facias,  
qui dicat se necēssitate, non uoluntate  
peccasse? imò ne peccasse quidem, sed  
se à Deo in omne flagitiorum ac scele-  
rum genus impulsū? O portentum in  
ultimas terras deportandum!

Quid dicā de altero dogmate, quod  
aduersus bona opera, Lutheri symmy-  
starumque illius confinxit impietas?  
Quem errorem quo nomine appellem  
nescio, pestēme, an insaniam & furo-  
rem? Non patitur epistolaris angustia,  
me aduersus tam sacrilegam impiamq.  
sententiam rhetoricum iactare sermo-  
nem. Illud tantū dicam, hoc uno de-  
creto atq; sententia, non solū omnes  
neruos uirtutis elidi, uerū etiam ho-  
minem, ut ita dixerim, ex homine tolli,  
omni-

omniq. humanitate spoliatum, cunctis  
leonibus ac pantheris crudeliorem, im-  
maniorem, truciorem fieri. Quid non  
mortalia pectora cogit execrabilis ista  
doctrina? Quis amaros eius fructus re-  
cēdere sufficiat? Quas seditiones, quos  
tumultus, quæ bella, quas hominum  
strages, quot homicidia, parricidia, fra-  
tricia, sacrilegia, furta, rapinas, adul-  
teria, incestus, & quid non malorū in-  
uexit in orbem noua hæc Lutheranorū  
& Calvinistarum falso uocata religio?  
Res ipsa loquitur, etiamsi homines ta-  
ceant. Nō poterat alia uia perniciosius  
ad totius generis humani, non dicam  
Christianorū tantum, perniciem graf-  
fari hostis antiquus, quàm hæc falsa do-  
gmata contra liberi arbitrij ueritatem,  
& bonorum operū merita hominibus  
obtrudendo. Certè de iis, qui illi cre-  
diderint, iure dixerim illud Psalmistę:  
Homo cū in honore esset, non intel-  
lexit, comparatus est iumentis insipien-  
tibus,

tibus, & similis factus est illis. Ex hominibus enim in immundos uertuntur Epicuri de grege porcos, ut nihil ultra de pietate, nihil de Deo legibusq. diuinis, nihil denique de hominis officio & dignitate, sed de solo uentre, sue nobilitatis obliti, imò ab hæresi, tanquam ab altera Circe transformati cogitandum sibi existiment.

Quanta autem istorum ingratitude in cōditorem Deum sit, quis exponat? Quod enim maius beneficiū in hominem conferri potuit, quàm hoc unum atque præcipuum, quòd illum artifex Deus ad imaginem & similitudinem suam fecit, paulo minus ab angelis differentem, gloria & honore coronatum, omnia suis subiecta pedibus habentem, id est dignitatis & excellentiæ gradibus supra cæteras corporeas eleuatū & exaltatum creaturas? Huius autem tanti beneficii magnitudinem isti ingrata sua impiaq. lingua, quantum

in

in ipsis est, extenuant, hominemq. ex  
supremo imperij sui throno deturban-  
tes, illum cunctis subiiciunt creaturis,  
inferioremq. constituunt, & ex nobi-  
lissima, libera, ingenua creatura uilem  
seruum miserumq. mancipium faciunt.  
Non habet totum hoc uniuersum uisi-  
bile liberum ullum ingenuumq. ciuē,  
præter unum hominem. Quæcunque  
enim alia in eo cernuntur, aut seruili  
conditione nata sunt, aut naturæ suæ  
legibus ita obtemperāt ac seruiunt, ut  
nō sponte, sed necessariò in suos actus  
exeant, imò potius agātur, quàm agāt.  
Vnus homo priuilegij singularis gra-  
tia, libertate donatus & ornatus est à  
Deo; qua una re & longissimè à reli-  
quis creaturis distat, & ad diuinæ natu-  
ræ maiestatem proximè accedit. Quæ  
cum ita sint, quis aduersariorum im-  
piam ingratitude non iure miretur?  
Qui ubi se ingenta sibi libertate & no-  
bilitate spoliarunt atque priuarunt, in



uniuersum hominum genus crudeliter  
sæuientes, omnes alios cunctis orna-  
mentis omniq. dignitate spoliatos, in  
idem perfidiæ barathrum atq; in eun-  
dem interitum secum præcipitare co-  
nantur. Tantum abest, ut Dei benefi-  
cium agnoscant, suoque creatori, ut  
æquum est, gratias agant. Callidi nimi-  
rum homines soli perire nolūt, ideoq.  
ut lucrosius pereant, erroris ac perfidiæ  
comites quærunt. Sed hæc illorum in-  
gratitudo fortasse leuior esse uideatur.  
Benefactori siquidem Deo, quemad-  
modum rectè ait Augustinus, etiam  
omnis gratus ingratus est. Quale autē  
illud est, quod isti nimirū religiosi ho-  
mines pro gratiarum actione in Deum  
blasphemias euomunt, dum illum pec-  
cati auctorem faciūt, dum homines ab  
illo in adulteria, furta, rapinas, sacrile-  
gia, latrocinia, cædes, denique in om-  
ne flagitiorum ac scelerum genus im-  
pelli, dum proditionem Iudæ non mi-

nus quàm conuerſionem Pauli opus  
Dei eſſe impudentiſſimè mentiuntur?  
Pro nefas, tantum ſcelus, imò ſacrile-  
gium noſtro ſeculo natum eſſe: O lin-  
guam morſu præcidendam, quæ ita in  
ſuum latrat auctorem:

Sed iſtorum ingratitudinem cū ſin-  
gulari impietate, mendacio, infania,  
furore coniunctam, miſſam aliquando  
faciamus. Illud ſanè mirum eſt, imò ue-  
rò aduerſariorum cæcitatem, furorem  
ac ſtuporè meridiana luce clariùs oſtē-  
dit; quòd pertinaciſſimè negant ſe id  
habere, quod experientia, rerum magi-  
ſtra, eos, uelint, nolint, habere paſſim  
arguit atque conuincit. Quid enim ſin-  
gulis horis atque momētis? Nonne ijs  
ineſſe arbitrij libertatē perſpicuè de-  
monſtratur? Non enim igne & aqua, ut  
dicitur, ſæpius, quam libero utuntur ar-  
bitrio. Quæ cū ita ſint, quis non cæ-  
cos & dementes, imò furore & rabie  
percitos homines iſtos dixerit? Quis

non



non propter ingentem impietatem suā  
ingratitudeque, in quo uitio, ut ait  
eximius orator, nihil mali nō inest, de-  
relictos à Deo, atq. in reprobū sensum  
traditos esse perspiciat? Ego certè sce-  
lestū hoc hominū genus mōstra dixisse  
debuerā, ita detestor, abominor & exc-  
ror, ut in uilissimas bestias conuerten-  
dos mutandosq. eos esse existimem, do-  
nec recuperata mente, ipsa tandem ex-  
perientia discant, quantum inter homi-  
nem intersit & bestiam. Certè hominū  
nomine prorsus indignos esse pronun-  
cio. Cū huiuscemodi bestiis sæpius mi-  
hi certandū pugnandūq. fuit in nostris  
Galliis, donec tandē offerente sese oc-  
casione cuiusdā epistolæ à quodam iu-  
risconsulto Caluinista fratri suo germa-  
no scripta, qua illi suadebat, ut deser-  
ta Romanæ ecclesiæ fide, in Caluini ca-  
stra transfiret, propterea quòd multa,  
ut ille dicebat, uerbo Dei contraria in  
catholica ecclesia docerentur, qualia  
non sunt,

sunt, homini liberum inesse arbitrium,  
opera nostra esse meritoria, per eaq.  
nos æternam assequi uitã. quæ omnia  
falsa esse, multis ex Lutheri Caluiniq.  
libris scripturarũ testimoniis & argu-  
mētis hinc inde corraſis, impiũ dogma  
conabatur asserere. Ita dum illi conten-  
tioſum funem trahunt, rogatus ab eo,  
qui catholicæ eccleſiæ alumnus, Calui-  
ni detestabatur errorẽ, librum contra  
fratris eius epistolam scripsi, quo hinc  
*Rom. 1.* eccleſiæ Romanę fidem Apostoli uoce  
laudatam, de libero arbitrio, & meri-  
tis bonorum operum assererem atque  
defenderẽ, neq; solũ diuinis literis,  
uerũ etiã orthodoxorum patrum au-  
ctoritati naturaliq. rationi & experien-  
tiæ consentaneã atque cõformem esse;  
indẽ uerò illius dogmata cũ sacra scri-  
ptura, orthodoxorũ patrum decretis,  
atque sententiis, ipsaq. ratione & ex-  
perientia pugnare monstrarem. Quod  
quã feliciter præstiterim, aliorũ esto  
iudi-

iudicium. Certè rem alioqui difficilè  
& obscuram, hæreticorū quæstionibus  
& argutiis intricatam atque inuolutā  
ita explicari, ut omnibus facile sit de  
tota ista cōtrouersia iudicare; & quàm  
sancta, uera & salutaris sit ecclesiæ ca-  
tholicæ doctrina, nō difficulter intelli-  
gi possit. Is aduersus quem scriptus est  
liber, testis est locupletissimus; qui dū  
lucubrationem nostram, ut reprehē-  
deret, nostrisq. argumentis responde-  
ret, studiosè legit, ab errore conuersus,  
ad ecclesiæ catholicæ, quam antè te-  
merè deseruerat, gremium rediit, fi-  
demq. quam non solùm cōdēnabat,  
uerùm etiam oppugnabat, mutata sen-  
tentia professus est & amplexus. O ma-  
gna uis ueritatis! quæ nullis machinis,  
nullo cuiusquā hominis ingenio aut ar-  
te subuerti potuit; quæ tametsi calli-  
dissimorum hominum depressa men-  
daciis, aliquando tamen emerfit, eūq.  
à quo prodita uidebatur, uictum ac re-

tractum, non modò sibi manus dare  
coëgit, uerum etiam sanum in ecclesiæ  
catholicæ castra perduxit.

Hic autem liber primū Gallica lin-  
gua scriptus est, sicut & epistola, quam  
refutat. Postea cū hinc non paucos  
qui rectè, ut ueritatis ratio postulat, de  
his dogmatibus non sentirent, ubique  
gentium esse animaduertērem, inde ex  
multorū relatione quā plurimos ex  
libri nostri lectione, in uera fide confir-  
mātos, non solū meliora de Deo &  
homine sentire cōpisse, uerū etiā ad  
Deum ardentius amandū, dum sui ge-  
neris nobilitatem, quantam à Deo ac-  
cepissent, ex eo perfectius didicissent,  
uehementius accensos & inflammatos  
esse intelligerem, rogatus à multis, La-  
tinum quoque in lucem edere operæ-  
pretium duxi, ut non solū Gallis nō-  
stris, uerū etiam cæteris nationibus  
prodesse posset. Cū autem in arenam  
prōditurus esset aduersus tam immania  
mon-

monstra dimicaturus, egeretq. patro-  
no atq; protectore, sub cuius favore au-  
daciùs cum tam feris & crudelibus be-  
stiis confidentiusq. pugnaret, non oc-  
currit cui melius dedicari posset aut tu-  
tius, quàm tu Gregori Pont. Max. Nā  
si exactissimo illo sanctitatis tuæ iudi-  
cio comprobatus, ad tam sacrum bellū  
admissus fuerit, non erit, cur quenquā  
aliū uereatur ac timeat. Irrefragabilē  
enim eum habere ueritatē, quæ omnia  
uincit, hinc facilē quiuis intelliget.  
Duabus autem præcipuē de causis san-  
ctitati suæ dedicatum uolui. Primum  
quia tu ecclesiæ Romanæ, quæ uera  
Christi ecclesia est, pro cuius defensio-  
ne in lucē prodiit, gubernandæ, ad hoc  
uelut alter Aaron à Deo uocatus, uice  
Christi præes. Deinde ut susceptorum  
à sua S.<sup>te</sup> beneficiorum memoriā apud  
me residere intelligat, meq. meo & to-  
tius gregis Franciscani mihi cōmissi,  
& cui semper impēsē fauit, ac in hodie-

num usque diem magis magisq. fauet,  
nomine illi gratias agerem, testatumq.  
apud posteros relinquerem, quantum  
ego & pueri mei mecum, id est, paupe-  
res mei fratres, iuxta patris nostri Fran-  
cisci mandatum, huic sedi dediti si-  
mus, iisq. qui in ea sedent, obedire pa-  
rati, ut pedibus ecclesiæ Romanæ su-  
biecti, stabiles in fide catholica ad mor-  
tem usque perseueremus.

In sanctitatis autē suæ laudes excur-  
rere hinc deterret rerum, quæ dicendæ  
essent, maiestas, quas oratione conse-  
qui, ne dicam explicare, etiam summi  
oratores nō sufficerent. Inde urget ad  
finem epistolaris angustia & breuitas.  
In ingentem enim excresceret librum,  
quæ hac de re scriberetur oratio, si cū  
tuis meritis atque uirtutibus ex æquo  
& pari certare uellet. Hoc tamen unum  
silentio præterire nō possum, felicissi-  
mam esse Rempub. Christianam, cui  
contigerit hoc turbulentissimo seculo  
talem



talem habere Pontificem & rectorem  
tot nominibus insignem, quem pietas  
eximia cum summo rerum usu, expe-  
rientia singulari, prudentia exactissi-  
ma iudicioq. coniuncta adeò exornat,  
ut quid primum in te miremur, diffici-  
le dictu esse uideatur. Certè quæ in fu-  
turo Pontifice magnus ille Basilius de-  
siderat, nimirum ut antè quàm ad tãti  
muneris culmen ascēdat, in minoribus  
atq; inferioribus probatus officiis, pru-  
dentia uirtutisq. suæ experimentum ac  
specimen dederit, multoq. rerum usu  
sibi iudiciũ compararit. Et ut in naui,  
cui Ecclesia meritò comparatur, nullus  
in gubernatorẽ cooptatur, nisi regen-  
dæ nauis artem ac scientiã longa expe-  
rientia multisq. periculis cōsecutus; ita  
S.<sup>us</sup> tua ad ecclesiæ Christianæ guber-  
nacula uidetur accessisse, non hominũ  
suffragiis cooptata, sed Ecclesiæ data  
diuinitus, ut inter huius seculi tēpesta-  
tes, & multorũ crebra naufragia, illam

sapientia singulari in portum salutis ac  
uitæ sanam integramq; perducas. Quæ  
enim singula miramur in cæteris, ea  
omnia in te uno cumulatissimè cōgre-  
gata suspicimus. Eò fit, ut quacunq; de  
re sua S.<sup>m</sup> consulatur, in promptu sem-  
per sit, quod respōdeat, ut uidere mihi  
uidear nō hominem, sed oraculum ali-  
quod diuinum in ea Dominum Deum  
ecclesiæ suę periclitanti prouidisse, qui  
inter uiolentos huius sæculi fluctus, bea-  
ti Petri nauem tot procellis ac turbini-  
bus agitatam sua sapientia, consilio,  
diligentia, constantia, uirtute seruaret.  
Mirum autem in modū omnibus illam  
commendat illa sua cū pontificia maie-  
state iuncta facilitas & humanitas, qua  
benignè cunctos audit atq; solatur, &  
quæ petunt, liberaliter cōcedit. Quam  
cum ego toties, ex quo tēpore sum in  
urbe, fuerim expertus, toties ab ea pa-  
tienter auditus, tot impetratis favori-  
bus, tot susceptis beneficijs, fecit illa



tua humanitas, ut hunc meū laborē illi  
offerre & dedicare nō dubitem. Acci-  
piat ergo placidè munusculum istud,  
quod illi offert curta nostra supellex,  
ut aliis maioribus iunctū, aliquid iuuet  
ad facta testā domus Dei cōseruanda,  
& ab inferorum iniuriis defendenda.  
Exiguū munus adfero, fateor, sed si  
uoluntas & zelus domus Dei, ex quo  
profertur, attendit S.<sup>us</sup> sua, magnū pro-  
fectū reputabitur ab eo, qui nō tanti fa-  
cit quod datur, quanti animum ex quo  
datur. Amando enim ecclesiā Roma-  
nā, & eius zelando fidem, nemini ces-  
sero. Acceptabat quōdā Moses pro ta-  
bernaculi Dei edificatiōe à diuitibus  
aēs, aurum, argentū, lapides pretiosos,  
sed pauperum pilos caprarum offeren-  
tium munuscula non repudiabat. A sua  
igitur S.<sup>us</sup> nō solū magna & pretiosa,  
sed etiam omnia quæ ad ecclesiæ Dei  
edificatiōem uel defensionem facere  
possunt, Christi, cuius successor & imi-  
tator

tator est, exemplo, qui pauperclæ uī-  
duæ munusculum commendauit, gra-  
tumq. habuit, acceptanda non dubi-  
tās, quod habui, prompto animo dedi,  
maiora Deo iuuante daturus, si hæc suæ  
S.<sup>a</sup> grata fuisse intellexero, dummodo  
tempus & otium suppetierint. Ego au-  
tem interim Deum Opt. Max. nunquā  
orare cessabo, ut cum commissio sibi  
Christi regno & grege, qui tā feliciter  
& securè sub tanto pastore æternæ uitę  
pascuis fruitur, illā nobis incolumem  
ad multos annos seruare dignetur.  
Vale S. P. felix diuq. Romæ ex con-  
uentu Aræ cæli, III. Calend. Iulij,  
diuis Apostolorum principibus Petro  
& Paulo sacro die, Anno Christi 1575.

*Sanctitatis suę obseruantissimus  
filius seruusq. humillimus*

*F. C. de Capite Fontium generalis  
Minister indignus, ordinis Sancti  
Francisci.*

AD

# AD LECTOREM.



*V*AENAM huius libri scribendi causa fuerit, ab initio te, amice. Lector, admonendum putavi. Hoc enim ad totius operis intelligentiam plurimum conferet. Scripserat quidam Iurisconsultus Calvinista, homo non illiteratus, ad fratrem suum germanum, virum piū, & in catholica fide ac religione constantissimum, epistolam, qua illi persuadere conabatur, ut Ecclesie Romanae fidem deserens, in Caluini castra transfugeret. Summa eorum quae illa epistola continebat, haec erat: se fratris sui, qui omnem lapidem mouebat, ut illum errantem in viam reuocaret, consilium libenter amplexurum, & ad catholicam

cam Ecclesiam redituum esse, si sibi  
planum fieret, ea qua Romana tradit  
ecclesia, verbo Dei & scriptura san-  
ctæ auctoritati non repugnare. Sed  
quoniã sibi constaret id aliter sese ha-  
bere, debere illũ potius à Romana ec-  
clesia deficere, atque ad Euangelico-  
rum, ut ille dicebat, quũ verbi Dei au-  
ctoritate niteretur, gregem transire:  
non esse dubium, quin ecclesia Roma-  
næ doctrina cum uerbi Dei veritate  
pugnaret. Id cùm ex alijs multis, tum  
uerò ex his duobus dogmatibus, ho-  
mini liberum arbitrium inesse, &  
bona opera esse meritoria, adeò ut per  
ea sempiternæ vitæ præmium conse-  
quamur, luculenter ostendi. Proin-  
de se illa duo interim oppugnanda  
sumpsisse, reliqua in aliud tempus  
differre. Ceterum ut suam senten-  
tiam

tiam confirmaret, è Lutheri Calui-  
nique libris, ex quibus hæretici erro-  
ris venenum hauserat, multa scriptu-  
rarum testimonia, nec minorem ar-  
gumentorum acervum, quibus se nõ  
modò liberum voluntatis arbitrium,  
verùm etiam bonorum operum me-  
rita euertere posse consideret, hinc in-  
de confarcinatum in unam contrusit  
epistolam: quam sibi redditam ille  
in orthodoxa fide constans & immo-  
bilis, ad me, quem paulò ante concio-  
nantem audiuerat, attulit. Et quo-  
niam illi multisque alijs nostra proba-  
batur oratio, qua confutato aduer-  
sarium errore nobis liberum inesse  
arbitrium cùm scripturæ sanctæ au-  
thoritate, tum multis orthodoxorum  
patrum testimonijs atque sententijs,  
ipsaq; ratione & experiētia perspicuè  
osten-

ostenderam, pluribus verbis rogavit,  
imò contendit, ut & impiam illius epi-  
stolæ vanitatem euangelica veritate,  
genuinaque sententiarum, quas de  
scripturis sumptas, ad impij dogma-  
tis confirmationem subdolus scriptor  
heretica fide ingenioque detorserat,  
interpretatione contererem, & erran-  
ti fratri, quo nihil sibi carius esse dice-  
bat, suum periculum ostendens, eum  
in viam salutis ac vitæ pro mea me-  
diocritate reuocarẽ. Quòd cùm Chri-  
stiano homine meaque professione di-  
gnissimum officium esse iudicarem,  
quod illius à me candor ac pietas re-  
quirebat, simulatque otium suppete-  
ret, me facturum recepi; idq; hoc sanè  
libentius ac promptius, quòd illius  
frater, quem heretici in suum erro-  
rem factionemque pellexerant, si ma-  
nifestis



nifestis scriptura sacra testimonijs  
doceri posset, hominibus liberum in-  
esse arbitrium, se ad Ecclesiam catholi-  
cam, quam deseruerat Et tum oppugna-  
bat, castra rediturum esse polliceba-  
tur. Itaque succisuis operis inter quo-  
tidianas, quas ad populum habebam,  
conciones, cœpi futura responsionis  
materiem cadere, quæ tã copiosa sese  
obtulit, ut epistolaris angustia modũ  
egressa, in iustum uolumen excreue-  
rit, non quòd difficile uideretur, stul-  
tissimũ dogma paucioribus uerbis re-  
futare, sed ut vultũ draconis euolue-  
rem, Et absurda impietate, blasphem-  
ia, furore, dementia, quæ ex his  
erroribus uniuersa nascuntur, digito  
demonstratis, renascentia hydræ ca-  
pita ueritatis ense truncarẽ. Ita lon-  
gius aliquãto quàm initio putaram,  
euectus

uectus sum. Nec enim meo studio  
fraternæq; salutis desiderio, satis fuit,  
infructuosa arboris radici admouere  
securim, nisi preposteram aduersa-  
riorum, quibus ne soli pereant, in pri-  
mis propositum est circumuenire quàm  
plurimos, diligentiam meo labore stu-  
dioq; superarem. Vt enim illis fami-  
liare est, in una epistola, concione, vel  
disputatione, quicquid scire viden-  
tur, effundere, omniumq; errorum  
suorum capita proponere, ut illis re-  
spondere non modò longum, sed etiam  
difficillimum esse uideatur; ita nobis  
elaborandum fuit, ne illorum subdo-  
la calliditate, nostra vinceretur indu-  
stria. Proinde ne illi suo more solitoq;  
artificio vociferarètur atque perstre-  
perent, aliquid à nobis in nostra re-  
sponsione prætermisum esse, quasi il-  
lud





LIBERO ARBITRIO  
ET MERITIS  
BONORVM  
OPERVM,

PER REVER.<sup>VM</sup> PATREM  
*F. Christophorum à Capite Fontium  
totius ordinis Minorum generalem  
Ministram.*



EDDITAE mihi sunt tuæ li-  
teræ, mi Frater, quibus ad  
superiores rescribis. In iis au-  
tem cùm illud in primis te-  
cum egissem, vt me quoque  
rogante in nostra castra redi-  
res, & deinceps in Ecclesiæ Romanæ, in qua  
nomen dedisti, susceptoq. Baptismi sacra-  
mento factus es Christianus, fide ac religio-  
ne nobiscum vnanimi pace, concordiaque  
A Deum

Deum coleres, in istis literis negas id fieri posse, propterea quod fides quam in Ecclesia colimus atque retinemus, cum Dei uerbo, ut ais, pugnat, illique contraria est. Et ut tuam uidereris confirmasse sententiam instar eorum, qui sibi fingunt monstra, quæ uincant, id sumpfisti ad refellendum, de quo in meis literis nullam feceram mentionem, uidelicet in nobis esse liberum arbitrium, cuius uiribus freti, cælorum regnū bonis operibus consequi, mereriq. possimus. Ego uerò ita non scripseram, neque ullam aut liberi arbitrij nostri, aut bonorum operum mentionem feceram, attamen cum te frater intelligam, in hanc partem, quam infirmiorum putas, impetum facere, ut doceas ecclesiæ Rom. fidem cum Dei uerbo, scripturæq. auctoritate pugnare, non inuitus in hanc aranam descendam, meque sine magna dimicatione non solum ex Dei uerbo, ipsaq. ratione, uerumetiam ex tuis uerbis liberum in nobis esse arbitriū, quo per Dei gratiam bona & meritoria opera facere possumus, pro quibus æternæ uitæ præmia Deus hominibus reppendit, demonstraturum esse cōfido. Vnum illud à te peto, ut te in tuis literis hæc scripsisse memineris. Si ex Dei uerbo mihi constaret, liberum in nobis esse arbitrium, tū uerò

Ecclesiæ

Ecclesię Rom. quę hoc docet, atq. defendit, fidem sequeretur. Quę cū tua uerba sint, me id ita se habere, his literis demonstraturum esse confido. Vnum illud ante omnia abs te peto, ut eo, quo opiniones uestras prosequi consueuistis, amore deposito, aut si id obtineri non potest, paulisper certe seposito, rationes, ac testimonia, quę producemus, diligenter examines.

IN primis igitur uehementer admiror, te, mi frater, in re tam perspicua errare, atq. illud negare, quod experientia non modò quotidiana, uerum etiam continua uerū esse demonstrat. Vt enim ignem calidū, & niuem albam esse nullo negotio intelligimus, ita liberum in nobis esse uoluntatis arbitriū ipsa experientia rerū magistra perspicuè ostēdit. Cū id mihi uenit in mētem, tum pro meo in te amore, ardentissimoq. tuę salutis desiderio, uehementē sanē uereor, ne sis ex illorum numero, qui sibi nimium confidentes à Deo derelinquuntur, quo fit ut in reprobū sensum incidant, eoq. delapsi recipiant operationem erroris, ut mendacio credant, qui charitatem veritatis recipere noluerunt. Est Mendacij  
natura. ea quidem natura mēdaci, ut seipsum euer-  
tat ac subruat, & experientia quę negatur uerbo, negantem cogit operibus confiteri.

Ita te uideo pugnare tecum, nec aliud facere posse, nisi ut quod uerbo negas, cum te ipse libero arbitrio spolias, hoc factis afferas, tuamq. sententiam ipse subuertas. O magna uis ueritatis, quæ nullis machinis, nullo cuiusquā hominis ingenio, aut arte subuerti pōt, quæ abs te uerbo negata, facto tuo sui confessionem extorquet! Quid enim aliud concionatores uestri? quid aliud uestre factionis principes sibi uolunt, cum in regem suum ipsamq. Remp. seditiones excitant, atq. impia arma induunt? Nōne illud agūt, imò totis uiribus, summo studio, maxima animi cōtentione, tot denique periculis elaborant, ut conscientię libertatem hac ratione defendant? Nonne tantos illos labores ærumnasq. suscipiunt, ne qd præter arbitriū suū facere cogātur? Ne quis eos cogere possit inuitos, ut singuli suo arbitrio uiuāt? Quæ cum ita sint, quæ fraus, quæ impostura, quis dolus malus cum hoc uestro cōferri potest? cum dicimus uos libero uoluntatis arbitrio præditos esse, negatis: cum autē contra libertatem uestrā aliquid tentatur, statim ut eam defendatis, ad arma concurritis. Quòd si liberum non habetis arbitrium, nullam profecto libertatē habetis. Cur igitur ut eā defendatis, Regi repugnatis? Qui si nescio quo fa-

Veritatis  
uis.

to ac necessitate compellitur facere qđ facit, certè illius decretū molestè ferre non oportet, sed potius amplecti. Cor.n.regis, ut ait *Prou. 21.* Scriptura, in manu Dei, ad quodcūq. uoluerit, cōuertet illud. Porro si Deus regē cogit, ut uelit, qđ uult, profectò cū regi resistitis, Deo repugnatis. Et si ut dicitis, Deus operatur in nobis & uelle & p̄ficere; nos uerò nihil, quicquid rex uult aut facit, Dei opus est. Attamen ut libertatem uestram defendatis, regi repugnatis. Ita ueritas, quam uerbo negatis, factis uestris sui cōfessionē a uobis extorquet. At cū in literis à me petis, ut in gratiam tui aliquid faciam, meq. qđ id non fecerim, reprehendis, quid? nonne me libero arbitrio præditum esse confirmas? stultum.n. est aliquid à me petere, si liberum mihi desit arbitrium, neque reprehendi debeo, si id qđ à me petis, non facio, cū mihi secundū sententiam tuam, liberum desit arbitrium. Cur pecudes non rogatis? cur asinis uestrū Euangelium non prædicatis? cur lupos ob uoracitatem non reprehenditis? Nonne idcirco qđ libero destituuntur arbitrio? Cur homines monetis, rogatis, reprehēditis? Nonne ea re, quod & facere, & nō facere possunt, pro uoluntatis arbitrio, quæ monentur, ut faciant? Nam si fato locus est, si homines omnia non

voluntate faciunt, sed necessitate patiuntur, superuacuum est quenquā monere, rogare, reprehēdere. Deniq; uos ipsi qui oē hominum genus libero spoliatis arbitrio, è cōuenticulis uestris conciones omnes atq. exhortationes cur nō exhibilatis? Quorsum illa cōsilia? illæ constitutiones? illa præcepta? & si quis fortè deliquerit, illa seueritas ecclesiasticę disciplinæ? Quę certè uana sunt omnia, si liberū negatur arbitriū, si cuncta non uoluntate fiunt, sed necessitate contingunt. Quid sibi uolunt tot inuectiuæ in Pontificem? in Episcopos? in monachos? in sacerdotes? denique in omnes catholicos ob illorū improbitatem, & perditos, ut dicitis, mores? Nōne æquius erat eos misericordia prosequi, maxime cū necessitate nō uoluntate tales sint? Quos si reprehendendos putatis, uidete ne quod oratione defenditis, id opere destruat. Rectè, ac propè diuinitus in quadam oratione Chrysostomus, Qui mali sunt, inquit, si à seipsis mali non sint, noli tuos seruos castigare, nec uxorē si peccat, increpa, nec liberos uerbera, nec amicos incusa, nec offendētibz inimicis infensus sis. Nā hi omnes nisi sponte delinquant, nō punitio, sed miseratione digni sunt. Et paulò post. Quādo seruus, inquit, tuus morbo impeditus iussa non fecerit,

*Hom. 60. in  
Matth.*



fecerit, nō modò non criminari, uerumetiā valde cōmiseresceris. Quare tu testimoniū perhibes, nonnihil ab ipso, nonnihil aliūde, ac non ab ipso fieri, uerum inde quoque oratorū obruere faciliè possumus. Nā undique ueritatis affluunt adminicula, si eos interrogabimus, quamobrem nūquam seruos criminarentur, si facie formosi non sint, si nō proceri statura, si nō quasi uolucres in eundo, ceteraq. huiusmodi, quia uidelicet natura hæc, non uolūtate concedūtur. Immunis est ergo eius culpæ, quā ei natura inuexit, nō uoluntas. Cū igitur accusas, tunc ostendis profectò nō à natura, sed à uolūtate mali quippiā processisse. Nā si quæ minimè culpamus, ea naturæ delicta esse, aut saltē non uoluntatis testamur, patet ea solū culpari, quę uolūtate cōmittuntur. Noli ergo peruersas in mediū ratiocinationes inferre, nec sophismata & orationis contextum telis aranearum viliorē. Hactenus Chrysostomus. Ex quibus intelligis eo sæculo non defuisse, qui uestrū sequerentur errorem. Atque utinam ex huiusmodi summorum hominum libris tanquam ex purissimis fontibus ueritatem haussisses. Ego uerò, fremant licet uestri, unius Chrysostomi auctoritatem omnibus Bezis, ceterisq. eius farinæ rabulis antepono.



Sed mihi diuinæ scripturæ auctoritatē opponēs, cui soli fidem habendam esse contenditis, nullumq. sanctorū patrum ei præferendum esse clamabis. Ego verò Chrysostomū omnes diuinæ scripturæ libros diligentissimè legissē cēseo, nec adduci possum, ut credam illum cōtra uerbi Dei veritatē, liberum unquā hominibus assignaturū fuisse arbitriū, quod paulò pōst pluribus uerbis planum faciemus. Sed antequam in campum prodeamus, ab experientia tibi ostēdere uolui nos libero uoluntatis arbitrio præditos esse, neq. posse fieri, quin ii qui illud negant, sæpe uel inuiti factis, dictisq. fateantur, hinc ueritate cogente, inde natura mouēte, ut se homines esse meminerint, & aliquid inter se, & pecudes, scilicet liberum uoluntatis arbitriū sentiant interesse. Quod tibi ipsi iam contigisse perspicio. nam superiore epistola me obiurgabas, quia id qđ à me antè petieras, nō fecissem, in extremis uerò literis tuis scribis, me liberū arbitrium nō habere. Quod si ita est, in superioribus literis me iniuria reprehēdis: sed nouissimæ literæ tuæ, in quibus me libero arbitrio spoliatū esse docēs, me satis purgāt atque defendunt. Qua in re idē tibi accidit, quod olim Chrysippo; qui cū omnia ab hominibus fatali necessitate, nihil libera  
uolun-

uoluntate geri diceret, etiam illud adiecit,  
latrones & sicarios nō supplicio coërcēdos,  
sed potius misericordia prosequendos, q̄ ad  
illa facinora, cædesq̄. non uoluntate, sed ne-  
cessitate traherentur. Sicarius quidam ex sen-  
tentia iudicum cū morti adiudicatus ad  
supplicium duceretur, Chrysippus instituto  
suo fati necessitatem incusans, iudices repre-  
hendebat. Tum prætor colaphū Chrysippo  
in aduersum os cū impegisset, molestē id  
Chrysippus ferēs, à prætore quæsiuit, cur eū  
uerberasset. hic prætor: Noli, inquit, hoc mo-  
lestē ferre Chrysippe, fato siquidē impulsus  
aliter facere nō potui, cū iuxta sententiam  
tuam uoluntatis libertate priuatus sim. Ita  
Chrysippū ille coëgit absurdam, quam antè  
defenderat, mutare sententiā. Non dissimile  
est quod tibi nunc accidit. modò enim mihi  
in tuis literis uolūtatis adimis libertatē, cū  
me paulò antè, quòd tuę uoluntati morē nō  
gererem, reprehendisses. Atqui si me libero  
uolūtatis arbitrio priuatū esse cēsebas, tecū  
potius ad hunc modū agere debebas: Scio  
fratrem meum, uim ac potentiā efficiendi,  
qđ in literis ab illo peto, non habere. Quòd  
si Deus in eo non effecerit, fieri nihil potest.  
Deus enim homini p̄stat & uelle, & facere.  
Proinde non fratri meo, sed Deo potius, qui  
illi,

illi, nec uelle, nec facere concessit, succedere debeo. Certè stultè atq. improuidè feci, qui hominè potius quàm Deum rogavi; ad què solum, qui omnia facit, nō ad fratrem meum, qui nihil neq. facit, neq. potest, preces meas uertere debuissim. Quare cū hic, quod ab illo petebam, præstare nō possit, illū iniuria profectò reprehēdi. Quàm diu igitur in hac opinione permanseris, si uerā eā esse credis, scribendi modum mutare necesse est, eumq. cui scribis, iuxta vestræ opinionis rationem, rogare isto modo. Mi frater equidē à te non peto, ut hoc aut illud in gratiam mei facias, neque enim tuę uoluntatis habes potestatem, sed à Deo peto, ut tibi & uoluntatē, & facultatem, hoc aut illud in gratiam mei faciendū cōcedat. Quæ ratio si tibi absurda uideatur, cogitare debes, opinionē à qua tanquam ex fonte ratio ista manat & profluit, absurdissimam esse, meq. nō frustrā à te petiisse, ut huiusmodi opinionē abiiceres. quam haud iniuria absurdissimā dico, propterea q̄ neq. ad uitæ humanæ rationem accōmodari ullo pacto potest, neq. unquā in societatis humanę communionē recepta est. Quid? q̄ tu ipse qui eam defendis, atq. astruis, tam absurdam iudicas, ut cū eā uerbo ponas, factō statim euertas, neque effugere potes, quin eam nō  
modò

modò uerbis, sed èt operibus destruas. Quæ  
cùm ita sint, uehementer sanè demiror, te  
summo ingenio iudicioq. peracri præditū,  
in tam absurdos errores, & tã paradoxas opi  
niones esse delapsum. Quæ quales sint, facile  
ipse p̄spicies, si quæ uestrā cōtra liberæ uolū  
tatis arbitriū opinionē sequantur absurda,  
pressiùs cōsideres. Tu qui ius ciuile didicisti,  
& inter iudices sepe uersatus es, non ignoras  
criminis excusationē ab æquo iudice nullā  
citius recipi, q̄ cùm ita defenditur, feci, sed  
aliter fieri nullo modo potuit. Antiqua sen  
tentia est. Necessitas nō habet legē. Si uolū  
tatis non habeo libertatē, omnia facio fatali  
quadā necessitate cōpulsus. si tali necessitate  
cōpulsus, aliter facere nullo modo possum.  
si aliter nequeo, p̄fectò nō pecco: usq. adeò  
siquidem, ut ait Augustinus, peccatū volun  
tarium malū est, ut nullo modo peccatū sit,  
si non sit uoluntariū. & alibi: Quis peccat in  
eo quod nullo modo caueri potest? quasi di  
ceret: Vbi necessitas est, ibi peccatū non est.  
vbi autem peccatum non est, ibi reprehēso  
aut pœna ab æquo iudice irrogari nō debet.  
Quid iustius nō modò apud homines, uerū  
etiam apud Deum iustitiæ auctore ipsamq.  
iustitiā adferri potest? Atqui iusta excusatio  
ista nō esset, si diuino iudicio improbaretur.  
Sed

*Lib. 1. de  
lib. arbit.  
cap. 12.*

*Caluini  
Deus cru-  
delis.*

Sed insignem quandam absurditatē, imò blasphemiam in Deū, quam ista uestra ridicula, stultissimaq. opinio fouet, tibi nūc apeririā. Si opera nostra faceremus inuiti, & fatone scio quo ac necessitate cōpulsī, quo iure imò qua iniuria uindictarētur à Deo? Scitū est illud Augustini cū de Deo loqueretur, puniente peccata. nō enim iustē ea uindictarentur, nisi libera fierent uolūtate. Quæ autē iustitia, quæ bonitas in Deo est, si præceptorū suorū, quæ iuxta sententiā uestram seruare impossibile est, transgressores pœnis afficit sempiternis? quid illo nouo Caluini Bezeq. uestri Deo crudelius? qd immanius cogitari potest? Nihil eo tetrius unquam finxit antiquitas; siquidem in hominēs talis est, qualē illum & magistri uestri confingūt, & tota factio uestra esse defendit. Ego uerò summum illum patrum meorum Deum, coeli & terræ creatorem, illum optimum atque iustissimū nolo dimittere, ut istū uestrum crudelissimū immanissimūq. Deum, imò prodigiū atq. portentum, qui non modò ea quæ, uti dicitis, fieri nullo modo possunt; hominibus præcipit atque imperat, uerū etiam eos qui illius præcepta non seruant, suppliciis afficit sempiternis, recipiam atq. amplectar. Multa quidem ridicula atque absurda uobis cōcionatores

natores uestri p̄suaserunt, attamē uobis mē-  
tem ipsam sensumq̄. cōmunem ab iis ereptū  
esse non arbitror, ut quid inter æquū, & ini-  
quum, inter bonū, & crudelem intersit, non  
intelligatis. Sed ad te frater redeo. Dic mi-  
hi, si seruum paralyticū, omniumq̄. mēbro-  
rum officio destitutum haberes, eiq̄. præci-  
peres, ut literas tuas Lutetiam Parisiorum  
adeò celeriter deferret, uti si intra horā non  
rediret, eum aut in carcerē coniiceres, aut in  
profluentē abiiceres, ut à piscibus deuora-  
retur, deinde in eum præcepto tuo non obtē-  
perantem animaduertes; nōne te ipsum ini-  
quum, & crudelem esse iudicares, qui in ser-  
uum tuū, cui impossibile aliquid p̄ceperas,  
tam inique crudeliterq̄. statuisses? Quanto  
maior Dei uestri acerbiorq̄. crudelitas, qui  
cū ea, quę ut dicitis fieri nullomodo possūt,  
hominibus præcipiat, in eos tamen, q̄ illius  
præceptis non obtemperauerunt, immanis-  
simē sequit, nō unius mensis aut anni, sed eter-  
ni carceris pœna; non temporali morte, sed  
sempiterna; nō illos in profluentem abiicit,  
sed in stagnū ignis præcipitat, ut inextingui-  
bili flāma non ad tempus, sed perpetuò tor-  
queatur? Et erit quisquā adeò cœcus ac de-  
mēs, qui ullam bonitatis, aut iustitiæ partem  
isti Deo adscribet? Nam si corporis mortem  
alicui



alicui nisi præcepto tuo pareat, cui obtemperari nullo modo potest, cōminari, tyrannicæ crudelitatis est, quāto sæuior & immanior ille est, qui hinc impossibilia præcipit, inde non corporis, sed animæ mortem comminatur? Cuius immanis ac sæua crudelitas fortasse tolerabilis uideretur, si miserā illam animam ad annū unum aut alterū flammis adiudicaret, uerū maxima igniū pœna, eaq. sempiterna cōdemnare, omnem immanitatem ac sæuitiam superat. Nulla igitur in Deo uestro iustitiæ pars, nulla æquitatis, nulla misericordiæ ratio, sed tā crudelis immanitas, ut is oēs Phalarides, omnes Nerones, cunctaq. alia tyrannorum monstra atq. portenta incredibili sæuitia superare uideatur. Neque uerò sum ignarus, quibus ambagibus Deū uestrū defendere consueuistis, eiusque iustitiam quo orationis prætextu adumbrare conamini. Cuius immanitatem atque sæuitiam, ut religioso uestro patrocinio à morsibus inuidorum uendicare possitis, non modò Chrysippea quædam adfertis in medium, sed etiam scripturam trahitis repugnantem. Quid tamen inter æquitatem & crudelitatem intersit, nō est obscurum, neque mihi ulla unquam oratione persuadebitis Deum uestrum, si tamen talis est, qualem eum fingitis; & si eius  
præcepta



præcepta seruare nō possumus, iniustissimū,  
 sæuissimumq. non esse, hæc omnia quæ di-  
 ximus, ex stultissima opinione uestra, tan-  
 quam ex putidissimo fonte nascūtur, suntq.  
 consequentia, nec ulla arte uerborum, Dei  
 uestri quem iniquissimum crudelissimumq.  
 finxistis, nomini & gloriæ patrocinari pote-  
 stis. Rectè igitur noster Hieronymus, Si q. s. *Epistol. 9. i.*  
 ait, dixerit Deum nobis præcepisse aliquid *Damasius*  
 impossibile, anathema sit. Et Christus in *Papam.*  
 Euangelio: Iugum meum suauē est, & onus *Matth. 11.*  
 meum leue. Item Ioannes apostolus in epi-  
 stola: Mandata, inquit, eius grauiā nō sunt. *1. Ioan. 3.*  
 Vide frater quantū inter Dei uerbum & ue-  
 strum errorem interfit. Vos præcepta Dei  
 impossibilia esse dicitis; Ioannes apostolus  
 negat. Quid Moyses in Deuteronomio? nō. *Deut. 30.*  
 ne consentit apostolo, cū ait, præcepta Dei  
 non esse supra nos, id est, nostram facultatē?  
 Lege 30. Deuteronomii caput, & in nostrā  
 sententiam multa esse perspicies, quæ liberæ  
 uoluntatis arbitrium probant, & ostendunt,  
 sine quo Dei præcepta seruare nō possumus.  
 Quod igitur confitemur & credimus, id non  
 modò rationi, uerū etiā Dei uerbo appri-  
 mē quadrat & conuenit. Vestra autē opinio  
 usque adeò rationi, experientiæ, Dei & uer-  
 bo, & gloriæ repugnat, estq. contraria, ut mi  
 hi

hi æquè difficile sit illi assentiri, atq. impossibile mihi est, Deum meum iniustum, sæuū, crudelem, immitem, tyrannū, denique omnis æquitatis oblitum credere. Quem cū scriptura diuina passim iustum, bonum, misericordem laudet ac prædicet, eiusq. uias omnes rectas esse pronunciet, nisi scripturam ipsam tanquam falsam antè condemnem, uerbis tuis, quæ cum ea pugnant, fidem habere non possum.

Hæc ad te mi frater fortasse pluribus uerbis. sed quàm stulta sit opinio tua, demonstrādum putauī, ut illius absurditate perspecta, ad scripturæ sacræ testimonia, quæ in fidei nostræ confirmationem proferemus, recipienda, tuum animum præpararē. Qua in re si medicorum imitamur industriā, nemo studium nostrum iure reprehendet. ut enim illi corpus ægrum, uitiosisq. refertum humoribus purgaturi, quibusdam medicamentis præparant, ac deliniunt; ita nos animum tuū Dei beneficio curaturi, mentem tuam ad suscipiendam uerbi Dei medicinam præparare studemus. Fides igitur nostra nihil contra Dei gloriam, nihil quod aut scripturæ sacræ aut rationi repugnet, docet. Neque enim cū Manichæis, cum Stoicis, Priscillianistis, Hufitis, Vuicleffitis, Lutheranis cæterisq. pestibus

tud non auderemus attingere (hoc enim aduersarij facere cōsueuerunt, ne, si garrire desinant, uicti fuisse videantur) intra quindecim dies ita hunc librum elucubrauimus, ut nihil ab aduersario positū esset, quod non à nobis diligenter expenderetur. Nam cum ille primo loco liberum oppugnet arbitrium, ut illius uenenum nostra sequeretur antidotus, ante omnia eius errori non solum unum & triginta clarissima sacra scriptura testimonia, verum etiam orthodoxorum sanctorumque patrū tam Græcorum, quàm Latinorū totidem sententias, ad hac multas variāsque rationes, quibus omnibus liberum arbitrium perspicuè demonstratur, opponimus. Hinc ordine sequitur declaratio absurditatum & blasphemiarū

in Deum, quæ ex illius erroris corrupto fonte manant & profluunt. Exinde omnibus aduersarij argumentis, imò sophismatibus confutatis, quæ etiam in illum retorsi, certas regulas rectè interpretandi verbum Dei exposui, ad quas tanquam ad Lydium lapidem siquis aduersariorum propositiones atque sententias examinare voluerit, quàm horrenda impietatis, hæreseos, blasphemiarum ex illis portenta nascantur, intelliget. Ita non modò rectè de hac tota controuersia iudicabit, verùm etiam omnes quæstiones ac difficultates, quæ in hac materia obiici possunt, facile soluet ac diluet.

In altera verò controuersia de meritis bonorum operum, ne quid desideraretur à nobis, ad eundem modum

dum elaborauimus. Illius autem Iu-  
risconsulti, nostri tum antagonista no-  
men suppressendum putavi. Rediit  
enim is ad sanam mentem; & ex ad-  
uersario noster, id est, catholicus fa-  
ctus est. Fratris autem eius in hac no-  
stra responsione personam indui. Nul-  
lus enim Dei beneficio germanus mi-  
hi frater est, qui aut unquam in ca-  
tholica fide vacillauerit, aut non sit  
semperque fuerit fidelis & constans  
ecclesie Romanae filius & alumnus.

Habes causam amice Lector, qua  
post tam multos viros singulari eru-  
ditione doctrinaeque praestantes, qui  
de libero arbitrio et bonorum operum  
meritis accuratè scripserunt, me in  
hanc arenam impulit. An illorum  
industria quicquam adiecerim, alio-  
rum esto iudicium. Certe materiam

hanc alioqui difficilem & obscuram,  
ac tam multis questionibus intrica-  
tam, ut Labyrinthus, ex quo exitus  
pateat nemini, esse videatur, aliquan-  
to facilius & ad vulgi captum accom-  
modatus, quam multi alij tractato-  
res explicuimus. Porro quàm efficax  
ad persuadendum fuerit oratio no-  
stra, effectus optatus ostendit. Aduer-  
sarius enim qui fratri suo tendebat  
insidias, ipsa veritate conuictus &  
captus est, nobisque ita victoriā gra-  
tulatur, ut se erroris gaudeat esse vi-  
ctorem. Itaque in Ecclesiam catholi-  
cam reuersus, iam nobiscum in ea-  
dem Petri nauicula est. Tanta veri-  
tatis efficacia, tanta vis est. Neque so-  
lum iste ex huius libri nostri lectione  
profecit, verum etiam alij non pauci,  
quos eo lectio hereticum errorem abie-  
cisse



cisse, & ad animi sanitatem reuersos  
esse cognoui. Nullus certè ministro-  
rum Calvinistarum, quod sciã, huic  
operi nostro ausus est respondere.  
Proinde fuere nostro labore amice Le-  
ctor, nostramque disputationem bo-  
nis auibus lege, & te tui studiij mini-  
mè pœnitebit. Vale.



## AD LECTOREM.

*Hæreses fraudes, ac impia dogmata, Lector.*

*Caluini certa vis abolere via?*

*Alciden (cuius nitaris viribus) ecce*

*Mittit ἀλεξινὰν caluūs iste liber.*

*Qui validus turpem letali conficit hydram*

*Vulnere, septenum concidit ense caput.*

*Cuncta venenato vomuit quæ pectore pridem*

*Caluinus, pereunt robore cassa suo.*

*Hic tibi diuinis firmantur dogmata verbis,*

*Quæ neget haud vllus, si modo mente valet.*

*Linguae iam sileant sceleratæ murmura, Seruum*

*Audiat Arbitrium nemo, vel esse putet.*

*Non operi meritum iusto putet esse negandum*

*Quisquam: Caluini nemo sequatur iter.*

*Sed vitium totis expellens viribus, olim*

*Celesti merito speret in arce frui.*

# PRIVILEGIUM.

GREGORIUS PAPA XIII.

Ad Futuram rei memoriam.



*V*M, sicut accepimus, dilectus filius frater Christophorus de Capite Fontium totius ordinis Fratrum minorum de obseruantia generalis minister, & seruus, quoddam opus, scilicet libellum de libero arbitrio, & meritis bonorum operum composuerit, ac denique reuiderit, quod à Venerabilibus Fratribus nostris sanctæ Romanæ Ecclesiæ Cardinalibus, congregationis Indicis librorum, & Magistro sacri Palatii Apostolici examinatum, & approbatum fuit: Nos eundem Fratrem Christophorum specialibus fauoribus, & gratiis prosequi uolem. omnibus, & singulis, ac quibuscumque utriusque sexus personis præsertim bibliopolis, & librorum impressoribus tam in Vrbe quàm reliquis terris Sanctæ Romanæ Ecclesiæ mediate, uel immediate subiectis in uirtute sanctæ obediencie, & sub quingentorum ducatorum auri Camera Apostolicæ applicam. & insuper amissionis librorum, & etiã excommunicationis maioris lata sententia pœnis, toties ipso facto, & absque ulla declaratione incurrendis quoties contra factum fuerit, ne durante Decennio proximo, à data presentium computam. dictum opus sine expressa, dicti Christophori uoluntate, & licentia imprimere seu ab ipsis, uel alijs, præterquam de eius, ut præfertur, uoluntate imprimere, uendere, seu uenale habere, aut proponere audeant, seu præsumant, Apostolica auctoritate districtius inhibemus. Mandantes vniuersis venerabilibus Fratribus Archiepiscopis, Episcopis, eorumque Vicarijs

liberum uoluntatis arbitrium in eorum posteris extinctum esse ac perditū. Sed quā uana sit hæc expositio, ex eo intelligi potest, quod ad Cain post fratrem ab eo occisum Dominus dixit, multis diebus, ut arbitror, post primum illud Adæ peccatū. Quid de cæteris scripturæ testimoniis dicam, quæ & superius produximus, & iam allaturi sumus? Quæ sanè omnia non de protoplastis ante peccatum, sed de illorum posteris accipi necesse est. Ex quo intelligi potest, quā inanis ac futilis sit uestra ista exceptio, qua inuictam ueritatem quidam ex uestris conātur eludere.

### XIIII. TESTIMONIUM.

**V** Eniamus ad uaticinia prophetarum, *Eesai. i.* Deiq. uocem per Esaiā filiis Israël ita loquentem audiamus: Si uolueritis & audieritis me, bona terræ comedetis. Quòd si nolueritis, & me ad iracūdiam prouocaueritis, gladius deuorabit uos. Qui ita loquitur, ut dicat, Si uolueritis, si nolueritis, eos, quibus loquitur, liberum uoluntatis arbitrium, quo aut implere possunt, aut non implere, quæ præcipit, habere non dubitat. nisi fortè Deum circulatorum more, nugatoriè loqui

C      existi-

existimamus. Neque enim quisquam ita loqui solet, nisi ei, qui potest aut implere, aut non implere quæ iusserit.

## XV. TESTIMONIUM.

**Q**uid Hieremias cùm Iudæ regē ciuesq. Hierosolymitanos, ut sabbatum obseruent hortatur & monet, nonne ita cū iis agit, ut illos liberam uolūtatem habere demonstraret? Sic enim ait: Hæc dicit Dominus, Custodite animas uestras, & nolite portare onera in die sabbati, nec inferatis per portas Hierusalem. Et nolite eicere onera de domibus uestris in die sabbati, & omne opus non facietis. Deinde huiusce præcepti obseruatoribus lætiora pollicitus, trāsgressoribus comminatur his uerbis: Si autem non audieritis me, ut sanctificetis diem sabbati, & non porteris onus, & ne inferatis per portas Hierusalem in die sabbati, succendam ignem in portis eius, & deuorabit domos Hierusalem, & non extinguetur. Hæc propter quod dā nostri sæculi iudices pluribus uerbis exposui. qui tametsi iuxta Dei præceptum a rege, ut dies festi obseruētur, decretum esse intelligant, tamen eos dies contra omnes leges diuinas & humanas facile uiolari pol-  
luiq.

Juiq. permittunt. Atque utinam ij hoc Hieremiæ caput legissent, ac Dei, si præcepta cōtemnunt, saltem iram uereantur ac timeant. Sed ut unde digressi sumus, eò reuertatur oratio, Propheta ipsa dicendi ratione satis ostendit, regem Iuda, eiusq. subditos liberum habuisse uoluntatis arbitrium, ut illum uel audirent, uel non audirent; diem sabbati uel seruarent, uel certè uiolarent; onera in die sabbati uel portare uel non portare possent, nimirum pro suæ libertatis arbitrio. Quæ cū ita sint, hæc ad ueritatis confirmationem fortasse sufficerent; ex abundanti tamen quod in hanc sententiam idem Propheeta paulò pōst dixit, adiiciā. Quid igitur pro uoluntatis libertate apertius dici pōt, quàm si homo peccator pœnitentiam agere uoluerit, Deum quoque pœnitentiam acturū esse super malo, quod peccatori facere cogitauerat? Quod non minus apertè Ezechiel quoque propheta demonstrat, apud quē Deus à quadam calumnia, qua eum afficiebāt filij Israël, sese purgans, illud prouerbiū quod inter eos tum uersabatur, cū dicerent, Patres nōstri comederunt uuam acerbā, & dentes filiorum obstupescūt; quibus uerbis Deum accusabant iniustitiæ, quasi filios ob parentum peccata puniret, refellens, peccā-

tes iure reprehendit. Neque enim Deus quenkumque puniebat innoxium; sed anima quæ peccauerit, ipsa morietur, proprio sane non alieno grauata peccato. Et paulò post: Si impius egerit pœnitentiam ab omnibus peccatis suis, & fecerit iudicium & iustitiam; uita uiuet, & non morietur. Contrà si iustus auerterit se à iustitia sua, & fecerit iniquitatem, ut impius, in peccato suo morietur. Et dixistis: Non est æqua uia Domini. Nunquid uia mea non est æqua, & nō magis uia uestra praua sunt? Nam si peccator resipiscens pœnitentiam egerit, salutem consequetur; si iustus pietatis opera deseruerit, punietur. Sic igitur pro suis meritis Deus unumquemque remunerat, Hæc in Iudæos olim dicta sunt, sed in uestras calumnias quibus Deum ut iniustū arguitis, quòd hominem puniat ob peccatum, quod neque admisit, neque secundum uos, cū liberū arbitrium non haberet, admittere potuit, æquè conueniunt. Neque enim ullum peccatum est, nisi uoluntarium.

## XVI. TESTIMONIUM.

**Q**uantæ uero sint liberi arbitrij uires, apud Danielē laudatissimæ Susannæ decla-

declarat exemplum. Quæ ab impudicis tentata iudiciis, cum hinc peccati dulcis illecebra, inde non solum infamia, uerum etiam certa mors ancipitem animum in diuersa rapi peret, primò quidem fluctuat secumque deliberrat, deinde confirmata uoluntate, mori mauult, quam Deum offendere. Iure igitur meritoque præclarissimæ feminæ uirtus toto terrarum orbe celebrata cantatur. Quæ laude profectò uideretur indigna, si fati necessitate compulsæ & inuita, mortem impudicitia prætulisset. Nihil enim ualde laudabile est, quod proficiscitur ab inuito.

## XVII. TESTIMONIUM.

**L**ongum est per omnes prophetarum libros currere, ex quibus ea quæ modo protulimus, sufficere deberet. Nā qui Moysen & prophetas nō audiunt, nulli profectò alteri credent. Attamen noui instrumenti testimonia iam in medium producturi, tantum testium numerum id effecturū esse confidimus, ut tandem & ad suscipiendā de libero arbitrio ueritatem & fidem, & ad istos ueritatos & callidos, qui illud tibi celare cōtendunt, de furto ueritatis ac proditiōe suspectos reddendos, animum tuū suo pōdere.



moueant. Quorum auctoritas si in te minus ualuerit, quod tamen nisi à Deo planè derelictus es, fieri posse non arbitror, certè iis qui ea lecturi sunt, perspicuum erit, Ecclesiã catholicam abs te non modò iniuria, uerùm etiam falsò accusari, quòd còtra Dei uerbũ homini uoluntatis libertatem assignet. Quoties autem mihi hinc tuarum literarũ uenit in mentem, inde tot scripturę loca còsidero, in quibus liberi arbitrii aperta fit mentio, uehementer sanè demiror tales à te literas esse scriptas. Nã si illa scripturæ loca legisti, quæ est ista impudentissimæ frontis audaciã, quis animi tumor, oblatrare tam perspicuæ ueritatis? Si non legisti, quãta est hæc tua leuitas, imò dementia, impostoribus ita temerè fidẽ habere, credentemque mendacio, salutis ac uitæ naufragium facere? Certè prudentis est diligenter attendere, quibus fidem habeas, quibus salutem animæ tuæ credas. Sed hæc hætenus.

Veniamus nunc ad noui Testamēti loca, quibus liberum uoluntatis arbitrium euidenter asseritur. In primis igitur illud occurrit

*Matt. 23.* quod Christus in Euangelio dicit: Hierusalem Hierusalem, quæ occidis prophetas, & lapidas eos qui ad te missi sunt, quoties uolui congregare filios tuos, quemadmodum

gallina

gallina congregat pullos suos sub alas, & noluit. Quid pro nobis magis perspicuè dici potest? Aliud Deus, aliud Hierosolyma uolebat. Erat igitur iis uolūtas propria, & quidem ita propria, ut cum Dei voluntate pugnaret. Et erit quisquam, qui neget liberum uoluntatis arbitrium, quod Dei uerbū adeò luculenter ostendit?

### XVIII. TESTIMONIUM.

**Q**uid? illud quale est quod apud alium Evangelistam legis? Si quis uult uenire post me, abneget semetipsum, & tollat crucem suam, & sequatur me. & alibi filiis Zebedæi loquens: Quid uultis, inquit, ut faciam uobis? Si isti uoluntatem liberam non habebant, frustra, ne dicam nugatoriè, Christus interrogat: Quid uultis? Sed quoniam iuxta uestram opinionem atque sententiā, Dei opus erat illorum & uelle & facere, ad hunc modū potius interrogandi erant: Quid uult Deus ut faciam uobis? Ex iis enim qui nihil uelle possunt, quærere quid uelint, stultum est. Quapropter cum ipsis tuis famulis loqueris, alio genere sermonis utendum est: Neque enim ab iis unquam quærendum est quid uelint, sed iuxta uestrū dogma potius

*Marc. 8.*

*Marc. 10.*

isto modo: Quid uult Deus ut faciam uobis? Quòd si absurdū tibi uidetur hoc orationis genus, à te peto ut opinio quoque, ex qua talis oratio tanquam ex fonte manat, ac profluit, absurda uideatur.

## XIX. TESTIMONIUM.

**A** Pud Lucam quoque euangelistā Christi non semel, sed sæpius cum discipulis, tanquā cum iis, qui liberā uoluntatē haberent, loquitur; ut cū dicit: Nolite timere pusillus grex. Nolite portare sacculū, neque peram. & illud tā sæpe repetitū: Nolite solliciti esse. & quæ sequuntur. Certè si discipuli uoluntatis arbitriū non habebant, aliter dicendū erāt, hoc modo: Velit Deus ne timeatis, ne portetis hæc aut illa, ne trāscatis de domo in domum; uos enim nullam habetis uoluntatem. Sed ne Græculus quispiā nos suggellādos putet, quod Græcè scriptum sit: *μη φοβῶν τὸ μικρὸν ποίμνιον, μὴ βασιζετε βαλάντιον, μὴ ἦραν μήδε ὑποδύματα, μὴ μερμνᾶτε τῇ ψυχῇ ἡμῶν, καὶ τὰ ἐξῆς.* Quid ad illud dices, quod cuidam cæco à Domino dictum est: Quid uis ut faciam tibi? Certè secundum uos dicendum erat: Quid uult Deus ut faciam tibi? Vides igitur opinionem

Luc. 11.

Luc. 10.

Luc. 19.

ionem uestram à Dei uerbo plurimum  
 iustificare, quam si Deus probet, non solum  
 uerbum, sed etiam loquendi ordinē  
 et uerborum mutationem mutari necesse est. Et pu-  
 teretur quispiam Deum ita tam sæpe locutu-  
 rum fuisse, si liberum uoluntatis arbitrium  
 homines non haberent? Quid autem sibi  
 uult hæc nostra quotidiana ad Deum ora-  
 tio: Fiat uoluntas tua, sicut in cælo & in ter-  
 ra? Si nulla est hominis in terrâ constituti  
 uoluntas, quæ cum Dei uoluntate pugnat,  
 aliq̃ue contraria est, cur eum rogamus, ut  
 quemadmodum eius uoluntas fit in cælo,  
 ita etiam fiat in terra?

## XX. TESTIMONIUM.

**Q**uid? nonne in Ioannis euangelio scri- *Ioan. 6.*  
 ptum est, quosdam ex Christi discipulis  
 cum magistri sermonem, quo illis carnē suā  
 pro cibum, sanguinē in potum pollicebatur,  
 non crediderunt, ipsum reliquisse? O fati-  
 dum incredibilem, quæ nolētes discipulos  
 præceptoris abstraxit! Quid autē ad  
 ceteros Christus? Nunquid & uos, ait, uul-  
 tis abire? Certè quibus id dicitur, nō est du-  
 bium, quin ij quoque quemadmodum alij  
 fecerant magistrum deferere poterant, libe-

ro utique uoluntatis arbitrio . Illud quoque quale est , quod Apostolo Petro , cū pedes Christus ablucere uellet , ille nolebat ? ut intel ligas hominis uoluntatem diuinæ plerūque esse contrariam . Infinita sunt in Euangeliiis huiuscemodi testimonia , hæc tamen pauca sufficient . Nunc ad alios quoque noui testa- menti libros festinat oratio .

## XXI. TESTIMONIVM.

*Act. 5.  
Ananias .*

**I**N actis Apostolorum cū Ananias agrū vendidisset , partemq. pretii quod totum Deo uouerat , sibi reseruasset , ab Apostolo Petro audiuit : Nonne manēs tibi manebat , & uenundatum in tua erat potestate ? Certè hic liberū uoluntatis declaratur arbitrium . Quid enim aliud est , in tua erat potestate , nisi quòd ante uotum illud Ecclesiæ uel dare , uel non dare poterat , post uotum autem absque peccato sibi reseruare non poterat ? Quantum autem ea fraus , imò sacrilegium displiceret Deo , rei declarauit euentus . Is siquidem ob unum illud crimen subita morte percussus , exemplo cæteris fuit , ne rem Deo cōsecratam , ad proprios imò profanos usus impunè quisquam à se transferri posse confideret . Quòd si ille sacrilegium istud fa-  
ti ne-

necessitate compulsus, non sponte commi-  
 t, nimium crudelis est Deus. Atque utinā  
 omnes qui Ecclesiæ bona administrant, quā-  
 uic Ananiæ contigit, memoria tenerent.  
 lius erat pecunia prius quā Deo uouit;  
 ōst autem quā Deo uouerat, partem sibi  
 inus plena fides retinens, diuina statim ul-  
 one punita est. Quæ igitur cruces? quæ  
pplicia istos manent, qui quod olim Eccle-  
æ aliorum deuotio cōsecrauit, id impiis ac  
sacrilegis manibus rapiunt, nefarioque scele-  
re Deo dedicata compilant? Qui, siquid iis  
 entis reliquum esset, certē uel hoc deterre-  
 ntur exemplo. Vnde Athanasius: Scire  
 ebemus, inquit, & nequaquam ignorare  
 æcūque promittimus Deo, nō ea deinde  
 ostra esse, sed Dei. & si inde quid defrauda-  
 us, ea nō nos sumere iam tanquam nostra,  
 d ut Dei, sacrilegio cōpilare. Hæc à nobis  
 oiter eò dicta sunt, quòd improba nostri se-  
 ali impietas & audacia tam facilè bona Ec-  
 clesiæ rapiens, sacrilegium pro ludo habere  
 deatur. Sed ad rem redeamus. Beatus Ste-  
 nanus Iudeos obiurgās, ac dicens; Vos sem-  
 er Spiritui sancto restitistis, quemadmodū  
 patres uestri; nonne perspicu è ostēdit eo-  
 bere proprium uoluntatis arbitrium, diui-  
 e uoluntati contrarium? Certē talis uolun-

*Lib. de  
 cruce Do-  
 mini.*

Act. 9.

tas à Deo ut illi resistat, neque cogitur, neq;  
impellitur. Quid Saulus cum diceret: Do-  
mine quid me uis facere? nōne declarat ubi  
intellexerit, quid Dominus iubeat, se ali-  
quid posse? Nam qui nihil potest, frustra  
quærit quid eum facere uelis.

## XXII. TESTIMONIUM.

**V**Eniamus ad epistolas Pauli, quas nobis  
soletis opponere, & ex quibus nostram  
de uoluntatis libertate sententiam à uobis  
euerfam esse gloriâmini. Sed tātum id abest  
à uero, ut nostram hanc sententiam atq. do-  
ctrinam nemo clarius probet atque confir-  
met, quàm epistolæ Pauli, in quibus pro libe-  
rō arbitrio tam multa ponuntur, ut nobis  
etiam si nihil esset præterea, quod causam no-  
stram adiuuaret, huius unius sufficere posset  
auctoritas. Multa prætereo ut ad illum locū  
ueniā, in quo de iis, qui filias suas uirgines,  
uel Christi flammeo consecrare, uel grauem  
i. Cor. 7. nuptiarum sarcinam suscipere uolunt, disse-  
fit. Si quis, ait, turpem se uideri existimat su-  
per uirgine sua, quod sit superadulta, & ita  
oportet fieri, quod uult faciat, non peccat, si  
nubat. Nam qui statuit in corde suo firmus,  
non habens necessitatem, potestatem autem  
habens uoluntatis suæ, & hoc iudicauit in  
corde



orde suo seruare uirginem suam, benefacit, igitur & qui iungit uirginem suam matrimonio, benefacit, & qui non iungit, melius facit. Memorabilis planè sententia, qua duos ministrorum uestrorum errores Paulus euer- tit; unum quo liberum uoluntatis arbitrium tollere; alterum, quo uirginitati nuptias quare contendunt. Primus apertè damna- tur, cum Apostolus dicit uirginis patrem ha- bere uoluntatis suæ potestatem, eumq. uirgi- nem suam non necessitate, sed spontè serua- re. Quid ad confirmandam nostram de uolun- tatis libertate sententiam clarius dici potest? potestatem inquit habens uoluntatis suæ. Sed dic mihi Apostole, ad quid ualet ista uo- luntatis potestas? Num solum ad peccandū, quemadmodū isti noui Euangelistæ Calui- us ac Beza contendunt? Tu qui raptus in tertium cælum, Dei arcana didicisti, melius uiam istam nescio qui, mysterium istud expo- nes. melius quàm tu ipse mi frater, salua pa- tua dixerim, cui nondū tanta mysteria re- elata sunt. Ad quid igitur ualet ista potestas uoluntatis? Ad bonum. Nam qui non iungit uirginem suam matrimonio, bene facit, & uidē melius, quàm ille, qui iungit. Ais igitur nos habere nostrę uoluntatis potestatem bona opera, quod frater meus negat. O quantum

quantum ab Apostoli fide fides uestra diffen-  
tit: Dicis enim frater ecclesiam nostram cō-  
tra Dei uerbum asseuerare, nos opera bona  
facere posse, & tamen Apostolus ipse, per  
quem Deus loquebatur, uas electionis, ut  
nomē Dei toto terrarum orbe portaret, idē  
tot ab hinc sæculis dixit, & quidem ita per-  
spicuē, uerbisq. adeò claris, & apertis, ut ea  
in aliū sensum, nisi planē uiolata, detorqueri  
nullo modo possint. Habet, inquit, potesta-  
tem uoluntatis suæ. Si Apostolus Paulus eā-  
dem uobiscum haberet fidem, diceret: Non  
habens potestatem uoluntatis suæ. Nunc au-  
tem contrā, quod uos negatis, ille cōfirmat,  
Quare mi frater à te peto, ne molestè feras,  
quòd tanti Apostoli auctoritati, Ecclesiæq.  
catholicæ, quæ illius fidem sequitur, malo  
credere, quàm aut tibi, aut Geneuēsi factio-  
ni, quæ contra illius uerbum atque senten-  
tiam docet. Quæso te ut epistolas Pauli ab  
Ecclesia non indiligenter lectas fuisse arbi-  
traris: cuius ea est antiquitas, ut abs te tam  
iuuene, neque doceri, neque corrigi debeat.  
Multo sanè prudentius, si ab ea ueritatē di-  
sceres, eamque sequereris, quam Dei sapiē-  
tia refertam esse non dubium est. Quanta  
igitur est uestra temeritas, quanta animi le-  
uitas, eam ita improuidē damnare, quasi cō-  
tra

a Dei uerbum doceat hominem suæ uolū-  
 tis ad bona opera præstanda potestatem ha-  
 ere, cū hanc doctrinam, quæ ipsissimum  
 Dei uerbum est, ab Apostolo Paulo sibi tra-  
 itam acceperit? Sed de his satis.

Veniamus ad alterum uestrorū ministro-  
 um, imò impostorum errorem, quē una ea-  
 emq. sententia Paulus euertit. apertissimè  
 nim dicit: Qui uirginem suam matrimonio  
 non copulat, melius facit. Qua igitur fronte  
 egant isti uirginitatem nuptiis anteponen-  
 am? Idem Apostolus cū antè dixisset, De  
 uirginibus præceptum Domini non habeo,  
 s tamen ut ita maneant, consulit, uestri ue-  
 ò ministri contra uirginibus, quę pudicitiam  
 am Domino consecrarunt, ut nubant per-  
 uadere conantur. Cū igitur aliud Aposto-  
 us, aliud isti suadeant, non est dubiū, quin  
 diuerso spiritu tam contraria consilia pro-  
 ciscantur. Apostolum autem cū continen-  
 am ac pudicitiam uirginibus suaderet, Spi-  
 tum sanctum habuisse, non dubium est.  
 uestros ergo ministros qui contrarium sua-  
 ent, à malo spiritu impelli necesse est. Sed  
 ene habet, quòd cur isti tam impudenter  
 apostolo contradicant, non est obscurum.  
 loc namq. prætextu incesti matrimonii sui,  
 quod post continentię professionem cū iis  
 uirgi-

1. Cor. 7.

uirginibus contraxerunt, quæ uoto se æternæ pudicitiae dedicarant, adumbrare conantur infamiam, eorumque singulis conuenit ille uersiculus:

4. *Aenei.*

*Coniugium uocat, hoc prætexit nomine culpam.*

A tē tamen peto mi frater, ut Apostoli uerba diligēter expendas, idq. agas, ne affectus, quo erga ministros abreptus es, plus apud te, quam veritatis ac uerbi Dei, quod ille nobis scriptum reliquit, amor ualeat. Sed ad propositum reuertētes, hæc missa faciamus; quæ tamen ea re obiter commemoranda cēsuimus, ut intelligeres, quod genus hominū te matri Ecclesiæ, quæ te Christo genuerat, renunciare persuaferit, ut illorum sequeris errores.

### XXIII. TESTIMONIUM.

**E**X eodem Apostoli purissimo fonte alia quoque ad liberi arbitrii confirmationē testimonia hauriamus; ut animi tui incredulitatem frontemq. durissimam eorum multitudo salutari pudore cōfundat. Idem igitur

2. *Cor.* 3.

Apostolus in eadem epistola, Vnusquisque, ait, propriam mercedem accipiet secundum proprium laborem. Dei enim adiutores sumus. Non est adiutor, qui nihil facit. Secundum

liberum negamus arbitrium, neque cū  
 elagianis tantas illius vires, tantamq. potē  
 am prædicamus, ut Dei gratiam homini ad  
 ne agendum necessariam denegemus, sed  
 ter Scyllam & Charybdim medium cur-  
 am tenentes, hinc atque illinc minātes sco-  
 los declinamus, liberumque voluntatis ar-  
 trum ita defendimus, ut id propter pri-  
 um illud Adæ peccatum adeò imbecillum  
 debilitatum esse dicamus, ut ad cupidita-  
 suas coërcendas, Dei que præcepta ser-  
 anda, illius auxilio semper indigeat. Hæc  
 igitur nostra de libero arbitrio fides est: Cū  
 uugustino cæterisque Ecclesiæ magistris,  
 er originale peccatum negamus nos liberū  
 voluntatis arbitrium perdidisse; sed tamen  
 a infirmum ac vulneratum esse cōfitemur,  
 t eius infirmitas nisi Christi beneficio, qđ  
 edentibus illiusque sacramenta ritē susci-  
 ientibus communicat, curari recreari que  
 on possit.

Sed quoniam uestri concionatores beatū  
 uugustinum secum facere gloriantur, quā  
 d falsum sit, ex ipsius uerbis, quæ hic pone-  
 nus, intelliges. Esse autem liberum arbitriū *Lib. 1. con*  
 nquit, atque inde peccare quenquā si uelit, *tra Faustū*  
 on peccare si nolit; nō solum in diuinis scri *Manichæ*  
 turis, quas nō intelligitis, sed etiā in uerbis *um, cap. 4.*

B ipsius

quid clarius in hanc sententiam dici potest? Quæ sit igitur Augustini de liber. arb. fides, perspicuum est.

Cùm igitur summus ille uir hoc ita liberè  
lareq. pronūciat, negetq. catholicum esse,  
ui liberum negat arbitrium, uide quæso an  
quum sit me de uoluntatis, quæ in me est,  
bertate dubitare. illud certè permolestè fe  
o, totoq. arbitror lacrymarum fonte plan  
endum, te mi frater non esse catholicum :  
i beati Augustini in hac causa iudicium se  
ueris, causa te cadere necesse est. quid ille  
ronunciauerit, iam audisti, nimirum te qui  
berum negas arbitrium, non esse catholi  
um. Quid igitur? hoc tibi cogitandum re  
nquo. Neque uerò nescio quasdam Augu  
ini sententias, ut is secum facere uideretur,  
à uestro Caluino hinc inde fuisse colle  
ctas. Sed qua fide? Nimirū hæretica. O por  
tentum in solas terras deportandū! Minimè  
men mirandū est, si hoc in Augustino præ  
eps molitur audacia, quæ diuinæ scripturæ  
sententiam toties antè uiolauit. Quod enim  
i scriptum erat, ut & humanæ uoluntatis  
firmitas, & auxiliij gratiæ Dei necessitas in  
telligeretur, id ad euertendam arbitrij liber  
tem iste producit, cuius è libris, tanquam  
x corruptissimis fontibus, quicquid in lite

ris tuis cōtra arbitrii libertatem & bona opera uomuisti, te hauisse non dubito. Sed ubi scripturæ testimonia quę ad fidei nostrę cōfirmationem in medium proferemus, legeris, eaq. omnia, quę nostrę sententię opponis, refutauerimus, tum demum illius impostoris uestri fraudes atque perfidiam te perspecturum esse confido. Illud certè mihi usu uenit, ut cū diuinos libros lego, in iisq. tot apertissima testimonia quę liberum uoluntatis arbitriū luculenter ostendunt, deprehendo, uehementer sanè demirer, cuiquā sanę mentis homini, qui ea legerit, in mentem uenisse, ut id neget, quod tam perspicuè diuina ostendit auctoritas. Quorum tātus est numerus, ut nullus diuinę scripturę liber adeò sit breuis & exiguus, ex quo non aliquod siue testimoniū, siue ratio, siue exemplum ad liberę uoluntatis arbitrium comprobandū, elici possit. Quę si omnia recēfere uellemus, dies nos citius quàm oratio deficeret. Nos ut breuitati cōsulamur, ex immēso illo aceruo pauca seligentes, ordine recensebimus.

### PRIMUM TESTIMONIUM.

*Genes. 4.* **I**N Genesi Deus ad Cain loquens, liberū in homine perspicuè ostendit arbitriū, dicens:



tens: Nonne si bene egeris, recipies? sin autē malè, statim in foribus peccatū tuum aderit? Sed sub te erit appetitus tuus, & tu dominaberis illius. Quid clarius dici potuit? Vides hic Deū de bonis operibus & eorū remuneratione loquentē, homini suū appetitū subire? Quām rectè Dei uerbis tuisq̃. conueniat, attende. Tu hominem seruum uocas, Deus dominum. tu negas illum suo appetiui posse dominari: Deus contrā ait. Et tamen quę tua est uerecundia, opinionem tuā Dei uerbum esse, Ecclesię uerò sententiā cū Dei uerbo pugnare dicis, cū hoc clarissimo Dei uerbo euidētissimè tua reuincatur audacia. Quod si obscurū esset, tergiuersandi locus forsitan non deesset. Nunc uerò adeò clarū est atque perspicuum, ut nullius calliditate ut ingenio in alium sensum, quām hunc, quem modò posuimus, detorqueri possit. Qui cū sit uerus, ac simplex literæ sensus, quem dum de fidei dogmatibus agitur, solum sequi necesse est, quæ tua est impudentia, tam manifestè luci repugnare.

## SECUNDVM TESTIMONIUM.

**A**lterum testimonium de Exodi libro *Exod. 35.*  
sumptum est: Omnes uiri & mulieres,

ait scriptura, mente deuota obtulerunt donaria, ut fieret opera, quæ iusserat Dominus per manum Moyſi. & paulò poſt: Cuncti filii Iſraël uoluntariè Domino dedicauerunt. Cæterum paulò ſuperiùs dictum erat: Separate apud uos primitias Domino. Omnis uoluntarius & prompto animo offerat eas Domino. Et ne plura replicando, lectori fastidium pariam, totum hoc caput, filios Iſraël munera ad opus tabernaculi neceſſaria ſponte obtuliſſe, luculenter oſtendit. Vbi uerò libertas arbitrii prædicatur, fati neceſſitas tollit.

### TERTIVM TESTIMONIVM.

Num. 15.

**A**D numerorum librum uenio; in quo Moſes, Domino iubente, præcipit filiis Iſraël, dicens: Cùm ingreſſi fueritis terram habitationis ueſtræ, & feceritis oblationem Domino in holocauſtum & uiſtimam pacificam, uota ſoluentes, aut ſponte offerentes munera, &c. Vides hic perſpicuè, uoluntatis adſtrui libertatem? Neque enim ab eo qui liberum uoluntatis arbitrium non habet, quicquã ſponte offerri Deo poteſt. nam ſponte quicquam facere fati neceſſitatē excludit & tollit. Quid in eodem capite? Nonne cùm de iis qui per ignorantiam peccauerunt, ſcriptura

ctura ageret, uoluntatis libertatē ostendit?  
 Rogabit sacerdos, inquit, pro omni multi-  
 tudine filiorū Israhēl, & dimittetur eis, quo-  
 niam non sponte peccauerunt. Cū autem  
 sponte peccetur, libera peccantis uoluntas  
 trimini obnoxia iudicatur, quemadmodum  
 paulò post scriptura commemorat, dicens:  
 Anima uerò quæ per superbiam aliquid cō-  
 niserit, quoniam aduersus Dominum rebel-  
 lis fuit, peribit de populo suo. Quis ergo nō  
 uideat, aliud peccatū per ignorantia, aliud  
 sponte committi, quod tam graue scriptura  
 pronunciat, ut rebellis in Deum uoluntas  
 morte damnetur? Quid autem aliud est re-  
 bellem in Deum esse, nisi hominis uolunta-  
 tem in Deum armare, idq. uelle quod Deus  
 uolit? Sed contra nouos Stoicos illud quoq;  
 animaduertendum est, paria non esse pecca-  
 ta; quod certè locum non haberet, si homi-  
 nes necessitate, non uoluntate peccarent.  
 Quid aliquantò inferiūs? Nonne de libera  
 uoluntate clarissimè differitur, ipso quoque  
 arbitrii uocabulo posito, cū ita dictū est?  
 Si uxor iuramento se constrinxerit, ut perie  
 unium uel cæterarum rerum abstinentiam  
 affligat animam suam, in arbitrio uiri erit ut  
 faciat, uel non faciat. Ita liberæ uoluntatis  
 perspicuè confirmat arbitriū Moses, cui po-

Num. 30.

*Luc. 16.*

tius, quàm Caluino, fides habenda est; nisi fortè falsam Abrahamæ putamus esse sententiam: Si Moysen non audiunt, neque si quis ex mortuis resurrexerit, credent. Tria autè ex hoc loco colligimus: Primum quædam non necessitate, sed sponte Deo offerri.

*Homil. 2.  
in Genes.*

Alterum hinc per ignorantiam, inde sponte peccari. Tertium in mariti arbitrio esse, ut uxor, quod facere constituit, aut faciat, aut non faciat. Scitum est illud Chrysostomi in hâc de peccatorum inæqualitate sententiâ:

*Stoici.*

Si non est facultatis nostræ, bonum aut malum eligere, omnes eiusdem naturæ participes malos esse oporteret, aut omnes bonos. Vnde etiam Stoici, qui primi fato omnia fieri asseuerantes, liberæ uoluntatis arbitrium negauerunt, omnia peccata paria, omnes uirtutes æquales esse dixerunt. Sed horum infania exhibitata, ad alia scripturæ diuinæ testimonia ueniamus, ut tuum errorem agnoscas, quantisq. in ignorantie tenebris uerferis, intelligas, dum Romanam Ecclesiam contra uerbi diuini auctoritatem, liberum arbitriū defendere autumas.

#### Q V A R T V M T E S T I M O N I V M .

*Leuit. 22.*

**I**N Leuitico scriptum est: Homo qui obtulerit uictimam pacificorum Domino, uel  
uota

uota soluens, uel sponte offerens. & paulò post: Bouem, & ouem, aure & cauda amputatis, uoluntariè offerre potes. uotum autem ex eis solui non potest. Certè quod uoluntariè offertur, liberum hominis ostendit arbitrium.

## QVINTVM TESTIMONIVM.

**Q**uid in Deuteronomio? Nonne cùm de *Deut. 10.* huiusmodi uoluntariis oblationibus Moses ageret, etiam de quodam sacrificii genere loquitur, quod Hebraicè dictū est *missah*, unde etiā quotidianæ oblationis nostræ quam missam uocamus, sumptum est nomen? Sed ipsa uerba ponenda sunt, quæ si quis Hebraicè legerit, ipsum missæ nomen inueniet. Et facies, inquit, solemnitatē hebdomadarum Domino Deo tuo, oblationem spontaneam manus tuæ. Et alibi: *Deut. 30.* Testes inuoco hodie cælum & terram, quòd proposuerim uobis uitam, & bonum, maledictionem & benedictionem. Elige ergo uitam, ut tu uiuas, & semen tuum. Quid pro arbitrii libertate, quam Græci *ἐξουσία* significantius dicunt, clarius adferri potest? Certè ubi electio est, ibi unum assumendi, alterū relinquendi potestas necessariò intelligenda est.

S E.

## SEXTVM TESTIMONIVM.

**V**Eniamus ad Iosue uerum Moyſi diſcipulum, qui magiſtri ſecutus exemplū, his uerbis Iſraēliticum populum admonebat: Nunc ergo timete Dominum, & ſeruite ei perfectō corde atque ueriſſimo, & auferre deos quibus ſeruierunt patres ueſtri in Meſopotamia, & in Aegypto, ac ſeruite Domino. Sin autem malū uobis uidetur, ut Domino ſeruiatis, optio uobis datur, eligite hodie quod placet cui ſeruire potiſſimū debeatis, utrum diis quibus ſeruierunt patres ueſtri in Meſopotamia, an diis Amorrhæorum, in quorum terra habitatis: ego autem & domus mea ſeruiemus Domino. En qualem arbitrii libertatem ſummus ille uir Iudæos habere credebat. Quos ſi putaffet eligere non poſſe, ut aut Deum, aut idola colerent, nūquam illis hanc optionem daret. In eodem quoque capite: Inclinate corda ueſtra, inquit, ad Dominum Deum Iſraēl. Cor autem in ſcripturis pro uoluntate ſumi, tibi obſcurum eſſe nō arbitror, quemadmodum Chriſtus ipſe ſumebat, cū in Euangelio diceret, de corde tanq̃ ex fonte exire peccata. Certē qui aliquē ut uoluntatē ſuā inclinēt hortatur, eū uoluntatē habere nō dubitat.

SEPTI-

## SEPTIMUM TESTIMONIUM.

**T**Ranfeamus ad libros Regum, in quibus Domino iubente per prophetam regi David post populi numerationem dictum est: 2. Reg. 24  
 Trium tibi datur optio, elige unum ex his, quod uolueris. Qui cum iram Dei peccata punientis se effugere non posse sentiret, in manus Domini, cuius multe sunt misericordiae, quam in manus hominum, incidere maluit. Quis non uideat nugatorium esse, cui eligendi potestas non sit, è tribus unum eligendi ei optionem dare? Qui autem è tribus unum eligit, uoluntatis libertatem perspicuè ostendit.

## OCTAVUM TESTIMONIUM.

**Q**uid? nonne eius filio Salomoni ab ipso Deo dictum est: Postula quod uis? Certè cui Deus ita loquitur, cum liberæ uoluntatis arbitrio præditum esse demonstrat. 3. Reg. 3.  
 Et erit quisquam adeò perfictæ frontis, ut nos contra Dei uerbum uoluntatis libertatē defendere mentiatur?

NO.



## NONVM TESTIMONIVM.

**I**llud autem quale est, quod in quarto Regum libro legimus: Omnem pecuniam sanctorum, quæ illata fuerit in templum Domini à prætereuntibus, quæ offertur pro pretio animæ, & quam sponte & ex arbitrio cordis sui inferunt in templum Domini, accipiant illam sacerdotes iuxta ordinem suum. Eant nunc isti noui Stoici & uoluntatis arbitrium negēt, quod scripturæ sacræ tam perspicuè demonstrat auctoritas.

## X. TESTIMONIVM.

*1. Par. 29* **N**ec minus clarè & apertè propheta Dauid illud ostendit, dicens: Si quis sponte impleat manum suam hodie, & offerat quod uoluerit. Librum Iudicum penè præterierā, in quo Debbora prophetis liberum uoluntatis arbitrium ostendit his uerbis: Cor meū diligit principes Israël, qui propria uoluntate obtulistis uos discrimini. Qui alterius dominio subiectam habet uoluntatem, is propria uoluntate nihil potest. Prophetissa igitur, quæ hominibus propriam uoluntatē adscribit, nobiscum in Ecclesiæ castris militat.

## XI. TESTIMONIUM.

**V**Eniamus ad Psalmorū librum, de quo duo testimoniorum genera producemus; alterum ex iis locis, in quibus aliquid sponte fieri luculenter ostenditur, ut cū dicitur: Voluntariē sacrificabo tibi. & alibi: *Psal. 53.* Voluntaria oris mei beneplacita fac Domine. item: Anima mea in manibus meis semper. & illud: Inclina cor meum ad facien- *Psal. 118.* das iustificationes tuas propter retributionem. Cor est ipsa uoluntas, quæ Dei mandata custodiens, ab ipso remunerationem expectat. Voluntatem igitur liberam vnā cum operum meritis Propheta hoc loco luculenter ostendit.

Alterum testimonii genus ex eo ducitur, quòd idem propheta Deum adiutorem suū appellat: Adiutor meus, inquit, esto, ne derelinquas me: & alibi: Deus in adiutorium meum intēde. Qui solus omnia facit, is adiutor dici non potest. Cum igitur Propheta Deum adiutorem suum dicit, se quoque aliquid facere, non à Deo tantum omnia fieri ostendit. Quapropter à Deo non petit, ut ipse solus totum opus faciat, sed ut sibi opem ferat. Porrò si quemadmodum dicitis, Deus in nobis omnia faceret, nos uerò nihil;  
David

ab initio constituit hominem rectum, & reliquit ipsum in manu consilii sui, adiecit mandata & præcepta sua. si uolueris mandata seruare, conseruabunt te, & in perpetuum fidē placitam seruare. Apposuit tibi aquam & ignem, ad quod uolueris porrige manū tuā. Ante hominem uita & mors, bonum & malum; quod placuerit ei, dabitur illi. Nihil ad demonstrādum in nobis liberum arbitrium clarius & apertius dici potest. Quis autem uestrum morem ignoret? Cū in aliquem scripturæ locum opinioni suæ reluctātem adeò clarum & euidētem, ut neque uiolari, neque mutari, neque in alium sensum detorqueri possit, magistri uestri incidunt; tum uerò ad hæreticorum commune præsidium repentē concurrunt, & ne ea per quæ reuincuntur cogātur agnoscere, totum eum librū è quo aduersus eos aliquid producit, ex albo & canone scripturarum eradunt. Illud tamen in præsentia satis est, hunc Ecclesiastici librum à mille annis ante ministrorum uestrorum aduentum à tota ecclesia Christiana fuisse susceptū. Vnde autem istis hæc censoria uirgula? Vnde hæc auctoritas, imò impudens audacia, ut quos libros opinioni suæ contrarios uiderint, eos è scripturarum canone tanquam è senatu moueant? Cur eodē modo

dum hanc igitur Apostoli sententiam, nos aliquid possumus. nam qui nihil potest, neque auxiliū ferre, neque adiutor dici potest. Et quoniā idem Apostolus alibi negat nos absque Dei auxilio aliquid posse, nō est dubium, quin mutua ope & Deus gratia sua nos adiuuet, & vicissim cooperemur. Vt enim cū is dicit nos sine Dei auxilio nihil posse, uerū dicit: ita cū ait, nos esse adiutores Dei æquē uerū dixisse credendus est.

igitur utrumque uno eodemq. spiritu cixerit, ei utrobiq. fidem haberi necesse est.

### XXIIII. TESTIMONIVM.

**Q** Vid in secunda ad Corinthios epistola, 2. Cor. 9.  
nonne pro uoluntatis libertate clarissimè differit, dicens: Vnusquisq. prout destinavit in corde suo, nō ex tristitia, aut necessitate. Hilarem enim datorem diligit Deus. Laudat hic benignitatem & eleemosynam, quæ in pauperes non cōactè sed sponte delata, Dei iudicio comprobatur.

### XXV. TESTIMONIVM.

**A** Libi quoq. cū de Euangelij prædicatione ageret: Si uolēs, inquit, hoc ago, 1. Cor. 9.  
D merce-

mercedem habeo; si autem inuitus, dispensatio mihi credita est. hic quoque libertatem uoluntatis ostendit, cuius sponte Euangelium Christi prædicantis magna sunt præmia.

## XXVI. TESTIMONIVM.

**A**D Philemonem: Sine consilio, inquit, tuo nihil uolui facere, uti ne uelut ex necessitate bonum tuum esset. De Onesimo loquitur, quem cum Apostolus in uinculis constitutus retinere uellet, ut illius ministerio, operaque uteretur, id tamen nisi cõsentiente Domino noluit, ut is dum fugitium seruum Apostolo sponte concedit, benignitatis à Deo præmium reportaret.

## XXVII. TESTIMONIVM.

*Heb. 10.* **I**llud quoque quod Hebræis de peccato voluntariè admissio scriptum est, quid de libero arbitrio sentiret Apostolus. luculenter ostendit: Voluntariè, ait, peccantibus nobis, iam non relinquitur hostia pro peccatis. Ex quo intelligi potest, peccata non necessitate sed uoluntate committi.

## XXVIII. TESTIMONIUM.

**Q**uid Petrus, Apostolorum coryphæus, *1. Pet. 5*  
 pastorq. ouium Christi, & Romanæ  
 fundator Ecclesiæ? Nōne cæteris pastoribus  
 ita loquitur? Pascite qui in uobis est gregem  
 Dei, prouidentes non coactè, sed spōtaneè,  
 neq; turpis lucri gratia, sed volūtariè. Quid  
 sibi uolunt hæc uerba, spontaneè, uolunta-  
 riè, non coactè? Nisi ut planū fiat, oues Chri-  
 sti habere liberū uoluntatis arbitriū, nec bo-  
 na opera fatali necessitate extorqueri, sed  
 sponte præstari. Nostra igitur Ecclesia Petri *Luc. 22.*  
 fidem, pro cuius conseruatione ante passio-  
 nem suam Christus orauit, adhuc sequitur.

## XXIX. TESTIMONIUM.

**B**eatus quoque Iacobus nobiscum facit, *Iac. 4.*  
 dicens: Quicumque uoluerit esse ami-  
 cus huius sæculi, inimicus Dei constituitur.  
 Qui ita loquitur, satis euidēter ostendit, ho-  
 mines de quibus loquitur, libero uoluntatis  
 arbitrio sæculū istud & amare, & non amare  
 posse. *8. No. 4*

## XXX. TESTIMONIUM.

**Q**uid in Ioannis Apocalypsi? Nonne de  
 quadam Iezabel, quæ se prophetā tra-

Apoc. 2. **A**peri uolens, Dei seruos circumueniebat,  
 Dominus loquitur, dicens: Dedi illi tem-  
 pus ut pœnitentiam ageret, & non uult pœ-  
 nitere à fornicatione sua? Ita si Domino cre-  
 dimus, intelligimus illi nullam aliam fuisse  
 non pœnitendi causam, nisi quia nolebat.  
 Dedi illi tempus, inquit, ut pœnitentiam  
 ageret, & non uult pœnitere. Cur autem  
 Domine illi tempus ad agendam pœniten-  
 tiam tribuis, cùm Calvinus dicat eam ne-  
 que pœnitentiam agere, neque ullum bo-  
 num opus facere posse? Cùm igitur tu, &  
 Calvinus pugnantia loquamini, certè alte-  
 rum ex uobis stultè loqui necesse est.

### XXXI. TESTIMONIUM.

**S**ed ut huic loco finem imponam, in ex-  
 tremo unicam Pauli sententiā proferā,  
 qua sic nobis uoluntatis nostræ potestatem  
 adscribit, ut affirmare non dubitet, non so-  
 lùm uelle, sed etiam facere ex nobis, & nō  
 tantū ex Deo esse. Et consilium, inquit, vo-  
 bis do, hoc enim uobis est utile, quia nō so-  
 lùm facere, sed etiā uelle cœpistis ab anno  
 priore. Nunc uerò & facto perficite, ut quē-  
 admodum promptus est animus uoluntatis,  
 ita sit & perficiendi ex eo quod habetis. Si  
 enim



enim uolūtas prompta est, secundū id quod  
habet accepta est. Ex his Apostoli uerbis fa-  
cilè intelligi potest, aliquid à nobis quoque  
fieri, nosq. habere potestatem & faciendi &  
uolendi. Neque uerò hæc dicentes, Pela-  
gij sectamur insaniam, ut omnia uoluntatis  
humanæ uiribus tribuentes auxilium gratiæ  
Dei, sine qua uires nostræ illi gratum ali-  
quid & acceptum præstare non possunt, ui-  
deamur excludere. Sed quoniam Aposto-  
lus ait Corinthios non solū facere, sed  
etiā uelle cœpisse ab anno priore, fidenter  
tantam auctoritatem sequar, ac dicam nos  
& facere & uelle posse. Neque uerò ignoro  
nos hanc potestatē à nobis nō habere. quid  
enim habemus quod à Deo nō accepimus?  
Illud tantum dico, me hac à Deo accepta po-  
testate uti posse si uelim. Dicere siquidem  
me à Deo potestatem accepisse, & nihilo-  
minus efficere nihil posse, quid aliud est  
quàm secum pugnare, imò nihil dicere?  
Nam cū me ab ipso Deo bene agendi po-  
testatem accepisse confitear, & nihilomi-  
nus dicam me nihil adhuc neque facere ne-  
que uelle posse, nonne tantundem est,  
ac si dicerem me nullam adhuc ab eo po-  
testatem accepisse, aut certè hanc nihil  
energix habere? Longè igitur pruden-

tius mater ecclesia tradit illud in primis, nos à Deo uires accepisse, quibus ab eo sumptis bona opera facere, iisq. rectè uti possimus. Quod si non fecerimus, sed ut nequâ ille de  
*Matt. 25.* Euangelio seruus, qui talentum abscondit in terra, nobis tradita diuinitus potestate, gratiæque Dei munere rectè non utamur, nos iure meritoque puniri. Quod inferius in argumentis uestris refellendis planû faciemus pluribus uerbis. Interea à te peto, frater, ut quàm improvidè stulteque loquaris, aduertas. Cùm enim uires ad bene agendum, Dei beneficio nobis datas esse fatearis; ad extremû inferis, nos nihil posse. Ex quo sequitur nihil uirium nobis cõcessum esse diuinitus. Nos uerò apertè fatemur hominem antequam uires ad bene agendum de Dei munere sumperit, nihil posse; iis uerò diuinitus sumptis, nihil nobis impossibile esse, iuxta scripturæ sacræ auctoritatem atque sententiam dicimus. Et ne nobis domi natum hoc doctrinæ genus esse contenderes, 31. scripturæ loca, quæ nobiscum faciunt, ecclesiæq. nostræ de libero arbitrio fidem apertè confirmant, antè produxi. Quæ cùm ita sint, i nūc amabo te, & istis impostoribus, qui nostram de libero arbitrio fidem cum Dei uerbo pugnare contendunt, iterum crede. Non est fides

des nostra Dei uerbo contraria, ne iis quidem scripturæ locis quæ in tuis literis posita sunt: sed cum eo sensu & peruersa interpretatione, quam iis locis, tanquam caudâ turpissimam de tuo adiungis, meritò pugnat, neque conciliari potest. Antequam autem tibi respondeo, tres rationes firmissimas, & nō solum in scripturæ sacræ auctoritate, sed etiam æquitate fundatas, iis testimoniis quæ suprà exposuimus, tanquam austario adiacere constitui; ut ex his & nostræ fidei sanctitatem, & erroris uestri qui illi repugnat, estque contrarius, ridiculam absurditatem omnes intelligant. Deinde quatuor ecclesiæ magistrorum atque Doctorum, quorum auctoritatem in ea fidei confessione quam in concilio Possiaceri Regi obtulistis, à uobis recipi, & approbari testati estis, cum dicere-  
tis omnem errorem ab iis damnatum, à uobis quoque eadem ratione damnari, testimo-  
nia proferemus; ut cum hinc Dei uerbum, inde rationem totamq. antiquitatem nobiscum facere, in nostrisq. castris militare uideritis, tanto fulgore perstricti, ad matris uestre, quam stultissimè reliquistis, gremium reuertamini. Nam, ut ait Sapiens, qui fu- Pro. 19.  
git matrem, ignominiosus erit & infelix.

## PRIMA RATIO.

**S**I bene agendi potestatem nō habemus, omnia Dei uerba quibus bene agere monemur, aut etiam iubemur, uana, ociosa, inutilia, superflua sunt; & qui ea protulit, parū sapiens. Fingant aduersarij quicquid voluerint, & arte, lenocinioq. uerborum, adulterium ueritatis fucare, atque adumbrare contendant, numquam sani capitis homini persuadebunt, quin aut asino ut instar auium uolet, aut homini qui pedes non habet ut currat, aut ei cui lingua præcisa est, ut loquatur, præcipere, superuacuū sit. Quamobrem? Quia iis ea præcipiuntur, quæ præstari nullo modo possunt. Ita quicquid isti garriant, si nihil agere possum, si non habeo liberum uoluntatis arbitrium, frustra mihi Deus præcipit, ut aut aliquod bonum opus faciam, aut eius legem obseruem, cū hæc ab eo qui nihil boni agere potest, obseruari nullo modo possit.

## SECUNDA RATIO.

**D**Einde si homo non habet liberum uoluntatis arbitrium, omnia illius opera  
Deo

Deo prorsus adscribi necesse est. Nam si me frigentem ignis calefacit, non igni sed Deo gratias ago. Sumpto quoque à me pane, fameque depulsa, non ipsi pani, sed Deo qui pro me panem creavit, gratias ago. Si domus mea fortè incendio conflagrauit, calamitatem hanc meam non igni, sed Dei iudicio peccata mea punientis adscribo. Idem de iumentis, quorum opera quotidie utimur, habeo dicere. Quam ob rem? Quia cuncta ista quæ diximus, libero carent voluntatis arbitrio. De homine autem, si is libero caret arbitrio, nonne eodem modo iudicandum est? Nonne omnia illius facta & instituta Deo adscribenda sunt? Nonne siquid ab illo beneficii accipis, stultissimum est illi gratias agere? Quis cum qui asino suo gratias agat, non stultissimum iudicet? Prorsus ad eundem modum, siquid mali ille attulit, ei succensere iniquum uidetur. Deo enim adscribenda sunt omnia. Hæc ex illo uestro antecedente, quo liberum hominis arbitrium tollitis, sequi necesse est. Quod cum Philippus Melanchthon, dialecticæ non imperitus, qui in castris uestris aliquando militauerat, intelligeret, audacter sanè concludit, & perspicuè ostendit, quid ex hac opinione sequatur, nimirum illud adulterium Davidis,

In locis cōmunibus.

Anno Domini. 1521. excusis, et in cōmēta-riis. in 5. c. ad Ro.

uidis, & Iudæ proditionem, nihilo minus  
esse opera Dei, quàm Pauli conuersionem.  
Videbat enim si unum daret, alterum quo-  
que oportere concedi, si liberum arbitrium  
tolleret, omnia humana opera, non homi-  
num esse, sed Dei. Sed ista sententia adeò  
absurda est atque blasphemata, ut ipsius quo-  
que Manichæi uincat insaniam. Is enim cū  
liberum negasset uoluntatis arbitrium, il-  
ludque intelligeret esse consequens, ut om-  
nia nostra opera Deo attribueretur, ut illud  
uitaret incommodum, duo principia exco-  
gitauit, unum omnis boni, alterum omnis  
mali auctorem. Turpe enim esse iudicabat,  
bono Deo mala hominum opera adscribe-  
re. Sed Melanchthon aliquanto prudentius:  
qui cū temporis successu suum intellexis-  
set errorem, impiam hanc absurdamq. sen-  
tentiam in secunda Locorum communium,  
& Commentariorum suorum in Epistolam  
ad Rom. editione è suis libris funditus sustu-  
lit, Lutherique opinione reiecta liberum ar-  
bitrium in homine esse confessus est, quod  
Dei gratia fretum & adiutum bona opera  
facere posset. Atque is ad eum modum ue-  
rum esse monstrauit tritum illud adagium,  
*ἀντίγραφοι πορτίδες σφώτεροι*. Illius uiri uti-  
nam sequereris exemplum, & cuius errorē  
probas

probas, eius imitarere prudentiam, qua tam absurdam impiamque sententiam correxit ac respuit. Id si facere nolueris, te omnia peccata tua Deo tamquam auctori adscribe re necesse est. Quo quid absurdius, quid magis impium cogitari potest? fingant sanè callidi homines quicquid uidebitur, ut fallente mendacio, & fucatæ orationis adulterio huius erroris celetur impietas. Certè si te à Deo tuo sine libero uoluntatis arbitrio conditum existimas, illum tuū Deum adeò malum humanisq̃ue rebus infestum haberi necesse est, ac si omnia adulteria, omnes cædes, omnia sacrilegia, rapinas omnes ac seditiones, denique omnia scelera, quæ uestræ factionis homines vnquam admiserūt, ille perpetrauisset.

### TERTIA RATIO.

**T**ertiò si hoc impium dogma suscipitur, omnium flagitiorum ac criminū generalem quandam excusationē admittere necesse est. Quæ enim meretrix, quæ adultera, quæ saga, quæ uenefica, flagitiis sceleribusq̃ suis patrocinium deesse arbitrabitur? quis latro, quis pyrata, prædo, sicarius se à facinoribus suis satis purgatum non esse existimabit,



bit, si planū fecerit se fatali necessitate compulsum, non proposito ac voluntate peccasse? Chrysippus Stoicæ antesignanus infaniæ, cū liberum hominis negaret arbitriū, omniaque humana opera fato adscriberet, illud esse consequens intellexit, ut scelera nullo animaduersionis genere, nulla poena uindicarentur. Itaque iudices qui prædones ac sicarios suppliciis coërcebant, reprehendebat: illosque, quod fato non uoluntate peccassent, misericordia potius prosequendos, quam puniendos esse dicebat. Quod eò retuli, ut ex his consequentiæ nostræ ueritas ac bonitas perspicui possit. Nam si opinioni uestræ locus est, sequitur, ut improbis nulla cuiuscunque criminis iusta defensio unquam deesse uideatur. Quid magistratus? Quid iudices? An cū in improbos grauius aliquid seueriusque constituunt, id si ne humana iniuria facere possunt? Imò uerò ne improbus quidē dicendus est quisquā. Nam si, nullus sponte atque ex proposito peccat, nullus improbus iure dici potest. Nullus autem sponte peccat, si ad peccandum fatali quadam necessitate impellitur, aliudque facere non potest. Sine iniuria igitur, neque in delinquentem seruulum animaduvertere dominus, neque peccantem filium castigare

Te pater, neque Rex legem ullam ferre poterit. Denique abrogandę sunt omnes leges, exhibilandi Reges, magistratus ac Iudices exterminandi, nemo sit dominus, nemo seruus, nulla Reipub. facies, sed hominibus pecudum more uiuendum est. Et sanè haud scio an hoc uestrę factionis hominibus propositum sit, an huc eorum studia tendant, consiliaque omnia ferantur, dum ita facilè seditiones ac tumultus concitant, cęlumque terrę miscntes, in Reges suos arma corripunt, quorum leges & edicta calcantes, ea sola uidentur amplecti, quibus potestas iis uiuendi ut uelint, conceditur. Complures quidem cū uestra studia conatusque considerant, & illa uestra arma respiciunt, arbitrantur hoc uobis propositum esse, ut id quod ex opinione uestra qua liberum negatis arbitrium, modò sequi ostendimus, in rem conferre possitis. Suspiciosum fortassis ac credulum hominum genus. Sed quamuis orationis fūco studeatis celare mendacium, nemini tamen dialecticis imbuto umquam persuadebitis, ex illo uestro paradoxo istas absurditates non esse consequentes. Quod paradoxum ille solus uerum esse credat, qui hominem non animal rationis particeps, sed pecudem esse

esse credit. Neque defuerunt qui cum intel-  
ligerent, ex illa uestra opinione sequi tam  
absurda, cùm agnitum errorem suum dam-  
nare deberent, non modò non damnarunt,  
sed nouo potius, & quidem absurdissimo  
errore cumularunt. Quàmuis, inquiunt,  
homo nihil aliud possit nisi peccare, liberum  
tamen ad peccandum habet uoluntatis arbi-  
trium, & sponte peccat. Nihil errore fœcun-  
dus ubi semel à ueritate discessum est. Tu  
uerò qui omnes humanas cogitationes à  
Deo, tanquam ex fonte deriuas, qui ut di-  
cere consueuistis, in homine operatur, &  
efficit non solùm uelle, sed etiã facere, huic  
opinionì non assentiris, ut equidem existi-  
mo. Itaque eam nō uehementer oppugna-  
bo, sed obiter tantùm eius absurditatem o-  
stendam. Illud igitur in primis habeo dice-  
re, istos secum pugnare, seque suo gladio iu-  
gulare, dum ex negatione definitionis affir-  
mationem definiti colligunt. Quasi ita ar-  
gumentarentur & dicerent: Ille non est ani-  
mal rationis particeps, sed tamen homo est.  
Non habet tres angulos, est tamen triangu-  
lum. Ad eundem modum isti negant nos li-  
berum habere arbitrium nisi ad peccandũ.  
Liberum autem arbitrium definitur pote-  
stas ad duo opposita, necessitas autem pote-  
stas

itas ad unum solum. De libertate hominis in uia constituti loquor. Nam dæmones & damnati tamen si nihil aliud possunt nisi peccare, tamen amplius commereri non possunt, neque peccatorum, nisi eorum quæ in uia admiserunt, pœnas luunt. Ita & beati cum iam peccare non possunt, ne mereri quidem amplius possunt, quia meritum & demeritum non nisi in uiuatoribus, qui ad duas res sibi oppositas habent potestatem, reperiuntur. Quæ cum ita sint, isti qui hominẽ in mortali etiamnum corpore constitutum nihil aliud posse dicunt nisi peccare, & tamen ob peccata sua iure meritoque puniri, peioris illum conditionis faciunt quàm eos qui iam cruciantur in tartaro, qui quanquã assidue peccant, ob illa tamen sola peccata, quæ in uia, id est in mortali corpore, constituti admiscere, dant pœnas.

His ita positis, ad propositum reuertamur. Ignis agit non liberè, sed necessariò, quoniam ad duo opposita simul non potest, sed ad unam solam rem ualet. Is autem libertatem habere dicitur, qui potest aut agere, aut non agere, amare, uel non, uelle aut nolle. Qui ergo dicit aliquid ita se habere ut ex duobus oppositis in unum solum ualeat, essentialem liberi arbitrii definitionem ei negat

gat conuenire. Deinde cùm ait illud nihilo-  
minus habere liberum uoluntatis arbitriũ ,  
definiti affirmationem ex definitionis nega-  
tione concludit & colligit , perinde ac si di-  
ceret, Habet in duas res potestatem, non po-  
test tamen nisi in unam rem. Cùm igitur isti  
aiunt hominem habere liberum uoluntatis  
arbitrium, idem est ac si dicerent, Homo ha-  
bet in duas res oppositas sibi que contrarias  
potestatem. Deinde cùm negant illum posse  
nisi in unam rem, idem est ac si hominem ne-  
garent habere liberum arbitrium , aut si ita  
dicerent , Homo est, sed animam nõ habet .  
Itaque simul aiunt & negāt . Vt enim homo  
ex duabus rebus , id est ex anima constat &  
corpore , ita liberum uoluntatis arbitrium  
duplici potestate , agendi uidelicet , & non  
agendi, præditum esse necesse est. Hæc spi-  
nosiora fortasse alicui uidebuntur , præter-  
mittenda tamen non erant, ut fraudes ac te-  
chnæ quibus callidi homines simplicibus il-  
ludunt , eosque mendacio fallente decipiūt,  
cùm absurdam impiamque sententiam ab-  
surdior quadam impietate protegere & ce-  
lare contēdunt, perspicuè ab omnibus intel-  
ligi possint. His igitur fraudibus ac dolis mū-  
dus fallitur atque decipitur . Miseret me il-  
lorum quos isti ueteratores & callidi huius-  
cemodi

cemodi dolis ac sophismatibus capiunt, in suamq. factionem trahunt. Suis inquam sophismatis ac dolis. Quod enim vnquam argumentum magis Sophisticum atq. captiosum excogitari potuit, quàm hoc, in quo rei definitæ affirmatio, ex definitionis negatione colligitur? Si essent qui istos impostores audire uellent, totum orbem terrarum suis sophismatis isti fallerent atque deciperent, maximè si iis ita argumentari liceret. Certè nullū est paradoxum usque adeò ab omniū fide, atque opinione dissentientiēs, quod isti iā probare non possint, cū auditores ita simplices, imò stupidos habeant, ut tã absurda dicentibus credant. Hæc igitur argutia, quā ne absurdè loqui uiderentur, isti excogitarunt, uestrum non defendit errorem, sed potius auget, illustrioremque reddit, quemadmodum ex iis quæ attulimus, perspicuū est. Nunquam error absurdus alterius erroris adiectione deletur, nec uulnus alterius uulneris inflectione curatur.

#### QUARTA RATIO.

**V**Eniamus ad quartam rationem, ut erroris uestri non solum absurditas, uerum etiā impietas atque blasphemia possit intelligi. Deum enim quantum in uobis est infamatis, eiusq. nomini & maiestati contume-

E liam

liam infertis, cùm illum in homine peccare, hominem autem pro peccato poena supplicioque affici dicitis. Ille secundum uos peccata committit, nos uerò dicimur peccatores. Ille comedit uuam acerbam, & dentes nostri obstupescunt. Hæc omnia ex opinionis errorisq. uestri putido fonte ducuntur, suntq. consequentia. Nam si uoluntate mea ipse meipsum nō moueo, si neq; uelle quicquam, neque facere possum, peccatum autē absque uoluntate ne cogitari quidē potest, profectò qui id agit ut uelim, agit etiam ut peccem. Deus autē iuxta uestram sententiā, isq. solus totam nostrā mouet atque gubernat uoluntatē. Is ergo solus peccat in nobis. Quo iure igitur, imò qua iniuria in aliis punit & uindicat scelera quæ ipse cōmisit? Cur peccatū cuius ipse auctor est, in homine potius quàm in asino aut pecude punit, cùm homo in mala uolūtate, a qua in primis peccatū est, gubernanda, non amplius quàm asinus fecerit? Qui fieri potest ut illū tanquā bonum ac φιλόθεον amemus, cùm ille usque adeò crudeliter in homines sæuiat, ut propter peccata quæ ipse cōmisit, eos exquisitissimis suppliciis torqueat? Cur grauē peccatorum suorū sarcinam non potius brutis animantibus, quàm hominibus imponit, cū



cùm hi secundũ vos libero voluntatis arbitrio carentes, non amplius quàm illa uelle aut nolle possint? Ad hæc quì Deus Opt. Max. atque iustissimus dici potest? Hoc uestro Deo certè nihil peius, nihil terrius, nihil immanius cogitari potest. Ipse namq. peccati, quod nobis luendũ est, à vobis auctor dicitur. Et erit quisquam uestrũ qui illum tanquam bonũ, aut iustũ deinceps prædicabit? Quis nesciat proprium esse iustitiæ, suum unicuique reddere, nec aliũ ob alterius peccatum poenæ supplicioq. subiicere? Vnde apud prophetã Deus noster ita loquitur: *Fi* *Ezec. 18.* lius non portabit iniquitatem patris, nec pater filij. Propheta igitur Ezechiel Deum adeò iustum agnoscit, ut nisi ob propriũ peccatũ puniat neminẽ. Si Caluini uestri Deus iustus est, cur ergo se ipse non punit, cùm peccatorũ ipse sit author & causa? ut quemadmodum iura præscribunt, poenæ teneant suos authores. Cur in miseros homines sæuit qui non habent liberum voluntatis arbitrium? Quale est istud, ut dominus aliquis peccet, & ob peccatum suũ seruos puniat? Quale, ut pater crimen admittat, deinde ut crimen admissum in filios uindictet? Patrem quendam ferunt filios conspuisse, eorumq. ora suo stercore contaminasse, quos

cùm ita deturpatos animaduерteret, in ignē  
coniectos uiuos cōcremauit. Talem isti Deū  
faciunt. Veritatem igitur adulterent ut ui-  
debitur, nemini tamen qui bonitatis ac iusti-  
tiæ notionem habeat, persuadebitur, ullam  
æquitatis aut iustitiæ partē illo uestro Deo  
esse posse. Quo quid crudelius, quid imma-  
nius cogitari potest? Neque uerò nobis ob-  
scurum est, quantum uestri concionatores  
imò impostores elaborent, ut noui sui Dei  
nomen hoc immanitatis ac sæuitiæ crimine  
liberent, hominibusque persuadeant, eum  
quamuis crudelissimum, bonitatis atque cle-  
mentię laudibus iure celebrari. Sed hoc fun-  
gis stipitibusque persuadeant; cordati certè  
viri, sanoque iudicio præditi, tam absurdis  
ac paradoxis opinionibus fidē adhiberē non  
possunt. Ego uerò, ut de me liberè loquar  
quod sentio, Deum meum longè alium mi-  
hi esse persuasi, nec in animum tam absurdas  
& impias de Deo opiniones possum inducere:  
quod si facerem, certè fieri non potest,  
quin illud etiam quod ex huiuscemodi opi-  
nionibus sequitur, unà crederem, illum ni-  
mirum adeò crudelem, sæuum, *μισάνθρωπον*  
esse, ut nihil eo sæuius, nihil immanius, nihil  
iniquius cogitari possit. Quis unquam homi-  
nem illum, qui omnia cędibus, adulteriis, ra-  
pinis,

pinis, sacrilegiis polluit, & nihilominus seruulos suos aut filios, ob ea peccata quæ ipse commisit, sæuerissimè punit, credet esse iustissimum? quis eum esse uirum bonum? quis denique hominem, ac non prodigium atque portentum existimabit? Nisi fortè is qui nihil uideat, nihil intelligat, ipso denique corde, sensuque communi priuatus sit. Quid de iis dicam, qui cùm Deum non modò omnium flagitiorum ac scelerum auctorem esse confingant, & haberi uelint, uerumetiam illa peccata quæ ipse in hominibus efficit, seuerissimè uindictæ ac puniat, nihilominus asseuerant eum esse iustissimum atque optimum? O mētes Cimmeriis, ut aiunt, tenebris atriores! O monstra atq; portenta in solas terras deportāda, & ex omni humana societate pelenda! Quid enim aliud agunt isti, imò quid per illos agit Satanas, nisi ut Deus à nullo colatur? à nullo ametur? denique ut Christiana religio funditus deleatur? Quis enim adeò iniquum Deum coleret? quis tam crudelem ac sæuum amaret? Quid igitur aliud sibi uolūt huiuscemodi opiniones? quid illa absurdissima paradoxa? quorsum inquā hæ blasphemix pertinent, nisi ut & fidem ipsam ac Religionē euertant, & Rempub. quoque, omnemq. magistratum funditus subruant?

*Grad⁹ ad  
Atheis-  
mum.*

Mirari iam desino quòd uestri concionato-  
res discipulos auditoresque suos in officio  
continere non possunt, quo minus illi & Deos  
facti in Epicuri castra transfugiant. Cùm  
enim hi tam absurdam atque impiam de  
Deo opinionem ab illis tanquam mortife-  
rum aliquod venenum hauserint, ac peni-  
tus imbiberint, ut illum & peccatorum &  
scelerum auctorem esse, & nihilominus mi-  
seros homines qui culpa uacant, propterea  
quòd aliud facere non possunt, ob illa pec-  
cata quæ in iis Deus ipse commisit, adeò  
seuerè puniri existiment, eo facilè delabun-  
tur, ut quem adeò malum atque immanem  
esse sentiunt, eum ne Deum quidè esse cre-  
dant. Hi sunt igitur fructus sanè præclari,  
qui ex paradoxis absurdissimisq. opinionibus  
uestris colliguntur.

Nos uerò Catholici Christianæ fidei alu-  
mni, Deum nostrum ita & amamus & opti-  
mum credimus, ut de illo nihil tale in ani-  
mum inducere possimus. Quare etiam si  
nullæ scripturæ loca produceres, ut homi-  
nem carere libero uoluntatis arbitrio pro-  
bares, tibi fidem habere nullo modo pos-  
sem, propterea quòd tam multæ in Deum  
ipsum blasphemiae ex illa opinione nascun-  
tur. Itaque malo iuxta manifestam scripturæ  
sacræ

sacræ sententiam Deum iustum ac bonum credere, quàm uobis assentiendo, cùm ipsius scripturæ uerba torquetis, de illo tam improbè nefarieque opinari, ut iniquum & crudelem Deum existimem. Iacobum Apo *Iac. i.* stolum audire malo, ei que fidē habere, qui ait: Fratres mei nemo dicat cùm tentatur, quòd à Deo tentatur. Deus enim intentator malorum est. Et ne Latini sermonis ambiguitas obscuritatē adferre uideatur, cùm Græcè sit ἀπειρασός: & paullò pòst sequitur, Ipse enim neminem tentat. Deus intentator, ἀπειρασός malorum est, & quisquam eū impia uoce malorum dicet auctorem? Malo inquam huic Apostolo Dei credere, quàm istis nouis, non apostolis, sed apostatis, imò Stoicis, qui de homine tã absurda, de Deo tam sæua immaniaque finxerunt. Quæ cùm ita sint, ego, ut antè dicebam, etiamsi isti mille scripturarum loca proferrent, ut mihi huiuscemodi paradoxa, nouasque opiniones ueras esse persuaderent, iis fidem nunquam habere possem; cùm mihi certum sit omnes scripturæ sacræ auctoritates quæ ad persuadendum aliquid tale proferuntur in medium, praua ipsius scripturæ intelligentia niti. Nam ut beatus Augustinus ad Marcel *August.* linum ait, Si manifestissimæ certæque rationi *epist. 7.*

uelut sanctarum scripturarum obiicitur auctoritas, non intelligit qui hoc facit, & non scripturarum illarum sensum, ad quem penetrare non potuit, sed suum potius obiicit ueritati, nec quod in eis, sed quod in seipso uelut pro eis inuenit, opponit. Cum igitur mihi contra certam hanc manifestamque rationem, & contra euidentissimam liberi arbitrij experientiam scripturæ auctoritatem opponis, non est dubium quin hæreticorū (de quibus præclare Tertullianus: omnes scripturas, inquit, sine sensu loquuntur) morem, secutus, Dei uerbū longè aliter quàm spiritus ueritatis accipiendum uelis. quod ut ad sensum quem domo adfers, accommo-  
dare possis, scripturam trahis repugnantem, quemadmodum inferius planum faciemus. Sed illud in primis faciendum puto, ut hac in re quid quatuor illi doctores senserint, quorum fidem uos ita sequi publicè testati estis, ut ea quæ illi probarent & crederent, uos quoque probare & credere, & quæ tanquam hæretica & falsa damnarent, uos consentientibus animis damnaretis, exponam. Quos omnes eadem fide, quam nunc quoque Romana conseruat ecclesia, imbutos fuisse, eamque solam posteris tradidisse, monstrabimus.

*QUATVOR DOCTORVM,  
QVOS IN FIDEI SVÆ CONFES-  
sione Regi Francorum Anno 1561. oblata Caluini-  
stæ receperunt, testimonia.*



ED ne quisquā existimet me ali-  
quid hoc loco fingere, ipsorū ver-  
ba ex sua confessione depromam,  
cuius inscriptio est: Cōfessio fidei  
cōmuni cōsensu cōsilioq̃. Francorū, qui iu-  
xta puritatē Euangelij Domini nostri Iesu  
Christi uiuere cupiunt. Huius præclare cō-  
fessionis articulo sexto de conciliis & docto-  
ribus ita loquūtur: Quod ueterū consilio-  
rū probauit ac decreuit auctoritas, libenter  
amplectimur, omnesq̃. sectas & hæreses quæ  
à sanctis doctoribus Hilario, Athanasio, Am-  
brosio, & Cyrillo reiectæ sunt, nos quoq̃. cō-  
sistentibus animis detestamur atque dam-  
namus. Hæc illi tū publicè professi sunt. Tu  
uerò, frater, qui idē quod istius confessionis  
auctores credis, illisq̃. consentis, illorū sum-  
morum hominū atque doctorū testimonia,  
ut equidē cōfido, suscipies, neq̃. reiiciendū  
putabis quòd tanta & à uestris approbata  
sanxit auctoritas. Cū igitur ea tua sit fides,  
contra hanc te facturū esse non arbitror, ut  
quod uerbo fateris, id factō negare uidearis.

In



Lib. 1.

*De gratia  
Christi cō  
tra Pela-  
gū & Ce-  
lestiū, ca.  
48. To. 7.*

In primis igitur Beati Ambrosij testimo-  
niū proferemus, de quo Augustinus ita scri-  
ptū reliquit; Hic est Mediolanensis episco-  
pus Ambrosius, quem Pelagius tanta prædi-  
catione laudauit, ut diceret in libris eius præ-  
cipuè fidē relucere Romanam, qui scripto-  
res inter Latinos flos speciosus enituit, ita  
ut eius fidē, & purissimum in scripturis sen-  
sum reprehendere, ne inimicus quidē aude-  
ret. Hæc de Ambrosio Augustinus, quē à  
uobis in uestræ fidei confessione recipi gau-  
deo, modò id nō fictē, sed ex animo fiat. Cui  
si credere uolueris, non dubito quin in no-  
stra castra transibis, imò redibis, nostramq.  
de libero arbitrio, & bonis operibus senten-  
tiam, imò Romanæ Ecclesiæ fidē, quæ, ut ait  
Pelagius, huius ecclesiæ inimicus, in illius  
summi uiri scriptis præcipuè relucet, denuo  
cōplecteris. Nā cuiusuis est hominis errare,  
nullius nisi insipiētis perseverare in errore.  
Sed ut ad propositum reuertamur, hanc no-  
stram fidē Ambrosius suo testimonio mirè  
confirmat, cū in epistolam ad Timoth. ita  
scriptum reliquit: Si Deus, qui est omnipo-  
tens & dicitur, uult omnes homines saluos  
fieri, cur nō impletur eius uoluntas? Sed in  
omni locutione sensus est, cōditio latet. Vnde  
dicit Petrus Apostolus. Omnis scriptura  
indiget

*In 1. ad Ti-  
mo. ca. 2.*

indiget interpretatione. Vult enim Deus omnes saluos fieri, sed si accedant ad eum. Nō enim sic vult ut nolentes saluentur, sed vult impios saluari, si & ipsi uelint. Et alibi: Non est quòd cuiquā nostram adscribamus culpā, nisi nostræ uoluntati. Nemo tenetur ad culpam, nisi uolūtate propria deflexerit. Non habent crimen, quæ reluctātibus inferuntur, uoluntaria tantū cōmissa sequitur delictorū inuidia, uoluntarium sibi militem Christus legit, uoluntarium sibi seruū Diabolus auctionatur. Neminem iugo seruitutis astrictum tenet, nisi se prius peccatorum ære ei uendiderit. Quid carnem quasi infirmam accusamus? Membra nostra arma sunt iniquitatis, & arma iustitiæ. Itē in libro De uocatione gentium, Primitus, inquit, de uoluntatis humanæ motibus & gradibus disputandū est. Inter quam & gratiam Dei quorundam non sana discretio est, existimantiū quòd prædicatione gratiæ liberum negetur arbitrium, nec aduertentium eadem regula obiici illis posse quòd gratiam negent, cū eam humanæ uoluntatis non ducem, sed comitem esse uolunt. Si enim uoluntas tollitur, ubi ipsa est uerarum origo uirtutum? Si tollitur gratia, ubi est bonorum causa meritum? Ambrosij ergo sententia est, ad  
bona

bona opera faciendū non modò gratia Dei, sed etiā humana uolūtate opus esse. Quid? Nonne idem in hoc ipso libro perspicuè docet, ob originale peccatum in homine liberum arbitrium non periisse? Non fidat homo uiribus, inquit, suis, quæ etiā cū essent integræ, non steterunt, sed per illū quærat uictoriam, qui solus non est victus, & omnibus uicit. Et si quærit, non dubitet quærendi affectum ab illo se accepisse quem quærit. Nec quia spiritu Dei agitur, idcò se putet liberum non habere arbitrium, quod nec tunc quidem perdidit, quando Diabolo uoluntate se dedit, à quo iudicium uoluntatis deprauatum est, non ablatum. Et in secundo libro, Virtus, inquit, nolentiū nulla est, nec potest asseri uel fidem, uel spem, uel charitatem eis inesse, quorum ab his bonis consensus alienus est. Quid potest euidentius, quid apertius dici, ut uirtutis ac uitij origo monstretur? Quæ cū sit humana uoluntas, nunquam iuxta Ambrosij sententiam hac repugnante, uirtus in homine locum haberet. Sic igitur noster Ambrosius liberum affirmat arbitrium, ut gratiæ Dei non deroget; sic gratiam prædicat, ut liberum non tollat uoluntatis arbitrium. Cuius summi uiri si sequereris exemplum,  
non

non alterum tolleres, ut alterum confirma-  
res, imò euerteres. Vt enim liberum arbi-  
trium sine gratia nihil æterna uita dignū po-  
test, ita gratia sine libero arbitrio nihil effi-  
cax non est.

## ATHANASII TESTIMONIUM.

**V** Eniamus ad illud Græciæ Lumen Bea-  
tum Athanasium, eiusq. sententiam  
nostro iungamus Ambrosio, ut quod hic in  
Occidēte sensit & docuit, ille in Oriente eo-  
dem sensu, quia eodem spiritu tradidisse ui-  
deatur, ut quorum una fuit fides, eorum in-  
telligatur eadem dogmatum fuisse consen-  
sio. Quis nesciat Athanasij fidem, fortitu-  
dinem, constantiam toto terrarū orbe fuisse  
se celeberrimam? Qui cū esset Catholicæ  
Religionis ac fidei propugnator acerrimus,  
in eumq. ob ueritatis studium, non solum  
hæretici, sed etiam Imperatores & exerci-  
tus coniurassent, Orientem atque Occiden-  
tem fidei constantiæque suæ laudibus illu-  
strauit. Non est mihi propositum summi  
clarissimique uiri prædicare uirtutes, quas  
tot sæculis miratus est orbis, semperque mi-  
rabitur. Hic igitur talis ac tantus contra  
idolorum uanitatem orationē scripsit egre-  
giam, in qua de libero uoluntatis arbitrio  
differuit,

*Athana-  
sii laus.*

differuit, cùm de natura animæ post originale peccatum, ita ait: Nam cùm mobilis agilisque naturæ sit, etsi se à motu auerterit, non quiescit tamen. Mouetur igitur, sed iam non secundum ueritatem, neque Deum spectat, sed res nihili, easque ueras ac solidas arbitrata essentias, uires suas occupat, iisque ad eas quas commēta est uoluptates abutitur, ideo quòd libera sit & sui arbitrii. Quæ cùm liberum sui ius arbitriumque intuetur, & sentit se corporeis membris in utramque partē uti posse, tum ad ea quæ sunt, tū ad ea quæ non sunt, &c.

De libero uoluntatis arbitrio quid clarius dici potest? Idem in eadem oratione aliquāto inferius, Peccata non à Deo, sed ab hominibus fieri luculēter ostendens: Nullum inquit malum nec à Deo, nec in Deo, nec ab initio extitisse, neque ullam esse eius substantiam, sed homines per priuationem imaginādi, cogitandique boni sibi illud quod malū est inceperunt comminisci. Quid in symbolo, quod in quinto uestre confessionis articulo tanquam legitimum, Dei que uerbo conueniens approbatis? Nonne in ipso statim eius exordio libertatem uoluntatis ostēdit, dicens: Quicumque uult saluus esse, ante omnia opus est ut teneat Catholicam fidē?

Qui

Qui ita loquitur, is profectò non dubitat quin homines salutem aut uelle aut nolle possint pro libero uoluntatis arbitrio. Quid adferent aduersarii, cur hoc Athanasii testimonium reiiciendum putent? Nonne hæc eorum in sua confessione uerba sunt? Tria symbola, scilicet Apostolorum, Nicenum, & Athanasii, quoniam cum Dei uerbo rectè conueniunt, recipimus & probamus. Faten- tur ergo, cum Athanasius diceret, Quicun- que uult saluus esse, illum rectè dixisse, nec a uerbi Dei regula deflexisse. Crede igitur & tu frater matrem Ecclesiam rectè, & secun- dum regulam uerbi dei loqui, cum ait nos uoluntatis nostræ potestatem habere, quod liberum uocamus arbitrium.

## HILARII TESTIMONIUM.

**V**eniamus ad Latini sermonis tubā, Gal- liæq. nostræ lumen Hilarium, cuius fi- des ac uirtus cum insigni eruditione doctri- naque coniuncta, orbi Christiano quòdam miraculo fuit, quiq. Gallicanam ecclesiam pro qua ab Arianis multa perpeffus est, illu- strauit. Hic de libero uoluntatis arbitrio nò semel, sed sæpius loquens, ne latum quidem unguem hac in re à Romanæ fidei puritate discessit,

discessit, quemadmodum eius scripta manifestant. In Commentariis in secundum psalmum scribit his uerbis: Deus unicuique nostrum libertatem uitæ sensumque permisit, non necessitate alterutrū afficiens, ut unūquodque ex natura bonum malumve esse lex cogeret, sed qui nos per beneuolentiam utendæ beatitudinis suæ creasset, profectū nobis ad id meritum uitæ innocentis honestæque constituit. Quid autem honoris ac præmii bonitatis necessitas mereretur, cum malos nos esse, uis quædam nobis conferta non sineret? Voluntati ergo permissa bonitas est, ut præmium sibi uoluntas bonitatis acquireret, ut esset nobis æternæ huius beatitudinis profectus atq. usus ex merito, nō necessitas indiscreta per legem. Et quanquā nos ad uoluntatē bonitatis, id est, ad bene honesteq. uiuendum, per spem promerendæ & utendæ suæ bonitatis illiceret, poenā tamen deuitatæ & contemptæ bonitatis adiecit. Vt cum libertatem nobis uoluntatis ad bonitatem promerendā reliquisset, quia meritum necessitas naturæ non haberet, libertatem ipsam quotidie propositus è contrario poenæ terror argueret. Atque ita & per rationem æqui atque iusti ad meritum præmii permissa libertas est, & per bonitatem



tem Dei uis libertatis metu constitutionis arctata est, ut bene uelle meriti spes moueret, malum nolle propositæ ultionis pœna suaderet. Egregia sanè sententia, ex qua non modò nos habere libertatis arbitrium, uerùm etiam cur illud habere necesse sit, perspicuum est. Nam si libero uoluntatis arbitrio careremus, quid honoris inquit ac præmii bonitatis necessitas mereretur? Voluntas ergo nostra hinc præmii magnitudine ad bonum incitatur, inde à malo supplicii metu deterretur. Necessitas autem, quæ omnē meriti occasionem funditus tollit, locum hic habere non potest. Nec dissimile est illud quod idem in Psalm. 18. scriptum reliquit. Vnicuique, ait, ad id quod uolet uia est proposita uiuendi & appetendi, atque agendi permessa libertas. Et ob id uniuscuiusq; aut pœna aut præmiis afficietur electio. Qui huius summi uiri opera legere uoluerit, is in hanc sententiam multo plura reperiet. Hæc ad confirmandam nostram de uoluntatis libertate sententiam ex uno Hilario satis multa sunt. Nunc ad Cyrillum ueniamus.

## CYRILLI TESTIMONIUM.

**N**on recessit à superiorū quos enumerauimus sentētia Beatus Cyrillus, Roma-  
F nç

nae fidei columna firmissima, quemadmodum ex tertio in Iulianum apostatam libro perspicuum est. Voluntaria, inquit, bene agendi libertate conueniebat hominem insigniri, & electionis liberè declarari fructum in bonis operibus dexteritatem. Et alibi in eodem libro: Valde puerile est quod dicit, scilicet Iulianus, non potuisse eum amicorum suorum proposita mutasse. Oblitus enim mihi uidetur, tametsi sæpius audierit, quod homo sit sui iuris, uoluntariè vadens ad quodcunque sibi libuerit. Ita bene habere gloriam opificis uniuersi, ut & qui bene operari uoluerint, laudandi sint, & qui diuersam inierint uiam, uituperandi iuste ab omnibus. Sentit ac dicit hominem sui iuris ac liberum esse, ut & bene agere possit & malè, cuius salus partim ex ipsius uoluntate pendeat. quemadmodum & Christus cuidam adolescèti perspicuè ostendit, dicens: Si uis ad uitam ingredi, serua mandata. Si uis, inquit, non si Deus uult. Quis ergo ex his non intelligat illum adolescentem fuisse liberæ uoluntatis, sine qua salutem consequi non posset? Deus enim neminem seruat inuitum. Cognata sunt his quæ idem Cyrillus in illud Ioannis ait: Hoc est autem iudicium, quia lux uenit in mundum, &c. Liberum, inquit, hominis iudicium

dicium his uerbis ostendit, qui ad alterutrū  
secundum animi sui iudiciū potest profi-  
cisci. Sic enim iustè laudē, si bene agimus;  
& contrarium, si malè committimus, inue-  
niemus. Hoc per prophetam etiam quen-  
dam dicit: Si uolueritis, & audieritis me, bo-  
na terræ comedetis. quod si nolueritis, neq.  
audieritis me, gladius vos deuorabit. Item  
in quarto libro: Non possumus secundum  
ecclesiæ ueritatisque dogmata liberam po-  
testatem hominis, quod liberum arbitrium  
appellamus, ullo modo negare. Ita iusti qui-  
dem præmiis propter iustitiam afficiuntur,  
qui uerò malè uixerint, non iniuria puniun-  
tur. In nono quoque eiusdem operis libro  
cap. 10. idē dicitur. En quatuor a uestris re-  
cepti uestri Doctores opinioni uestræ dire-  
ctè contrarij, ecclesiæ nostræ, quam propte-  
rea quòd idem quod illi credit & docet, te-  
merè damnatis erroris, fidē atque sententiā  
tuentur atq. approbant. Hęc fortè satis mul-  
ta, sed quoniā magnopere cupio mi frater  
ut ueritatē agnoscas, ex abūdanti celeberrī-  
mū quenq. atque antiquissimū ecclesiæ do-  
ctorē in mediū adducere non grauabor: ut  
quod mea, imò totius ecclesiæ catholicæ au-  
thoritas non potest, hoc tot tantorumq. ui-  
rorū consensus efficiat, erroremq. tuū, quē

ab illis toties iugulatum uides, tanquam scopulos fidei que naufragium fugiens, in ueritatis tutissimo portu acquiescas.

TERTULLIANI TESTI-  
MONIVM.

**I**ungatur superioribus Tertullianus, qui in libro De exhortatione castitatis: Cum utrunque ex præceptis Dei didicerimus, inquit, quid uelit, & quid nolit, iam nobis est uoluntas eligendi alterum, sicut scriptum est: Ecce posui ante te bonum & malum.

CYPRIANI TESTIMONIVM.

**B**eatus quoque Cyprianus in præmio libri de præcipuis operibus Christi consentit ita dicēs: Hoc ipsum quod dico carnis affectus, improprie dico, quia hæc uitia proprie animæ sunt, quæ sentit & mouet, & uiuit, cui imputatur peccatum, quia ipsi datum est arbitrium & iudicium, & scientia, & potētia, per quæ possit improbare malum, & eligere bonum. Corpore autem sic utitur anima sicut faber malleo uel incude, in qua format omnium turpitudinum idola, & fabricatur quælibet quarumcunque uoluptatum simulacra. Non est caro dictatrix peccati, nec inuentrix malitiæ, nec cogitatus format, nec disponit agenda, sed officina est spiritus, qui in ea re, & per eam quæcūque affectauerit, peragit.

# IRENÆI MARTYRIS TESTIMONIUM.

**C**ypriano Irenæus martyr antiquior eiusdem fidei sententięq. fuit in quarto aduersus hæreses libro ita scribens: Homo rationalis, inquit, & secundum hoc Deo similis, liber in arbitrio factus, & suę potestatis, ipse sibi causa est, ut aliquando quidem frumentum, aliquando uerò palea fiat. Et in 17. eiusdem libri capite idem uerbi Dei auctori-  
tate confirmans, his utitur uerbis. Quod Christus ait, Quoties uolui cōgregare filios tuos, & noluisti: ueterem legem libertatis hominis manifestauit, quia liberum eū Deus fecit ab initio, habentem suam potestatem, sicut & suam animam, ad utendum scientia Dei uoluntarie, & non coactum à Deo. Vis enim à Deo non fit, sed bona sentētia adest illi semper. Et propter hoc consilium quidē bonum dat omnibus, posuit autem in homine potestatem electionis, quemadmodum & in angelis.

## ORIGENIS TESTIMONIUM.

**O**Rigenes quoque multis in doctissimorum operum suorum locis liberum hominis ostendit arbitrium, quemadmodum in Commentariis in epistolam ad Romanos 3. Vnusquisque, ait, in manu sua habet & in ar-

bitrii potestate, ut aut peccati seruus sit, & iusticiæ, &c. Item in Homil. 12. in librum Num. Obserua, inquit, quomodo dixerit Propheta, Et nunc Israel quid Dominus Deus poscit à te? Erubescant illi hæc uerba qui negant in homine liberum arbitrium. Quomodo posceret ab homine Deus, nisi haberet homo in sua potestate, quod poscēt Deo deberet offerre? Sunt ergo quæ dantur à Deo, & sunt quæ præbentur ab homine. Verbi gratia, in uno homine sunt, ut una minā faceret decē minas, aut una mina faceret quinque minas: ex Deo autē fuit, ut haberet homo minā. Et in eūdem librum Homil. 20. Sui, inquit, arbitrij est anima, in quā uoluerit partē est ei liberum declinare, & ideo iustum Dei iudicium est, quia spōte sua siue bonis, siue pessimis monitoribus paret. Quibus uerbis Dei iustitiam aduersus eos qui liberū negant uoluntatis arbitrium, defendit. Consequens enim est, quod eruditissimus uir facillimè intelligebat, si homo non habet arbitrij libertatem, qua aut bene agere possit, aut malè, eum à Deo puniri iure non posse, quemadmodum nec bruta animantia puniuntur. Quod cū uideret Origenes, liberum multis in locis defendit arbitrium: ut in epistolam ad Corinth. & in 1. libro *τῶν ἀρχῶν*.

Illud,

Illud, inquit, definitum est in ecclesiastica prædicatione, omnem animam esse rationalem, liberi arbitrii, & uoluntatis. Quem librū si legere uolueris, multa in hanc sententiam præclarè dicta reperiēs.

BASILII MAGNI  
TESTIMONIUM.

**Q**uid magnus ille Basilius, in quo ita uirtus egregia cum incredibili doctrina eloquentiaq. certauit, dubium ut sit, utrū is sanctior, an doctior, an facūdior fuerit. Extat etiam nūc eius oratio, ὅτι οὐκ ἔστιν αἴτιος τῆς κακῶν ὁ θεός. qua elegātissimè ostendit, Deū non esse malorum auctorem, hominem autem peccatorem ac malum esse, non à Deo nescio quā necessitate compulsū, sed libero uoluntatis arbitrio. Eius hæc uerba sunt: ἀρχὴ γὰρ καὶ ῥίζα τῆς ἀμαρτίας, τὸ ἐφ' ἑμὲν, καὶ τὸ αὐτεξούσιον. Id est, Principium radixque peccati in nobis est ipsum liberum arbitriū. Et paulò post, cū de mundi calamitatibus, atque naufragiis, aliisque quæ uulgo mala dicuntur, disseruisset, adiecit: τὸ μὲν οὐκ ηὐθείας κακὸν ἢ ἀμαρτία, ὅτι πρὶν μάλιστα εἶναι τῆς τοῦ κακοῦ προσηγορίας ἄξιον, ἐκ τῆς ἑμετέρας προαιρέσεως ἔρπεται, ἐφ' ἡμῖν οἷτος, ὃ ἀπὲλκεται τῆς πονείας, ὃ μοχθηρὸς εἶναι. Malum propriè pecca-



eum est, quod hac appellatione uerè dignū  
 à nostra uoluntate pendet. In nobis etenim  
 situm est, uel abstinere à malitia, uel impro-  
 bis ac malis esse. Itē aliquanto inferius: ἀρε-  
 τὴ καὶ κακία ἐκ περαιορέσεως, καὶ οὐκ ἐξ ἀνάγκης  
 γίνεται. περαιορέσεις δὲ τῆς ἐφ' ἡμῖν ἡρτῆται. τὸ δὲ  
 ἐφ' ἡμῖν ἔστι τὸ αὐτεξούσιον. Virtus & uitium ex  
 uoluntate non ex necessitate perficitur. Vo-  
 luntas autem ab iis pendet, quæ in nobis sita  
 sunt. Quod uerò in nobis situm est, id est li-  
 berū arbitrium. Item paulò post: πότεν πο-  
 τηρὸς ὁ ἀνθρώπος; ἐκ τῆς οἰκείας αὐτοῦ περαιορέ-  
 σεως. Vnde malus & iniquus est homo? Ex  
 ipsius libera uoluntate. Est & altera eius  
 oratio, περὶ τῆς αὐτεξουσίου, id est, de libero  
 arbitrio, in quo uoluntatis libertatem ita  
 ostendit, ut gratiam Dei necessariam homi-  
 ni esse demonstret. In cuius orationis exor-  
 dio ita loquitur: τὸ γὰρ ἐν τῇ τῆς ἀνθρώπου δυ-  
 νάμει αὐτεξούσιον ἐπὶ τὸ ἐλέει, ἢ μὴ ἐλέει τῷ  
 διαβόλῳ ἀντιστῆναι κηται. Liberū illud, quod  
 in potestate hominis est, arbitriū in eo sitū  
 est, ut aut uelis, aut nolis resistere diabolo.  
 Longè consideratiùs dicit Basilius, quàm  
 tu frater. Nam ita necessitatem auxiliij gra-  
 tiæ Dei ponis, ut id quod iuuandum est tol-  
 las, ille uerò, & quod iuuat, & quod iuari  
 necesse est simul asserit. Sed quæro ex te, si  
 non

non est liberum uoluntatis arbitrium, quis gratiæ Dei locus est? Cur datur gratia? Quid tandē eius auxilio subleuatur? Si gratia ueniens liberum tollit arbitrium, non eius adiutrix, sed inimica est, tantū abest, ut ei aliquid boni conferat. Qui auxilii mentionē facit, is aliquem adiuuandum esse commemorat, quo sublato superuacuum auxilium est. Basilius ergo ita gratiæ Dei necessitatē ostendit atque defendit, ut liberū non tollat arbitrium, ad quod iuuandum gratia necessaria est. Tu uerò ita loqueris, ut uideo, ac si diceres: Rex Francorū nullus est, is tamen Regis Hispaniarū eget auxilio. Porro si rex in Gallia nullus est, falsum est, Galliæ regē auxilio indigere, quod ei qui non est, dari non potest. Bona igitur est hæc consequentia: Rex Francorum indiget auxilio regis Hispaniæ, est igitur aliquis Francorum rex. Eodem modo ex scripturæ uerbis argumentandum est, cum dicitur liberum uoluntatis arbitrium Dei auxilio indigere. Ex quo sequitur esse liberū arbitrium uoluntatis. Vestrorum autem concionatorum, imò impostorum, argumentū, quod ex necessitate auxilii Dei sumtū est, æquē captiosum est atque istud: Rex Francorū eget auxilio, nullus est igitur rex Francorum. Eodem modo  
isti:

isti: Liberum hominis arbitrium Dei auxilio indiget, nullum est igitur liberum hominis arbitrium. Ex iis quæ non sunt contraria, ita argumentantur, ac si essent cōtraria, ut si dicerent: Si nox est, dies non est. Porro auxiliū ei qui iuuatur, neque contrarium est, neque inimicum, sed potius amicum atque consentiēs. Disce igitur, frater, ubi auxilio opus est, ibi qui eo indigeat esse necessariò. Relatiua enim simul esse necesse est: ut si filius est, patrem quoque esse necesse est. Itaque si gratia necessaria est, eam rem quæ gratia indiget, atque utitur, esse necesse est. Hoc modo certè scriptura accipienda est, quam profectò melius intellexit antiquitas, quàm isti uestri nouatores, quemadmodum ex his quæ diximus perspicuum est.

## CHRYSOSTOMI

### TESTIMONIUM.

**Q**uid aureum illud eloquentiæ flumen Chrysostomus? nonne nobiscum est? Qui cum in oratione de Chananæa ita dicat: Liberi quippe arbitrii creauit nos Deus, ut uolūtate nostra cum adiutorio Dei, quod uolumus, faciamus. Et in Genes. Homil. 24 Vtrisq; nobis opus est, inquit, & quæ diuinitus dantur, & quæ à nobis sunt, siquidem diligenter & exactè saluandi fuerimus, idq. nō solum

solùm antea, sed & nunc quoque etiã si magni celebresq̃. fuerimus, diuina gratia opus habemus. Cùm igitur ita dicat Chrysostomus, nonne perspicuum est eum sentire hinc Dei gratia, inde uoluntatis arbitrio opus esse, ut inter sæculi turbines, atque naufragia, ad salutis æternæ portum peruenire possimus? Alterũ igitur sine altero ad consequendam salutem parum efficax est, sed utrũque iungendum est. In priorem quoque ad Timotheum epistolam, ita necessitatem gratiæ Dei prædicat, ut liberum minimè tollat arbitriũ. In omnibus, inquit, locis Paulus suã iusticiam suppressit, totumq̃. Deo adscribit, ita tamen ut libertatẽ non tollat arbitrii.

#### HIERONYMI TESTI- MONIUM.

**N**ostrum Hieronymum pœnè præterieram, qui in secundo contra Iouinianũ libro sic ait: Liberi arbitrii nos condidit Deus, nec ad uirtutes, nec ad uicia necessitate trahimur. Alioqui ubi necessitas nec damnatio nec corona est. Itẽ alibi: Homines, inquit, suo arbitrio derelicti sunt. Neque enim bonũ necessitate faciunt, sed uoluntate, ut credentes coronam accipiant, increduli suppliciis m̃cipentur. Et iterum: Deus, inquit, æquali cunctos sorte generauit, & dedit arbitrii

trii libertatem, ut faciat unusquisque quod vult, siue bonum siue malum. Intantum autem dedit hominibus libertatem, ut vox impia disputet contra creatorem suum, & causas uoluntatis eius perscrutetur.

THEOPHILI ALEXANDRINI  
TESTIMONIUM.

**H**Is affine est illud, quod Teophilus Alexandrinus episcopus in tertio libro de Paschate: Non ambigitur, inquit, quin in utranq. partem uel faciendi, uel non faciendi bona habeamus liberam facultatem. Nihil neque breuius neque uerius dici potuit.

IOANNIS DAMASCENI  
TESTIMONIUM.

**Q**uid Damascenus? Nonne in secundo de Theologia libro cap. 30. nos Dei cooperatores ac συνεργούς esse pronūtiat? Ex quo nō oīa in nobis à Deo fieri, sed aliquid à nostra quoq. uolūtate proficisci perspicuū est. cuius hæc uerba sunt: ἐκ τῶς τῆς τοῦ Θεοῦ συνεργίας καὶ βοηθείας, ἀδύνατον ἀγαθὸν θελήσαι ἢ πράξει ἡμᾶς, ἐφ' ἡμῖν δὲ ὅτι ἢ ἐμμεῖναι τῇ ἀρετῇ, καὶ ἀκολουθεῖν τῷ Θεῷ πρὸς ταύτην καλοῦντι, ἢ ἀρροῦνται τῇ ἀρετῇ. ὅπερ ὅτι ἐν τῇ κακίᾳ χεῖρε, καὶ ἀκολουθεῖν τῷ διαβόλῳ πρὸς ταύτῃ καλοῦντι ἀβιάτως, id est, sine Dei coope-

cooperatione, & auxilio impossibile est nos aut bonum uelle, aut agere. At in nobis est inhærere uirtuti, & sequi Deum nos ad illam uocantē, aut deserere uirtutem, quod est in malum prolabi, & sequi diabolum ad illud uim non inferendo uocantem.

## ALIA AVGVSTINI

## TESTIMONIA.

**E**X Augustino multas sententias easque præclaras ante produximus, sed tam ardentem abs te ueritatem intelligi cupio, ut cum lectori superiore diligētia fatisfecisse uidear, mihi satisfacere non possim. Itaq. certas eiusdē auctoris illustresq. sententias ex abundanti in medium adferam, ex quibus intelligas, ab illo sic gratiam Dei prædicari, ut liberæ uoluntatis nō tollatur arbitrium. Sine Deo, inquit, nihil possumus facere, sed ipse in nobis facit opera, nō tamen omnino sine nobis. Cooperatores enim Dei sumus, si cut dicit Apostolus. Vult siquidē Deus, ut eū oremus, & ut ei aduenienti, & præstolāti ad ostiū, aperiāmus sinū uoluntatis nostræ, & ei cōsentiamus. Et alibi: Deus odit eos, inquit, quide suis uiribus præsumūt. Quid liberū possit arbitriū, si à Deo non iuuatur, in Adā ostēsum est. Ex se quidē ad malū sufficit, sed ad bonū minimè, nisi iuuetur à Deo.

*Lib. in sca  
lis paradi  
si, cap. 10*

*De canti-  
co nono,  
cap. 8.*

Item

*Lib. de bo no uolun- ta. cap. 7.* Item alibi : Arbitrium uoluntatis humanæ nequaquam destruimus, quando Dei gratiam, qua ipsum adiuuatur arbitrium, non superbia negamus ingrata, sed grata potius pietate prædicamus. Nostrum enim est uelle, sed uoluntas ipsa etiam mouetur ut surgat, & sanatur ut ualeat, & dilatatur ut cupiat, & impletur ut habeat. Alio quoque in loco, cum de belli quod in nobis inter spiritum & carnem geritur, magnitudine periculoque differeret, quam necessarium nobis sit auxilium gratiæ Dei ad uictoriam obtinendam, ostendit his uerbis : Si ad istam pugnam de te præsumis, admonendus es, ne frustrâ audieris, Exultate Deo adiutori nostro. Si enim per te impleres totum, non esset necessarius adiutor. Rursus si tu ipse tua uoluntate nihil ageres, non uocaretur adiutor. Adiutor enim aliquid agentem adiuuat. In epistola quoque 46. Nisi libero, inquit, arbitrio intelligeremus, & saperemus, nõ nobis præciperetur dicente scriptura : Intelligite ergo qui insipientes estis in populo, & stulti aliquando sapite. Eo ipso quippe quo præceptum, & imperatum est, ut intelligamus atque sapiamus, obedientiam nostram requirit, quæ nulla potest esse sine libero arbitrio. Sed si posset hoc ipsum  
sine

*In Psal.*

143.



sine adiutorio gratiæ Dei fieri per liberū arbitriū, ut intelligeremus atque sciremus, non diceretur Deo: Da mihi intellectum, ut discam mandata tua. Huius summi uiri, ecclesiæq. doctoris testimonia fortasse pluribus uerbis exposui, sed quæ sit eius in hoc negotio fides, tibi planum faciendum putaui. Duo igitur hæreticorum genera tunc erant, quibuscum ille pugnabat, Manichæi, & Pelagiani. Hi grariam Dei necessariam esse negantes, liberi arbitij uires ita prædicabant, ut illud ex se ad bonum sufficere dicerent. Illi contrà liberum negantes arbitrium, omnia gratiæ tribuebant. Inter amborum diuersas pugnantesq. sententias Augustinus tâquam inter Scyllam & Charybdim medius incedens, contra hos auxilium gratiæ Dei, contra illos uoluntatis libertatem accuratè defendit. Quem si ipse legeres, nec obscuris quibusdam, truncatisque sententiis à Luthero, eiusque farinæ hominibus ad ueritatem inter illas obscuritates celandam, hinc inde collectis contentus esses, uideres illius sententiam nobiscum, & cum ecclesia nostra, quam temerè deseruisti, omni ex parte quadrare. Quòd si illum legendi laborem fugis, hæc tamen illius testimonia, quæ iam exposuimus, certè sufficient,

cient, modò ueritatem ex animo quæras. Sunt enim usque adeò clara & aperta, ut in aliū sensum detorqueri nullo modo possint. Et sanè ex huiusmodi locis, in quibus doctores suam fidem simpliciter aperiunt, & ostendunt, non ex obscuris quibusdam ac difficilibus, quæ ab illis manifestioribus explanationem lucemque desiderant, illorum summorum hominum discenda sententia est. Plura quidem etiam aliorum doctorum testimonia, quibus probatur liberum uoluntatis arbitrium, in medium proferre possent; sed hæc in præsentia sufficient. Quæ postquam euolueris, à te peto, ut tecum in primis prudenter matureque consideres, num tutius atque honestius sit, tantorum hominum auctoritatem sequi, quàm nouorum istorum siue Stoicorum, siue Manichæorum, qui cū illis antiquis, summisque doctoribus, nec uitæ merito ac sanctitate, nec eruditionis atque doctrinæ magnitudine conferri ullo modo possunt, absurdam opinionem amplecti. Deinde illud quoque in mentem tibi ueniat uelim, quàm improuidè, stulteque dicebas, nostram ecclesiam contra Dei uerbum, contra omnem auctoritatem atque rationem, uoluntatis libertatem asserere. Tertiò pressius cogita, num æquum sit me eam sequi fidem ac religio-

religionem, quam in eiusdem ecclesię castris militans, ante me tantus sanctissimorum, doctissimorumq. hominum numerus tenuit atque defendit, ne fortè mirandū putes, quòd ab huius ecclesię castris ita leuiter, ac temerè, ut tu, transfugere nolo. Versetur tibi, quæso, etiam illud ante oculos, quàm incōsideratè illis tuis impostoribus credas, credēdoq. pereas, dum iis asseuerantibus neq; uerbum Dei, neque antiquitatem unquam docuisse liberum uoluntatis arbitriū, adeò improuidè fidem habes. Quid de admirabili illo patrum nostrorum atque doctorum consensu dicam? qui inter se non solum tot spatijs maris atque terrarum, uerùm etiam sæculis ætatibusq. diuisi, in unam tamen eandēq. fidei concordiam ita cōspirarunt, ut in idem doctrinæ genus omnes iurasse uideantur. Quod à te frater etiam atque etiam animaduerti uolo. Vide Ambrosium Mediolani in Italia constitutum, Hilarium in Gallia apud Pietauos, Athanasium & Cyrillum Alexandriæ in Aegypto, Chrysostomum Constantinopoli in Thracia, Cyprianum, Augustinum, Tertullianum in Africa, Hieronymum in Palæstina, tantis inter se spatiis, prouincijs, ætatibusque diuisos, in eandem tamen de arbitrii libertate, cæterisque ad salu-

tem pertinentibus, fidem atque sententiam  
conspirare, cum uestri ministri, & concio-  
natores non solum eodem tempore uiuen-  
tes, uerum etiam iisdem prouinciis ac pro-  
pè iisdem parietibus clausi inter se conue-  
nire non possint. Mentior nisi Lutherus,  
Melancthon, & præclarus ille Calvinus,  
uestre opinionis auctores, & antesignani,  
imò uerò ueterum hereseon, quas illi patres  
nostri atque doctores tot sæculis antè con-  
triuerant, renouatores, inter se usque ad ul-  
timum spiritum de hac liberi arbitrij quæ-  
stione pugnarunt. O incredibilem nostro-  
rum in fidei ueritate concordiam! O admi-  
rabilem aduersariorum in perfidiæ defensio-  
ne discordiam! Sed ut hunc locum aliquan-  
do concludam, illud, quæso, tibi frater in  
mentem ueniat, quod ab Augustino, quæ-  
admodum supra ostendimus, dictum est,  
non esse Catholicum eum qui liberum ne-  
gat arbitrium. Quod idcirco repetendum  
puto, ut qui illud negas, te ipse respicias,  
& qui sis intelligas. Sed de his satis multa.  
Venio nunc ad eâ scripturæ loca, & ad ar-  
gumenta, imò sophismata, quibus catholi-  
cæ fidei ueritatem oppugnandam putasti.

EO-

## EORVM QVAE AB ADVER-

sariis contrà dicuntur, refutatio.

**B**ene habet, iacta sunt fundamenta defensionis nostræ, qua fidei catholicæ veritatem non solum cum scripturæ sacre auctoritate, sed etiam cum ratione, experientia, antiquitate, patrumq; sententia congruere monstrauimus. Quod ad eam illustrandam reliquum est, cum in sola eorum quæ contrà dicitis refutatione positum sit, aliquanto facilius uidetur ac planius. In primis igitur negare non potes frater, ea quæ produxi testimonia, diuinis literis contineri, Deique uerbum esse. Ego quoque ea scripturæ loca quæ in tuis literis attulisti, pœnè omnia ex eodẽ uerbi Dei fonte sumpta confiteor. His ita positis, uter nostrum scripturæ sacre uerbis suum uerum atque germanum sensum attribuat uidendum est. Nam, ut ait Hieronymus, scripturæ non in legendo consistunt, sed in intelligendo. Vnde igitur sciemus uter nostrum scripturas melius intelligat? Illud in primis habeo dicere, nostram ecclesiam nec sine scripturarum auctoritate, nec absque ratione de libero arbitrio docere quod docet. Nam scripturæ sacre loca quæ produximus, de libero uoluntatis arbitrio apertissime

*Cõtra Luciferianos*

agere, negari non potest. Cur ergo ob alia  
quædam obscura scripturæ loca, quæ contra  
meâ fidem atque sententiam, quasi obtorto  
collo trahis, me uoluntatis libertate arbitra-  
bor esse priuatû? Cur clarissimis scripturæ sa-  
cræ uerbis credere desinam, ut absurdissimâ  
opinionem, quâ ex obscuritate sententiarû,  
quas tantûm attingis, quasi è densissimis te-  
nebris eruis, ac mihi obtrudis, amplectar? Po-  
tes & tu sine dubio à me quærere, cur opinio  
nē tuam abiiceres, nostramq. susciperes, cum  
& nostra tibi uideatur infirmior, & tua uer-  
bi Dei auctoritate firmata. Ego uerò in pri-  
mis illud respondeo, me nolle, ut scripturæ  
uerbis, quę produxisti, sed ut prauę intelligē-  
tiæ, falsisq. illationibus, & consequētiis, quas  
scripturæ uerbis de tuo adiicis, renuncies.  
Sed ut non solûm de culpa, quâ admittis, cū  
scripturarû uerba ad eum modû allegas, ue-  
rûm etiam de testimoniorum, quę ex eodem  
fonte produximus, idonea bonitate rectam  
atque incorruptam possis ferre sententiam,  
certas tibi rectè interpretâdarum scriptura-  
rum regulas ante oculos ponam, quas non  
obseruare, omnis erroris falsęque opinionis,  
quæ ex scripturis sumi uidetur, occasio est.  
Sunt autē hæ regulæ adeò rectæ rationi con-  
sentaneæ, ut Christianus ac ueritatis studio-  
sus

sus eas obseruandas esse, inficiari nullo modo possit, neminiq̃ue sit dubium, quin omnis scripturæ sacræ contra has regulas facta explicatio, non uerbi Dei interpretatio, sed euersio potius habenda sit.

## PRIMA REGULA.

**O**Mnes scripturæ sacræ libros ad diuinæ maiestatis honorem & gloriam factos esse non dubiū est, nihil autem minus quàm ad diuinæ glorię diminutionem, aut ad diuinitatis infamiam. Ex quo lex ista, & uniuersalis regula sequitur: Omnis scripturæ sacrę siue explicatio, siue allegatio, in eo sensu adhibita, ex quo aliquid cōtra diuini nominis gloriā sequitur: recteq̃. inferri potest, adulterina & falsa est, ac proinde reiicienda, aut certè corrigēda, donec alius sensus Dei gloriæ conformis appareat. Quòd si is qui scripturam interpretatur, ex obscuriore aliquo loco huiusmodi sententiā eruere non potest, locum illum exponere nullo modo debet, donec aut aliunde melius intelligat, atque approbet, aut illi Deus meliorem, certio remq̃. sententiam reuelauerit, aut certè expectet omnino, donec gloriam Domini reuelata facie contemplabimur, ubi nihil eorum quæ scire cupiemus, obscurum erit, nullus ignorantia locus. Interea scripturæ sacræ



maiestatem admirans, angustam humani ingenii ad illa summa diuinæ sapientiæ capienda mysteria exiguitatē agnoscat. Cōtrā omnis explicatio, in qua nihil est, quod ad Dei gloriā, & honorem non pertineat, ferenda certē quidem; si uero ad amplificandā, atque retinendā diuini nominis gloriā tendi- ac pertinet, tanquam bona obuiis manibus amplectenda est. Vt enim in ceteris artibus, ac disciplinis, si quid contra earū prima principia generalesq. regulas sumitur atque concluditur, id statim reiiciendum est, atque iugulandū; ita in uera Theologia, quæ docet rectē explicare scripturas, quicquid contra hanc regulam, atque præceptū inferitur, id statim tanquam pestis ac uenenum, quod fidei nostræ fundamēta subuertit ac destruit, reiiciendum est, atque damnandum. Quid hac regula rectæ rationi magis consentaneū potest esse? Certē quemadmodum minimē negabis malum atque imperitum ædificatorem, qui ut domus suæ tectū faciat, eius fundamenta diruit & euertit, primosq. lapides, quibus ædificiū nritur, loco mouet; ita mihi facilē concedes, malū fidei architectum esse, qui ut nouam aliquam opinionem extruat atque componat, ipsius fidei fundamēta subuertit. Quisquis autem in explicatio-

ne scripturarū aliquid adfert, quod cum diuini nominis gloria pugnat, illiq. contrariū est, prima fidei nostræ, ac Theologiæ fundamenta tollit, & euertit, ex quibus certò cognouimus, Deum neque unquā dixisse, neque diuinis literis uoluisse comprehendī aliquid, quod ad sui nominis gloriam abolendam, aut certè minuendam, ullo modo pertineret. Quæ cū ita sint, cui Christiano, ac pio homini dubium esse possit, quin huiusmodi scripturarum non explicator, sed euerfor, tanquam prodigium aliquod atque portentum, cum suis nēnijs exterminandus ac profligandus sit? Dei autem gloria in quo maximè cernitur? Nēpe in hoc, ut de illius bonitate, sapientia, potentia, æquitate, misericordia, *φιλανθρωπία*, cæterisq. huiusmodi, omnes homines non solū optimè, atque honestissimè sentiant, sed etiam sanctis, ac sinceris opinionibus imbuātur. Cū autē aliquis scripturæ uerba sic explicat, aut ad sententiam suam confirmandam ita producit, ut ex illius oratione ac sensu mala cōtra huiusmodi Dei uirtutes, ac sinistra quædam opinio concipi possit; ut uerbi causa, cū Deū minus esse sapientem, minus bonum, aut iustū, minus misericordē, atque hominum amatorem inferri potest, talis ex-

plicatio unà cum suo auctore damnāda est. Quamobrem? Quia contra mentē spiritus sancti, scripturarum auctoris, cui cū illa sacrosancta uerba dictaret, nihil aliud, nisi ut & Dei gloriā illustraret, & eius in homines amorem ostenderet, propositum erat, directè concludit. Volebat autem spiritus ueritatis ex scripturæ libris homines non solum amoris erga ipsos diuini certiores fieri, uerum etiam intelligere, Deū Optimum Maximum, iustissimum, potentissimū esse. Sed quoniam is sensus quem scripturæ uerbis, quæ abste contra liberum uoluntatis arbitrium, & bonorum operum merita producuntur, attribuis, cum Dei gloria pugnat, estque contrarius, reiiciendus est atque dammandus, aliusq. in ea scripturæ loca quærendus, qui cū diuini nominis gloria quadret, recteq. conueniat. Vt enim superius ostendimus, ex uestro dogmate sequitur, Deū neque satis sapientem esse, cū ea homini præcipit quæ fieri nullo modo possunt, neque satis bonum, ac iustum, cū hominem morte afficiat sempiterna, propterea quod ipsius præcepta, quæ obseruari secundum uos impossibile est, non obseruauit; neque φιλάγρων, hominumq. amatorem, cum iis illa præcipiat, ut eos puniendi atque perden-

di

di iustā occasionē habere uideatur ; neque  
satis æquum iudicem , cū peccata mortis  
æternæ supplicio puniat, uirtutes autē nul-  
lo præmio dignas iudicet. hæc omnia uestrā  
opinionem, scripturæque expositionem se-  
quuntur necessariò . Vnde manifestum est ,  
ea quæ contra nos produxistis scripturæ lo-  
ca , longè aliter quàm à uobis accipiuntur ,  
explicanda esse . Porro quæ à me ad liberi  
arbitrij probationem scripturæ loca testimo-  
niaq. producta sunt, ea neque gloriæ, neque  
bonitati , neque sapientiæ , iustitiæq. diui-  
næ repugnantem sententiam secum trahūt .  
Quare illa quidem uestra , tanquam impia ,  
& absurda reiicienda ; hæc uerò nostra, tan-  
quam Dei gloriæ conueniens, obuiis ulnis  
excipienda sententia est .

## SECUNDA REGULA.

**E**T quoniā omnis diuina scriptura uerissi-  
ma est , sibiq. omni ex parte consentit ,  
nec unquā secū ipsa pugnat, aliud hoc aliud  
illo loco prædicās, (est enim propositioni co-  
pulatiuæ similis, quæ ut uera sit, omnes illius  
partes ueras esse necesse est ) sequitur , ut in  
eius explicatione nihil quod alteri loco re-  
pugnet sitq. contrariū, dicendū sit . Neque  
enim ex uno loco oppugnādus est alius, sed  
potius si duo loca inter se pugnare uidean-  
tur,

tur, ea commodā quadam explicatione conciliabit doctus interpres. Sed lōgè aliter hostes fidei nostræ scripturæque diuinæ Iudæi, Gentiles, Iulianus aliquis, aut Porphyrius, aut denique hæretici, quorum studium est unum scripturæ locum ita alteri opponere, ut ea inter se pugnare uideantur, ita perfidi scripturæ auctoritate scripturam conantur euertere. Cū ergo huiusmodi loca in scripturis Christianus ac pius lector inuenit, utraque uera esse non dubitans, sæpius ea exponit, ac studiosè uersat, donec ea explicatio occurrat, quæ quo minus uterq; locus uerus esse credatur, minimè impediat. Quod certè faciendum esse ne tu quidē negabis. Est enim hæc regula uniuersalis, ratio- nique maximè consentanea, qđ omnes Christiani mihi faciliè concedent.

### TERTIA REGULA.

**D**iligenter quoque considerandum est, quando in scripturis agatur de thesi, quando de hypothesi, & quādo hypotheses diuersæ circumstantiæ, generisq; tractantur. Cū enim in genere de una thesi agitur, quicquid de ea dicitur, unicuique hypothesi, quæ illa thesi continetur, attribuendum non est. De una siquidem thesi nonnunquam contraria sine ulla conditione dicuntur,

cuntur, quæ de aliqua sua hypothefi fimul dici non poffunt. Nec minus ftudiofè uidentum eft, ne id quod de aliqua hypothefi dicitur, alteri diuerfi generis tribuatur: ut uerbi gratia, quod de homine dictum eft, id ad afinum equumve referatur, quæ alterius formæ funt diuerfæque fpeciei. Quid autem fit thefis, quid hypothefis, epiftolaris anguftia me hoc loco declarare non patitur. Quod fi cui uidetur obfcurius, rhetorum fchola perfpicuè oftendet. Exempli tamen caufa aliquid fubiiciam, ex quo quid fit, intelligi poteft. Sit igitur hæc thefis, carnes comedere. Quærenti an hoc bonum fit an non: Refpondeo, & bonum & malum effe poffe. Sed quantum ad fuas hypothefes, & particulares quæftiones, fecundum differentiam circumftantiarū, à quibus feperantur, aliter atque aliter respondendum eft. Nam fi quærat à Paulo, an contra confcientiam carnes comedere liceat; negabit: at uerò fi quæras, an contra Mofaicæ legis præceptū id liceat; licere dicet. Contrà fi quæras, an à carnibus abftinendum fit: uariè respondebit. Nam eos qui a carnibus abftinēt in contumeliā creatoris, quafi natura malæ fint, peccare dicet. Nec aliter de iis pronuntiabit, qui à carnibus abftinent, quòd legem Moyfi obferuandam

*Rom.* 14. uandam esse sentiant. Porro si quæras, an bonum sit ad edomandam libidinem, aut ad obediendum ecclesiæ, à carnibus abstinere:  
*Act.* 15. re: bonum esse dicet. Ipse siquidem post concilium illud Hierosolymitanum prouincias circumiens, confirmabat ecclesias in fide, præcipiens obseruari traditiones Apostolorum, & seniorum, in quibus certus ciborum delectus ab ipsis Apostolis institutus est. Quid? nonne in epistola ad Romanos idem Apostolus ait: Bonum est non comedere carnes, neque bibere uinum, & quæ sequuntur? Quem qui ita legunt, ut eius hypotheses misceant atque confundant, quodque de una materia dictum est, id ad alterius generis quæstionem referant, neque Apostolum unquam intelligent, & illos in sexcentos errores incidere necesse est. Idem istis usu uenit, qui cum scripturas legunt, quando hæc materia, quando illa tractetur, non considerant, sed ita omnia turbant atque confundunt, ut quod de uno argumento dictum est, id ad aliud non modò differens, sed etiam contrarium referant. Exempli causa: nonnumquam in scripturis argumentum de gratiæ Dei necessitate, alibi de liberi arbitrij imbecillitate tractatur. Hic de acerrima inter carnem & spiritum pugna,



pugna, & de concupiscentiæ uiribus, illic de libero uoluntatis arbitrio. Si id quod de vno argumento dicitur, ad alterum transfers, in labyrinthios delaberis errores. Itaque suo loco unaquæque materia separatim collocanda, & sine alterius confusione tractanda est.

#### QUARTA REGULA.

**I**N Diuinis libris ὑπερβολικῶς adeo multa dicuntur, ut cū de una re agitur, *Hyperbole in scripturis frequens.* omnium aliarum quæ ab ea pendent, scriptura oblita esse uideatur. Exempli causa sit illud Pauli, in quo fidem laudat, & prædicat, eiusque necessitatem ita ostendit, ut omnium aliarum uirtutum memoriam abiectisse uideatur, neque bonorum operum, neque spei, neque charitatis ullam mentionem faciendam putet. Quem Apostoli morem qui non considerant, errandi occasionem inde sumpserunt, ut fidem solam sufficere arbitrarentur. Atenim si isti, quid alibi Apostolus dicat, considerassent, quæ sit illius de bonis operibus, & de charitate sententia, intellexissent. Illius enim uerba sunt: Si om- *1. Cor. 13.* nem fidem habuero, charitatem non habuero, nihil mihi prodest. Et alibi: In Christo *Galat. 5.* Iesu neque circumcisio aliquid ualet, neque præputium, sed fides, quæ per dilectionem opera-

operatur. Ita cùm idem Apostolus de liberi arbitrii imbecillitate, de acerrima illa carnis impugnatione, de gratiæ Dei auxilio, & necessitate loquitur, ita uehemēter ac *ἡδυστολως* aliquando agit, ut liberi arbitrii quodam modo oblitus esse, illudq. ad bona opera nihil habere uirium assenerare uideatur. Qui igitur de arbitrii libertate uult Apostoli exploratam habere sententiam, eam non his in locis, ubi de aliis rebus agitur, sed in aliis, ubi de libero arbitrio propriè loquitur, inuestiget necesse est. Neq; uerò magna inquisitionis est difficultas. Prior enim ad Corinthios epistola statim occurret, in qua, ut etiam suprà demonstrauius, de libero uoluntatis arbitrio ita perspicuè Apostolus loquitur, ut quid de eo sentiat, obscurum esse non possit. Quid enim aliud hæc uerba sibi uolunt? Non habens necessitatem, potestatem autem habens uoluntatis suæ. Et illud quoque sequitur: Itaque & qui iungit uirginem suam matrimonio, bene facit, & qui non iungit, melius facit. Potestne aliquid manifestius dici, ut uoluntatis libertas ostendatur, in cuius arbitrio est, opus uel bonum uel melius facere? Si stultū est ex eo quod quispiā de asino dixerit, quid is de homine sentiat, uelle cognoscere, an non æquè stultum est,

Cap. 7.

est, ex eo quod Apostolus de gratia Dei dixit, quid de libero arbitrio sentiat, uelle comprehendere? Quanta uerò imprudētia est, ne dicam insanīa, ex eo quod aliquis de asino loquens nullam fecit hominis mentionē; inferre tanquam consequens, illum existimare, nullum esse hominem? Certē non minus absurdum est, ex eo quod Paulus, cū de gratia Dei ageret, liberum non commemorauit arbitrium, nec de illius uiribus disputauit, inferre tanquam consequens, Paulus igitur liberum arbitrium in homine esse nō credit. Nequē enim hoc illi tum propositum erat, ut de uoluntatis libertate disliceret. Nemo potest duo simul argumēta tractare. Suus unicuique materiæ locus est, nec una alterius confusione tractanda est.

Idem in doctorum, quos rectē intelligere uolumus, lectiōe obseruandum est. Augustinus tractans liberi arbitrij quēstionem, gratiæ Dei nullam mentionem facit. Vnde Pelagiani tantum uirum, & gratiæ Dei propugnatorem acerrimū secum facere, atque in suis castris esse dicebant. Contrā cū is de gratia Dei eiusque necessitate disliceret, tanto disputationis feruore abripitur, ut liberæ hominum uoluntatis oblitus esse uideatur. Ita Hieronymus uirginitatem tantis

tis laudibus uehit, ut nuptias dampnare uideatur, quas alibi probat, & licitas esse defendit: iniquum scilicet postulat, ut æquum ferat. Id quoniam parum attenditur, multa & Augustini in liberum arbitrium, & Hieronymi in nuptias falsò citantur. quod qui faciunt, in errorem idcirco lapsi sunt, quòd summorum uirorum sententiam ex aliis eorum libris discere noluerunt. Quos si legerent, iis profectò & hic Augustini locus occurreret: Liberum arbitrium quisquis negauerit, Catholicus non est: & Hieronymum nuptias approbare non modò primas, secundas & tertias, sed etiam uicesimas perspicuū esset. Ita isti non modò libenter errant, uerum etiam errori suo apud summos uiros patrocinium quærunt.

#### QVINTA REGVL'A.

**I**llud quoque magnoperè fugiendum est, ne ex scripturæ uerbis quæ citasti, captiosam, ac sophisticam inferas consequentiam. Quā uiciosam esse faciliè intelliges, si ad eundem modū alias fingens, eas falsum aliquid cōcludere animaduertis. Dialectica hic prorsus necessaria: quæ quoniam à plerisque aut nescitur, aut non adhibetur, fit ut disputatorum, & hæreticorū fraudibus sæpe capiantur, quemadmodū tibi quoque usu uenisse

in

*Lib. 3. Hy  
pognos.*

in iis consequentibus quæ ex scripturæ testimoniis abs te productis elicere conatus es, inferius demonstrabimus. Sophismatis atq; captiunculis uti nunquam certè licet, cum id sit erroris mendaciiq. asylum: sed in scripturarum tractatione, non furtum illud sed sacrilegium, non improbum facinus sed detestandum prodicionis scelus existimandum est. Sic enim & ueritas proditur, & inextinguibili scelere mendacium defenditur. Qui sophisticè loquitur, odibilis erit.

#### SEXTA REGULA.

**Q**uemadmodum in cæteris disciplinis ad *Eccles. 37* veritatis cognitionem perueniendi methodus ac uia est, à planioribus atque facilioribus ad obscuriora procedere, ita in scripturarum tractatione faciendum est. Obscuriores enim loci à manifestis & apertis illustrandi sunt, nō contrà clari & illustres à difficilioribus obscurandi. Exempli causa aliquid subiiciam, ex quo quid uelim perspicuè intelligetur. Nihil ad liberi arbitrij confirmationē, etiam post originale peccatum, apertius dici potest quàm illud quod in Genesi scriptum est Dominum irato Cain dixisse: Sub te erit appetitus tuus, & tu dominaberis illius. Quæ autem contra uoluntatis libertatem scripturæ loca producis,

H      obscura

obscura sunt, neque aliquid ad illustrandam  
atque explicandam hanc quam è scriptura  
proferimus sententiam, lucis adferre pos-  
sunt. Quæ igitur à te scripturæ loca produ-  
cuntur, ex hoc illustranda sunt, non contrà.  
Qui sciunt quid sit interpretari, atque ex-  
plicare scripturas, ij quantum habeat æqui-  
tatis hæc regula, quamque sit rectæ rationi  
consentanea, facile intelligunt. Nec aliud

*Li. de pec-* sensit Augustinus, cum ita scriptū reliquit :  
*cat. me-* Inhærendum est iis quæ in scripturis aper-  
*rit & re-* tissima sunt, ut ex his reuelentur obscura.  
*miss.*

#### SEPTIMA REGULA.

*August.*  
*Epist. 7.* **S**eptima regula ex Augustini uerbis, quæ  
*ad Mar-* suprâ quoque exposuimus, sumitur: Si  
*cellin.* manifestissimæ certæque rationi, inquit, ue-  
lut sanctarum scripturarum obiicitur aucto-  
ritas, non intelligit qui hoc facit, & non scri-  
pturarum illarum sensum, ad quem pene-  
trare non potuit, sed suum potius obiicit  
ueritati, nec quod in eis, sed quod in seipso,  
uelut pro eis inuenit, opponit. Nulla uerò  
neque certior, neq; manifestior ratio, quàm  
ea quæ ex quotidiana sumitur experientia.  
Nihil autem est, quod sæpius experiamur  
in nobis, quàm liberum uoluntatis arbitriū.  
Neque enim dicere, neque facere aliquid  
possumus, quin uoluntatis experiamur li-  
bertatem,

bertatem, quemadmodum initio ostendimus. Si igitur scripturarum testimonia perperam abs te producta esse, si clarissimam apertissimæ rationis atque experientiæ lucē à te oppugnari dico, cum libertatem uoluntatis oppugnās, non est quod mihi succenseas, cum Augustini uestigiis insistentem, me hoc dicere ueritas ipsa compellat, quemadmodum in refutandis allegationibus tuis inferius ostendemus. Hæc uerò regulæ diligenter notatæ, non solum ad intelligendum, sed etiam ad refellendum errorem tuum plurimum proderunt: ex quibus perspicuum erit, omnia argumenta tua scripturarumque loca, aut contra aliquam istarum, aut contra plures, aut certè simul contra omnes esse collecta.

## PRIMI SCRIPTURAE LOCI

AB ADVERSARIO CITATI

REFUTATIO.

**Q**Uod igitur ex Ezechielis cap. 7. primo loco citas, falsum est. Neque enim in eo capite scriptum est omnem hominū cogitationē esse malā omni tempore. Cæterum si ita in uestris Bibliis scriptū autumas, lege totum illud caput, & de quorū hominū cogitationibus propheta loquatur, intelliges.

H 2 Neque



Neque enim de quibuscunque hominibus, sed de impiis, scelestis, obstinatis eo loco propheta loquitur, quorum cogitationes si quis malas dixerit, cum eo non magnoperè pugnabo. Tu uerò in eam sententiam profers, ut ad tollendum liberæ uolūtatis arbitrium pertinere uideatur. Quod quàm captiosum sit, ac sophisticum, quis tam cæcus qui nō uideat? Ex particulari siquidem aliquid uniuersale ac generale concludis. Sed faciamus ita scriptum esse quemadmodum uis, scripturæque sententiam à te religiosissimè productam esse fingamus. Num erit consequens, omnes omnium hominum cogitationes malas esse? Minimè uerò. Neque enim de omnibus hominibus propheta tū loquebatur. Quod si ille dixisset, certè piis hominibus in Deumque mente, & cogitatione suspensis fecisset iniuriā. Quorum si cogitationes bonæ sanctæque non essent, Christus à Magdalena optimam partem electam esse non diceret. Quamquam autem illud obtineres, omnes hominum cogitationes malas esse, non esset tamen consequens, in hominibus non esse liberam uoluntatem. Quod sanè consequens esset, si propheta negaret, aut humanas cogitationes corrigi, aut hominem nihil unquā boni cogitare posse. Cū uerò neq;

hoc

*Lucæ. 10.*

hoc ille dixerit, neque illum dixisse possitis fingere, quæ (malum) hæc est uestræ frontis audacia? imò quæ inscitia? quod nouum disputandi genus? Atq; ut quàm Dialecticè sis peritus intelligas, uide ne eo prophetæ loco quem ut liberum euertas arbitrium, temerè imperiteque producis, nostram sententiam adiuuans, ipsum potius confirmes atque corroboret. Hoc enim est consequens, Hominis cogitationes malæ sunt: Homo igitur habet liberum arbitrium: Beatus Augustinus, melior, ni fallor, Dialecticus quàm tu, uel ego, ad hunc modum argumentatur, ut liberum arbitrium probet: Quis peccat in eo, inquit, quod uitari non potest? Peccatur autem, ergo caueri potest. Eodem modo ex prophetæ uerbis abs te productis argumentor: Homo, ut dicis, malè cogitat, potest igitur id agere, ne malè cogitet. Si id potest, habet igitur liberum uoluntatis arbitrium. Vides ut abs te producta sententia nobiscum facit, non contra nos? Nobiscum, si rectè argumenteris; contra nos, si uiciosè.

*Lib. 3. de  
libero ar-  
bitr. c. 17.*

## SECUNDA REFUTATIO.

**N**Ec minus in citando altero scripturæ loco sophisticè captiosèq. agis, quàm suprà egisti. Neque enim inter illud quod citas, & illud quod inde concludis atque inferis, plus

est connexionis quàm inter istas duas propositiones: Baculus stat in angulo, Deus igitur non est in cœlo. Sic enim argumentaris: Quod natum est ex carne, caro est, liberum igitur non habemus arbitrium. Quid potest absurdius, quid ineptius dici? Quis enim animam in qua est liberum arbitrium, carnem unquam esse dixit? Anima siquidem, ut de spiritu Christus ait, carnem & ossa non habet. Quale est igitur hoc tuum consequens? Quod natum est ex carne, caro est. Liberum igitur animæ, id est spiritui, deest arbitrium. Neque uerò nunc scrupulosius quid hoc loco caro significet quærendum est. Quicquid enim significet, satis est, quòd ex ea contra liberum uoluntatis arbitrium inferri nihil potest.

### TERTIA CONFUTATIO.

**Q**Uod abs te tertio loco allatum est, nihi-  
lo magis quàm superiora liberū oppu-  
gnat arbitrium. Quicquid enim de carnis af-  
fectu dicitur, nimirum quòd sit mors, quòd  
legi Dei subiectus esse non possit, uerissimū  
est. Sed quid ad causam? Neque enim libe-  
ra hominis uoluntas carnis affectus est, sed il-  
la quæ carnis affectui repugnare debet, cui si  
obtemperauerit, moritur. Quis nesciat istum  
carnis affectum legi Dei esse contrarium?

Longè

Longè autem aliud est liberum uoluntati<sup>s</sup> arbitrium, cui alterutrum, ut aut legi Dei, aut affectui carnis obtemperet, concessum est. Neque enim fieri potest, ut aut lex Dei carnis affectui, aut carnis affectus legi Dei subiectus sit. Liberum autem arbitriū prout uoluerit, uel huic, uel illi sese subiicere potest. Viciosè igitur argumentaris, teq. Apostoli locum quem producis, non intelligere probas. Tua ergo conclusio adeò sophistica est, ac si ex eo quòd ignis est calidus, aquam non esse frigidam demonstrare uelles. Tantum enim interest inter carnem, & spiritum, inter liberum arbitrium, & carnis affectum, quantum inter ignem, & aquam. Ita tertiū sophisma tuum haud magno negotio discussum à nobis, in fumos uanescit ac defluit.

#### QVARTA CONFUTATIO.

**N**ON minori sophismate quarto loco quā superiore usus es. Cū enim dicis: Nō sumus idonei ex nobis cogitare aliquid boni, sed sufficientia nostra ex Deo est. Deinde ex eo inferis, nos omnino in uniuersam nihil posse, dico te fallere, fraudemq. cōmittere, quæ propria sophistarum, à dicto secundum quid, ad dictum simpliciter uocatur.

Lege Aristotelis Elenchos, & quantum hæc fallacia ualeat intelliges. Exempli causa hoc à Dialecticis adferri solet. Aethiops albos habet dentes, igitur albus est. Captiosum argumenti genus ac sophisticum, cui tuū dissimile non est. Cuius fallaciam ut intelligas, age, alia eisimilia proferamus in medium. Num igitur consequens est? Mulier absque uiri auxilio concipere non potest, igitur concipere non potest. Ager nisi sementem acceperit, triticum producere nequit, triticū igitur nullo modo producere potest. Palmes uuam non fert, nisi in uite permanferit, igitur nō fert. Centurio sine Regis auxilio uincere hostem non potest, igitur non potest uincere. Omnia hæc argumenta tuo similia, captiosa sunt ac sophistica, tuum igitur huiusmodi sit necesse est. Hæc non abs re exempla protulimus, quæ ad hanc materiam illustrandam maximè pertinent, quibus etiam diuinæ literæ utuntur, Animæ nostræ Christi sponsæ dicuntur. Despondi uos uni uiro, ait Apostolus, uirginem castam ut exhibeam Christo, τὴν ἁγνήν : cui inhæremus tanquam palmites uiti : qui seipsum uocat uitē, & discipulos suos palmites. Cor da quoque nostra agro, qui uerbi Dei semētē recipit, semen uerbo Dei, gratia rori siue humori,

2. Cor. 11.

Ioan. 15.

Lucæ 7.

2. Cor. 9.

humori, quo ager rigatur ut fructus adolescat, non incōgrue comparatur. Quid? Nonne milites Christi sumus, & ut ad uictoriam peruenire possimus, atque immortalitatis gloriam consequi, in acie stantes spirituali proelio quotidie dimicamus? Vt igitur neq; mulier absque uiro cōcipere, neque palmes absque uite, neque uitis absque palmitē, neque ager sine semine, neq; semen sine agro fructum adferre, neque miles absque Regis auxilio certam uictoriam adipisci potest; ita neque Dei gratia sine nostro studio & diligētia, neque nostrum studium sine Dei gratia & auxilio bonorum operum fructus adferre potest. Vnde diuinitus noster Augustinus: Qui creauit te sine te, nū iustificabit te sine te. A creādis enim hominibus nihil exigit Deus. Quid enim exigeret ab iis qui nondum erant? A reformandis autem & iustificādis hominibus passim in scripturis exigit ut credant, resipiscant, poenitentiam agant, ad cor redeant, orent, ut remissionem peccatorum & gratiam accipiant. Habes superius Ambrosij sententiam his uerbis: Vult Deus omnes saluos fieri, sed si accedant ad eum. Non enim sic uult, ut nolentes saluētur, sed uult impios saluari si & ipsi uelint. Vnde Chrysostomus quoque nec uoluntatem si-

Tomo 10.

serm. 13.

de uerbis

Apost.

In 1. ad

Tim. cap.

2.

ne



ne gratia, nec gratiam sine uoluntate quicquam operari posse confirmat. Et Paulus nos  
*1. Cor. 3.* Dei adiutores locat. Item Euangelista Mar-  
*Marci 16* cus Dominum suis discipulis cooperantem ostendit. Quæ omnia & scripturarum exempla, & doctorum testimonia eò pertinent, ut & fidei nostræ rationem, & auxilij gratiæque Dei in nobis necessitatē, & argumentorum, imò sophismatum tuorum fallaciam intelligas. Sed quid dico tuorum? Non enim hæc tua sunt sophismata, sed istorum qui te quoque suis fraudibus captum, adhuc irretitum tenent. Quorum ita detestabilem impietatem dolosque sacrilegos execror, ut tui me ualde misereat. Ita tuam perniciem meum dolorem amor erga te meus facit.

## V L T I M V M S O P H I S M A

### VBERIVS TRACTATUR.

**S**ed quoniam Dei beneficio te, mi frater; aliquando istorum & imposturæ ac fraudem intellecturum, & perfidiam saniore cōsilio declinaturum esse confido, grandem illusionum deceptionumque quibus discipulos suos fallere consueuerūt, acerrimum tibi demonstrare constitui; ut quot ex hoc uno scripture loco, Nos sine Dei auxilio nihil posse, sophismata, quot captiones ab istis eliciantur, intelligas. Sic ergo argumentari solent: Sine  
 Dei



Dei auxilio nihil potes, nullam igitur bene  
faciendi potestatem habes, aut quod tantū-  
dem ualet, impossibile est te bene uiuere,  
uel Dei præcepta seruare. O bone Deus quid  
audio! Qualis ista conclusio? qualis Diale-  
ctica? An quod Deus potest, id tam exiguum  
est, ut ex eo inferri debeat nos nihil omnino  
boni posse, quia sine illius auxilio nihil pos-  
sumus? Cum aliquis tibi dicit te sine alterius  
auxilio nihil posse, ex eoq. tibi illud impossi-  
bile esse concludit, hoc profectò uidetur di-  
cere, Is sine quo illud non potes, nihil habet  
potestatis, aut si quid habet, minus tamen ha-  
bet quàm par est, aut certè inexorabilis est,  
neque unquam tibi suo fauore auxilioque  
subueniet. Ita ex istorum argumentatione  
sequitur, Deum aut inualidum atque impo-  
tentem, aut adeò inexorabilem esse, ut homi-  
ni opem ferre nunquam uelit. Sed istorum  
argumentum Dialectico more explicemus.  
Quod ut rectum sit, hunc modum habeat ne-  
cesse est. Sine Dei auxilio homo nihil boni  
potest, Dei autem auxilium ut hominem ad  
bonum adiuuet, inualidum est: aut certè isto  
modo, Deus autem homini opem auxiliūue  
non feret, igitur homo nihil boni potest. Sed  
in hoc argumento assumptio siue minor fal-  
sa est, ex quo in hac ratiocinatione cōtra Dei  
hono-

honorem & gloriam nescio quam latere blasphemiam intelligi potest. Hinc enim sequitur Deum aut minus potentem, aut minus bonum esse. Itaque aduersarij in primam rectè interpretandi explicandiq. scripturas regulam peccant. Illud enim hoc loco prætereo, illorum argumentum captiosum ac sophisticum esse.

Nos igitur melius, & Dei non modò gloriæ, sed etiam uerbo conuenientius, quàm impostores tui, ad hunc modum argumentamur: Sine Dei auxilio nihil possumus, omnia ergo possumus, neque quicquam nobis impossibile est. Nostra namque conclusio hoc fundamento nititur: Deus omnia potest, nosq. uult adiuuare. Sic & Apostolus Dei bonitatem potentiamq. considerans: Omnia possum, inquit, in eo qui me confortat. Et Christus in Ruangelio: Credenti omnia sunt possibilia. Cur id? Quia Dei auxilium efficacissimum est. Ex eo igitur quod Dei auxilium nobis est necessariū, non impossibile aut difficile esse bene uiuere, sed potius id esse facile colligendum est. Deus enim adeò bonus est, ut opem auxiliumq. suum, quo nihil efficacius, nihil potentius, petenti deneget nemini.

A D.

## ADVERSARII EX VNA EA-

demque scripturæ sententia con-  
traria inferunt atque con-  
cludunt.

**S**ed ex hoc uno scripturæ loco quæ ex illo  
rum sententia non rectè producis, cōtra-  
ria ab aduersariis inferri demonstrandū est, ut  
hinc eorum argutas fraudes ac dolos clarius  
intelligas. Quid igitur isti? Ex hoc, quem di-  
ximus, loco bonū modò facile, modò diffi-  
cile, iā possibile, paulò pòst impossibile esse  
definiūt, prout & ad persuadendū imperitis  
quod uolunt, eosq. fallendos necessariū, &  
ad studia conatusq. suos exequēdos id com-  
modum existimant. Quis nesciat eorum cō-  
munem decantatamq. sententiā, scripturas  
sacras intellectu adeò faciles esse, ut in iis ni-  
hil obscurū, nihil difficile, quod non ab om-  
ni sexu & ætate legi atque intelligi possit?  
Vnde & nos à se iure meritoq. reprehēdi pu-  
tant, quòd scripturā ab omnibus legi nolu-  
mus, neq; ut pro arbitrio suo singuli eam in-  
terpretentur explicētq. permittimus. Si igi-  
tur ex iisdē scripturæ uerbis, quibus isti bo-  
na opera nobis impossibilia esse probare co-  
nantur, ad eundē modū argumenter, ut scri-  
pturam intellectu non modò difficilem, sed  
etiam

etiam impossibilē esse demonstrem, quid de illorū impostura dices? Id uerò mihi longè  
*Ioan. 15.* facillimū est isto modo: Sine Dei auxilio nihil possumus. Scripturas igitur intelligere nō solum difficile, sed etiā impossibile est. Illud enim mihi facilē concedes, scripturæ intelligentiā in bonis iure numerari. Si igitur ex eo, quòd sine Dei auxilio nihil boni fieri potest, bonū ἀδυνάτον, impossibile esse concludis, scripturā quoque intelligere, quod sine dubio bonū est, homini impossibile esse fatearis necesse est. Longè uerò aliter isti argumentantur, scripturamq. sacrā non obscurā ac difficilem, sed potius planā ac facilem omnibus esse pronūciāt, idq. ex eodem loco. Nam absque Dei auxilio & spiritus sancti munere neque scripturæ rectē intelligi, neque alia bona opera fieri possunt. Illud iā ab aduersariis quæro, cur ex uno eodemq. scripturæ loco contraria tanquam frigidū & callidū colligunt? Cū bona opera impossibilia esse contendunt, ita argumentantur: Sine Dei auxilio fieri nō possunt, igitur fieri nullo modo possunt. Porro cum à nobis eodem modo urgentur: Scriptura quoque sacrā sine Dei auxilio intelligi non potest, ergo nullo modo intelligi potest: non modo negant istud consequens, uerū etiam  
 ex

ex eo, quòd Dei gratiam & auxilium facile consequi possumus, scripturam facilem esse concludunt. Quæ igitur paradoxa imò ænigmata cum istorum oratione cõferri queunt? Quis tanta copia & facultate dicendi prædictus & instructus, quæ oratio tam facunda, ut istorum imposturam ac fraudem, quibus imperitam multitudinem capiunt, & mendacio fallente decipiunt, cum ex eadem scripturæ sententia, ex iisdem Dei uerbis pugnantia inter se atque contraria colligunt, satis explicet? Non mihi si linguæ centum sint, oraque centum, ferrea uox, omnia technarum percurrere nomina possim. Sed non his finibus continetur audacia, nec arguta calliditas paucorum deceptione contenta est. Nam si aduersariis respondeam: Qui fieri potest, ut scriptura sit omnibus adeò facilis atque perspicua, cum eam à tot summis doctissimisq. uiris intelligi non potuisse dicatis? statim illud ab iis audiã: Scriptura sine Dei munere & spiritus auxilio intelligi non potest, idèoq. ab omnibus comprehendere nequit. Ergo secundum uos eadè & facilis & difficilis, eadem & perspicua & obscura una eademq. ratione monstratur. Quid cum ministrorum suorum, qui monachi fuerunt, continentiamq. quam professi erant,

erant, seruare debebant, sacrilegas & incestas nuptias defendere student? Nonne ut castitatem impossibilem esse, illosq. continere non posse probent & ostendant, eodē argumento utuntur, quo scripturā quoque facile intelligi posse contendunt? Itaque hoc modo ratiocinari solent: Scripturæ sententia est, hominē nisi Dei beneficio ac munere continere non posse. Continentia igitur homini impossibilis est. Quid ais bone uir? Modò aliter loquebaris, cū ex eo quòd scriptura absque Dei auxilio & munere intelligi non potest, eam omnibus facilē ac perspicuam esse diceres. Nunc uerò te negas continere posse, propterea quòd absque Dei munere & auxilio continere nemo potest. Cur ex una eademq. scripturæ sententia pugnantia contrariaq. inferis? Nonne metuis ne ista tua fraus, astutia, sycophantia intelligatur ab omnibus? Sed quoniam ad hanc quæstionem isti respondere nō solent, ego pro iis respondebo. Facilē intelligebamus, inquit, istos principes adeò callidos non esse ut argumentorum nostrorum fraudem atque fallaciam perspicerent. Itaque nihil erat quod uereremur, ne ab iis nostra pròderetur astutia. Eorum autem fauor nobis erat necessarius, ut uiolato à nobis conti-

continentiæ uoto, iis tanquam lenonibus, impudiciæque nostræ patronis uteremur. Tale uerò patrociniū usqueadeò nobis necessarium ne sperandum quidem uidebatur, nisi iis continentiam impossibilem esse antè persuasissemus. Alio autè modo id illis persuaderi probarique non poterat quàm isto, quo usi sumus necessariò. Nā si ita non egissemus, omni patrocinio ac præsidio destituti non solum in prælatorum nostrorum manus incidissemus, uerum etiam ab iis iuxta leges atque cōstitutiones ordinum quos deserueramus, seuerè coërciti iustas pœnas ac debitas dedissemus. Sapientis est impendens periculum prudenti uitare consilio. Vetus quoque sentētia est: Nequicquam sapit qui sibi nō sapit. *μὴδὲ σοφίῃς ὅστις οὐκ αὐτῷ σοφός.* Sed heus tu, itane principes ac nobiles lenones dicendos putas? Ego uerò non accusatoriè, sed, ut ille dicebat, Latinè, purè, naturaliter loquor quemadmodū à matre didici. Qui ab hinc quadraginta annis eam exercebant artem quam isti modò exercent, ij toto orbe terrarum lenones dicebantur, & erant. Nam si quis tum domi suæ Veneris officinā ita instituisset ut in ea sacerdotibus, monachis, monialibus aliisque mulieribus lecti cōmunes essent, illique dedicata Deo corpora

I uel

*Cicero in  
Verrē o-  
rat. 7.*



uel cum publicarum libidinū uictimīs, uel cum alia qualibet muliere nefaria pollutione fœdarēt, nō is Dei Euangelista aut Apostolus, sed leno uocabatur, propterea quòd ab ecclesiæ nascētis exordio usque ad illa tēpora omnibus Christianis insitū erat atque persuasum, eos qui continentię uoto sese astrinxissent, neque uxorē ducere, neque liberis operā dare, imò uerò libidini seruire sine summo adulterii crimine possent, quēadmodū etiā in libro de habitu uirginū Cyprianus ostendit his uerbis: Dum ornari cultius, dū liberius euagari uirgines cupiunt, esse uirgines desinunt furtiuo dedecore corruptæ, uiduæ antequā nuptæ, nō mariti, sed Christi adulteræ, & quæ sequuntur. Quales igitur istorū nuptiæ sint habendę perspicuū est. Ego itaque ueram rerum appellationē mutare non didici: ut iis aliud quo indignæ sunt nomen imponam. Ad hæc istis principibus persuadere operæ precium erat, illos ad intelligendas diuinas literas non minus idoneos esse quàm theologos, qui etatē in earū studio & lectione cōsumunt. Sed quoniā isti uix literas attigerant, & earū studio incumbere grauabātur, hoc quoque addēdū erat, scripturę intelligentiam non studio & labore, sed Dei munere quod omnibus expositū  
atque

atque obuiū est, cōparari. Neque enim aua-  
rus aut tenax est Deus, cuius in omnes bene-  
ficia iugiter manant, & affluenter exuberāt.

Sed si illi uobis respondissent: Si Dei mu-  
nera ita facilē capiūtur ab omnibus, si adeo  
exposita sunt quibusuis atque obuia, cur er-  
go continentiae donum uobis difficilius est  
quā nobis munus intelligēdi scripturas? Si  
uobis, inquam huiuscemodi uerbis principes  
respōdissent, in quas angustias uos illorū cō-  
trulisset oratio? Sed uerisimile est uos istud  
discrimen à nobilitate nunquā ueritos esse,  
cuius animos tanto in Theologos, quorū of-  
ficiū erat defensio ueritatis, odio uos inflā-  
maturus esse non dubitabatis, ut eos nullo  
modo dignarētur audire. Itaque Theologis  
(qui soli uobis timēdi uiderētur, propterea  
quod ii qualia essent uestra sacrilega & ince-  
sta coniugia facilē nobilitati ostendere pos-  
sent) non ratione reiectis, sed ui repulsis, in  
principū animos ita uos insinuaſtis, ut ii tan-  
quā uestri lenones impudicitieq̃. uestræ pa-  
troni illa incesta uestra coniugia ui & armis  
defenderēt. Magna est, iuxta inclyti oratoris *Pro Mi-*  
elogiū, illecebra peccandi impunitatis spes. *lone.*

Quā cū uobis uideretis esse propositā, nihil  
erat quod nobilitatis nō solū patrociniū, sed  
etiā armis tecti, uobis ab illis quondā prepo-

fitis uestris, nihil quod à monasterii legibus,  
nihil quod à cuiusquã seueritate metuẽdũ  
putaretis. Sed quoniã, ut est apud Comicũ:  
Improbus est homo qui beneficium  
Scit sumere, & reddere nescit:  
ut ingratitudinis, in qua nihil mali nõ inest,  
notam effugiatis, illis uestris defensoribus  
omnia sacra & prophana diripienda obtuli-  
stis. Ita manus manũ fricat, & muli mutuũ  
scabunt. Sed ut ad propositum reuertamur,  
non est dubiũ quin is animus, ea mens con-  
cionatorũ, imò impostorũ uestrorũ fuerit,  
qui non ignorabant illa quæ diximus, argu-  
menta sophistica & captiosa esse, sed quid di-  
ceret nõ curabãt, modò nobilitatis animos  
in suam traherent factionẽ, ut illius patroci-  
nio armisq. tuti, uotorumq. suorum ac re-  
ligionis quam professi erant, abiecto iugo,  
per omnia licetia genera liberẽ uagarentur.  
Vobis igitur o principes, egregiẽ illi quidem  
ex eo quod sine gratia Dei uota Deo nũcu-  
pata seruare non possunt, continentia im-  
possibilem esse probarunt: uos autẽ in eos  
ita humani fuistis, ut illorũ excusationẽ tan-  
quam æquissimam rationiq. maximẽ cõsen-  
taneam amplexi sitis. Nihil est tam regium,  
tam liberale, tamq. munificum, quàm opem  
ferre supplicibus, fouere afflictos, liberare  
peri-

periculis homines. Sed ad te redeo mi frater, à teq. peto ut in nostros sacerdotes, monachos, aliosq. quoslibet nostrorum, si forte ii bona opera nō faciunt, neque tāta sunt integritate uitæ morumq. honestate ac uirtute præstantes, quantā ab illis fortè desideras, pari ac simili æquitate uti uelis. Ministri siquidē uestri bona opera non modò difficilia, sed etiam impossibilia esse uobis persuaferunt, idq. eodē argumento ac eadem scripturæ auctoritate qua se continere non posse comprobauerunt. Quibus cū fidem habeatis, illorumq. incontinentiā excusatā habeatis, à te humanitatis iure peto ut quēadmodū iis bona opera nullo modo fieri posse asseuerantibus credis, ita nobis ignoscas nostrosq. excusatos habeas, si ea quæ præstari nullo modo possunt, nō præstātur à nobis. Nihil hac postulatione iustius, nihil equius cogitari potest. Desināt ergo ministri uestri in perditos nostrorū mores inuectiuas orationes scribere, nec deinceps in cleri uicia diserti odiosis atque importunis uocibus perstrepan, ut factionis suæ principes in nostri odiū inflamment, eorumq. mucrones in nostrum sanguinē acuant. Nam si nostri minus religiosè atq; integrè uiuūt, nonne eos cum ministris uestris excusari equū est, cū

illi uos docuerint eandē utrobique non modò difficultatē, sed etiam, ut ita dixerim, impossibilitatē esse? Certē pares utrinque culpæ pari uel seueritate damnandæ, uel ueniæ dignæ iudicandæ sunt. Cur igitur his absolutis illi damnantur? Nonne secundum uos eadē utrinque necessitas? Quid ministris uestris humanius? quid benignius? qui propter necessitatem nescio quam se uenia dignos, alios autē quos iuxta illorū sententiā eadē necessitas sequitur, non modò indignos, uerū etiam supplicio dignissimos iudicant. Porro si sacerdotes ac monachos ob suā improbitatem uitæq. impuritātē à uestris principibus iure puniri, meritoq. suppliciis, bonorum direptione, morte denique affici existimas, si in illos uestra factio inaudito crudelitatis ac seuitiæ genere iure grassatur, illud etiā crede, hos probos esse, bonaq. opera facere posse si uelint. Dum enim hæc ab illis nullo modo fieri posse contendis, & tamen in illos propterea quòd ea quę præstari nullo modo possunt, ab iis minimè præstantur, odio inflammatus tanto furore baccharis, uide ne te ipse crudelitatis, sæuitiæ atq. immanitatis accuses, imò te tuo ore condemnas, cū in his idem punias quod in illis tãquam iure factum laudas atque defendis.

Si

Si factionis uestræ ministros amore, beneuolētia, fauore prosequeris, cur de nostris eadē ratione non iudicas? Qui si bona opera facere nullo modo possunt, non crudeliter puniendi, sed potius misericordia prosequēdi sunt. Si uerò probi esse innocentiamq. seruare ac bonis operibus operā dare possunt, nō est dubium quin uestri quoque ministri eodē modo continenter casteq. uiuere possint, si continentiae munus à Deo petere uoluerint. Omnia quæcunque petieritis patrē *Luc. 11.* in nomine meo, ait Christus, dabit uobis. Omnis enim qui petit, accipit: & qui quærit inuenit, & pulsanti aperietur. Scitū est illud Augustini: Casti non sumus non quia non *De peccat. merit. et remiss. Cōfess. lib. 6. cap. 11.* possumus, sed quia nolumus. Et alibi, cū illā sapientis sententiam explicasset, Nemo potest esse cōtinens nisi Deus dederit: Vtique dares, inquit, si gemitu interno pulsarē aures tuas, & fide solida in te iactarē curam meam. Igitur si in sententia perseuerans nostros sacerdotes ac monachos, propterea quòd bona opera non faciunt, à uestris principibus iure occidi, bonisq. priuari dicis, ex ea scripturę sententia qua bonum opus fieri nullo modo posse probare conatus es, cōtrā facilia esse bona opera te iam asserere, atque ad hūc modum argumentari necesse est: Si-

ne Dei, auxilio bona opera fieri nequeunt, facilia sunt igitur, non impossibilia. Quid enim nobis potest esse difficile? quid impossibile? si tale habeamus auxiliū. Quod cū nostri Doctores uiderēt, lōgè aliter quā uos ex illa quā producitis scripturæ sententia in hunc modū argumentantur: Sine Dei auxilio nihil possumus, omnia igitur possumus. Nec dubitant cum Apostolo dicere: *Philip. 4.* Omnia possum in eo qui me confortat. Ita quidē Paulus, cuius sententia cū ministrorū uestrorum opinione pugnat *dis ὅτι πρὸς αὐτ.*

Hæc igitur duo in quæstionem uocanda erant, quid ex nobis absque Dei auxilio, quid cum illius opē auxilioq. possemus. Si ne illo nihil, cum illo, ut ait Apostolus, omnia possumus. Qui cum Dei auxilio omnia potest, is profectò aliquid potest. Et si omnia possibilia sunt credenti, consequens est credentem boni plurimū posse. Quæ cū ita sint, animaduertis frater, te à nobis non solum exarmatum esse, uerū etiam tuo gladio iugulari. Nam eo scripturæ loco quo nos maximè oppugnari putabas, & tuum refutamus errorem, & nostræ fidei ueritatem ostendimus. Vides igitur quibus fraudibus ac sophismatis uos ministri uestri fallāt atque decipiant? Id quoties mihi uenit in mentem,



mentem, quanto me arbitraris dolore cruciari, cum te iis fidem habere uideam qui modò hoc modò illud asseuerantes, tuo candori tam petulàter illudunt? Hinc enim bona opera se facere posse negant, propterea quòd illa sine Dei auxilio nò habètur: inde scripturam sacrà facile ab omnibus intelligi posse contendunt, propterea quòd illa intelligentia nisi à Deo non habetur. Et cum ex eadē sententia facultatem & difficultatē inferant, iis tamen credis. Dicunt tibi se cōtinere non posse, quia id sine Dei munere fieri non potest, ideoq. illos ab impudicitia crimine absoluis, quēadmodū ut facias à te petunt, & cum bona opera à nobis fieri posse pernegēt, quia Dei dona sunt, nos tamen secū absolui nolunt, sed potius gladijs uestris interficiēdos obiiciunt. Tanta est in iis equitas, tanta humanitatis cōstantiaq. ratio. Tu verò frater, illorū blanditijs ita te dementari sinis ut pugnantia inter se contrariaq. credas, Deum ipsum si illi negarent in cēlo non esse, forsitan crediturus. O incredibile illorū calliditatem: o singulare fraudis genus, summa cum iniquitate, sœuitia, crudelitate coniunctū: Neque uerò ignoro te nunquā illorum fraudes & technas satis diligēter cōsiderasse, quòd sit ut minus mirādum sit te illos

los dolos ac sophismata nondum satis acutè  
uidisse. Sed quoties diuinas literas ab iis  
adeò callidè tractari animaduerto, quoties  
illorum argumentorum, imò captionum ue  
nit in mentem, maximè misereor eorū quos  
illi sic mendacio fallēte decipiunt. Quæ cū  
ita sint, omnes Caluinos, ac Bezas in arenam  
uocare nō dubito. Nam apud quemuis iudi  
cem qui quod bonum, quod malū ac uicio  
sum argumentum sit intelligat, omnes istorū  
consequentias quibus in tuis literis usus es,  
sophisticas, fallaces, captiosas esse monstra  
bo. O magna uis ueritatis, quæ contra homi  
num ingenia, calliditatem, solertiā, contraq.  
fictas omniū insidias facilè se ipsa defendat.  
An non igitur calamitatem tuā iure deplo  
rò, cū te desertis ecclesiæ castris, ac relictis  
antiquis illis doctoribus ac magistris, istis a  
nimæ tuæ corruptoribus qui diuinarū litera  
rū sanctitatē adeo impiè nefarieq. uiolarūt,  
addictum, cum transfugis esse uideam? Ex  
pergiscere quæso expergiscere frater, som  
noq. isto negligētiæ socordiēq. discussio, quæ  
hic ad te scribo mente sincera diligenter at  
tende, ut illorum imposturam fraudemq. co  
gnoscas, eaque perspecta ad matris ecclesiæ  
gremium redeas, atque agnitis ueris pastori  
bus tuis, in quos tantum odium iniuria con  
cepisti,

cepisti, salutē tuam credas. Non deerunt uirī  
summa eruditione doctrinaq. pręstātes, qui  
te in nostra castra redeuntem excipiant, ac  
reliquas illorum impostorū fraudes, de qui-  
bus hactenus nihil suspicabaris, aperiant, er-  
roribusq. tuis patefactis uia tibi salutis ostē-  
dant. Nonne iam intelligis quam caliginem,  
quas tenebras illi animo tuo infuderint, ut  
& contraria simul credas, & tecum ipse pu-  
gnes, uerbisq. tuis fidem detrahas, dum ea  
aut uerbis euertis aut factis? Continentiam,  
quia Dei munus est, iis impossibilē esse cre-  
dis, probū ac bonum esse posse neminē exi-  
stimas, propterea quod id nisi Dei ope ac be-  
neficio fieri non potest. Et quoniā impossibi-  
lem esse uirtutē arbitraris, illos quidem tuo  
calculō cōprobas & absoluis, nos uerō, qui-  
bus uirtutem æquē impossibilē esse contē-  
dis, dānandos putas. Quæ igitur est ista men-  
tis tuæ caligo? quæ cęcitas? quæ uel Cimme-  
riæ tenebræ cum hoc fascino cōferendæ? Iu-  
diciū certē tuum & illud acumen ingeniī  
non modō ab ijs retusum, uerū etiam ue-  
neno nescio quo imbutum ac uiciatum sit  
necessē est, ne illorum technas ac dolos intel-  
ligere posses. Sentio me hoc loco prolixiorē  
esse, sed dabis amorī in te meo ueniam. Salu-  
tis enim tuæ desiderium me epistolarem an-  
gustiam

gustiam excedere, pluribusque uerbis quam initio statueram, uti coëgit, ut & aduersariorum imposturam fraudemque perspiceres, & intellectam deinceps maiore studio uitares ac fugeres. Culpa enim illa, bis ad eundem lapidē offendere, uulgari, ut nosti, reprehensa prouerbio est. Satiū est recurrere quā malē currere: *παλινδρομήσαι μάλλον, ἢ δραπετεύειν κακώς*. Verū hāc hactenus.

### Q V I N T A C O N F V T A T I O .

**A** Dhuc Apostoli Pauli sententia niteris quā ex epistola ad Philippēses producis: Deus operatur in nobis & uelle & perficere. unde liberum uoluntatis arbitrium in nobis non esse concludis. Sed hoc tuū argumentum haud minus captiosum ac sophisticum esse quā superiora, facilē demonstrabimus, teque Pauli locū non bene intellexisse planū faciemus, ut deinceps Apostolo Petro potius quā tuis impostoribus credas. Illi siquidē epistolas Pauli facillimas esse dicūt.

**1. Pet. 3.** Sed lōgē aliter Petrus: Charissimus, inquit, frater noster Paulus secundum datam sibi sapientiā scripsit uobis, sicut & in omnibus epistolis, loquens in eis de his in quibus sunt quēdā difficilia intellectu, quæ indocti & instabiles deprauant, sicut & cæteras scripturas, ad suā ipsorū perditionem. Cuius aucto-

ritati

ritati si fidem habendā putares, numquā in istā temeritatem & arrogantiam incideres, ut Apostoli uerbis istam tuā explicationem tāquam Lesbiam regulā adiungeres: sed Pauli mentem atque sententiam ex antiquis patribus, qui locum hunc, quemadmodum inferius ostendemus, aliter quā tu explicāt, disceres. Ceterū ut quod dicturi sumus bene intelligas secundum regulam rectē interpretandi scripturas, quam superius exposuimus, in mentem reuocare debes memoriaque retinere, non scripturæ partem aliquam, sed totam scripturam amplectendam, ei que toti credendū esse, propterea quod eius nulla pars alteri parti repugnat, quemadmodum etiam in Deo scripturarum auctore non inuenitur est & non, aut ulla contradictio. Itaque summoperè cauendū est ne ita diuinas literas explicemus, ut è nostra explicatione aut alterius loci destructio, aut aliqua inter scripturæ sententias cōtradiçtio possit inferri. Vestri certè magistri in hanc regulam maximè peccāt. Sic enim pleraque scripturæ loca exponunt, ut ea inter se tanquam gladiatorum paria committant, scripturamque sanctā scripturæ auctoritate destruant & evertant. Qua in re bonorū animos uehementer offendunt, dum hæretica licētia, ueterū, qui scripturæ

scripturæ loca quæ inter se pugnare uiderentur, conciliare solebant, expositionem præmittentes, atque calcantes, illud solum uidentur habere propositum, illud studiū, ut in scripturis aliquid cōtradictionis inueniāt, unumq. locum alterius peruiacæ explicatione subuertant. Quod sanè Iuliani fuerit atque Porphyrij, qui contra ueritatē ex professo studiosq. latrarunt. Porro tu frater, qui ueritatis inuestigationi uideris incumbere, cū aliqua scripturæ loca producis ut me uoluntatis libertatem non habere confirmes, quid mihi faciundum suades? Scripturæ sententiam cum tua expositione suscipiam? Sed si id fecero, alia clarissima Dei uerba quæ

*Genes. 4.* Dominus in Genesi loquebatur, Sub te erit appetitus tuus, & tu dominaberis illius: tan-

*1. Cor. 7.* quam falsa reiciam necesse est. Quid illam Apostoli sententiam qua hominem suæ uoluntatis potestatem habere confirmat? num falsam iudicabimus? Sed hoc absque nefario scelere fieri non potest. An amplectemur ut ueram? Sed sententiæ tuæ repugnat. Quid enim his duobus locis clarius ad probandū uoluntatis arbitrium liberū, quo non solum cupiditatibus nostris reluctari, uerū etiam bonis operibus operam dare possumus, adferri potest? Hæc equidem ita perspicua sunt,

ut nullius hominis ingenio aut arte in alium sensum detorqueri ullo modo possint. Nam si cupiditati, imò uerò si appetitui meo repugnare non possum, certè mentitus est qui id me posse dixit. Si uoluntatis meæ nō habeo potestatem, profectò falsa sunt Apostoli uerba quibus eam me habere dicit. Hoc autem non est scripturam exponere, sed euertere. Quis igitur uestram non miretur audaciam, qua uni aut alteri scripturæ loco, imò uerò ei sententiæ quam pro uestro arbitrato ac libidine finxistis, tam obstinatis animis adhærere, illamque adeò pertinaciter defendere consueuistis, ut non solum clausis oculis omnia alia scripturæ loca opinionioni uestræ repugnantia prætereatis, uerùm etiam quod alibi scriptum sit non curetis? Ita plerique errare malunt, eamque sententiam quam adamauerunt pugnacissime defendere, quàm sine pertinacia quid uerius sit exquirere. Sed dicet aliquis: Sic scriptum est, ipsius Dei *Matth. 4.* uerba produco, cur ergo contradicitis? Ita & quondam diabolus Christo dicebat: Scriptum est: ipsumque locum facile ostendere poterat: non tamen à Domino illius ueteratoris ac callidi scripturæ uerba recitantis suscepta sententia est. Quamobrè? Quia hæc alteri scripturæ loco repugnabat, quo p̄spicue dictum



dictum est: Non tentabis Dominum Deum tuum. Ad eundem modū si sexcenta scripturæ loca produceres, ut quod in epistola tua facere conatus es, uolūtatis euerteres libertatem, citationem tuam peruersam esse dicerem, non quòd ita scriptum non sit, sed quòd ea mente, eoq. sensu quo à te scriptura producitur, minimè scriptū sit. Video siquidem sensum tuum cum ipsa ueritate, atque adeò cum spiritus sancti mēte pugnare, quā alibi clarissimè ostēdit, ut cūm dicit: Sub te erit appetitus tuus, & tu dominaberis illius. Multa prætereo, sed tamen ut hoc illustrius fiat, aliud exēpli causa proferam. Pauli uerba sunt hæc: Soli Deo honor & gloria. Quis negat? Ex quibus uerbis soletis inferre nos idolorum esse cultores, propterea quòd diuos ueneramur & colimus. Scriptum quidē esse confiteor, sed nego illud eo sensu quem affingitis, esse sumendū. Vos enim hanc Pauli sententiam esse cōtenditis, qui quamlibet creaturam quouis modo ueneratur, eum in contumeliam creatoris idolorū esse cultorē. Sed ista sentētia menti Apostoli, atque adeò spiritus sancti, quæ in multis aliis scriptura locis satis perspicuè declaratur, manifestè repugnat. Is etenim ipse qui dicit, Soli Deo honor & gloria. alibi quoque ait: Gloria, h

1. Tim. 1.

Rom. 2.

nor

nor & pax omni operanti bonum . Et illud: *1. Tim. 5.*  
 Qui bene pręsunt presbyteri, duplici honore digni habeatur. Et ibidē: Honora uiduas *Exod. 20.*  
 quę uerē uiduę sunt . Itē alibi : Honora patrem tuum & matrem tuā. Honora personā *Matt. 16.*  
 senis . Honora medicū . Regē honorificate. *1. Pet. 2.*  
 Honore inuicē pręuenientes. En scripturę sententias quibus septem hominum, qui dii nō sunt, genera colere atque honorare pręcipimur , utique sine contumelia creatoris. Cum ergo mihi locum hunc Pauli opposueris: Soli Deo honor & gloria: ego quoque tibi illa quę modo protuli scripturę pręcepta cantabo , scriptumq. esse dicam etiam hoc : Gloria, honor, & pax omni operanti bonū. Si scriptura ubiq. sui similis ac uera est, certē hic falsa esse non potest . Quid de multis aliis scripturę sententiis dicā, quibus uaria hominū genera uenerari iubemur ? Quas omnes , si in eo sensu quo uultis accipienda est illa Pauli sententia, falsas esse, ipsumq. Apostolum pugnancia loqui, diuināq. literas secum pugnare necesse est . Quo quid absurdius dici possit non uideo . Nunquam enim secū ueritas pugnat, sed mēdaciū ita semper oppugnat ut sibi perpetua stabilitate cōstet.

Nos ergo catholici scripturę loca conciliamus inter se, Paulumq. secum pugnare **K** negamus.

negamus. Diuinas autem literas ubiq; ueras agnoscimus & fatemur. Itaque cū Apostolus diceret, Soli Deo honor & gloria, eum de alio honore & gloria, quā cū alibi diceret, Gloria, honor & pax omni operanti bonū, loqui dicimus. hic de honore ciuili, quo non solum parentes, sed etiā præpositos nostros, omnesq; bonos afficimus: ibi de honore diuino, qui cum homine cōmunicari non potest. Si hanc distinctionem reiicis, sensum quem Apostoli uerbis adeò pertinaciter tribuis, eò pertinere ut scripturam tanquā sibi repugnantē euertas, perspicuum est. Quod cū Christianæ fidei hostes ipsiusq; scripturæ inimici maximè cupiant, quo loco habendi sint qui eorum perfidiam adiuuant, obscurum non est.

Sed ut ad propositum reuertamur, in literis tuis non dissimile peccatum admittis. Certa siquidem ad liberum uoluntatis arbitrium, & bonorum operum merita tollenda scripturæ loca producis, reliqua uerò quibus ea quæ sic impudenter oppugnas, adeò perspicuè demonstrantur, præterire nō dubitas. Vnde aut diuinas literas abs te nūquam lectas esse, sed te ab istis quibus animæ tuæ salutem ita temerè credis, deceptum esse arbitror: aut si hæc scripturæ loca quæ ad libe  
ri ar-

ri arbitrij probationem à me producta sunt, fortè legisti, cùm eorum in tuis literis nullâ facias mentionē, uerisimile est te non ueritatis inuestigationi studere, sed id tantum agere ut me quoque circumuenias, ac mēdacio fallēte decipias. Quod cùm mihi de tuo candore persuadere non possim, iis à quibus deceptum te esse uideo, iure succensco.

Veniamus nunc ad quintum scripturæ testimonium quod nobis opponis, ut quàm falsum sit illud consequens, quod ex eo elicere conaris, intelligas. Apostoli quidem uerba agnoscimus & fatemur: Deus operatur in nobis & uelle & facere; sed cū ex iis tanquā consequens inferas, hominem nihil omnino potentiæ habere, conclusionem tuam uiciosam esse dicimus, propterea quòd ex particulari uniuersale aliquid colligit. Neque enim ab Apostolo ita dictum est: Deus solus & omnino operatur & uelle & facere. quod certè dicendū erat, ut hominem qui est secunda causa, otiosum esse nec quicquam agere, posset intelligi. Illud ergo memoria tenendum est, cùm duæ causæ aliquem effectum unā producunt, tametsi primæ principalique causæ laus præcipua tribui soleat, tamen ex eo non sequi secundam nihil omnino agere. Exempli causa, sit uictoria militum uirtute

ac fortitudine à rege parta. Quam ita cōmemorabit historia ut tota uictoriæ laus regi, nō militi propria esse uideatur. Sic. n. annales referēt: Ille rex hostiū uires fregit exercitūque fudit. Annibal Saguntū expugnauit. Ex quo si quis inferat Annibalē cūcta fecisse, milites nihil: nā is præposterè scriptoris historie mentem intelliget, qui cū primo loco regis uictoris fecerit mentionē, illius quoque milites, centuriones, tribunos alibi honoris causa nominabit, quantaq. illorū uirtus fuerit exponet. Ita scripturæ sacrę, in quibus Deus hominibus loquitur, illorū morē ac sermonis usum imitari uidentur. Quemadmodum igitur ex historia in qua scriptū est ab Annibale Saguntum expugnatū, si quis inferat à solo Annibale absque militū opera Saguntū fuisse captum, nimiū is ineptus ridiculusq. uideatur; sic ex his scripturæ uerbis, Deus operatur in nobis & uelle & perficere: qui inferunt hominem nihil neq; facere, neq; posse, iure ridentur. Sed ex abundanti demus hoc uobis, ut ex Apostoli uerbis rectè argumentari uideamini. Nolo iā nimiū urgere. Sit illud quod uultis consequens, tamen ex eo nō sequitur hominē nihil posse. Quāquā enim alius beneuolentiæ causa faciat quod ego alioqui facere deberē, non est tamen conse-

quens

quens me illud facere nō posse. Sed hoc tuū  
 sophisma clarius intelligetur cū regulam  
 quā suprā posuimus, illi admouerimus. Ad  
 eundem igitur modum argumentemur quo  
 tu, utamurq̃. Dialectica tua, & si consequen-  
 tiæ nostræ falsæ non fuerint, te uerum intu-  
 lisse credemus. Sit igitur hoc è scripturæ pe-  
 netralibus sumptum antecedens, ex quo lō-  
 gè aliter quàm tu, planeq̃. contrarium iuxta  
 tuæ Dialecticæ regulam concludemus. Dixit  
 Dominus Abrahæ: Quia fecisti hanc rem. *Genes. 22*  
 & Christus de Magdalena: Bonū opus ope-  
 rata est in me. Quæro ex te an Dei uerbis cre- *Matt. 26.*  
 dere debeamus? An fortè cū Paulus dice-  
 ret, Deus operatur in nobis uelle & perfice-  
 re; uerum dixit? Deus autem cū opus bo-  
 num ab homine factum esse dicit, falsum?  
 Non est nostrum inter se tanquam pugnan-  
 tia Dei uerba committere. Sit hoc impiorū  
 Luciani, Porphyrij, Iuliani, quorū sacrilegā  
 impietatem uestri ministri, imò magistri, aut  
 imitantur, aut uincunt. Sed ut ad rē redeam,  
 quēadmodum ex hac Pauli sententia Deus  
 operatur in nobis uelle & perficere; tibi licē  
 re putas hanc conclusionē inferre, Homo igi-  
 tur nihil facit: ita mihi ex Dei uerbis quibus  
 bonum opus ab homine factū esse dictū est,  
 inferre liceat: Deus igitur in hoc opere nihil

fecit. Vt enim illic Apostolus nullā cooperationis humanæ cum diuina mentionē facit, ita hic Deus se homini bonum opus facienti opem ferre non dicit. Si Dei auxilium hic, tametsi scriptum non sit, intelligendum esse contendis, eodē modo illic hominis cooperationē, tametsi hoc scriptum non sit, intelligendum esse dicam. Vides argumentum tuum ineptū, sophisticū, uiciosum esse, cū ex antecedente non minoris auctoritatis, quā tuum, eadē argumentandi ratione cōclusionem tuę repugnantē atque cōtrariā infert? Tu ex Apostoli uerbis hominē nihil facere, nihil posse cōtendis; hoc modo ex ipsius Dei uerbis, Deum nihil in bono opere neque facere, neque posse, colligam. En in quantum blasphemix barathrū præclara tua argumentādi ratio deuoluta sit. Si tibi ad hunc modū argumentari licet, cur mihi eodē iure non liceat? Atqui & tua & mea conclusio falsa est: scripturarum uerō sententiæ, ex quibus sumptæ uidentur, uerissimę. Quis igitur adeo Dialectices imperitus, ut hanc argumentandi rationem uiciosam ac sophisticam esse non uideat? Quid, quod regulam illam à nobis superius expositam, cuius hæc summa est, ut totam scripturam sacrā ueram esse credamus, neque unū scripturæ locum per aliū destrua-

mus,



mus, nō sine ingēti culpa calcas & præteris? Quod cū à te fieri uideo, tuamq. argumen-  
tandi rationē modumq. cōsidero, nihil aliud  
existimare possum, nisi te ad scripturam euer-  
tendam omne studiū contulisse. Quid enim  
aliud facere uideris, cū ex uno scripturę lo-  
co id colligis quod alteri repugnat, estq. con-  
trarium? Ego uerò hoc à te peto, ut toti scri-  
pturæ diuinæ fidē habeas. Quid hac mea po-  
stulatione æquius? Porro scripturæ sentētia  
est: Deus est qui operatur in nobis & uelle  
& perficere. Vera sententia, quā ego libēter  
amplector. Sed uide ne quid ei de tuo adii-  
cias. Contrā alterā tibi eiusdē scripturæ sen-  
tentiam profero, qua Deus Abrahamæ dicit:  
Quia fecisti hanc rem: & de Magdalena Do-  
minus: Opus bonū operata est in me. Nihil  
de meo adiiciā. Hæc ergo Dei uerba mecum  
amplectere, & omnis inter nos controuersia  
sublata est. Id si feceris, Deum & hominē in  
bono opere producēdo simul operari nobi-  
scum confiteberis. Vtrumque enim à scriptu-  
ra demonstratur, & uerū est, nec unum repu-  
gnat alteri. Ad hunc modū pax inter nos at-  
que concordia in negotio fidei conciliari po-  
test. A te igitur peto, ut simul & toti scriptu-  
ræ fidē habeamus, & qđ diuinis literis utrin-  
que adiecimus, id tanquā superuacuum, ac

ueritatis inimicum, communiter reiiciamus  
atque damnemus. Scripturæ sententia est :  
Deus est qui operatur in nobis & uelle &  
perficere. Credo & amplector. Cùm igitur  
eadē scriptura testetur ab homine bona ope-  
ra fieri, & ut ea fiant hortetur ac moneat, à  
te petò ut id quoque credas atq; suscipias.  
Illi sententiæ hanc conclusionem adieceras.  
Homo igitur nihil potest, huic ego addide-  
rā, Deus igitur nihil facit aut nihil potest.  
Istæ duæ conclusiones nostræ sunt additio-  
nes, non uerba scripturæ, nec usquam diu-  
nis literis cōtinentur. Hoc igitur iterū à te  
peto, ut uterq; nostrū suæ additioni renun-  
cians, soli nudæq. scripturæ credat, & inter  
nos ilico pax sequetur. Ita enim & tu uerū  
credes esse quod dico, & ego quod tu pro-  
feres in mediū, suscipiā, & tāquam Dei uer-  
bum amplectar. Sic utrique uincemus, &  
pulcherrimæ uictoriæ utriusq; palmā æqua-  
lem & similē gloriā consecuti, non solum de  
errore triūphabimus, uerum etiā eruditio-  
nis atque doctrinæ altiorē cōscendemus gra-  
dū. Hinc enim in faciendis bonis operibus  
homines nihil posse arbitraberis, inde illa  
adiēctione mea in iisdē operibus producen-  
dis, Deū nihil facere me existimare finge-  
bā. Atqui nunc hominē & aliquid facere, & à  
Deo

Deo iuuari didicimus, sine cuius auxilio facere homo nihil posset. Ita legendis diuinis literis uterq; proficimus. Porro aliud est, si id quod scripturæ uerbis de tuo adieceras; adeò pertinaciter retines, obstinateq; defendis, ut quas adiectioni tuæ diuinarû scripturarû oppono sententias, nō digneris audire. Quod si ita abs te fit, nulla in eundē pacis atque concordia ratio inueniri potest. Quale enim est quòd ita sententiā tuā, non quā de scripturarû purissimo fonte hausisti, sed ipsi scripturis adiecisti, sic instituiisti defendere, ut me alias scripturæ sententias opinioni tuæ repugnantes atque cōtrarias, quibus nihil uerius potest esse, cōcordia causa abiicere necesse sit? Ergone pax inter nos nō erit, nisi ego ueritatis proditor ac transfuga effectus, abiecto scuto, manus tibi dederò, in uestraq; castra trāsiero? Sed ut ad propositum reuertamur, tolle ea quæ scripturis sanctis utrinq; adiecimus, & nihil erit inter nos cōtrouersia. Abiice adiectionē tuā, & ego abiiciā meā: tū utraq; scripturæ loca, quæ ppter adiectiones nostras inter se pugnare uidebātur, ambobus uterq; brachiis amplectamur. Igit̃ ut diuinas scripturas recta interpretari possis, hæc tibi regula proposita sit. Cū duo scripturæ loca simpliciter accepta, sibi mu-

tuò

tuò nō repugnant, uterq; suscipiendus, utriq;  
fides habēda est. Quare? Quia scripturæ di  
uinæ nō simul nobis traditæ sunt, sed in plu  
ribus libris diuersisq. temporibus, non ut id  
quod in priori dictum erat, posterior emen  
daret editio, atque ita scriptura scripturam  
euerteret, sed ut ex hac aliquid disceremus,  
quod nō didiceramus ex illa. Prior alioqui  
uana & inutilis iure cēsebitur, si hāc à poste  
riore corrigi necesse est. Qui id quod antè di  
xit, postea mutat & corrigit, seq. fatetur esse  
mentitū, eū neque sapientē, neque uirū bo  
nū existimare cōsueuimus. Deus autē cū  
multa dixisset, si ea pōst corrigeret atq; mu  
taret, nonne stultitiæ argueretur, & illa infi  
nita sapiētia, & bonitas, sibi dissimilis esse iu  
dicaretur? Cū ergo scripturę sententiā sit  
in Genesi: Sub te erit appetitus tuus, & tu  
dominaberis illius, memoria tenendū est, ni  
hil in ullo diuinæ scripturæ libro postea esse  
positū, quod ad huius sententię euerfionem  
pertineret: sed quicquid exinde scriptū est,  
id ad tradēdū nobis aliquid noui, quod an  
tè nesciebamus, illāq. sciētiā quā ex priorū  
librorū fontibus hauseramus, augēdā uale  
re. Cū igitur ex illo Geneseos libro uo  
luntatis libertatē in nobis esse iā didiscisse  
mus, reliquū erat, ut quæ essent arbitrij libe

Gen. 4.

si uires, doceremur. Quod ut intelligere possemus, primæ illi quâ modò cōmemorauimus sententiæ multa alia dei uerba successu temporis accesserunt, ex quibus liberū uoluntatis arbitriū uitiis atque peccatis per se reluctari nō posse, nec satis ualidū ac firmū esse, nisi Dei niteretur auxilio, disceremus. Ita primæ illi sententiæ hanc alteram adiungimus, non ut illā euertamus, sed ut augeamus, & ut audiendo, legendoq. Dei uerbo, ueræ eruditionis atque doctrinæ augmenta capiamus. Porro si id quod initio didiceramus, sequens institutio tolleretur atq; destrueret, nullos certè progressus faceremus, sed priora ædificia dirueremus, ut noua possemus erigere. Proinde quis unquā istorū maiorum finis reperietur? Quæ animi quies & securitas tranquillitas à nobis expectari potest? Quis pictorē qui imaginē in tabula elaboratā sæpius mutat & corrigit, non stultissimū iudicet? Non est igitur diuinæ scripturæ librorū nobis tradita multitudo, ut aut unus ab altero corrigatur, aut ut illi fides haberi possit, hic relinquendus esse uideatur, sed ut in nostrā utilitatē, nostrumq. in Dei cognitione profectū omnes recipiantur à nobis. Quare sæculi nostri, quo Dei uerbum partim suscipitur, partim reicitur, calamitatem,

tem, imò malitiam atq; impietatē iure deplor-  
 ro. Cuius mali causam Satanæ calliditatem  
 & astutiam esse non dubito, ut qui totā scri-  
 pturam nobis eripere non potest, certē dimi-  
 diam eripiat, dū subdola persuasione id agi-  
 ut hunc scripturæ locum sic exponamus, u-  
 illum a nobis nō solū prætermitti, sed etiā  
 euerti necesse sit. O infelix humana cōditio  
 quæ teterrimi hostis decepta consilio, nō so-  
 lum ueritatis lumen amittit, sed etiam cū  
 in densissimas errorū tenebras deuoluta fue-  
 rit, tum demum in clarissima scientiæ luce  
 uersari existimans, malo suo gaudet. Sed ac-  
 te redeo, frater, quē ex illis tenebris tetra  
 caligine ad ueritatis lucem libenter sanē re-  
 uocare. Amplectere igitur, frater, amplecte-  
 re scripturam uniuersam. Quid hæres? quid  
 dubitas? Quæcunque ueritatis spiritus diui-  
 nis literis promulgauit, hæc uera esse crede.  
 Nihil nec in Deo nec in Dei uerbis secū pu-  
 gnare, sibiq. cōtrarium esse potest, in quibus  
 si qua uidetur esse contradictio, id non aliū-  
 de quā à nostra ignorantia, imò arrogantiā  
 proficiscitur. Nos enim Dei uerbis, quod no-  
 bis pro nostra libidine uidetur, adiicimus.  
 Nos ad diuinas literas explicandas eam opi-  
 nionem quam nostra ignorantia peperit, im-  
 pudenter adferimus. Nos sacrosanctæ scri-  
 pturæ

pturæ maiestatem deprimentes, ad nostros affectus accommodamus. Nos Dei uerba non sequimur, sed ad nostram sententiâ inflectimus. Porro in diuinis literis, si rectè intelligatur, nihil est repugnans, nihil contrarium.

Sed, ut ad propositum reuertamur, uis scire quæ sit scripturæ consuetudo, cum de nostris operibus loquitur? Cùm uirum sanctum de suis operibus loquentem inducit, facit eum ut plurimum de illis adeò humiliter moderateque sentire, ut ea pro nihilo habere uideatur. Quod profectò ex illius humilitate procedit. Dum enim is attendit quantum Deo debeat, illique maiestati se adeò curæ esse considerat, nihil coram Deo neque se neque opera sua esse existimat. Vnde clamat & dicit: *Psal. 8.*  
 Quid est homo, quòd memor es eius, aut filius hominis, quoniam uisitas eum? Et alius quidam: Loquar ad dominum meum, cum *Genes. 18*  
 sim puluis & cinis. Ita de se pii homines sæpe loquuntur, & sentiunt. Opera uerò sua nihili faciunt, sed cùm Dei gratiam, sine qua nihil possunt, attentè considerant, ei in gratiarum actionem totum adscribunt, atque ita Domino consententur. Sine te ò Domine nihil possum: quicquid igitur sum, quicquid habeo tibi attribuo. Ita & inter homines usu uenit. Cùm enim aliquis in eum cui plurimum  
 debet,



debet, aliquid officij cōtulerit, ad hunc modum loqui solet: Nihil hoc est: multo plura beneficiis erga me tuis debeo. Itaq. scriptura diuinā hominem aliquē de suis operibus loquentem inducens, aut ad illos qui de iis gloriari, seseque iactare cupiunt, uerba faciēs, eos ut humilitati moderationiq. animi studeant, deprimit. Porro aliud est cum in scripturis Deus homini pio loquitur, cuius opera nō solū laudat & prædicat maiestas illa diuinā, sed etiam iis qui bonis operibus incumbunt, bona infinita & æterna promittit. Hinc est illud Origenis: Aliud est, inquit,

*In episto.  
ad Rom.  
cap. 5.*

ex persona scripturæ, prophetæ, uel Domini aliquem peccatorem designari, aliud est iustum ipsum sui fieri accusatorem, & humiliare semetipsum, ut exaltetur à Deo, & illud quod in ore omnium est, Deus superbis resistit, humilibus autē dat gratiā, quos in gloriam eleuare, eorumq. bona opera laudare consuevit. Inde sunt illa Dei ad Abraham uerba:

*Genes. 22*

Quia fecisti hanc rem, & non pepercisti filio tuo unigenito ppter me, benedicam tibi, & multiplicabo semen tuum, & benedicentur in semine tuo omnes gentes terræ. Et Dominus in euangelio cū Iudas & alii discipuli Magdalenæ factū uituperarent, ac nihili facerent, hos reprehēdens:

*Matt. 26.*

Bonum,

Bonū, inquit, opus operata est in me. Magdalena igitur factum suū nihili æstimabat, sed longè aliter Christus de illius opere iudicabat. An fortè cū Christus hoc diceret, mentiebatur? Minimè uerò, non magis quàm Apostolus Paulus cū gratiæ Dei qua hominem in bonis operibus adiuvat, magnitudinem ostendens, Deus, inquit, operatur in uobis & uelle & perficere: & illud, quod alibi ait: Neque qui plâtat est aliquid, *1. Cor. 3.* neque qui rigat, sed qui incrementum dat Deus. Atqui cū idem Apostolus aut seipsum, aut alios exemplo suo in spem conatur erigere, adhunc modum loqui non dubitat: Bonum certamen certavi, cursum consummaui, fidem seruaui. De cætero reposita est mihi corona iustitiæ, quam reddet mihi in illa die iustus iudex: & quæ sequuntur. Quid, quod alio in loco se plus omnibus aliis laborasse dicit? Cū igitur Apostolus hic se nihil facere, ibi se plus cæteris laborasse dicebat, uerum utrobique dicebat, non in eo sensu quem eius uerbis attribuitis, sed tantum comparatione atque respectu non solum illius quod diuinæ maiestati debebat, sed etiam gratiæ Dei, cuius in bonis operibus administrandis, & præsidio nitimur, & auxilio subleuamur. En simplex & aperta, nullisq.

nullisq̃ue uerborum ambagibus inuoluta declaratio ueritatis, quam si ante uidisses, quàm Apostolum legeres, in tam absurdum scripturæque contrarium errorem nunquã incidisses.

*Quàm absurdus error sit eorum qui homines nihil agere, sed Deum in eo omnia facere sentiunt, uberiorius explicatur.*

**A** Bsurdum hunc errorẽ iure dixi. Nã in hoc uestro paradoxo, quo hominẽ cæteris omnibus rebus uiliorem facitis, dum eum trunco, qui nec sese mouere, nec quicquam aliud nisi id quod in illum proicitur, suscipere potest, comparatis, multa sanẽ nõ solum rationi, uerum etiã apparentiẽ ac ueri similitudini repugnãtia uideo. Quale enim est illud, hominẽ cæteris rebus excellentiorem à Deo conditũ, nihil neque facere neq; posse? Atqui nihil esse in rerũ natura, quod iuxta suam uim ac proprietatem, quam illi Deus opifex contulit, non aliquid agat, perspicuũ est. Ignis urit, aqua humectat, cæli uertuntur, sol lucet, equus portat, canis currit, bos arat, solus homo, tanquam telluris inutile pondus, nihil agit, sed in illo Deus omnia absq; illius cooperatione perficit. Atqui sine Dei auxilio nec ignis urere, nec aqua humectare potest, non tamen negabis

gabis ista aliquid agere. Cur ergo potius hominem, quàm cæteras res, nihil neque facere neque posse dicis? Miror sanè cum ex te audio hominem, cui tot organa, tot instrumenta, tot vires ac potentias actiuas cæteris rebus negatas natura concessit, hunc solum ita instructum, nihil neque agere neq; posse, sed uanum ac superuacuum esse. Philosophi sententia est, Deum & naturam nihil frustrà fecisse, sed omnia in rerum natura certis operationibus destinata esse. Et isti solum hominem frustrà factum esse contendunt, ut in mundo superuacuum & ociosus, tanquam sterilis arbor terram occupet. hoc mihi tam absurdum uidetur, ut nihil supra, quod à summa cùm humanæ excellentiæ, tum diuinæ sapientiæ, quæ nihil unquam frustrà, quod ad certum usum finemq. non referat, facit, ignoratione proficisci necesse est. Ergo iuxta præclaram istorum sententiam nihil aliud est homo nisi massa quædã inutilis, quæ in orbe terrarum nihil agat, sed tantum terram occupet, aliisq. rebus impedimento esse uideatur. Ad nihilum igitur ualet, nisi ut tanquam sal infatuatum è rerum natura exterminetur. Hoc me in uestra opinione plurimum offendit.

## ALTERA ABSVRDITAS.

**N**on minus absurda est illorum sentētia, qui ut hanc Scyllam declinent, & fugiant, hominemq. aliquid posse, nec frustra conditū esse fateantur; in eam Charybdim sese præcipitant, ut illū nihil nisi mali, nullū opus nisi sibi & aliis perniciosum atque noxiū facere posse dicant. De calcaria, ut dicitur, in carbonariā. Tolerabilius enim erat hominē à Deo conditū esse ut nihil ageret, quàm ut male ageret: de illo siquidē dicitur, Si nihil boni facit, certē nec mali quippiā perpetrat, neque cuiquā nocet. Iā uerò isti dicunt hominē esse rem totius mundi miserrimā, propterea quòd nihil aliud nisi sibi ipsi nocere possit. Quasi dicerent, Nihil aliud homo potest nisi seipsum occidere, uulnerare, mordere, lacerare, tanquam bestia rabie concitata. Cū enim omni animali, simul atque natum est, natura insitū sit ipsum sibi conciliari & commendari ad se conseruandū, & ad eum statum, & ad ea quæ cōseruantia sunt eius status diligenda, alienari autē ab interitu, iisq. omnibus quæ interitū uidentur adferre, solus homo ob eā ipsam causam quòd homo sit, sibi prodesse nō potest, tantūq. abest ut malū declinare ac fugere ualeat, ut ipse per singula momen

ta illud nō solūm arcessere, uerūetiā perpetrare cogatur, nec aliud quicquā nisi opera sibi adeo pernicioſa, noxia, pestifera, ut iis nihil perniciosius cogitari queat, nimirū ut sibi supplicium sempiternū cōparet, facere possit. O miserū hominem, qui seipsum perdere potest, imò cogitur, prodesse sibi nō potest: En paradoxū adeo execrabile ut nihil unquā ei simile audiuerim, adeo absurdū & à ratione abhorrens ut nihil neque dici neque fingi possit absurdius. Quid enim ad hominis desperationē certamq. perniciē, quid ad Dei auctoris contumeliā magis tendit ac pertinet? Nam unaquæque res secundum uim ac potentiam quam à Deo accepit, agere debet; homo autē, iuxta istorum sententiam, nullā uim nisi ad peccandū accepit: consequens est igitur ut & peccare, & seipsum morte afficere debeat sempiterna. Itaq; non solūm adeo furiosus est ut sese mordeat ac laceret, uerūetiā seipsum morte nō temporali sed æterna debet afficere: Qui enim peccat, animā suā non solūm odit, uerūetiā occidit. Quæ cum ita sint, uidētur mihi hæc tici nostri sic affecti cōtra Deū & hominem, ut quicquid mali dici uel cogitari possit de Deo uel de homine, id dicere uelint, scripturaq. male intellecta, ad ea persuadēda abu-

ti, cùm tamen ad declarandã Dei erga hominẽ summã bonitatẽ scripta sit, nõ ad ullam crudelitatem insinuandã, quo nulla usus est ali quãdo in genus nostrũ. Certẽ peiorẽ faciunt hominũ in hac uita conditionẽ, quàm damnatorũ, qui sicut nõ possunt nisi peccare, ita neque puniuntur de nouo pro ullo peccato. Homo autẽ uiator, aiunt hi, non potest etiã nisi peccare, & tamen pro quolibet peccato æternã pœnã demeretur. Sic aduersarij nõ solum homines iis qui cruciantur apud inferos miserosiores, uerũ etiã Deũ in illos, quàm in ipsos dãnatos, iniquiorẽ & crudeliorẽ faciunt. Qui si Christi uerbis crederent, cuius hæc sententia est, qui peccauerint, eos ob suas culpas propriaq. peccata sempiternis adiudicãdos esse supplicijs, nõ ita in Dei creatoris cõtumeliã impiis uocibus obstreperẽt ueritati. Quid enim illo Deo crudelius, quid immanius cogitari potest? qui hominẽ, quo nihil in rerũ natura præclarior, nihil excellentius finxit, usque adeò miserabili fini destinauit. Ignis, aqua, cũcta elemẽta, denique pecudes, cùm id quod illis natura insitũ est, faciãt, nõ puniuntur, solus homo, inquit isti, nihil aliud nisi peccare potest, sui tamen peccati sempiternas dabit pœnas. Remoue quæso frater, remoue è cõspectu nostro huiusmodi



iuscemodi blasphematores diuini nominis, ne impias eorū uoces audire cogamur. Quis enim usqueadeò sacrilega uerba, quis tam abominabilē impiāq. sententiā patienter audire possit? O monstra, portēta, prodigia, in ultimas terras deportanda: O sacrilegos homines, imò dæmones! qui non solū de homine, præclarissima creatura, uerum etiā de Deo, eius auctore, tā absurda cōfingitis. Ista siquidē uestra uox est, homo ad id solum factus est, ut sese occidat & destruat. Quid igitur is Deo debet, à quo nihil nisi malū accepit? O Satan Satan: certē nunc solutus es, alioqui mētibus hominū tā absurdas ípiasq. opiniones ingenerare non posses. O miserī homines, & toto lachrymarū fonte plāgēdi: certē à Deo derelicti in reprobū sensum incidistis, ut uidētes nō uideatis, nec audiētes audiatis. Quare mi frater ab iis quæso te segrega, ne te quoq; ultio diuina cū iis pariter inuoluat atq; consumat. Quid aduersarij & faciant & doceant, attentē quæso cōsidera: qui cū nihil nisi Dei laudē & gloriam sibi propositā esse dicāt, de Deo tamen tā absurda & à ratione aliena, tā impia, tā execranda prædicāt, ut cui illa iure tribuuntur, is Deus esse non possit, qui etiā si Deus esset, ab homine tamen propter eximiā in illū crudeli-

tatē atque fœuitiā, nulla religione colendus uideretur. Non uides Diabolum per eos nihil aliud agere, nihil moliri, nisi ut ueri Dei religionē & cultum euertat? Veri, inquam, Dei iustissimi atque optimi, qui uidit omnia quæ fecerat, & erāt ualde bona, quemq. maiores nostri sanctè pieq. coluerunt. Vix teneo lachrymas cū animaduerto nostro seculo in Christianissimo florentissimoq. regno cōtra Deū nostrum nō modò huiusmodi opiniones erroresq. cōfingi, uerū etiā impunè blasphemari, tātāq. pseudoprophetarum ac Satanæ ministrorū, qui torrentis è Stygio, imò Lemano lacu, erūpētis instar orbē Christianū peruaferūt ac populati sunt, esse audaciā, imò licentiā, ut cū certa multorū, qui illis pestibus fidē adhibuerunt perniciē ex illa Geneuę sinagoga, tanquā ex putidiss. fonte, hoc errorū ac blasphemiarum, quibus nō solū ecclesiæ Gallicanæ sanctitas sinceritasq. corrūpitur, uerum etiā totius Christianæ religionis labefactatur auctoritas, summa cū Reip. clade pelagus redundaret. O Deus! itane Christiani desipere incipiunt, ut post tantā diuinarum humanarūq. rerū notitiā, tā absurdas de Deo & de homine opiniones admittere possint, quas ne bestię quidē si mentē haberent, admittere unquam

quā possent? Iam Christiani, qui soli olim sapiebāt, incipiunt soli esse stulti, & nō sapere ea quæ Dei sunt. Certè animales, bestiales, carnales sunt, & ideò ea quæ Dei sunt, nō sapiunt, nō intelligūt. Ita quēadmodū si eos taderet esse homines, præclarissimū Dei opus, ad pecudū qualitātē redire uelle uidetur. Quæ cū ita sint, cur tuis opinionibus adeò absurdis succēseā, easq. molestē ferā atque improbē, perspicuū est. Quas ut tuearis atq; defendas, hominēq. libero uolūtatis arbitrio, boniq. alicuius faciēdi potestate spoliātū esse psuadeas, nō solū de ipso homine illiusq. operibus, uerū etiā de Deo absurdissimē dicis & sentis. Verū hæc hæcenus.

*Altera huius opinionis absurditas.*

**A**bsurdū illud tuū orationis genus haud iniuria dico. Cū enim sic loqueris, neque cōmunē hominum inter se loquendi usum atq; consuetudinē, neq; scripturę sanctę phrāsim imitaris, quā in aliud sermonis genus, ut cum tuis opinionibus tā absurdis alienisq. cōueniat, mutari necesse est. Nā si solus Deus & uelle & facere operatur in nobis absq; ulla nostra cooperatione, cōsequēs est solū Deū uelle, quod homo, uelle solū Deum facere, quod homo facere dicitur. Quis enim nesciat actiones non iis qui nihil

L 4 agunt,

agunt, sed suis uel auctoribus uel auctoribus esse tribuendas? Ignis enim calefacit, non ligna uel aqua. Rursus aqua humectat, non fistula aquam continēs. Si pictor elegantē imaginē pinxit, deinde boui aut asino illud opus adscribitur. Siquid ego desiderē, & hoc ipsum alius, qui nihil minus cupiat, desiderate dicatur, nonne mendaciū est, non solū à ratione, uerum etiā à loquendi consuetudine prorsus alienū? Ad eundem modū, cū absq; ullo meo motu ullave cooperatione Deus in me uoluntatē producit & creat, si quis me uelle dixerit, falsa & à ratione abhorrēs erit eius oratio. Cuncta igitur scripturæ loca in quibus homo aliquid aut fecisse, aut uoluisse dicitur, corrigi, eaq. uerba quæ solū Deū fecisse & uoluisse significēt, iis subrogari necesse est. Nam iuxta uestram opinionē atque sententiā, falsa sunt illa scripturæ uerba, homo aliquid aut fecit aut uoluit. Qui si nihil potest uelle, cur illi diuinæ literæ uoluntatē attribuunt? Si nihil facere potest, cur in scripturis aliquid fecisse dicatur? Qui nihil neq; vult neq; facit, quā ratione aliquid aut fecisse aut uoluisse dicendus est? Hoc si uerū est, quid falsum sit nō uideo. Vera enim est propositio, cū ea res de qua sermo est, ita se habet quemadmodum uerba significāt; falsa, cū

cùm aliter. Si igitur aliter homo se habet,  
quàm scripturarum uerba significât, quæ il-  
lū aliquid aut fecisse aut uoluissē declarât,  
scripturæ sententias falsas esse perspicuū est.  
Ergo corrigēdę sunt, imò uerò de scriptura-  
rum albo tollendę, nō solūm quòd falsę sint  
& uanę, sed etiam quòd orbi terrarum sum-  
mam perniciem attulerunt. Nam si uera est  
uestra sententia, multis bonis uiris piisq. ho-  
minibus, ut maioribus nostris qui Dei uer-  
bo simpliciter credendū putabāt, illa scriptu-  
rę uerba, quę simplices illos & apertos homi-  
nes in eum præcipitarunt errorem, ut homi-  
nem aliquid & uelle & facere arbitrarētur,  
exitio fuerūt. Quæ cū ita sint, uos Dei uel  
consiliarios, uel magistros fuisse operępretiū  
erat, ut illum alio sermonis genere quàm in  
scripturis suis usus est, uti doceretis. In iis. n.  
hominem non solūm aliquid uoluissē, sed et  
fecissē dicit, illiq. opera quædam attribuit:  
imperitè sanè, ne dicam falsò, iuxta præcla-  
ram noui uestri euāgelij sanctitatem. Sed  
quoniam Deus in scripturis grammaticę ue-  
strę præcepta non curat, hanc certè, nisi fal-  
lor, consuetudinem, quæ ab initio in homi-  
num sermonibus usuque uersata est, ut ho-  
mo aliquid uel uoluissē uel fecissē dicatur, li-  
benter emendaretis. Non ergo amplius di-  
cendum

cendum est, Ille vult ire Romam: sed potius, Deus vult ire Romam. Dei enim est omne qđ aut uolumus aut facimus. Ita deinceps dicere non licebit, Homo vult bibere: sed dicendū est, Deus vult bibere. & quicquid est eiusmodi, sic pronunciarī oportebit. Sed natura, quæ audire nō sustinet hominē in hoc mundo nihil agere, nos ita loqui docuit. Attamen eam ad istorum normam & amussim qui in scripturis sanctis, id quod ante illos nemo neq; intelligere neque uidere potuit, lynceis oculis acutissimeque uiderūt, exigī, imò corrigi necesse est. Sed ad te redeo mi frater, illudq. tuum peracre iudiciū ita caligine offusum esse nō arbitror, ut quàm absurda sint ista, si in usum inducerentur, uidere non possis. Opinionem ergo tuam falsam & à recta ratione abhorrentem esse mihi crede, ad quam, nisi diuinæ literæ corrigātur, & humani sermonis usus atq; consuetudo mutetur, nos accommodare nō possumus. Illud tibi persuade, Spiritū sanctum, cuius instinctu prophete & apostoli ita locuti sunt, optimē scire quo sermonis genere utendum sit: qui cū aliquanto melius quàm homines, rerum atq; uerborum proprietatem intelligat, sine certa ratione nunquam ita locutus est. Si homo nihil neque facere, neque uelle posset,

posset, nunquā (mihi crede) Deus, id est, ipsa  
ueritas, eū aliquid posse dixisset. Vides dum  
istis tuis ministris, imò impostoribus, nimis  
temerè & improuidè fidē adhibes, in quas  
absurdissimarum opinionum plagas, in quæ  
retia te ipse conieccheris? Porro si tot rationi-  
bus & exemplis à me prolatis, tanquā mul-  
tis absurditatibus in tuo errore deprehensis  
atq; detectis, tibi fortè non satisfeci, iure abs  
te petere uideor, ut quēadmodū te diuinis  
literis fidē habere fingis ac simulas, ita etiam  
re uera facias, iisq. omnibus credas. Vt igitur  
Apostolo credidisti cū dicit: Deus operatur 2. Cor. 4.  
in uobis & uelle & perficere, ita eidē crede  
dicenti: Hoc uobis utile est, qui non solum  
facere, sed & uelle cepistis ab anno superio-  
re. Crede Christum ipsum cū de Magdale-  
na diceret: Bonum opus operata est in me,  
nō esse mentitū. Hoc igit & Christo, & eius  
Apostolo, imò tibi ipsi, nā hic tua res agitur,  
præsta beneficium, ut utrūque uerū dixisse  
credas. Quid discipulum cū magistro, Apo-  
stolum cum Christo, præconem cum iudice  
committis? An illos inter se diffidere arbitra-  
ris? Certè quorum iam est in coelis animorū  
summa consensio, eorū in terris non pugnat  
oratio. Quemadmodū ergo magister bonū  
opus ab homine fieri prædicat, ita discipulus  
ut



Galath. 4. ut illud faciamus admonet, dicens: Dum tē-  
 Rom. 2. pus habemus, operemur bonū. Gloria enim,  
 1. Cor. 3. ut alibi idem Apostolus ait, & honor, & pax  
 omni operanti bonum. Item: Vnusquisque  
 propriam mercedē accipiet secundum suum  
 laborem. Quid ais Paule? Paulo antè dice-  
 bas Deum in nobis operari & uelle & perficere,  
 nūc autē de nostro labore differis. Qui fieri  
 potest ut nobis proprius sit labor, cū iuxta  
 istorū qui se discipulos tuos iactant, sententiam,  
 nihil neque faciamus, neque omnino possimus?  
 Quomodo tu dicis: Referet unusquisq;  
 propria corporis, prout gessit, siue bonum  
 siue malum? An tecum ipse pugnas, tibi-  
 que contradicis? Nihil profectò minus. Sed  
 nostra cū incredulitas, tum ignorātia, imò  
 uerò quorundam superbiorum hominū pertinacia  
 in causa est, ut in Apostoli scriptis pugnantia  
 quædā esse uideantur. Vt cū illius uerbis de  
 nostro aliquid adiicimus, nostręq; sententię  
 nihil cōtrarium recipere aut credere sustinemus.  
 Nunquā enim Apostolus dixit solum Deum absq;  
 nostra cooperatione totum & uelle & perficere  
 in nobis operari. Illius quidē agnosco sententiā,  
 Deus operatur in nobis & uelle & p̄ficere. sed  
 unde hæc uerba, *Solus & absque nostra cooperatione*,  
 nisi de tuo? quæ si Apostoli uerbis non addi-  
 disses,

diffes, errori tuo congruentē sententiam nō  
 haberes. Nego igitur secū pugnare Paulum,  
 nego in eius epistolis unum locū alteri esse  
 contrariū: additionē autem tuā illius uerbis  
 contrariā esse dico, cui ut crederes, eamque  
 defenderes, tā multa scripturæ loca, quæ cū  
 additione tua pugnant, nec conciliari ullo  
 modo possunt, nō solū pessundas & præte-  
 ris, uerū conaris euertere. Tolle mihi hanc  
 tuā adiectionem, & statim Paulus nō modò  
 secum, uerum etiam cum Christo, id est cum  
 ipsa ueritate, consentiet. Neq; enim ignorat  
 Apostolus Deum tanquā præcipuum agentē  
 in nobis operari & uelle & perficere, sed ho-  
 minem quoque nouit Deo concurrentē, ut  
 ita dixerim, & cooperantē, cuius adiutores  
 nos esse disertè pronunciat. Hæ pfectò due 1. Cor. 3.  
 sententiæ, quas in Apostolo legimus, nō pu-  
 gnāt inter se, sed tu ista tuā adiectione, quā  
 pro Apostoli uerbis mihi obtrudis & uendi-  
 tas, cōsensionem atq; concordiam scindis. A  
 te igitur peto, si qua te salutis cura tangit, si  
 quod est in te pietatis uestigiū, si illam Dei  
 maledictionem, quam iis qui scripturæ uer-  
 bis aliquid adiiciunt, ueritas cōminatur, me-  
 tuis, remoue illam tuam adiectionem, crede  
 deinceps Apostoli uerbis, & inter nos ilicò  
 pax sequetur. Alioqui fieri nullo modo po-  
 test,

test, ut pro Dei uerbo tuam adiectionē scripturæ contrariam amplectamur, eoque impietatis auctoramento tecū redeamus in gratiam. Nam si amici esse non possumus, nisi hæreticis manum dederō, leuius tuas inimicitias, quàm illorum amicitiam sustinebo. Crede igitur matrē ecclesiam spōsi sui nosse uocem, alteriusque sermonem à Christi uerbis facillimè posse discernere. Atq; utinam illius sequerere prudentiam, nunquam in illud perfidiæ barathrum incidisses. Nunc autem quia quorundam homuncionum sententiam, quam uelut ex scripturæ fontibus hauristam, uerbo Dei contra ipsum Dei uerbum adiiciunt, pro ueritate complexus es, multo erroris luto oblitum, imò implicatum, uix emergere posse te uideo. Atqui cōplura sunt scripturæ loca in quibus homines aliquid uoluisse aut noluisse, fecisse aut non fecisse dicuntur, & tu me uis istorum siue adiectionem siue sententiam cum diuinarum litterarum auctoritate pugnantem atque contrariam amplecti? Non faciam, ne tu quidem si sapias, & si salutis tuæ uis aliquam habere rationem, erroremque uitare & fugere. Vis scire quàm insigni cōcionatores, imò impostores tui calliditate sint usi? Certè ut te fallerent atque deciperent, in primis hanc suam  
adiectio.

adiectionem Dei uerbum appellare non dubitarunt: deinde quia illorum adiectionem atque sententiam pro Dei uerbo nolebamus amplecti, in nos latrare coeperunt, indignum facinus esse clamantes, Verbum Dei à nobis respui ac reiici. Quæ cum in nos impia uouisset audacia, iis temerè credidisti. Hinc igitur illa tua præclara sententia, quã in tuis literis contra Romanam ecclesiam ferre non dubitas, cum censoria uirgula sumpta, eam contra Dei uerbum, contra scripturæ auctoritatem docere pronuncias, hominẽ aliquid boni facere posse. Atqui istud quod Verbum Dei uocas, contra quod ecclesiã docere uis, nihil aliud esse nisi additionem uestrã, quã Dei uerbo contra Dei uerbum Pseudoprophetæ uestri adiiciunt, planum fecimus, quẽ admodũ ex iis quæ in hoc loco disseruimus, liquidò intelligere potes. Ministrorum nãq; uestrorum omnem fraudem imposturamq; deteximus, illosque cuniculos quibus arcẽ ueritatis euertere moliebantur, deprehendimus. Restat ut ad sextum epistolæ tuæ argumentum ueniamus.

#### SEXTA CONFUTATIO.

**S**extum igitur argumentum tuum ex horum euangelij locorum uitiosa interpretatione sumptum est, Nemo potest ad me uenire,

nire, nisi pater meus traxerit eum. Item; Compelle eos intrare. Quibus ex locis nos liberum uoluntatis arbitriū nō habere concludis. Eodem argumentandi modo, neq; Christum, neque Angelos sanctos libero arbitrio præditos esse monstrabo. Nā de Christo in euangelio dictū est: Et coegerunt eū, nimirum ex discipulis eius duo, ut secum ingrederetur hospitium. Quid in Genesi? Nonne hæc disertè scripta sunt? Compulit Loth illos, nimirum angelos, ut diuerterent ad eum. Sic igitur tuo more argumentor. Discipuli coëgerunt Christum, & Loth angelos compulit, neque Christus igitur, neq; angeli habuerunt liberum uoluntatis arbitrium. Si tuum argumentum ad probandū in nobis non esse uoluntatis libertatem ualeat, ualebit & meū, quod ex clarissimis scripturæ locis, neque in Christo, neque in angelis eius liberum fuisse uoluntatis arbitriū, eodē modo probat. Sed hoc perspicuè falsum est. Consequens est igitur & tuum esse uiciosum, ex mala scripturæ intelligentia sumptum. Animaduertendū est igitur hæc uerba, trahere, cogere, compellere non significare uim aliquam, cum ad hominis uoluntatē admoventur, sed tantū uehementem quandam persuadendi rationem, quæ precibus,

precibus, exhortationibus, supplicibus uerbis fieri consuevit. Cum uerò actionem aliquam circa corpus ostendunt, tum demum necessitatem uimq. significant. Hoc orationis genere nonnunquam ipse uteris. Cum enim ab aliquo multis precibus exoratus fueris, tum ut illi concederes quod petebat, te coactum fuisse dicis. Ad hunc modum orator, cum audientium mouet affectus, iisq. quod uult dicendo persuadet, auditorum suorum animos in sua potestate habere, illosq. in quantunque uoluerit partem flectere dicitur. Orpheum non feras modò, sed saxa etiam syluasq. traxisse, posteritatis memorie proditum est. Vnde est illud poetæ: Trahit sua quæque uoluptas, & tamen hic nulla uis ad trahendū adhibetur. Inde est & illud Iacobi: Vnusquisq. tentatur à concupiscētia sua abstractus & illectus. Voluptas igitur hominē Luc. 1. ad se trahit, nō ui impulsū, sed cuiusdā suauitatis illecebris delinētū, qualē in Cantico canticorū sponsa capiebat, cum sponsus diceret: Trahe me post te, in odore curremus uinguentorū tuorū. Hoc ergo modo nos ad Filium trahit Pater, nō uim ac necessitatē adferens, sed multis de causis illum & sequi, & amare persuadens. Hoc quoq. modo uerbi Dei prædicatoribus dicitur, ut ad regnū cele-

stis conuiuium inuitatos intrare cōpellant, id est, ut iis instēt opportunè, importunè, arguant errantes, desides obsecrent, increpēt delinquentes, quemadmodū discipulū suū

**2. Tim. 4.** Paulus hortatur. Hanc autem compulsione non esse uiolentā, neq; liberæ uoluntatis arbitrio quicquā detrahare perspicuū est, ex eo quòd de iis qui ad coenam inuitati erant, Euāgelista ait: & nolebāt uenire. Deus quoque hoc modo cogi dicitur, cū à nobis importunè rogatur, & ut à nobis ita cogatur, multis rationibus atq; exemplis ipse nos incitat. Vnde & Moyse ardentissimis precibus se tanquam ui quadā retineri, imò cogi fatebatur, cū ei diceret: Dimitte me, ut irascatur furor meus: & quę sequuntur. Hęc hominis coacti uidetur oratio. Attamen neq; negabis, ut equidē existimo, Deum habere liberū uoluntatis arbitriū, neq; eò impudentiæ processisti, ut dicas, ei uim aliquā adferri posse. Suorū igitur preces liberè exaudit, nulla necessitate cōpulsus, sed libertate uoluntatis adductus. Ex quo hæc uerba, trahere, cogere, compellere, non magis tibi ad euertendā humani, quā mihi ad tollendā & angelici, & diuini arbitrij libertatē fauere, perspicuū est. Cui igitur obscurum esse possit, te ad confirmandā opinionē tuam, &

præpo-



præpostere scripturarū uerba proferre, cū ea non solum malè intelligas, sed etiā peius exponas, & illud argumētum tuum captiosum ac sophisticum esse, cū eodem modo falsum aperte concludam & colligam?

### SEPTIMA CONFUTATIO.

**N**Ec minus sophistica est septima allegatio tua, quæ nō supra uerbi Dei petrā fundata, sed supra uiciosam ac malam scripturæ intelligentiam posita, diu stare non potest, sed sua spē procumbit. Ex iis enim quæ & à propheta de immutatione cordis humani in noua lege futura, & à psalmista scripta sunt hoc modo: Cor mundū crea in me Deus, & spiritū rectū innoua in uisceribus meis. Itē alibi: Cōuerte nos Deus salutaris noster: & siquid est eiusmodi, tuo more cōcludis, hominē liberæ uoluntatis arbitriū nō habere, sed omnia quæ in illius cōuersione, cordisq. immutatione gerūtur, sic à Deo fieri, ut ab homine nihil fiat. Cæterum ut tibi in hac parte respōdeā, in primis à te peto frater, quod etiā superiūs memini me petisse, ut non alicui scripturarū parti, sed omnibus diuinis scripturis fidē habeamus. Cū illud è Psalmista producis in medium: Cor mundū crea in me Deus. Itē: Cōuerte nos Deus salutaris noster. scripturæ uerba libe

*Psal. 50.*

*Psal. 80.*

ter amplectēs & exosculās, prophetā à Deo rectè petentē, quod is cōcedere & posset, & uellet, agnosco. Porro si apud prophetas hominē à Deo rogari demōstro, ut cūm ei dicitur: Cōuertimini ad me, & ego cōuertar ad uos: à te peto, ut id à Deo rectè fieri, atq; ab homine aliquid, quod ab illo pręstari posset, postulari, tibi quoq; persuadeas. Quēadmodū igitur ex hoc, quod Deus ab homine rogatur ut ipsum cōuertat, Deū in peccatoris cōuersione aliquid facere cōcludis & colligis, ita ex eo quòd homo rogatur à Deo, ut ad illū se cōuertat, hominē in sua cōuersione ad Deū aliquid facere pari ratione cōcludas necesse est. Hac enim conditione Deus nos ad se conuertit, si ad illum conuerti uelimus, imò si nos ad illum conuertimus. Alioqui ad illū frustrā clamamus: Conuerte nos Domine: si omnia expectātes à Deo, quod in nobis est pręstare negligimus. facile igitur inter nos, in hac quidē parte, poterit cōuenire, si quēadmodū utrūq; Dei uerbū est, ita utrūq; uerū esse credideris. Tum enim uti semper credidi, in nostra cōuersione hinc Dei auxiliū nobis necessariū, tecum esse credā. Inde tu mecū hominis tāquā aliquid agentis, cōoperationē requiri credes.

*Psal. 118.* Vnde qui ait, Conuerte me Domine. idem

alio

alio loco dicit, Cōuerte pedes meos, id est,  
 affectus meos, in testimonia tua. Quēadmo-  
 dū enim Deū rogamus ut nos ad sese cōuer-  
 tat, ita Deus à nobis, ut ad illū cōuertamur,  
 exigit. O quām facile hac re cōciliari posse-  
 mus, si utrinq; φιλαυπία & cōcertatione de-  
 posita, semel totā scripturā uellemus ample-  
 cti. Nihil hic à te frater difficile, nihil iniquū  
 postulo. Tu mihi hinc vnum prophetā Deo  
 supplicantē producis in mediū, atq; dicen-  
 tē: Cor mundū crea in me Deus, id est, laua  
 cor meum. ego tibi Deum ipsum apud alte-  
 rum prophetā nos uel orantē uel hortantē  
 ostendo. Lauamini, inquit, mundi estote, au- *Isaia 1.*  
 ferte malum cogitationū uestrarū. Et alibi:  
 Laua à malitia cor tuū. Dauidis orationē à *Hiere. 4.*  
 te recipio. Cur tu à me, imò à Spiritu san-  
 cto, Dei orationē, qua te, ut cor tuū laues,  
 admonet, reiiciendā putas? Nisi forte solū  
 Deū in te laborare uis, tu uerò in Epicuri ca-  
 stris, imò in Adonidis hortulis ociosus, in-  
 terim ut de peccatorū tuorum cœno te sine  
 ullo tuo studio ac labore Deus educat, ex-  
 pectas. Sed non sic itur ad astra. Vult enim  
 Deus nos operi manū admouere, neq; ces-  
 santes, sed enitentes auxilio suo subleuare  
 consuevit. Scitum est illud Hesiodi: τὸ δ' αὖ  
 εἰ τῆς ἰδρωτὰ θεοὶ περὶ πύργου ἔδουκον. & quæ

Labore

sequuntur. quod à nostris ita reddi solet ;  
Virtutē posuere Dei uirtute parandā. Illa  
quoq; Augustini sentētia ueniat in mentē :  
Qui creauit te sine te , nō iustificabit te sine  
te . Quæ cū ita sint , quā & rationi cōsen-  
tanea , & scripturis cōueniens sit oratio no-  
stra , perspicuū est . Nec dubium est quin tua  
differendi ratio sit eiusmodi , ut dū unū scri-  
pturæ locū respicis , alterū destruas . Hęc tua  
pietas est , ita Christianā religionē à tuis co-  
lere ac seruare didicisti . Sed quid ueritatē di-  
uidis ? Cur nō potiùs scripturā sacrā aut to-  
tā uerā , aut totā falsam esse credis ? Et quo-  
niā uos , qui de Caluini schola , tanquam ex  
equo Troiano prodistis , ita fidē uestrā iacta-  
re , ita de ea gloriari soletis , ut soli ex omni-  
bus fideles dici uelitis ; sit ea fidei uestræ am-  
plitudo , quā illud uocabulum gloriosum ,  
quod cæteris ereptum , uobis solis arrogatis ,  
meritò postulat . Ergo deinceps nolite inte-  
gras scripturæ sentēcias reiicere , ut dimidias  
quasdā , atq; trūcatas , quas impostores illi ue-  
stri uobis obtrudūt , mordicus retineatis . Cū  
igitur aliqua materia tractanda erit , antequā  
de illa sententiam feras , quid de ea tota scri-  
ptura pronunciet , diligenter ac maturē cōsi-  
dera , ne tanquā fatuus iudex de re incogni-  
ta iudices , quod hic fecisse te uideo , dū ma-  
trem

trē tuā Ecclesiā , & quidē inauditā, temerē  
 cōdēnas, cū illā cōtrā scripturarū auctori-  
 tatē de liberę uolūtatis arbitrio docere pro-  
 nuncias. Atqui nō illius sentētiā , sed tuam  
 opinionē scripturę contrariā esse perspicuū  
 est. Tuę igitur fidei angustia & paruitas nos  
 in hoc religionis negotio conuenire atq; cō-  
 ciliari nō finit. Ego enim à te totius scriptu-  
 ræ cōfessionē exigo, ego ut eā totā uerā esse  
 fatearis, postulo: tu uerò cū tantū aliquā  
 scripturarū partem recipias, omnium tamen  
 cognitionē ita tibi ac tuis arrogas, ut ad nul-  
 lū præterea existimes pertinere. Quæ cū  
 ita sint, quis adeò cæcus, ut tuā iniquitatē im-  
 prudentiamq. non uideat? Ex uno siquidē  
 uerbo , sed quid dico uerbo? ex una propè  
 syllaba, quicquid de aliquo argumento dici  
 potest, imperitè sanè cōcludis & colligis, at-  
 que ex uno loco , in quo de eo quod inter  
 nos cōtrouertitur, nulla fit mētio, id falsum  
 esse cōtendis. Cū ergo Dauid ait: Cor mū-  
 dum crea in me Deus: nū hoc illi propositū  
 erat, quærere utrū in sua cōuersione homo  
 aliquid faciat an nō? Minimè uerò. Sed id,  
 quod sibi necessariū nouerat, à Deo postula-  
 bat. Ad eūdē modū, cū Deus homines, ut  
 ad se cōuerterētur, oraret, hanc quæstionē,  
 utrū gratię suę auxiliū, hominibus ad cōuer-

sionem necessariū esset, tractare nō instituerat, sed id solū ab homine, quod requirebat, ad ueram pœnitentiam, & ut Græci significantius dicunt, μετάνοια, illi necessariū erat: nimirum ut si homo Deum ad se conuerteret, illiusq. auxiliū & fauorem sibi adesse uellet, ad eum se ille conuerteret. Cū igitur ex aliqua sententiola, quæ de altera cuiusdā materiæ parte agit, aut totius argumenti resolutionē inferre, aut quicquid in illa sententiola dictū non est, falsum esse concludis, nonne stultissimè facis? tanquam si diceret, quicquid in eo scripturæ loco positū nō sit, uerū esse non posse. Hæc est à loco, ab auctoritate negatiuè arguere, quod quàm sophisticū sit, nullus ignorat. Argumentum igitur tuum se habet ad hunc modum. Dauid cū diceret, Cor mundum crea in me Deus: de eo quod ad mundādum cor nostrum facere debemus, nihil dixit, homo igitur in sua cōuersione nihil facit. Hoc modo Christum de Virgine natum non esse concluderes. De hoc enim eo loci Dauid nihil dixit.

*Huius sophismatis uberior explicatio.*

**A** Pud Rhetores ultiosum dicitur orationis exordium, quo etiā aduersarius uti potest. Sic Dialectici argumentum malū & ultiosum esse dicunt, cū ei simile ab aduersario,

sario, & contra nos concludi potest. Non gra-  
uabor hoc loco tibi ostendere, quanta in im-  
postorum uestrorum argumentis sint uitia,  
ut aliquando tandem oculos aperias, totque  
fallaciis cognitis atque perspectis, ministro-  
rum uestrorum fraudem intelligas. Illud igi-  
tur in primis animaduertere operæ precium  
est, eadem argumentandi ratione, qua homi-  
nem nihil in sua conuersione agere, demon-  
strare conatus es, probari posse, Deum in  
nostra conuersione, cordiumve nostrorum  
purgatione nihil facere. Sic enim argumen-  
taris: Dauid Deo dicit, Conuerte nos Do-  
mine: homo igitur nec in sua conuersione  
quicquam agit, nec liberum habet uolunta-  
tis arbitrium.

Licet mihi ad eundem modum argumen-  
tari: Deus, qui non minus prudenter quàm  
Dauid loquebatur, ait: Cōuertimini ad me  
in toto corde uestro: consequens est igitur  
eum in peccatoris conuersione nec aliquid  
facere, nec habere liberum uoluntatis arbi-  
trium. Aut certè hoc modo: Prophetæ uer-  
ba sunt. Lex Domini immaculata conuer-  
tens animas. Neque Deus igitur neq; homo  
in peccatoris conuersione quicquam agunt,  
sed hoc solius legis officium est. En idem ar-  
gumenti genus. Tria antecedentia ex scriptu-

*Psalm. 18*



ræ quidem fontibus hausimus, sed conclusiones nostræ sunt, quas scripturis adiecimus. Sed quoniâ hæc argumentandi ratio sophistica est, nostræ tres cōclusiones falsæ sūt. Hæc cū mecum reputo, teq; , quem in cæteris rebus prudentiæ laude dignissimum iudico, in hoc maximi ponderis negotio impostorū aucupio & fraude captum, ac diaboli cassibus implicatum uideo, pro meo in te amore, tuam uicem miseriamq. deploro.

*Isaia 1.*

Vis aliud exemplum? Lauamini, inquit Deus per prophetam, mūdi estote. homo igitur in mentis suæ purgatione totū facit. Hoc cōsequens iure negabis, attamen ex eodem artificio, ex eadē officina, qua tuū illud, existit. Quale igitur tuū? Prophetæ uerba sunt, inquires, Laua me Domine ab iniquitate mea. Item: Cor mundum crea in me Deus. homo igitur in cordis sui lotionē nihil facit, nihil potest. Vis me hanc tuam conclusionē amplecti? Recipe & tu meam, quæ tua nihilo deterior est. Sed quoniâ id à te obtineri non debet, nec potest, quid hic faciendum existimas? Quid? nisi ut hanc nostram argumentandi rationem sophisticā esse ambo intelligentes, illas cōclusiones quas de nostro scripturæ uerbis adiecimus, reiiciamus, solasque scripturæ sentētias, è quibus tāquam ex fontibus

tibus illas conclusiones uidebamus haurire, pro ueris retineamus. Illis igitur prophetæ uerbis: Laua me Domine ab iniquitate mea: istud adiecisti de tuo, Deus ergo in hominis purgatione facit omnia. Huic autem Dei ad homines dictæ sententiæ, Lauamini, mundi estote: de meo adieci, Homo igitur in sua spirituali lotione omnia facit. Si hanc meam adiectionem repudiandam putas, cur ego tuam amplectar? Hæ duæ adiectiones non Dei uerba, sed nostra sunt. Vtraque ergo repudiata solum ac purum Dei uerbum retineamus, & nihil inter nos cōtrouersia relinquetur. Deū igitur in nostra cōuersione plurimum operari credendum est, alioqui non rogaretur à Propheta, ut illū lauaret atque conuerteret. hominē quoque in sua conuersione aliquid facere, non est dubium, alioqui eum diuina sapientia non rogaret, neq; præciperet his uerbis: Lauamini, mundi estote, & conuertimini ad me. sed omnia per se Deus ageret, nec ab hominibus aliquid postularet. Vnde in Apocalypsi quidam uestes suas in sanguine agni dealbasse dicuntur. Vide quàm facilè hac ratione ad ueram scripturarum intelligētiam peruenire possemus. Quā ut sequaris, & conclusiones quæ ex scripturis sumi uidentur expendas, etiam atq; etiam à te peto. Id si antè fecisses,

feciffes, nunquam illi ueteratores, & callidi; quos admiraris, te circūuentū, ac sophismatum suorum tendiculis implicatum, in suā factionem adduxissent, nūquam ita temerē maiorum tuorum religionem ac fidem deferens, in aduersariorum castra transiffes. Beatus Hilarius, nostræ Galliæ lumen, in Commētariis in Psal. 118. multa diuinitus in hāc sententiam scripsit, cuius uerba subiiciens, tanto uiro potius, quā illis tuis impostoribus ac sophistis te crediturum esse confido. Impiē, inquit, est uolūtatis, existimare idcirco se ea quę sunt credentiū propria non consequi, quod sibi à Deo indulta non fuerint. Sed omnem occasionem huius impiē excusationis propheta summouit. Primum enim cū orat, conueniēs infirmitati suæ egit officiū. Dehinc Dei muneribus humanę deuotionis studia connexuit. Cū enim ait, Legem pone mihi Domine in uia præceptorū tuorum: quid secundum nostrę orationis humilitatem Dei esset, ostendit. Cū autem subiecit, Et exquiram eam semper: officium deuotionis suę protulit, & in ceteris quoque utrumque quodam complexu sibi inuicem colligauit, cū deduci se in semita postulauit, & cū id ipsum uoluit. Prius enim quę à Deo sunt, cū honore præposuit; & tūc quę à se,

à se, cum confessione subiecit. Ita diuus Hilarius Dei auxilium, & humanæ deuotionis officium colligans atque cōiungens, utrūq; necessarium esse demonstrat. Quā in re longè aliis argumētis utitur, quàm uos. Neque enim ex eo quòd Dei auxiliū Dauid postulat, cum nihil posse, sed ex eo quòd ille Dei muneribus humanæ deuotionis studia connectens, se legem Dei exquisiturum esse dicebat, officium nostrum cum Dei auxilio & gratia colligari debere concludit. Quæ autē hac de re hactenus diximus, ea tibi sufficere posse existimo, teque cum ecclesia Dei, sanctisque patribus iuxta scripturarum auctoritatem atque sententiam deinceps crediturum esse confido, hominem in sua conuersione aliquid posse, & facere, & consequenter illum & uoluntatis libertate præditum esse, & ad bona opera gerenda aliquid uirium habere, quæ quanquā infirmæ sunt & imbecillæ, tamen cū potentissimus gratiæ Dei fauor accedit, homini nihil impossibile est. Vides igitur non solum omnes allegationes tuas uitioso quodam malæ intelligentiæ fundamēto ac sensu, quē diuinis literis attribuis, niti, uerum etiam omnia argumenta tua quibus liberum uoluntatis arbitriū conaris euertere, sophistica, fallacia, captiosa

ptiosa esse? A te igitur peto, ut & tuæ salutis uelis habere rationem, & quoniã hic agitur non de umbra asini, sed de uita & de salute tua, uerane sint ea quæ iam diximus, quieto animo tranquillaque mente cõsideres. Quæ cùm uera esse deprehenderis, in quantum erroris ac confusionis barathrum; dum illorũ impostorum calliditatem, fraudesque minus caues, te ipse coniecero, liquidò intelliges. Nullus hic est negligentiæ, nullus socordię locus, neque iam aliena, sed tua res agitur. Nõ hic de fumo disceptamus, nec de lana caprina rixamur, sed hoc negotiũ ad animæ tuæ, quam toti mundo iure anteponimus, salutẽ pertinet. Quæ cùm ita sint, non erat hic sophismatibus, ac puerorum in morẽ captiunculis agendum, sed omni cõcertatione pertinaciãq. deposita, prudẽter ac maturẽ, quicquid contra fidem nostrã ab aduersariis adferebatur, examinandũ erat, antequam aut ipsa fides reiiceretur, aut in eius locum perfidia reciperetur à nobis. Insignis enim est temeritas, cùm aut falsa aut incognita res approbatur. Nec quicquam est turpius, quàm cognitioni & perceptioni assertionẽ approbationemq. præcurrere. Quare quod tum cùm maiorum tuorum religioni ac fidei nũcium remisisti, facere neglexisti, ut aduersa-

riorum

reriorum argumenta rationesq. diligenter expenderes, uel nunc cū tibi & tuum errorem, & illorum à quibus circūuentus & captus es, fraudem ita perspicuè demonstraui-  
mus, facere stude. Adhuc diligentiae locus est. Itaque quod tibi eripuit ignauia, reddat industria. Quid cessas? quid hæres? Nihil tibi neque graue præcipimus, neque difficile suademus. Illi uerò impostores tui, qui tibi in hoc liberi arbitrij dogmate pro ueritate mendacium, pro luce tenebras, pro fide perfidiam tradiderunt, in cæteris quoque, quibus contra ecclesiæ catholicæ, in qua Christo nomen dedisti, fidem supra petram diuina uoce fundatā, te prauis opinionibus imbuerunt, pari ( mihi crede ) candore, eademq. sinceritate in cæteris abusi sunt, quæ admodum à Catholicis doctoribus, si odio quod in eos iniuria concepisti, paulisper de-  
posito, ueritatē ab iis discere uolueris, facillimè intelliges. Tui ergo siue ministri, siue concionatores in nos multa cōfingūt, tibiq. falsò persuadēt, nos contra perspicuam uerbi Dei ueritatem, contra scripturarum auctoritatem atq; sententiam docere nonnulla, quorum si uelles scire rationem, uideres profecto nos in singulis fidei dogmatibus ne latū quidem unguē à uerbi Dei regula, ipsaq. ueritate,

ueritate, honestate, ratione discedere. Sed quoniam longum est per uniuersa discurre-  
re, ut illorum calumnias detegamus, una de  
bonis operibus disputatione contenti eri-  
mus, quibus noster tantum tribuere aduersarij  
mentiuntur, ut eorum merito regnum cæ-  
lestē ab hominibus comparari doceamus.  
Quod certē nemo nostrorum unquam ne-  
que dixit neque credidit. Nostri namque  
doctores de bonorum operum meritis dis-  
ferentes in hoc omnes conueniunt, ut uerē  
ea uitæ æternæ meritoria esse dicant: per se  
tamen & secundum naturalem suam confi-  
derata bonitatem nunquā ex condigno fu-  
turæ gloriæ meritoria esse docuerunt. Quid  
enim hac Apostoli sententia uerius? Non  
sunt condignæ passionēs huius sæculi ad fu-  
turam gloriam, quæ reuelabitur in nobis.  
Num igitur hæc eiusdem Apostoli falsa erit?  
Vnusquisque propriam mercedem accipiet  
secundum suum laborem. Minimè uerò.  
Idem enim est in utraque ueritatis tenor.  
Restat igitur ut qui de libero uoluntatis ar-  
bitrio satis multa iam diximus, de operibus  
deinceps nonnulla dicamus. Hic ergo eorū  
quæ pro arbitrii libertate ad epistolam tuam  
respondimus, sit modus.

Rom. 8.

1. Cor. 3.



*De humanis operibus ac meritis.*

**H**Actenus de uoluntatis humanæ libertate, siue delibero arbitrio differuimus. Veniamus nūc ad bonorū operū quæstionē, quibus cur uestri ministri tantas inimicitias, ac tam exitiale bellum indixerint, diu (fateor) multūq. dubitauī; sed ad extremum illius plus quā Vatiniani odij hanc unicā causā esse cognoui, quōd ii nihil tantopere sectantur, quā id quod Dauid maximē uerebatur atq; fugiebat, cū Deū rogans, diceret: Non declines cor meum in uerba malitiæ, ad excusandas excusationes in peccatis. Hoc igitur tanquam pestē aliquā propheta fugiebat ac uerebatur, isti uerō lōgè aliter. Neque. n. alia de causā contra librum uoluntatis arbitrium, & bona opera caninam exercuere facundiam, nisi ut uitia sua atque peccata defenderent, suamq; negligentiam hoc prætextu adūbrarent. Apostoli & euangelistæ dici uolunt. Iure igitur uerentur ac metuunt, ne quis ab illis uitę innocentiam ac sanctitatem, quæ tam gloriosum nomen deceat, postulet, ne quis eos Apostolis sanctisq; hominibus dissimiles iudicet, de quibus Apostolus scribit his uerbis: Circūierunt in melotis, & in pellibus caprinis egentes, angustiatī, afflicti, quibus dignus nō erat

*Psal. 140*

*Hebr. 11.*

**N** mun-

mundus, in solitudinibus errantes, in mōtib<sup>us</sup>, & speluncis, & in cauernis terrę. Neque igitur beato Ioanne Baptista, qui nō modō uixit abstemius, uerū etiā locustas pro delitiis habuit, neq; diuis Paulo, Antonio, Hilarione, Bernardo, aliisq. huiuscemodi; qui repugnantem carnem ita uigiliis inediaq. confectam ac domitam, spiritus legibus subiecerant, ut eos toto orbe terrarū omne hominum genus miraretur, atque in cælū laudibus ferret, inferiores haberi uoluerūt: sed ad eam laudem & gloriam lōgē alio itinere sibi nitendum putauerunt. Cū enim illos ob uitę austeritatem suspiceret orbis, isti aliquanto scilicet prudētiores, quibus illud durum ac rusticanum uitę genus minus probaretur; ut excusatione digni existimarentur, multos errores callidē sanē fabricati sunt. In primis igitur bonorum ac malorum operū fontem, liberum uoluntatis arbitriū hominibus eripere conati sunt: deinde bona opera nullo modo fieri posse: ad extremū, etiā si illa fieri possent, inutilia tamen esse dixerūt. In quo uidentur fuisse nimium diligentes. Quid enim opus est pluribus uerbis? Nam cui semel persuaferis nec esse in hominibus arbitrij libertatē, nec bona opera fieri posse, hūc, si bonis operibus non incumbat, in-

gratis

gratis abs te excusari necesse est. Porro si id persuadere difficile est, certè uel illud satis est, opera inutilia esse, nec aliquid meriti fructusve adferre posse. Quis enim in bonis operibus sibi putet elaborandū, si uana inania, inutilia esse credat? Sed si illa tria simul alicui persuaderes, quid ad eius excusationē addi potest, nisi fortè illud, bona opera homini nō solūm inutilia & uana, sed etiam perniciosa atque adeo superstitiosa esse? Quod aduersarij de sanctissimorū hominū, qui ætatē in solitudine cōtriuerūt, operibus pronunciare non dubitāt, quihus & Eliam, & Elizeum, & Ioannem Baptistam ante iudicij diē iudicis ore laudatū, aliosq. huiusmodi, quos & Apostolus tot encomiis tātis- *Hebr. 11.* que laudibus ornat ac prædicat, & illius austeræ solitariæq. uitæ, quā isti superstitiosam uocant, auctores fuisse non dubiū est, facile adiungent. Neq; uero expeditior ulla ratio excogitari potuit, qua isti perditissimum illud suum uitæ genus adumbrarēt, ac se quominus illorum sanctitatē atque uirtutē per eadem bonorum operū, quæ in ijs maiores nostri admirabātur, præclara uestigia sequerentur, excusare possent. Quæ cū ita sint, ministris uestris iure succenseo. Hi siquidē contra omnium nō modò prophetarū Dei

morem, sed etiam Apostolorum institutum, contra ueteris ecclesie totiusque antiquitatis doctrinam atque sententiam, bonis operibus deprimendis atque calcandis ita student, ut iis bellum indixisse uideantur. Quo studio illud certe consecuti sunt, ut seculi nostri homines, in omne malorum genus sua sponte plus satis pronos, in tantum desidie somnum, imò ueternum adduxerint, ut qui antè suae salutis immemores uidebantur, nunc uirtutis odio inflammati, in omne uiciorum genus concitatissimè rapiantur. Cum autem hinc omnes diuinæ scripturæ tam multis & uerbis & exemplis homines ad bona opera hortentur & moneant, inde uos tantum illorum odium pectoribus humanis ingeneraueritis, ac poenè totum orbem in tantam negligentiam desidiamque traxeritis, quis uestram non miretur audaciã, cum negatis uos quicquam docere quod ad illa dissuadenda pertinere uideatur? Certè si uestra paradoxa, omniaque alia quæ contra bonorum operum exercitiũ adfertis, uera essent; uestri tamen officii erat, illud doctrinæ genus, quod negligentiae socordiaeque patrocinari uidebatur, suppressere, maximè hoc tempore, quo inter homines ita refrixit charitas, ut bonis operibus uix ullus relictus sit locus. Quæ  
cum

cùm ita sint, quid sibi uolunt tot uestræ in bona opera declamationes? Quis hinc fructus ad Christianâ Rempub. redit? Nullus omnino, sed potius disciplinæ ruina, bonorū morū euersio, somnolētia quædā, atq; desidia, qua tãquā uetero sic occupatę sunt hominū mētes, ut ad uirtutis studiū excitari nō posse uideantur. Quare contentionibus omnibus. & acutis aduersariorum disputationibus prætermiſſis fidei nostrę de bonis operibus ueritatē, iuxta scripturarū auctoritatem atq; sentētiā simpliciter ostēsurus, me etsi nō omniū curiosē expectationi, officio tamen meo, si bona opera nō solū ad salutē necessaria, sed etiā homini utilia esse demonstraero, satis facturū esse confido. Nā cui hoc de suis operibus exploratū est, is in hac parte satis doctus est, cū salutis æternæ uia teneat. Illa uerò cōtētiosa uerborū acumina, quę in hoc negotio pacis inimicus excogitauit, ad salutē consequendā nemini sunt necessaria. Quis ergo ministris uestris de hac materia sic digladiantibus, ut multas cōtentiones & rixas ad rē minus pertinentes, in orbē inuenerint, nō iure succēseat? In primis igitur regulā quandā generalē habeo, ex qua omnia scripturę loca, in quibus de humanis operibus agit, rectē intelligi possūt ad hūc modū.

**N**ihil de Deo diuinis literis continetur, quod aut ad bonos, ne in uia exercitioq. uirtutū perseuerent atque proficiant, deterrendos, aut ad malos in uitij animandos, & quo liberius in peccatorū impuritate permaneāt, corroborandos, ullo modo pertineat. Nam scripturæ bonos hortantur, ut in uia, studioq. uirtutum non modò perseuerent, sed etiā proficiant, malos hinc ut ad Deū per poenitentiaē uia redeant, admonent, inde in uiciorū luto perseuerantibus supplicia comminantur. Hæc est prima generalisq. Dei uoluntas, quæ ut hominibus perspecta esset & cognita, quicquid de humanis operibus bonis ac malis diuinæ literæ sonant, memoriæ proditū est. Deus enim ille summus ac uerus, qui sic malos odio, bonos amore prosequitur, ut hos in itinere studioque uirtutis perseuerare, illos ab improbitate regredi uelit, nihil unquam dixit aut fecit, ex quo aut probi deserendæ uirtutis, aut improbi desperationis, aut impoenitentiaē ansam capere possent. Itaque non est mihi dubium, quin omnes sani iudicij homines, quiq. Deum sapientem, bonum, iustum, φιλόφρων esse credūt, illud facilè cōcedēt, eum quēadmodum nō uult mortē peccato-

ris, sed potius ut cōuertatur & uiuat, ita nihil unquā neque dixisse, neq; fecisse, quod huic suæ uoluntati cōtrarium uideri queat. Porro si Deus incredibili clemētia peccatorē post tanta scelera prouocat ad salutē, non minus ardent(er) (mihi crede) ut iusti in uirtutis studio perseuerēt, cupit, nec minus cupidē iis perseuerandi uires suggerit. His ita cōstitutis, & de Dei benignitate, clemētia, *φιλανθρωπία* non modò ratione, sed etiam scripturæ auctoritate confirmatis, ex hac regula consequenter aliam generalē, ad examinandum omnes explicationes, atque interpretationes, omnesque sensus, qui scripturæ locis in quibus agitur dē humanis operibus, attribuantur, elicimus ad hunc modū: Omnis expositio interpretatioq. scripturæ, quæ eò pertinet, ut aut probos à studio perseuerantiaq. uirtutis deterreat, iisq. cœptum in bonis operibus iter deserendi occasionē præbeat, aut improbos in uitiiis ac uitæ impuritate confirmet, uel certè iis ansam præbeat, ut aut uitæ emendationē negligant, aut si poenitentiā egerint, frustra id esse facturos, quasi Dei sententia mutari non possit, ac proinde hi in desperationis barathrū incidant, reicienda est atq; dānanda, tanquā diuinæ uoluntati, spirituiq. sancto, qui nihil unquam



eiusmodi dixit aut fecit, aut statuit, repugnās. Si quis est igitur scripturæ locus, cuius hæc uideatur esse sententia, ut aut improbis ad persistendū in uitijs atq; peccatis animū addat, aut probos à uirtutis studio, perseuerantiāq. deterreat, ita exponendus est, ut cū hac prima Dei uolūtate, quæ multis aliis scripturæ locis euidentissimè demonstratur, cōgruat atq; cōsentiat. Itaq; cū istæ sentētiæ: Bona opera fieri nullo modo possunt. Ieiunia, chameunia, uigiliæ, ceteræq. corporis afflictiones, & omnis uitæ rigidioris austeritas, deniq; pœnitentiæ, quæ dicimus, opera superuacua, inutilia, non necessaria sunt, propterea quòd sola fides sufficit, & si quæ sunt huiuscemodi sentētiæ, cū illi primæ Dei uoluntati repugnēt, cū diuinis literis cōgruere nullo modo possunt. Cū igitur aduersarij taliū sententiarū architec̃ti, ad eas cōfirmandas aliquē scripturæ locum proferūt, nō est dubiū quin scripturæ uerba torqueāt ac repugnātia trahāt, propterea quòd aliis in locis sententiā suā, ac uoluntatē lōgè aliā esse Deus satis luculēter ostēdit. Illud quoq; animaduertendū est, peccatū ita naturæ nostræ repugnare atq; esse contrariū, ut quisquis illud admisit, aut excusare, aut celare, aut negare conetur. Atqui post originale peccatū

& in malū ac uitium proni sumus, & à uirtutis studio nescio qua pigritia retardamur. Quæ omnia incōmoda ex carne, imò ex naturæ corruptione nascuntur. Omnis enim homo ab ineunte ætate in malum pronior quàm in bonū, errorem potius quàm ueritatem amplectitur: & ut ait comicus, omnium ingenium à labore procline est ad libidinē. Hinc carnales homines, & animales, qui nō sapiunt ea quæ Dei sunt, sua peccata suamq. desidiā excusare conantur, quo liberius & uitiiis, quorum illecebris ad mortiferas uoluptates trahuntur, inseruiant, & præruptum atq; confragosum uirtutis, in qua laboris ac difficultatis inest plurimum, iter deserant. Cū igitur id genus homines diuinas literas legunt, si quis occurrat locus, quo uitia sua honesto aliquo pretextu excusare, illāq. socordiā suā, boni q. faciēdi negligētiā alere possint, tū demū quasi reperto thesauro gaudēt & exultāt. Si quis autē propheta, uel cōcionator usq; adeò ingeniosus extiterit, ut huiuscemodi excusationes nō solum excogitare, sed etiā defendere possit, nemo hoc uno libentiùs audietur, nemo gratior omnibus, nemo iucundior. Id enim attulit, quod omnes amarēt, uerumq. esse gestirent. Nec aliud in causa est, ut pseudoprophete semper  
audi-

auditorū multitudine floruerint. longè plures etenim semper fuerunt, qui uitiorum illecebris capti, uoluptatibus inseruirēt, quàm qui arduū uirtutis iter scāderēt. Illi ipsi protoplastæ parentesq. nostri Adam & Eua peccatum suum excusare conati sunt, hæc in serpētem, ille in uxorem, imò in ipsum Deum culpam reiiciens. Exinde miseri eorum posterī uanitatē ita complexi sunt, ut uitia sua atque peccata semper excusare, mendacioq. protegere atq; celare conētur. Quis enim se peccasse libenter fatetur? Quis se in culpa esse non inuitus agnoscit? Ista potius peccatis nostris obtendimus: Aliter, non potui uitam mutare, me ipsum retexere, uitis in quæ pēpē inuitus abripior, repugnare non possum. Ita est in fatis, diabolus, aut nescio q̄s alius, me illud peccatū admittere coēgit. sic homines uitia sua excusare consueuerunt. Quid autē diuinę literæ? Certè peccata omnia ex humano corde ac uoluntate, tanquā ex fonte nasci pronūciant. Inde est illud quod Dominus per Prophetam ait: Perditio tua ex te Israël. Inde illa Christi sententia: Ex corde prodeūt cogitationes malæ, homicidia, adulteria, fornicationes, furta, falsa testimonia, blasphemix. Hæc sunt quæ coinquinant hominē. Nihil est igitur quod apud iustū Dei tribunal

*Osee 13.*

*Matt. 15.*

tribunal cuiusquā uitium aut culpam defendere, excusare, purgare; nihil quod honesto aliquo iustoq. prętextu celare possit. Itaque nec ueri Prophetę, nec sancti Doctores unquam aliquid aut dixerunt, aut scriptū reliquerunt, ex quo aut in uitio cōfirmari possit improbitas, aut cuiusquā in malo p̄tinacia, in bono socordia iustā excusationē capiat. Eò fit, ut illi non solū minus accepti sint ac minus grati, uerū etiā tanto semper odio laborauerint, ut & passim uexati, afflicti, profligati, deniq; ex iis plurimi acerbissimis suppliciis excruciatī, uitaq. priuati sint. Veritas enim odium parit. Amara sunt delicatis, & improbis, quorū hoc nostro miserrimo sæculo magna copia est, pręcepta iustitię. Cōtrā falsi prophetę accepti, cariū sunt omnibus. Assentatio enim uitiorū adiutrix, in stultorum, quibus plena sunt omnia, mētes blādē influit. Quę cū ita sint, cur adeò multi hinc Machometi impietatem sequantur, inde austerū illud uitę genus fugientes monasteriū deserant, atque in uestra castra transfugiāt, non est obscurū. Vt enim Machometi impia lex, ita pręclara religio uestra omne libidinis genus impunē permittit. Sed ut ad rē reuertamur, illud tibi confirmo frater, has inimicitias quas impostores uestri bonis operibus  
indi-

indixerunt, hoc bellum quod cū pudicitia, ieiunio, poenitentia, cæterisq. uirtutibus gerunt, nō aliunde quā ex uno libidinis affectusq. carnalis fonte manare. Solum enim uitium est uirtutis inimicum, cui sicisti assentari student, ut id non modò tegere, sed etiā prætēxu nescio quo atq; ἀδωαμίᾱς nomine adūbrare conētur. Inde bona opera fieri nullo modo posse dicūtur. inde inutiles superuacuæq. uirtutes, quippe nō necessarię, quę apud Deum nullius sint meriti, nominātur. inde omnia in homine à Deo fieri, ipsum autem hominem nihil posse. Sic nimirum humana fouetur ignauia. Sic bonū quod fieri nullo modo potest, impunè dimittitur. Sed iste carnis affectus, non aliqua religio, sed mors est; quemadmodū ex Apostolo in tuis literis ipse commemoras. Mors, inquam, est iste carnis affectus, propterea quod ii, qui hunc sequuntur, ad mortem eamq; perpetuam conciti currunt. Quod natum est ex carne, caro est; uestra ergo secta, quā religionem dicitis, cū ex carnis affectu, atq; prudentia, quæ Dei sapientiæ ueræq. religioni subiecta esse non potest, nata sit, quid est aliud nisi caro? Quare si sapis frater, isti carnis affectui renūciāns, uerā religionē amplectere, quæ crimina nunquā excusans, hinc  
in

in criminosos, ne flagitiorū & criminū somno opprimantur, assiduè clamat, inde bona opera laudās, probos homines iuxta Aposto *Rom. 2.* li sententiam gloria & honore prosequitur. Hęc friuolis excusationibus nostris nullū relinquit locum. hęc bona opera cum auxilio gratiæ Dei, quæ nulli uerè petenti negatur, nō modò facilia, uerūm etiā necessaria, utilia, æternæ uitæ meritoria esse pronunciat. Quę omnia eò pertinet, ut & probi incepto uirtutū itinere, non solum perseuerent, sed etiā currentes, ut dicitur, incitētur, & improbi ad pœnitentiā prouocati, mortiferis uoluptatibus abdicatis in meliora conuersi, ad Deū redeant. Hęc omnia ad Dei uerbū primāq. illā uoluntatē ac sententiā, de qua superius diximus, omnino quadrant atq; conueniunt, cum illoq. carnis affectu siue prudentia, quę peccata nō damnat, sed excusat, & cum omni lege, quam nō Dei sapientia, sed carnis prudentia sanxit, planè pugnat, eiq. cōtraria est. Pluribus uerbis hoc agēdū putauī, ut qua in explicandis scripturis arte, cōstantia, prudētia utamur, intelligas. Neq; enim ita diuinas literas explicamus, ut à primis illis scripturæ propositionibus atq; sentētiis, quibus hinc Deus iustus, bonus, uirtutis ac bonorū operū amator inducitur, inde impieta-

impietatis patronus auctorque peccati negatur, uel transuersum, ut dicitur, digitū recedamus: contra quas quicquid in scripturarū explicatione p̄fertur, non modò falsum est, uerū etiam ipsi scripturæ contrarium.

His ita constitutis, iactōque doctrinæ nostræ de bonis operibus alto ac solido fundamento, erroris autē uestri non solū ex carnis affectu nati, sed etiam supra carnis prudentiam, quæ nihil aliud est nisi mors atque corruptio, non stabili ueritate, sed mendaci uanitate fundati, radice detecta, ueniamus ad causæ nostræ demonstrandam honestatē, operaq. bona cum scripturarum auctoritate congruere; quæ uerò contrā dicuntur à uobis cū ueritate pugnare doceamus. Quod ita simpliciter, apertè, perspicuè planum me facturū esse cōfido, ut si quis in tuo pectore ueri relictus est amor, illa falsa carnis & mortis religione, quā infelicissimè amplexus es, repudiata, ad nos ipsumq. ueritatis domicilium te rediturum esse non dubitem. Porro si neq; adeò perspicua erroris tui refutatione, neque ipsius ueritatis clarissima demonstratione te mouere, atq; ab hoc miserrimo affectu abducere potuero, me de tua salute desperare necesse est, ac deinceps existimare, te à Deo derelictum, in reprobū sensum incidisse,



incidisse, quemadmodū illos præclaros ministros, impostoresque tuos, à quibus huiusce modi erroribus imbutus es, erroris barathro iam obrutos ac demersos esse planum faciā. In primis igitur ne contentiosum funem traham, quod de nostris operibus dicis, tibi ex parte concedo, nimirum ea sine fide nullo modo salutis æternæ esse meritoria. Vnde Gentilium philosophorum, Iudæorum, Hæreticorum opera Deo non esse grata, id est, æternæ uitæ meritoria nō esse concedimus. Sine fide siquidem, ut ait Paulus, impossibi- *Heb. 11.* le est placere Deo. & alibi: Quod nō est ex fide, peccatum est. Inde est illud Augustini: *Rom. 14.* Omnis infidelium uita peccatum est. Nam ubi deest agnitio ueritatis æternæ, falsa uirtus est etiam in optimis moribus. Ideoq. Plato, Cicero, Cato, cæteri q. philosophi fide carentes, imaginem quandam speciemq. uirtutis habere poterant, ueram uirtutem habere non poterāt. Ita quæcunque uirtutis imago, quicquid boni operis in hæretico fuerit, neque uera uirtus, neque Deo grata est, propterea quòd is corde non retinet fidem, ex qua tanquam ex fonte, bonorum operum riuis manat & profluit. Hæc igitur si hæretico semel errore uitietur, omnia opera nostra corrumpit ac polluit. Quæ cū ita sint, pa-  
tere

tere me quæso frater uerum dicere. Neque enim hæc eò profecto, ut te ad iracundiam pro-  
uocem, sed ut tibi tuum periculum osten-  
dam. Cum primùm illam Apostoli senten-  
tiam, quam contra nos facere arbitrabaris,  
in epistola tua legi; Omne quod non est ex  
fide, peccatū est; lachrymas profectò tenere  
non potui. Nam cum hinc unam tantum fi-  
dem, unum Deum, unam ecclesiam, unum  
baptisma esse, solosq. catholicos uerā, & fi-  
dem, & ecclesiā retinere intelligerē, illudq.  
Augustini mihi tū uenisset in mentem; libe-  
rum arbitriū quisquis negauerit, catholicus  
nō est: inde omni te studio ac diligētia eniti  
uiderem, ut probares in nobis nō esse liberū  
uoluntatis arbitrium; facere non potui, quin  
te catholicum non esse, ac proinde hæreticū  
esse concluderem. O miserum, inquebam,  
fratrem meum, & toto lachrymarum fonte  
plangendum: ò infelicem illius coniugem,  
probatissimam alioqui feminam: ò deplorā-  
dam utriusque conditionem! Quicquid. n.  
hi conantur, quicquid moliuntur, quicquid  
efficiunt, peccatum est. Porro si iuxta Pauli  
sententiā stipendia peccati mors, quid aliud  
illi quos tam ardentè amo, quorum salutem  
ita auidè sitio, quid inquam illi aliud agunt,  
quàm ad mortem concitatissimè properare?  
quid

quid aliud quàm suum in dies singulos augere supplicium? Malè sit illi pesti, quæ tam cara mihi nomina circumuenit, quæ mihi cõ iunctissimos ac dulcissimos homines à salutis & uitæ itinere abductos, in illos mortis anfractus errorisq. præcipitia rapuit. Quid illud? quo gemitu, quo dolore mihi deuorandum putas frater, cùm abs te Dei uerba, quæ non intelligis, contra te ipsum produci uideo, cùm te proprio mucrone cõfossus aspicio? Quid enim aliud illa Dei uerba sibi uolunt, nisi ut te tuo ore damnatum esse demõ strent, nisi celeriter ex hoc errore, tanquam ex incendio fugias?

Sed ut ad id, unde digressa est, reuertatur oratio, opera fidei lumine destituta, uitam æternam non mereri, tecum haud inuitus fateor. neque tamen cum disputationis campum ingredior, ut quid huiuscemodi opera ualeant, hoc loco quærendum putem. Illud certè non negauerim, hæc nonnunquam ex congruitate quadam aliquàliter Deo grata esse, & quidem ita grata & accepta, ut illorum contemplatione Deus iis qui ea faciunt, gratiam ac fidei lumen largiatur. Sed hoc loco nolo contentiosum funem trahere, nec quid ante fidem opera ualeant, quærere. illud tãtum quod ex scripturarũ fonte hausi,

liberè dico, cum hominem qui nō malitia, aut pertinacia ducitur, sed errore, & nihilo minus bonis operibus incumbēs, Deum religiosis precibus orat, à Deo non deseri, quin illi ueræ fidei lumen tribuat. tanta est enim Dei benignitas, ut si ita erranti humana remedia subsidiaq. deessent, angelū mitteret potius, quàm illo in errore iacere pateretur. De iis autē loquor qui nec malitia impulsī sunt ut amplecterentur errorē, nec opinione suā tanquā ueram pertinaciter obstinateque defendunt, suiq. erroris expertes nec odio prosequuntur, nec in suam factionem abripere conātur. Qui enim ita sunt animo cōstituti, propter ardētes illos affectus amoris, & odij, quibus eorum iudicia cæcantur, ueritatis lumen uidere non possunt. Cæterum qui simpliciter errans, neminē odit, sed bonis operibus studens, Dei auxilium precibus implorat, hūc, modò adniti uelit, illudque quod est in sua potestate, præstare, ad ueritatis cognitionē peruenturum esse non diffido. Præstet, inquā, illud quod in sua potestate est, id est, non tentet Deum, sed cū aliquem esse, à quo ueritatem discere possit, intelligit, ad illum accedere, ab eoque quid factō opus sit, discere non grauetur. Neque uerò me ad hanc opinionem atque sententiā

temeri-

temeritas, sed obstetricum Aegyptiarum ad ueri Dei fidem præclara conuersio id ut asseram facit, quæ ob humanitatis opera populo Dei exhibita ad ueri Dei uocatae fuere fidem. Sic enim expressè de illis scriptura *Exod. 1.* testatur quod benefecit illis Deus, & quia timuerunt Deum, ædificauit illis domos. Super quo Lyranus ait, quòd propter pietatem erga innocentes, & timorem Dei dedit eis Dominus gratiam, per quam conuersæ ad fidem unius Dei & ritum fuere Hebræorum. Hæc obstetricum pietas, & Dei timor si peccata fuissent, & nõ aliquallyter placuissent Deo, certè tantam non accepissent gratiam. Fuerunt ergo earum opera ante uerã unius Dei fidem aliquallyter præparatoria & dispositiones ad gratiam, & aliqua ratione grata. Hoc igitur est quod initio dicebam, eiusmodi infidelium opera, licet æternæ nõ fuerint meritoria uitæ, peccata tamen dici non posse, aut nõ aliquallyter placuisse Deo, quandoquidem eorum contemplatione singulare istud uerę fidei donum conferebat illis. Vt sint autem æternæ meritoria uitæ: uera, sana, & uiua in Deum opus est fide, quæ bona hominis opera in tam sublimem erigat dignitatis gradum. Viua enim fides opera humana in tam sublimẽ erigit digni-

tatem. In hanc sententiam recipio distinctionem tuam, qua opera duobus modis consideranda esse dicis, uidelicet ante baptismum, & tum meritoria non sunt. Num igitur tecum sentio omnia opera ante baptismum esse peccata? Minimè? Neque enim hoc patitur illud, de quo supra diximus, exemplum. Satis est ergo quòd illa meritoria esse negamus. Nec sanè opus est pluribus. Non enim committendum est, ut infideles atque impios à bonorum operum studio deterreamus. Quod si quis faciendū putat, obstetricum prædictarum exemplum in memoriam reuocet. ita cauebit, ne eiusmodi hominibus iniuriā faciat. Secundò, opera post baptismum facta consideranda esse dicis, quæ, ut tuis uerbis utar, Deus non modò sibi grata esse dicit, uerùm etiam se remuneraturū esse promittit. Qua in re non pugnabo tecū; sed tuam sententiā meo calculo cōprobabo. Cū igitur opera meritoria dicimus, num de infidelium operibus loquimur? minimè uerò, sed tantū de Christianorum operibus. Hic igitur duabus de causis uehementer admiror. Primū, cur fidelium opera meritoria neges, cū ita Deo grata sint, ut iuxta tuā sententiā se illa remuneraturū esse promittat. Deinde cū hæc infructuosa dicas,

quæ

quæ etiã remunerantur à Deo. An quòd ab illo tã æquo iudice remuneratur, id inutile potest esse? Quis, cùm te tã pugnancia loqui uideat, ab illo summo Deo, ac nō potius à cōtradictionis spiritu impulsus te esse arbitretur? Opera remuneratione digna esse iudicas, deinde negas esse meritoria, & quibus præmia attribuis, ea inutilia esse pronūcias. Quæ (malum) est ista orationis leuitas? quæ incōstantia? quæ ambages? An nos ita stupidos homines, & bardos arbitraris, ut tam pugnātia inter se pro ueris possimus amplecti? In Deo nō est, est, & non, sed, ut scriptū est, 2. Cor. 1. in illo est. Ita in doctrina, quæ ab illo fonte manat & profluit, nihil est secū pugnans sibi quæ contrarium. quæ autem à malo spiritu nata est, ea sibi ipsi non consentit. nec mirum, hanc enim contentionis spiritus peperit. Ita fit, ut in uestris dogmatibus sit est, & non, magna quæ sententiarum, pugnant quæ uarietas, quemadmodum infrà planum faciā. Et sanè illud uehemēter admiror, quòd nouellam hanc doctrinā uestram sibi repugnantē atque contrariam ubique deprehendo. Quale enim est illud in primis, quod operum nostrorum remuneratorem Deum esse cōceditis, ipsa uerò opera meritoria esse negatis? Potestne aliquid pugnantius dici? Quid



enim remunerator & remunerabile, nonne correlatiua sunt, ut loquuntur, & alterum pēdet ex altero? Vnde & ea quæ ab Aristotele τὰ πρὸς τι, à nostris relatiua dicuntur, natura ita cōiuncta sunt, ut alterum sine altero esse non possit. ut enim pater & filius, dominus & seruus, inter se cōferuntur, nec unum sine altero intelligi potest; ita nec hominem doctum absque doctrina, nec agentem, nisi sit aliquid quod agi; nec remunerationem, nisi aliquid quod remunerari possit intelligas. Cū igitur operum quæ à regeneratis ac fidelibus fiunt, Deum remuneratorem esse fatearis, ipsa opera quæ remuneratione digna sunt, meritoria quoque sint necesse est. Quid enim aliud est remuneratione dignū, quàm meritorium? Itaque remuneratione dignū id dicimus, cui debetur præmium. Meritorium autem idem esse definimus. Nec aliud apud nos significat hoc uerbum, quod fortè tanquam minus Latinum, & tinnulum, repudiatur à uestris. Sed non est de uerbo laborandum, quando sensus in tuto est. Verū ut ad propositum reuertamur, ualde miror, te frater, qui rem acu maiore ex parte tangebas, atque in ipsius ueritatis adytum fortè delatus, rem uel præcipuam confitebaris, in ipso uestibulo substituisse, ne accessorium,  
sine

fine quo principale consistere non potest, fa-  
 tereris. Dedisti nobis quod est maximum,  
 cum Deum remuneratorem esse confessus  
 es, cur illud, quod ex eo sequitur necessa-  
 riò, esse aliquid remuneratione dignum ne-  
 gas? Qui patrem esse dicis, cur filium tollis,  
 sine quo pater intelligi non potest? Deum  
 remuneratorem esse concedis, & nihil esse  
 uis, quod ille remuneret? Quid hac tua ora-  
 tione uanius? quid inanius? imò insanius?  
 Cur Deo uanum & inanem titulum remu-  
 neratoris adscribis, nec illi quicquam, quod  
 remunerari possit, relinquis? Longè aliter  
 de Deo, quem isti, nescio qui, uerbo remu-  
 neratorem dicentes, re ipsa debitoque ho-  
 nore spoliare conantur, Apostolus loquitur:  
 Credere enim opus est, inquit, accedentem *Heb. 11.*  
 ad Deum, quia est, & inquirentibus se remu-  
 nerator est. Si Apostolo credis, crede omnia  
 uera esse quæ dicit: Deus (inquit) inquiren-  
 tibus se remunerator est. ergo qui Deum  
 inquireunt, remuneratione digni iudicandi  
 sunt. Eorum itaque labor ac studium remu-  
 nationis præmio dignum est, iuxta illud  
 quod in Apocalypsi Deus loquitur: Ambu- *Apo. 3.*  
 labunt mecum in albis, quia digni sunt. Et  
 alibi Paulus: Gloriamur in Ecclesiis Dei pro *1. Thes. 1.*  
 patientia uestra & fide, in omnibus persecu-  
 tionibus

tionibus uestris & tribulationibus, quas sustinetis in exēplū iusti iudicij Dei: ut digni habeamini in regno Dei, pro quo & patimini, si tamen (id est si pro quia) iustū est apud Deū retribuere his qui uos tribulant, & uobis qui tribulamini, requiē nobiscum in reuelatione Domini Iesu de cælo, cum angelis uirtutis eius in flamma ignis dantis uindictā iis, qui non nouerunt Deum, & qui nō obdierunt Euāgelio Domini nostri Iesu Christi. Vides quid Apostolus de bonorū operū dignitate sentiat? Vt digni habeamini, inquit, in regno Dei; & quæ sequuntur. Consentit Apostolus Petrus, bona opera præscribens his uerbis: Vos autem fratres curā omnē subinferētes, ministrare in fide uestra uirtutē, in uirtute autē scientiā, in scientia autē abstinentiā, in abstinentia patientiā, in patientia autem pietatē, in pietate amorē fraternitatis, in amore autem fraternitatis caritatem. Hæc enim si uobiscum adsint, & superent, non uacuos, nec sine fructu uos cōstituent in Dei nostri Iesu Christi cognitione. Cui autē non præstò sunt hæc, cæcus est, & manu tentans, obliuionem accipiens purgationis ueterū suorum delictorum. Quapropter fratres magis satagite, ut per bona opera certā uestrā uocationem, & electionem faciatis. ,

faciatis. hæc enim facientes, non peccabitis  
 aliquando. Sic enim abundâter ministrabi-  
 tur vobis introitus in æternû regnum Do-  
 mini & saluatoris nostri Iesu Christi. Sic Pe-  
 trus nō solum fidē, ut uestri, sed etiam bona  
 opera exigit, quæ qui non habet, eum cæcû  
 manuque tentantem tanquam ingredi ne-  
 queat, esse pronūciat; qui autē habet, is nec  
 uanus, nec sine fructu est, nec peccati naufra-  
 giû facit. Quid? quod per bona opera vo-  
 catio nostra fit certa? Quid? quod ea regni  
 cælestis ianuam nobis patefaciunt? Et erit  
 quisquā qui eiusmodi opera meritoria ne-  
 get, quæ tã multiplicē bonorû copiã submi-  
 nistrant? Hæc autē duo nomina, merces &  
 meritum, correlatiua sunt. est enim merces  
 meriti merces. Dignus est autem operarius *Luc. 10.*  
 mercede sua, utin Euangelio Dominus ait,  
 qui nos etiã operarios uocat. Merces igitur  
 & meritû inter se conferuntur. ubi merces,  
 ibi meritum, quod bonorû operû laborem  
 studiumq. comitatur; propter quod meritû  
 ea mercede digna dicuntur. Omnia scriptu-  
 ræ loca, quibus Deus operibus bonis merce-  
 dem redditurus ostenditur, nobiscû faciunt,  
 nostraque opera meritoria esse demon-  
 strant. quæ enumerare infinitû est. nos ex  
 multis pauca ponemus. Ad Abraham Do- *Gen. 14.*  
 minus

- minus ait: Protector tuus sum, & merces tua  
*Ruth. 1.* magna nimis. In libro Ruth dicitur: Plenā  
*1. Par. 15.* mercedem accipias à Domino Deo Israël,  
*Prou. 11.* Et alibi: Erit enim merces operi uestro. Itē  
*Sapient. 5.* in Prouerbiis: Seminanti iustitiam merces fi-  
 delis. Et alio in loco: Iusti autē in perpetuū  
 uiuent, & apud Dominum est merces eorū.  
*Sap. 10.* Item illud: Reddet Deus iustis mercedem  
*Eccl. 2.* laborū suorum. Qui timetis Deum, credite  
 illi, & nō euacuabitur merces uestra. Item  
*Hiere. 31.* Hieremias: Est enim merces operi tuo. Ve-  
*Matth. 5.* niamus ad nouū testamentum: Gaudete in  
 illa die & exultate, quoniam merces uestra  
*Matt. 10.* copiosa est in cēlis. & alibi: Qui recipit pro-  
 phetā in nomine prophetæ, mercedē pro-  
*Marc. 9.* phetæ accipiet. Qui dederit calicem aquæ  
 frigidæ &c. Amen dico uobis, non perdet  
*Luc. 6.* mercedē suā. Merces uestra multa est in cæ-  
*Ioan. 4.* lis. Item apud Ioannem: Qui metit, merce-  
*1. Cor. 9.* dem accipit. Et Paulus: Si autē hoc uolens  
 fecero, mercedē accipio. Item in Apocalypsi  
*Apoc. 22.* Deus loquitur: Ecce uenio citò, & merces  
*Hebr. 11.* mea mecū est. Moses Apostolica uoce lau-  
 datur, quòd contēpto Aegyptiorū thesauro  
 in futurā aspiciebat remunerationē. Sapiēs  
*Sap. 2.* improborū scelera describens, ait: Excæca-  
 uit eos malitia eorū, & nescierunt sacramen-  
 ta Dei, neque mercedē sperauerūt iustitiæ,

nec

nec iudicauerunt honorem animarum sanctarū. En Sapiens inter impiorū grauissima crimina recenset, quòd ij mercedem iustitię non sperauerunt. Quid hoc est? Certè nihil aliud, nisi arbitrari nullam bonis operibus propositā esse mercedē, id est, ea meritoria non putare. Quæ cū legis frater, nō caligāt oculi tui? nō lingua torpet? nō animo? non toto corpore perhorrescis? O incredibilem animi tui stuporē, si ista legisti; temeritatem, si nō legisti! Dic mihi, tu nostrā Ecclesiam ista numquā uidisse arbitrabaris? tu Christi sponsæ hanc temeritatē, imprudentiam, uanitatē adscribes, ut nullo scripturarū fulta præsidio, nostra opera meritoria esse definiat? Maiores nostri diuinę scripturæ uolumina diligentissimè peruolutarūt, in quibus cū adeò multa de operum meritis inculcata & repetita uidissent, hoc sacrilegio se cōtaminari passi nō sunt, ut prodita ueritate, bona opera meritoria esse negarent. Quæ cū ita sint, uis me tā multas Dei calcare sententias, ut tua, imò Caluini somnia suscipiā & amplectar? Hinc Deus multis scripturæ locis, unicuique iuxta suorū operum qualitatem se mercedē redditurū esse promittit. Inde Caluinus oblatrat, opera nihil mereri, & tu me uis Caluino potius, quā Deo credere?

credere? Num obscura sunt Dei uerba, quibus innitimur, nostramq. sententiam confirmamus? An opera non erunt meritoria, quibus mercedem Deus præmiumq. promittit? Audaçter ergo dicam opera bona regni cælestis esse meritoria. Sed molestum est, inquires, meriti nomen, quod in diuinis literis non habetur. Si meriti uis in scriptura reperiatur, quid de nomine laborandū est? Deus in scripturis operum nostrorum remunerator dicitur, iisq. merces tanquā debita promittitur, & tu in diuinis literis meriti mentionem fieri negabis? Cū Deum patrem audis, statim de filio cogitas, sine quo pater esse non potest: ita qui de operum mercede tam multa dixit, is meritum si non uerbo, at certè re ipsa dixisse credendus est. Nam si merces sine merito ne cogitari quidē potest, certè operis nomine meritum intelligēdum est. Sufficiunt hæc quidem homini minimè pertinaci, qui uerborum significationem tenens, de ipsis uerbis rixandum non putat. Attamen ipsum meriti uerbū scriptura certo loco posuit, dicens: Omnis misericordia faciet locū unicuiq; secundū meritū operū suorum. Et Paulus de Enoch: Priusquam. n. transferretur, testimonium meruerat quòd placuisset Deo. Ita è Græco uertit Erasmus.

QVAM

*Eccl. 16.*

*Heb. 11.*



QVAM ABSVRDVS SIT HIC  
error, pluribus uerbis exponitur.

**C**AE terum quàm absurdè opera esse me-  
ritoria negentur à uestris, hoc loco de-  
monstrare operèpretium est. Illud in primis  
uehementer admiror, mala opera à te deme-  
ritoria dici, bona meritoria negari. Si hoc ita  
se habet, uide ne Deum iniquitatis accuses.  
Cur enim ille hos ob mala opera eternis sup-  
pliciis adiudicet, illos ob bona nullo prēmio,  
nulla mercede dignos censeat? Potestne esse  
optimus atque iustissimus, qui malum opus  
æterna morte condemnat, bonum cum sua  
gratia & cooperatione immortalitate dignū  
esse non iudicat? Si mala opera tam acerbis  
suppliciis digna sunt, dic mihi cur Deus bo-  
na opera tanto prēmio tantaque mercede,  
quanta sunt malorum supplicia, nō repēdit?  
Si Deus iustus est, cur & probis & improbis  
iuxta opera sua non reddit? Et si ab homine  
opera prēmio digna non postulat, cur illius  
peccata supplicio digna existimat? Sed ad te  
redeo, cur (rogo) bonum opus mercede ac  
prēmio dignū esse nō audes fateri, cū malū  
supplicio dignum esse fatearis? Cumque op-  
positorum eadem sit scientia, qui hæc opera  
morte digna esse nosti, potesne ignorare illa  
digna

digna esse uita? Non minus hic Dei benignitas, quàm illic iustitia periclitatur. At enim ut Dei gloriam conseruetis, illiusq. benignitatem & gratiã prædicetis, hoc orationis genus à uobis institutum esse dicitis. Rectè, sed ita gratiam extollitis, ac fertis in cælum, ut æquitatem ac iustitiam deprimatis in cœnũ. Nam cùm omnia gratiæ Dei adscribitis, iustitiæ nihil: hanc nimis rigidam ac seueram inducitis, quæ cùm peccata tam acerbè puniat, uirtutes ne respiciat quidẽ. Si illa diuina maiestas secundum uos ad miserendum quàm ad puniendum propẽsior est, cur illã adeò trucem facitis, ut in malum opus seuerissimè animaduertat, æquitatem illi detrahitis, qua bonum nullo præmio, nulla mercede dignetur. Si peccatum morte, & quidem eterna dignum arbitramini, cur uirtutem uitæ præmio iudicatis indignam? Hoc cine est Dei gloriam extollere? Imò uerò minuere. Nam si uera sunt uestra paradoxa, iniquum Deum, qui in peccata acerbissimè sæuiat, uirtutes ne respiciat quidem, existimemus necesse est. Quis iam de Deo non iure queratur, quòd hominem adeò infelicem ac miserum finxerit, ut operibus suis pœnam eternã sibi comparare posset, uitam æternam ne cū gratia quidem posset? Bona opera, ut dicitis,

con-

cōtemnit & præterit, mala usque adeò exaggerat, ut infiniti supplicij animaduersione condemnet. Atqui satius est, ut ait Seneca, prodesse etiam malis propter bonos, quàm bonis deesse propter malos. Et ut Iuriscon-  
 sulto placet, Satius est impunitum relinqui *Lib. 4. de benefic. ff. de pœnis. l. absentē.* facinus nocentis, quàm innocentem damnari: fauores enim ampliandi sunt, rigor restringendus. Contrà iustitiæ Dei rigorem in hos amplias & intendis, in illos tam iniquū facis Deum, ut eorum bona opera, innocentiam atque uirtutes pro nihilo putet atque despiciat. Quanto melius nostri Theologi Deum dicunt punire citra condignum, remunerare ultra condignum, minus fortasse Latinè; sed hic res, non uerba quæruntur. In remunerandis ergo bonis hæc duo, iustitia liberalitasq. coniuncta sunt. Iustitiæ est, quòd operibus nostris magna quædā merces ac præmium debebatur à Deo; liberalitatis, quòd ille multo amplius, quàm opera merebantur, munificentissimè cōcedit. Sed duas istas in remunerandis bonis fulgere uirtutes diuinarum literarum testimoniis comprobemus. Apostolus mercedem suam iustitiæ coronam uocat. Reposita est, inquit, mihi corona iustitiæ, quam reddet mihi Dominus in illa die iustus iudex. Et alio loco: Nō  
 enim

enim iniustus est Deus, ut obliuiscatur operis uestri, & dilectionis, quam ostendistis in nomine eius. quasi diceret: Si obliuisceretur operis uestri, & dilectionis, iniustus esset. Itaque secundum hanc Apostoli sententiam, dicimus iniustum fore Deum, qui peccatum animaduersione mortis æternæ plectit, nisi & uirtutem honesta aliqua mercede compenset, præmioq. dignetur, & promissis steterit, quibus non semel, sed sæpius, se bonis iuxta illorum opera mercedem redditurum esse pollicitus est. hætenus de iustitia. Liberalitas autem benignitasq. diuina quibus in rebus cernitur? Primum in eo quod homines, ut bona opera facere ualeant, gratiam eorum infundendo cordibus, adiuuat. Deinde quod opera nostra, quamquam illi nihil conferunt, tamē remunerare dignatur. Tertiò, quod in remuneratione plura quàm meruimus, diuina benignitate cōcedit. Quæ si nihil amplius, quàm debitum esset, daret, non posset intelligi. Liberalitas enim è gratiæ fonte manat, iustitia meritum respicit. Itaque si nihil aliud daret, nisi quod debet, solam in illo iustitiā prædicarem: iam cū amplius tribuat, illius iustitiam beneficentiamque laudamus. Iustitia igitur & gratia, ueritas & misericordia, remuneratio & liberalitas

ralitas in bonorum retributione obuiauerunt sibi. Sic igitur hæc argumenta tractanda sunt, ut non aliquam scripturæ partem, sed eam totā ueram esse credamus: neq; solum ea loca, quibus iustus remunerator Deus dicitur, uerū etiā ea, quibus Dei benignitas & munificentia prædicatur, recipiamus: id est, ut ita Dei gratiā beneficiūq; laudemus, ut bonorum operum atq; meritorum, quæ admodum diuinę literę faciunt, rationem aliquam habere uideamur. Hoc in te frater pro meo in te amore desidero. Totam itaq; scripturam amplectere, illamq; impietatem, quæ scripturæ auctoritate scripturā euerit, fuge. Cū enim clara scripturarū illustrisq; sentētia sit, bonis operibus reddi mercedē; fieri non potest, ut illæ Dei gratiæ omnia tribuant. Ita enim Apostolus: Ei autē, inquit, *Rom. 4.* qui operatur, nō reputatur merces secundū gratiam, sed secundum debitum. Hæc mercedis natura est, ut non ad gratiam, sed ad debitum referēda sit. Itaque cū operibus nostris, Deus se mercedem redditurum esse promittat, in iis aliquid dignitatis, quod mercedem postulet, insit necesse est.

Hoc loco aliud argumentū, quo operum dignitatē ostēdamus, occurrit, quod ex ipsa mercedis uarietate sumit. Apostoli sentētia

P est:

est: Vnicuique secundum suū laborem mercedē esse reddendā. ex qua intelligi potest, qui amplius laborauerit, eū ampliorē mercedē recepturum. Inde est illud Christi: In domo patris mei mansiones multæ sunt. in quibus intelligitur uarietas præmiorum, unumq̃. altero esse maiorē. Quod profectò constare non posset, si in operibus humanis quædam non modò dignitas, sed etiā uarietas non inesset. Vt enim uitiorū magna diuersitas est, nec iuxta Stoicorum insaniam, omnia peccata sunt paria; ita uirtutū multa distātia est: quod certè fieri nullo modo posset, si omnia ex illo gratiæ Dei fonte tantum manarent. Vides quā aptè, quā cādide agimus. neque enim aliqua scripturæ membra truncamus, cuius auctoritatē secuti, gratiam Dei cum operum meritis copulamus. Mercedis ac remunerationis uocabula, quæ in scripturis passim occurrunt, nos quoddā meriti genus asserere coēgerunt, gratiæ nomen sustulit, humanum tumorem ita redegit in ordinem, ut illum scopulum fugientes, inter opera nostra per se cōsideratas eorumque mercedem, non æqualitatē ac parē dignitatem, sed congruentiam quandam esse fateamur, nō ut merita nostra præmij magnitudini ex æqualitate respondeāt.

Si

Si hæc ante didicisses, mi frater, quàm Theologiae magisterium usurpares, nunquam in tã absurdi erroris barathrum incidisses, nec inter has scripturarum, quæ ob tuã opinionem sensumq; peruersum, quem illis attribuis, tanquam in acie concurrere uidentur, symplegadas fluctuantes. Ex hac igitur supputatione illa summa nascitur, opera nostra esse meritoria, non inania, uana, infructuosa, quemadmodũ dicitis. Nam cum Spiritum sanctũ per Prophetarũ & Apostolorum linguas tã multa uerba consumere uideo, cum ipsum Dei filium è cælo in terrã uenisse cõsidero, ut hominibus uirtutis uia panderet, eosq; ad bona opera non solum uerbis hortaretur, sed etiam incitaret exemplis, quæ & Dei filius tã studiosè docuit, & ueritatis spiritus tam accuratè commendauit, ea uana, infructuosa, friuola existimare non possum, nisi fortè & Christi sermo friuolus & inutilis, & Dei spiritus uanus est. Cum igitur tam multis uerbis remunerationem ac mercedẽ bonis opèribus Deus se redditurũ esse promittat, nimiũ profectò durus ac ferreus sim; si tantæ auctoritati non cedam, eaquẽ opera quibus Deus iustus ac uerus tã præclara promittit, meritoria esse non credã. Gaudete, *Matth. 5.* ait, & exultate, quoniã merces uestra copio-



*Apoc.* 18. *sa est in cælis . & alibi : Reddā unicuiq; secū-  
 dum opera eius. Hæc uerba, secundū opera,  
 quandam in operibus humanis manifestè si-  
 gnificāt qualitatem, quæ in remuneratione,  
 mercede, præmio attenditur. Hanc nos meri-  
 tum dicimus, & sanè, ni fallor, propriè dici-  
 mus. Cæterum ut quod de operum nostro-  
 rum inutilitate dicis, rectè intelligatur, anim-  
 aduertendum est, mercedē operibus debe-  
 ri, duobus modis cōsiderari posse. Primum  
 ex ipsius operis natura, uidelicet cū is, cu-  
 ius causā fit, ex eo opere uoluptatem aliquā  
 fructumq; capit. Tum enim is operario pro  
 suo labore fātisfacere debet. Vnde scriptura  
 ait: Dignus est operarius mercede sua. Nam  
 operarij detinere mercedem, unum est ex iis  
 peccatis, quæ ad Deum clamantia postulāt  
 ultionem. Quod peccati genus, mea senten-  
 tia, tantoperè execratur Deus, ut quàm ar-  
 dēter & cupidè pro ipsius obsequio laboran-  
 tibus satisfaciāt, à nobis intelligi possit. Alte-  
 ro modo merces operario debetur ex pacto  
 atq; cōuento, cū is, qui opus imperat, se sa-  
 tisfacturū esse promisit. Tū enim, etiā si ex  
 eo opere nihil ille fructus, nihil utilitatis ca-  
 peret, quia tamē imperauit, seq. soluturū es-  
 se promisit, fides illi seruanda est. Quod qui  
 nō facit, & illum iniuria afficit, & se perfidiæ  
 crimine*

crimine adstringit. Hinc est quòd operarius à viro bono conductus, de cuius fide atque integritate non dubitat, habet pollicenti fidē, nec ueretur ne aut ille fallat, aut ipse sua mercede priuetur. Ita de Deo & nostris operibus iudicandū est. Neque enim hæc si cū Dei beneficentia cōferantur, suapte natura sunt meritoria, neq; Deus ex his aliquid fructus aut utilitatis capit, cū nullius indigeat, nec illi nostra deuotione, obsequio, studio quicquam accedat. Sed cū ad illius & præcepta, quibus hæc opera nobis imperauit, & promissa respicimus, quibus mercedē nobis pollicitus est, opera dicimus meritoria ratione gratiæ Dei cū qua fiunt, & ex ipsius pacti cōuentiō. natura, quod Deus nobiscū bona fide pactus est. Cuius rei tabulas prorsus authēticas, obsignatas, omninoq. firmissimas, cū in ueteri tū in nouo instrumēto habemus, in quibus Deus præceptorū suorum obseruatoribus uitā pollicetur æternā. Hac igitur inter Deū & nos cōuētionē trāfacta, opera nostra modò rectē atq; ordine in ipsa cōuētionē præscripto gerantur, promissam mercedē mereri dicimus; quam si seruis suis atq; operariis denegaret Deus, esset iniustus. Sine pacto & Dei gratia nihil nobis pro nostris operibus debebatur, post pactū

si nobis promissa merces denegaretur, certe afficeremur iniuria, ipseque Deus fidem falleret, atque homines mendacio circumuentos, in impostorū more deciperet. Sed quoniā impossibile est mentiri Deum, à quo ueritas omnis ac bonitas, tanquā à fonte, manat & profluit, quicumque illius se deuouet obsequio, se nō frustra laboraturū esse nō solum iure confidit, sed etiam certus est. Hinc illa

2. *Tim.* 4. Apostoli præclara fiducia: Bonū, inquit, certamen certavi, cursum consummaui, fidem seruaui, de reliquo, reposita est mihi corona iustitiæ, quā reddet mihi Dñs in illa die iustus iudex. Ita spes illa præclara, qua Paulus sibi iustitię coronā meritò pollicebatur, Dei æquitate subnixa, inter uiolentos sæculi fluctus atq; naufragia, stabat immobilis. O singularis & admiranda fiducia: quę de bonorū operū cōscientia & Dei æquitate nata, uirtutibus adolescit, & in animis piorū hominū, Deiq. seruorū, altissimis radicibus nixa subsistit. Sciebat enim Apostolus Deū iudicē, si certantibus promissum uictoriæ præmium minimè reddidisset, iustū non esse dicendū. Quod ut magis perspicuum fiat, Dauidis & Saulis regis profertur exemplum. Ille cū esset pastor ouium, uidebatur indignus, & erat, si eius statum spectamus, qui regis filiæ

matri-

matrimonio iungeretur. Sed cum rex filiae suae nuptias pollicitus esset ei, qui cum Goliath gigante pugnasset, eumq. uicisset, partem iam de gigante uictoria, filiam suam Dauidi sine iniuria negare non poterat. Quod si rex fecisset, sine dubio fuisset iniustus. filiam ergo regis merebatur ille, non status sui, aut uictoriae genere, atq; natura, sed ex pacto atq; cōuēto, quo rex filiae suae nuptias uictoriae premiū fore promiserat. Hinc quid per se considerata, & quid cum gratia Dei opera nostra ualeāt, aut nō ualeāt, quantū aut mereātur, aut nō. facilē potest intelligi. Neq; enim ea Deo quicquā aut merentur aut conferunt, sed nobis tantū profunt. Si ergo inutilia cuiquam uidentur, certē Deo inutilia sunt. Quanquā scripturae locū, quo bona opera inutilia uel infructuosa dicantur, nullū adhuc uidi. Illud quidem constat, Christum monuisse discipulos, ut Pharisaicū illud supercilium, quo superbū & arrogans hominum genus sese cunctis anteponebat, ac melius ceteris esse iactabat, tanquam pestem aliquam atque perniciem aspernarentur ac fugerent, animiq. moderationi atque humilitati ita studerent, ut se seruos inutiles esse sentirent. Illorum autē opera inutilia, uana, infructuosa esse non dixit. Sunt illi quidem

inutiles serui, propterea quod ex illorū obsequio nihil domino fructus, nihil utilitatis accedit: sed eorū opera & obsequia illis inutilia esse non dicit, pro quibus amplissimā iis in cælo mercedem præmiūq. promittit. Ita si Dominum, cuius serui sumus, attendimus, profectò serui inutilis sumus. Neque enim illū obsequio nostro ditiorē aut fortunatiorē reddere possumus. Sed si nos ipsos respicimus, certè utilissimi negotiatores sumus, ac thesauri Domini diuites fortunatīq. custodes, qui præceptorū Dei obseruatia uitā nobis ac regnū cōparamus æternū,

*Matt. 19.* iuxta illam Christi sententiā: Si uis ad uitā ingredi, serua mandata. Quod qui faciūt, iis Dominus immortalitatē, iis regnum cælorum, iis æternæ beatitudinis præmiū diuina uoce promittit. Hinc Apostolus quoq; *1. Tim. 6.* Timotheo docendi rationem formamq. præscribens, Diuitibus, inquit, huius sæculi præcipe, nō sublimè sapere *μὴ ὑψιλαφρονεῖν*, neq; sperare in incerto diuitiarū, sed in Deo uiuo, bene agere, diuites fieri in bonis operibus, thesaurizare sibi fundamentū bonū, ut apprehendant uerā uitā. Hæc opera, quæ tantorū bonorum cumulus sequitur, tu inutilia dices? Hæc inquā, opera, quibus, ut

*2. Pet. 1.* Apostolus Petrus ait, certā nostrā uocationem

nem & electionē facimus, tu tanquā infructuosa damnabis? Cū igitur ab ipso Deo ad bonorum operum studiū tam crebris, tā magnis pollicitationum stimulis incitemur, ut eo studio regnum æternū, cælum, immortalitatis præmiū comparemus, an non rectē dicimus, nos ea omnia bona uirtutū ac bonorū operū studio nobis comparare? Planē ad eundē modū, quo mercenarius aliquis ad certū opus faciundum interposita pactiōe conductus: hic postquam opus illud absoluit, nonne se suo labore atque sudore pactā mercedē sibi cōparasse iure dicit? Ita quoniam nostris laboribus atque sudoribus certam mercedem Deus ipse promisit, cur nos Deo seruientes regnū cælorū nobis comparare, imò lucrari, non liceat dicere, quod nobis laborātibus præmiū, operisq. nostri mercedem ipse proposuit? Ne illud quidem hic anxie mihi quærendū puto, num in hoc pacto atque conuento, ultra iusti pretij dimidiam partē Deus fortē fallatur. neq; enim desipiebat ille cū pactus est; cōuēctio quidem è re mea est, sed fidē ille non fallet. Cuius pacti ui atq; ratione, dico me regnū cælorū, modo præscriptas leges obseruē, mihi esse comparaturum. Sic igitur spem meā atque fiduciam, quæ non meis tantum operibus,

bus, sed Dei pollicitationibus nititur, in ipsa  
ueritate defixi. Impossibile est mentiri Deū.  
Qui benigno atq; liberali domino seruiūt,  
plura lucrātur, quā iij qui auaro ac tenaci  
ministrāt. Et qui ei domino seruit, cuius nō  
solum opes, uerū etiam liberalitas infinita  
est, nōne se infinita sibi comparare iure glo-  
riari potest? Itaq; nō est quod uereamur, ne  
talis dominus in transigenda conuentione  
deceptus sit. Ille enim satis sapiens est, nec  
quid facto opus sit ignorat. Ego uerò illud  
pactū & conuentū esse inter Deum & nos,  
meritò gaudeo. Si uereris, ne Deū fortē de-  
cipias, si adeò religiosus es, ut ob consciētiae  
scrupulum tanquam cum prodigo uel mino-  
ri, qui quid agatur, ignoret, negotium transi-  
gendum sit, huic pacto stare non audeas, in-  
tegrum tibi est desistere, Deus neminem co-  
git. Ego uerò tam religiosus ac sanctulus esse  
nolo, ut Dei uerbis stare non audeam. Si ille  
in hoc negotio fortē prodigus fuit, ut quāti  
opera nostra essent, aestimanda nesciret, ipse  
uiderit. An illum homines, ut cum illis ita  
pacisceretur, coegerunt? Ego, inquam, il-  
lius uerbis atq; promissis ita stare cōstitui, ut  
eū etiā appellare non dubitē. O me felicem,  
cui quāquam est adeò curta supellex, tamen  
inter ipsos pannos & illuuiem aliquid, quo  
rem



rem pretiosissimam mercari possem, inueni:  
Fortunatum te diceret atq; felicem, si uno  
denario centū aureos lucratus esses, & quā-  
quam inter unum obolum & centū aureos  
magna distantia est, tamen centum illos au-  
reos uno obolo te lucrātū esse audacter glo-  
riareris: ita tamen si inter nostri laboris meri-  
tum secundum operis naturam consideratū,  
& cælestis regni præmiū plurimū intersit,  
propterea tamē, quod tam sapiēs Dominus  
pro aquæ frigidæ calice tantū præmium tri-  
buit, eius liberalitatē ac munificentiam non  
aspernabor, rēq. adeò pretiosam tā exiguo  
pretio cōparans, Deo Opt. Max. tam beni-  
gno, liberali, munifico, imò magis prodigo,  
quā fortē uelles, immortales gratias agā.

Sed ut ad propositū reuertamur, hoc emo-  
lumentum atq; lucrum, quod in Dei obse-  
quio facimus, mercedē idcirco dicimus, qđ  
id in scripturis eodē modo dicitur, quibus  
ut credamus Deū inquirentibus se remune-  
ratorem esse, præcipitur. At uerò Paulus ait:  
Non sunt condignę passionēs huius tempo- *Heb. 11.*  
ris ad futuram gloriam. Rectē. Nihil melius *Rom. 8.*  
dici potuit. nam cū Domino tā bono nobis  
res est, ut nos de exiguo ditari uelit. Parum  
est qcquid ad eius obsequiū attulimus, sed  
nos diuina beneficētia cælesti liberalitate lo-  
cupletat.

cupletat. Hæc est nostra felicitas, hæc nostra uera gloria est. Quærenti igitur tibi qui fieri possit, ut cum hæc ita sint, nostra opera meritoria dici debeât, uno uerbo respōdeo: quia Deus ita uoluit atque decreuit; quia ei qui opera bona fecisset, tanta promissa sunt præmia. Inde est illud Apostoli: Vnusquisque propriam mercedē accipiet secundum suum laborem. Inde illud ipsius Christi: Gaudete & exultate, quoniam merces uestra copiosa est in cælis. Nos igitur utrumque scripturæ locū obuiis manibus amplectimur, tam eum quo opera nostra tâto futuræ gloriæ præmio pronūciâtur indigna, quàm hūc, quo ipsis operibus mercedem deberi ostenditur. Cur ex his duobus scripturæ locis alterum recipis, alterum reiicis? utrumque una atq; eadē scripturarum auctoritas sanxit. Itaque si fidem nostram hoc modo exponas, nihil nec in ea absurdum aut ineptum, nec in Dei uerbis, quod secū pugnare uideatur, inuenies. Nos igitur, abiectō superbix supercilio, animum nostrum moderatione atque humilitate deprimimus, cū opera nostra ex sua natura promissæ gloriæ magnitudinē equare non posse perspicimus, in eoq; Dei nostri summum beneficium ac munificentissimam gratiam recognoscimus; quod quamquam

quam à nobis, quòd illi proſit, nihil fiat, obedi-  
entiaẽ tamen noſtræ per inhabitantem ſpi-  
ritum eius in nobis tantam mercedem præ-  
miumq. conſtituit. Ita cùm quanta præmia  
Deus uirtuti propoſuit, nobis in mentẽ ue-  
nit, tum ad ſtudium uirtutis incendimur, tũ  
in Deo gloriamur, nobisq. ipsis piẽ gratu-  
lamur, quòd ſummus ille Deus tanta nos fe-  
licitate dignatus eſt, ut ad nominis ſui cogni-  
tionẽ adductos, in familia ſua & inter ſeruo-  
rũ ſuorũ greges numeret. Quod noſtrã ſpẽ  
atq; fiduciam nutriend, legis diuinæ iugum  
nobis non modò leuiſſimum, ſed etiam ſua-  
uiſſimum reddit. Vides mi frater quàm ho-  
neſta, quàm ſancta, quàm & rationi & ſcri-  
pturarum auctoritati conſentanea ſit atque  
conueniens fides noſtra? Quæ cùm ita ſint,  
quanta eſt tua inſcitia? quanta animi tui cæ-  
citas, cùm ita in tuis literis ſcribis, ut nos Ec-  
cleſiamq. catholicã feſtiuè ac lepidè irri-  
dere uidearis, propterea quòd noſtris operi-  
bus ac meritis regnũ celorũ conſequi poſſe  
nos dicimus? O mentẽ Cimmeriis, ut aiunt,  
tenebris atriorem! Nimirum imperitiæ tuæ  
teſtem totum orbem habere uoluisti. Nam  
quæ ſit fidei noſtræ ratio, quam tam temerè  
improuideq. damnaſti, te nunquam intel-  
lexiſſe perſpicuum eſt. Nec minori temeri-

tate matrem ecclesiam & nostram, & quondam etiam tuam, in cuius placidissimo sinu utinam perseverasses, & ad quam uelut ex multa tempestate in portum te aliquando errore damnato, rediturum esse confido. Non minore, inquam, temeritate, amentia, furore matrem ecclesiam accusas, quod contra Dei uerbum opera nostra meritoria esse doceat atq; defendat: imperitè sanè, si iudiciū sequamur tuum. Sed plus est (mihi crede) sapientiæ, plus eruditionis atq; doctrinæ in minimo Ecclesiæ nostræ digitulo, quàm in toto synagogæ uestræ corpore. Est enim sapientia in senibus, temeritas autem & inscitia lasciuiantis ætatis. Nostra ergo mater ecclesia eum antiquitatis & experientiæ conscendit gradum, ut spiritu Dei plena nihil quod à quoquam discere possit aut debeat, reliquum esse uideatur. Tam multis enim ab hæreticis aliisque suis hostibus tamque crebris questionum fluitibus ab ineunte ætate iactata, ita inter sæculi tempestates atque naufragia semper emerfit, ut eorum omnium, qui illam erroris atque ignorantie damnare conati sunt, inscitiam, arrogantiam, uanitatem, impudètiā, furorem toti orbi tanquam in speculo spectandum exhibeat. Itaque cum hinc mecum reputo, quàm audacter & teme

rè in matrem ecclesiam latrans, nō dubitasti dicere, quicquid illa de libero uoluntatis arbitrio, & operū meritis docet, cū uerbo Dei & scripturarū auctoritate pugnare, inde tor & testimoniorum nube celatum atque obrutum, & rationum, quas ex scripturarū fontibus haufimus, telis confossum profigatūq. te uideo, utrum iis, quorum dolis, fraude, perfidia in hanc errorum uoraginem adductus, iter salutis ac uitæ temerè reliquisti, sto machari, an sæculi nostri calamitatem toto lachrymarum fonte plangendam deplorare debeam, diu multumq. dubitauī. fraternus enim amor me tibi succensere non patitur, sed potius me ad misericordiā impellit, dum mecum reputans, in quantū errorum barathrum incideris, infelicitatem tuam dies noctesq. deploro. Quare mi frater, si quis est in te mutæ beneuolentiæ sensus, si quod pietatis uestigium, si nobis & scripturarum auctoritas, & sanctorum patrum consentit antiquitas, si hinc fides, ratio, æquitas, bona opera, totusq. uirtutum chorus nobiscum in iisdem castris militat, inde perfidia, furor, iniquitas, uitiorum denique omnium una colluies, uirtutem ac ueram religionem oppugnat, in uiam atq; in matris ecclesiæ gremiū redi, segrega te ab illis lupis, salutemq. tuam

tuam ueri pastoris tui curæ consilioque com-  
mitte, ut unâ nobiscum in eodem fidei uirtu-  
tisq. domicilio clarissimum ueritatis lumen  
agnoscas, discussisq. illis ignorantiæ tenebris,  
mente integra, religione sincera, pietate con-  
cordi, uoce pura colamus Deum & patrem  
Domini nostri Iesu Christi, qui est benedi-  
ctus in sæcula. Amen.

Sed ut ad propositum reuertamur, quàm  
facile hæc controuersia dirimi poterat, si ue-  
stri non aliquam scripturæ partem respexis-  
sent, sed totam scripturam amplexi essent,  
nimirum ut Apostolo crederent non solum,  
cùm is opera nostra futuræ gloriæ præmio  
pronunciaret indigna, uerùm etiam cùm  
vnumquemque mercedem secundum suum  
laborem recepturum asseueraret. Nos utrūq.  
eadem credulitate complectimur. Itaq; pro-  
pter illam Apostoli sententiam, negamus ho-  
minis opus ex suo genere atque natura ma-  
gnitudini præmij æquari, eoque dignum esse  
posse. Propter hanc bonum opus merito-  
rium credimus, non suapte natura, sed pro-  
pter Dei gratiam cooperantem, & propter  
illud pactum atque conuentum, de quo su-  
perius diximus, quod si Deus uiolaret atq;  
rescinderet, iniquus uideretur, ac mendax.  
Quod cùm fieri nullo modo possit, Dei que  
promissis



promissis nihil sit firmitus, nihil uerius; nos iuxta scripturæ regulam atque sententiam utrumque uerum esse profitentes, unum alteri negamus esse cōtrarium. Nam cū Dei uerbum utrumque ponat atque confirmet, quid erat facilius, quā isti cōtrouersiæ sine ulla contentione finem imponere, si uestri totam scripturam dignaretur amplecti? Sed quoniam iis aliud propositum erat, nimirū ut bona opera nō meritoria, sed inutilia, uana, infructuosa esse orbi persuaderent; idq. uel maximè ad consiliōrum suorum executionem necessarium esse acuti homines uidebant, iis scripturæ locis atq; sententiis, quæ bonis operibus mercedem ac præmium assignant, non modò credere noluerūt, uerū etiam bellum indicendum putarunt. Hinc igitur illæ lachrymæ, hinc tanquam Scyllei canes in abstinentiam atq; ieiunia; hinc in castitatem, pudicitia, sanctitatem; deniq; in omnem uirtutum chorum latrant. Neque enim iis expediebat laudare uirtutem, aut bonis operibus aliquod præmium assignare; quod si facerent, intelligebant homines callidi, hac ratione sua cōsilia retardari, suumque cursum quasi contrariis uentis impedi-ri. Fecerunt igitur quod è re sua uidebatur esse, omnesque neruos intenderunt, ut

Q orbi



orbi se excusatione dignissimos esse persuaderent, cum illam antiquorum patrum disciplinæ severitatē, uirtutumq. uestigia minimē sequerentur. Quod si faciundū esse confiterentur, & bonorum operū promissæq. mercedis ac præmii aliquam habendam esse rationem, facilē intelligebant homines acutissimi, excusationis suæ molem stare non posse. Cum igitur hoc animo ad diuinarum literarum lectionem accessissent, eorum locorum, quibus ad deprimendā hypocrisim, illudque Pharisaicum supercilium deiiciendum, scriptura utitur, grandem aceruum ita coëgerunt, ut eas omnes scripturæ sententias, quibus amplissimum immortalitatis regniq. cælestis præmiū bonis operibus pollicetur Deus, studiosē tanquam syrtes ac scopulos præterirent. Acutē sanē. Quis enim adeo uirtutis inimicus? Quis adeo Epicureus est, ut cum audiat Deū bonis operibus tāta præmia pollicentē, ipsa opera uana & inutilia dixerit? Quis infructuosa existimet, quibus remunerationis æternæ merces diuina uoce promittitur? Quod oculus non uidit, nec auris audiuit, nec in cor hominis ascendit, id præparauit Deus iis, qui diligunt illū, ait Apostolus; qui in tertiū cælū raptus, Dei arcana cognouit. Tantū est igitur illud bonum,

1. Cor. 2.

Isaie 64.

num, ut ei addi nihil possit. I nunc frater, & talia opera, quibus Deus rerū sapientissimus æstimator tantā mercedē præmiumq. promittit, infructuosa crede. An inutile est, qđ infinitam utilitatē adfert? Quid mirabilius cogitari potest, quā nullū opus esse adeo exiguum ac tenue, quod sua mercede priuetur? Mentior nisi mihi Christi uerba cōsentiunt: Si quis dederit calicem aquæ frigidæ tantū in nomine discipuli, amē dico uobis, non perdet mercedem suam.

Sed ut ad propositum reuertamur, uides frater quā apertē, quā cādide, quā simpliciter hic agamus, cū Dei uerbo simpliciter credimus? Ex quo intelligi pōt, quod antē dicebam, omnem hāc de humanis operibus cōtrouersia facile dirimi posse, si uestri, qui de Dei uerbo tāto perē gloriātur, ei fidē adhiberent. Sed ab his ut omnia Dei uerba recipiant iure postulo. Nam si uera sunt ea, quibus operū ac præmiorū negatur æqualitas, cur alia qbus uirtuti ac bono operi merces æterna promittitur, tanquam falsa repudiantur? Vis me frater tot Dei uerba mēdaciū uanitatīsq. damnare? Si hoc impiū est ac sacrilegū, patere me opera nostra meritoria existimare, sine me credere magnā iis à Deo propositā esse mercedem, magnum præmiū,

magnum thesaurum in cælis. Hoc Dei uerbum est. Ergo sine exceptione credendum est. Hoc Romana tradit ecclesia. Rectè. Id enim suis filiis tradit; quod à sponso dudum accepit: Regnū, inquit, cælorū uim patitur; & uiolenti rapiūt illud. O felix rapina! Sed quomodo regnum cæleste diripitur? Certè cum homines sibi ipsis ad bona opera facienda uim adferunt, illiusq. præclarissimi ducis Ioannis Baptistæ, cuius ætate cælum diripi cœpit, uictricia signa secuti, per eadē uirtutis uestigia gradiuntur. Christus igitur, ut quibus machinis cælum expugnetur ostendat, nos tribus hominum generibus cōparat, nimirū militibus, ad alicuius opulentæ ciuitatis expugnationē iter ingressis; negotiatori quærenti bonas margaritas, ut eas sibi cōparet: uinitori à patrefamilias ad uinæ cultū mercede cōducto. De primo ait Paulus: Omnis qui in agone cōtendit, ab omnibus se abstinere. illi quidem, ut corruptibilem coronā accipiant, nos autem incorruptā. Ego ergo sic curro, nō quasi in incertū; sic pugno, nō quasi aerem uerberans. quasi diceret: Non ignoro, quæ sit laboris mei causa: magnum premiū expecto, de futura mercede nō dubito. Reliquæ duæ similitudines in Euangelio exponuntur pluribus uerbis, quibus emolumentū,

Mat. 11.

1. Cor. 9.

mētī, quod in huius uitæ negotiatione facere possumus, ut nobis cælestis uitæ thesaurū cōparemus, ratio demonstratur. Illud autē uehementē miror, te Christi uerbis, quibus *Matt. 12* præcipit ut thesaurum recondamus in cælis; nō moueri, ut opera nostra meritoria, & lucratiua esse arbitreris. Quid enim sit thesaurū recondere in cælo, Paulus ostendit, cū Timotheo scribit his uerbis: Diuitibus huius sæculi præcipe, ut in bonis operibus diuites fiāt, sibiq. thesaurizēt fundamētū bonū, ut apprehendant uerā uitā. Sic igitur Apostolus bona opera uocat ueras diuitias, bonūq. hominis thesaurū. Nec iniuria. Quid nī ueræ diuitiæ thesaurusq. pretiosus illa dī cantur, quibus ueræ optimæq. uitæ præmiū comparatur? Nihil est igitur bonis operibus, nihil uirtute lucrosius. Nisi fortē Deum ipsum ad bonorū operū studia nos adhortantē, uanū esse arbitraris. Christus admonet, ut thesaurū nostrū recondamus in cælis. & *Matt. 6,* alio loco: Vēdite, ait, quæ possidetis, & facite uobis sacculos qui nō ueterascūt, thesaurū non deficientē in cælis. Quondam diues adolescens modum, quo ad salutis æternæ portū perueniret, quærebat à Domino. Cui *Matt. 19.* cū ille respondisset, Si uis ad uitā ingredi *Marc. 10.* serua mandata; nonne cōsequenter intulit: *Luc. 18.*

Tobias 4.

Vade, quęcunque habes, uēde, & da pauperibus, & habebis thesaurum in cęlo? Vnde Tobias filium suum ad bonorum operum cursum exhortās, inter illa p̄cepta cęlestia, ad eleemosynę studium diligēter admonet, dicens: Si multum tibi fuerit, abundanter tribue: si exiguum, etiam exiguum libenter impartiri stude. Præmium enim bonum tibi thesaurizas in die necessitatis. Tot Dei uerba (mihi crede frater) uana esse nō possunt. Bona igitur opera, utilia, fructuosa, lucrosa esse crede, nosq. dū ea exercemus, summas diuitias grandemq. thesaurum in cęlis recondere existima. Neque enim mentitur ueritas, cū hęc diuina uoce pronunciat. Ergo mater ecclesia, cū bona opera meritoria esse tradit, nihil, qđ Dei uerbo repugnet, docet. Non est igitur q̄ ob unam aut alterā abs te lectā scripturę sentētiā, omnē scripturarū seriem tibi perspectam & cognitā existimes. Nōne uides hęc omnia Dei uerba, quę iam in mediū produximus, tibi incognita fuisse? Ex quo tuā ignorantia, & inscitia intelligere deberes, ut tua imbecillitate imperitiaq. perspecta, de theologicis cōtrouersis tāquā cæcus de coloribus iudicare nō audeas. Cū in scripturis bonorū operum tam crebra fiat mentio, nihil erat quod memorię commendarēs.

dares, nisi illud, nos seruos inutiles esse? cer-  
 tē inutiles sumus: sed Deo, cui nullā utilita-  
 tē adferimus, inutiles; nobis autē, si bonorū  
 operum, pro quibus tantam mercedē, tantā  
 præmia nobis redditurus est Deus, thesauro  
 ditemur, profectō utilissimi sumus. Hæc igi-  
 tur ex scripturarum fontibus hausta, nobis  
 tradit ecclesia, quæ medium inter duo extre-  
 ma, regiumq. iter carpens, hinc arrogantia  
 scopulos inanisq. gloriæ prærupta declinat,  
 nec Deo sua opera tāquam ei fructuosa ex-  
 probrat: ( quis enim aliquid se Deo præsti-  
 tisse gloriatur, cum ad se totū industriæ suæ  
 fructū redū dare intelligat? ) inde negligē-  
 tiæ desidięq. uoraginem fugiens, summa in-  
 dustrię suæ præmia proposita esse cognoscit.  
 Medium tenere beati. Virtus denique cō-  
 sistit in medio. Itaque sapientissima mater  
 Ecclesia, errorum extrema semper & ubiq;  
 declinat, ac uelut inter Scyllam & Charyb-  
 dim tutissimum conficit cursum. Dextrum  
 Scylla latus, læuū implacata Charybdis ob-  
 fidet, & utrumq; fidei naufragium commi-  
 natur. Vt enim a ueritatis cursu aberrat, qui  
 humana opera suapte natura, & ex se aut me-  
 ritoria, cęlestisq. gloriæ præmio digna, & pa-  
 ria, aut Deo utilia esse arbitratur; ita qui hæc  
 neq; meritoria ullo modo, neq; aliqua mer-



1047. 4.

cede pensanda existimat, in nō dissimili errore uersatur. Qui autem hæc ex gratia Dei & pacto atq; conuēto Dei promissione firmato, meritoria esse dicit, is à recto ueritatis itinere nō aberrat. Cū igitur illius aquæ, uidelicet Spiritus sancti gratiæ, ex cordibus nostris in uitā salientis æternā, efficaciam uimq; cōsidero, si opera tali aqua non modò lota, sed etiam irrigata, & uiuificata, cælestis uitæ præmio ex æqualitate digna dixi, me lapsū esse nō arbitror. Nā quod operibus ex eorū natura deest, id gratiæ Dei uis sanctiq; Spiritus efficacia supplet. Hæc aliquanto commodius dicuntur, ac uerius, quā id quod ista noua philosophia excogitauit, uimirum humana opera, etiā si à solo Spiritu sancto producātur ac fiāt, imperfecta tamen esse, atque ut menstruatæ pannus immūda. Itane uerò ipsius Spiritus sancti opera nō solū imperfecta, sed etiā immunda dicetis? Quid hoc aliud est, quā in Spiritū sanctū iactare blasphemiam; & tā impiū, ut ægerrimè remittatur, crimen admittere? Quid enim aliud de Satanae operibus dici poterat, nisi quòd imperfecta, turpia, immūda sunt? Ex quo intelligi potest, à quo Spiritu ad eiusmodi blasphemias impellamini. Sed ad te redeo frater. Vide quæso quid dicas, fateris esse opera  
Spiritus



Spiritus sancti, & tamē hęc ipsa imperfecta, turpia, immunda esse pronuncias. Sentisne secū pugnare orationē tuā? extremoq. sententię tuę eiusdē principiū iugulari? Quanto sapientius diuinas literas explicat mater Ecclesia? Quas omnes non solum diligēter euoluit, sed etiā amplectitur & recipit. Cū igitur in iis duo, quę diuersa uidētur, occurrunt, non alterum recipit, alterum reiecit, sed utrumque tāquam uerum amplectitur. Duo in diuinis literis de operibus nostris memorię prodita sunt; hic eternę glorię prēmio asserūtur imparia, inæqualia, indigna: illic merces iis amplissima prēmiiūq. promittitur. Et quoniā mater Ecclesia uerā esse credit utrāque sententiā, animum tuum, ut uideō, vehementer offendit, Hinc ille lachrymę, imō illa conuicia, quibus ei tanquam Scylleus canis oblatras; eamque quasi Dei uerbo scripturęq. auctoritati repugnet, impudēter accusas. Sed quis nō uideat falsam esse sententiā tuā? Quis nō intelligat criminationis tuę uitium? Quę (malum) est ista perfidia, toti scripturę sacrę fidem adhibere nolle? Quam si totā amplecteris, ecclesię fidē ei optimē conuenire fatearis necesse est. Sed quoniam hoc superius planum feci, nō ero hyclōgior. Illud tamen te hortor, & mo-

neo frater, ut hoc loco promissam fidē ser-  
ues, & quoniā fidē nostram de uoluntatis ar-  
bitrio libero, & de operū meritis cū diuinā-  
rū scripturarū auctoritate cōgruere, nec illā  
Lydium uerbi Dei lapidē pertimescere in-  
telligis, à te peto, ut in nostræ ecclesiæ castra  
redeas, nec eam quæ ita cū scripturæ aucto-  
ritate consentit, sequi dubites. Hæc enim si  
meministi, tua uerba sunt. Nam si Romana  
ecclesia cum Dei uerbo scripturæq. diuinæ  
ueritate congrueret, conformataq. esset, nō  
est dubium quin eā sequi oporteret. Quæ  
cū ita sint, serua pactū atq; promissum, &  
hec noua Stoicorum istorum paradoxa noli  
tueri. Noua hæc meritò dixerim, non quòd  
nūc primū nata sint, sed quòd ab antiquis  
illis ecclesiæ magistris atq; doctoribus, mul-  
tis ab hinc sæculis iugulata, nūc demū à Lu-  
thero renouata sunt, atq; ab iſeris excitata.  
Atque utinā tibi ecclesiæ cognita esset anti-  
quitas. Intelligeres profectò qui fuissent ab  
initio perniciosissimi aduersus liberū uolun-  
tatis arbitriū erroris auctores, quiq; tā im-  
piū dogma defenderint. Neque enim fu-  
nestam hanc opinionem, imò pestem, homi-  
num uirtute doctrinaq. præstantiū peperit  
industria, sed errorem de Stoicorum lacunis  
haustum, semper hæreticorum propugna-

uit impietas. Post Stoicorum uanitatem pri-  
 mus Bardesanes è Valentini schola tanquā *Bardesa-*  
 ex equo Troiano profectus, impium hoc do- *nes, anno*  
 gma in ecclesiam inuehere conatus est. Nam *Domini*  
 ut liberum arbitrium tolleretur, ad reliquos *220.*  
 Valentini errores illud adiecit, ut fatum de-  
 fenderet. Exinde Manichæi liberum arbi- *Manichæi,*  
 trium funditus fustulerunt, duo principia *anno 270*  
 ponentes, quorum alterum bonorū, alterū  
 malorū operum causam esse dicebant. Hinc  
 Priscillianistæ in Hispania eandem insaniam *Priscil-*  
 instaurarunt. Quam inde Petrus Abelardus *lian, an-*  
 tandē in Galliā deportauit. Hunc secuti Al- *no 406.*  
 bigenses, Ioannem V Viclef habuerunt sue *Anno De*  
 impietatis hæredē. Quā extinctā & sepultā, *mi. 1130.*  
 tādē Lutherus nostra memoria ab inferis  
 excitauit. Sic à Stoicorum fontibus error  
 exortus, per contritos hæreticorū lacus ha-  
 ctenus fluxit. Ex quo intelligi potest, quales  
 opinionis uestre habeatis auctores. Merito  
 igitur Augustinus: Liberū, inquit, arbitriū  
 quisquis negauerit, Catholicus non est. Sed  
 fortē solus Augustinus hoc sensit, reliqui  
 uerò ecclesiæ magistri, atq; doctores nullam  
 meriti faciunt mentionem. Imò uerò san-  
 cti Patres non modò Latini, uerū etiam  
 Græci tam frequenter hoc nomine utuntur,  
 ut infinitum esset omnes omnium proferre  
 senten-

sententias. Quod si mihi faciundū esset, dies  
 me profectò citiùs quàm oratio deficeret.  
 Itaq; ne sim longior, unius aut alterius ero  
 recitatione cōtentus. Hieronymus igitur in  
 Dialogo aduersus Pelagianos: Sancti secun-  
 dum mensuram, inquit, suam & modū, iusti  
 sunt, & appellātur, ut Paulus, qui plus habet  
 meritorum, quia plus omnibus laborauit. Et  
 eodem in loco, cū quēssisset cur in cēlo plu-  
 res mānsiones? Quia sanctorum, inquit, diuer-  
 sa sunt merita. Quid Augustinus? nonne  
 perspicuè nobiscū facit? Nullus, inquit, alie-  
 nabitur ab illa domo, ubi mansionē pro suo  
 quisque habiturus est merito. Et paulò infe-  
 riùs: Multæ mansiones diuersas meritorū in  
 una uita æterna significant dignitates. Item  
 alio loco: Deus pro merito fidei & bonorū  
 operū dabit fidelibus suis regnum cēlorum.  
 Et lib. 14. de Trinitate, cap. 15. Quid faciet  
 mentem aliquam beatam, nisi meritū suum,  
 & præmium Dei? Item Cyprianus: Iusti-  
 tia, inquit, opus est, ut promereri quis possit  
 Deum iudicē: præceptis eius & monitis ob-  
 temperandum est, ut accipiāt merita nostra  
 mercedē. Item Ambrosius in Lucam: Ergo,  
 inquit, qđ in merito fuit copiosius, hoc erit  
 in præmio redundantius. Diuus Hilarius in  
 Psal. 92. Cur sancti sua opera tam paruo æsti-  
 ment,

In Ioannē  
 trac. 67.

Serm. 162

Cap. 161

ment, ac pro nihilo putent, luculenter ostendens: Habet hoc, inquit, uerecunda ipsa sanctorum iustitia, ut quicquid sibi de beatitudine sperat, id pro magnificentia Dei potius (quia dignum est Deo & æterna & bona retribuere) quàm pro merito suo postulet; nec tamē preferens honorem misericordiæ Dei, merendi quoque per se excludit officium. Acquū. n. est uitā retribui stipēdiis sanctitatis. Et paulo pōst: Ex meritorum diuersitate ait, uel in poenā uel in misericordiā iudiciū Dei tēperari. Hactenus Hilarius; cuius uerba memoriæ mandare operēpretiū est, ut quasdam scripturę ueterumq. sentētiās rectē intelligamus, modestiamq. sanctorum ac uerecundiam, qua ita salutem suam Dei munificentię potius, quàm meritis suis tribuunt, ut tamen ab iis merendi nō excludatur officiū, cum uirtute coniunctā esse uideamus. Quæ cum ita sint, habes frāter omnia, quę ad fidei nostrę & sanctitatem demonstrādā, & ueritatem probandā requiruntur. Nam cum hinc scripturarum auctoritas, inde non solum rationis momenta, uerū etiam patrū testimonia nostram de operibus sententiam confirment atque corroborent, in susceptæ ueritatis tutissimō portu libenter acquiescimus. Cuius clarissimū lumen omnes argu-

mento-

mentorū tuorū tenebras, quibus eam oppugnare conatus es, & si quid præterea in epistola tua contra illam producis in mediū, ita refellit, ut quicquid ei à uobis opponitur, sua sponte uanescat ac defluat. Tanta efficacia ueritatis, tanta uis est. Nam quod ex Esaia commemoras; Quasi pannus menstruatae uniuersae iustitiae nostrae; de sanctorum Deoq. placentium hominum operibus intelligi non potest, nisi fortè idem opus & cor hominis mündet atque abluat, & tamen immundum sit ac sordidum. An immundū est, quod purum, sanctum, uiuum meritò dicitur? an immundum est, quod hominē ita ornat atque condecorat, ut nuptiali ueste fulgentem, caelesti conuiuio dignum exhibeat? an immundum ac sordidum, quod in agni sanguine dealbatum, hominem, qui sequatur agnum quocunque ierit, efficit dignum? an immunda sunt opera, quae ex illo aquae uiuae, quam Spiritus sanctus salietem in uitam æternam produxit in nobis, fonte manāt & profluunt? an immunda sunt quae Deus cælo æstimat digna? an immunda quae in cælorum regnum intrabūt, quo nihil co-inquinatū intrabit? Opera enim illorū, ait, *Apoc. 14.* sequuntur illos. Sed quinam sunt hi, quos opera sua sequuntur? Ij nimirum qui in Domino

mino



mino moriuntur; quos hoc nomine felices merito dixerim. At quō felices, si eos opera sua immunda quasi pannus menstruata sequantur? An eos huiusmodi opera sequerentur in cælum, in quod nihil immundum, nihil coinquinatū intrabit? Talia igitur opera illos felices profectò non redderent, sed potius infelices ac miseros, si eos comitarentur, cū in cælum recipi nullo modo possint. Non ergo de huiusmodi operibus loquitur Ioannes Apostolus, ut aduersariorum errori fauere uideatur. Itaque longè aliter ille sentit quā tu frater. Sed Esaia mihi sententiā opponis: Quasi pannus menstruata uniuersa iustitiæ nostræ. Quis hoc scriptum esse negat? Sed quæro ex te, De quorum operibus Propheta tum loquebatur? num de fidelium in Christi baptismo renatorum? Nihil minus. sed de suæ gentis, de Iudæorum operibus loquitur: quæ ita immunda erant ac cōtaminata sordibus peccatorum, ut si quid in iis honestū ac religiosum uideretur, id totum certis sceleribus ac flagitiis inquinatum esset. Quam Esaia esse sententiam, facilè intellexisses, si ea, quæ paulò antè posita sunt, uerba legisses, id est, si totam illam sententiam, non aliquam eius particulam legeres. Sed hac truncate sen-

sentia,



tentia, quam ex impostorum tuorum libris, tanquam ex uitiato fonte, hausisti, maluisti esse contentus. Itaque quod inde malè sumpseras, in sanctorum opera, quæ tibi oppugnanda sumpisti, peius detorques. Porro si totam illam sententiã perlegisses, alio uel interprete uel explicatore tibi opus nõ erat. Cùm. n. à Propheta scriptũ sit his uerbis: Facti sumus ut immũdi omnes nos, & quasi pannus mēstruatæ uniuersæ iustitiæ nostræ: & cecidimus quasi folium uniuersi, & iniquitates nostræ quasi uētus abstulerũt nos; qui uniuersas iustitias suas immundas esse dicebat; iniquitates atque peccata, huius immunditię ac sordium causam esse luculenter ostēdit. Non ergo de seipso, sed de sæculi sui hominibus Propheta loquitur; qui cùm opera quædam, quę à bono & æquo abhorrere nõ uiderentur, ut uerbi causa eleemosynas, ieiunia, nonnullaq. alia iustitiæ opera facerēt; ita tamen ea administrabant, ut aut libidini, aut ambitioni, aut auaritiæ dediti, omnia rectè facta hac peccati sorde polluerent. Iure igitur huiuscemodi opera immunda dicuntur, ac mēstruatæ mulieris sordibus meritò comparantur. Hanc Prophetæ esse sententiam faciliè quicuis diligens lector intelliget. quam si aliter explicandã putas, uide quęso,

ne te hæc Apostoli Ioannis uerba impediât: Opera enim illorum sequuntur illos. nimirum in cælum, quò nihil inquinatū admittetur. Itaque hæc duo loca tibi concilianda relinquo, quorum inter Symplegadas, si errorem tuum defendendum putas, in uado hæreas necesse est.

Venio ad illum locum, quem ex libri Iob cap. 14. imperitè sanè pducis: Ad quod tibi circumscriptè breuiterque respōdeo, nō de bonis angelis, sed de malis illic esse sermonē. Quod non quarto decimo, ut existimas, sed quarto capite scriptū est, nec ipsius Iob uerba sunt, sed Eliphaz Themanitæ, cuius non omnia fuerūt Dei iudicio comprobata. Sed ne contentiosum funem trahere uideamur, dæmonas qui quondam angeli Dei fuerūt, peccati sordibus inquinatos fuisse, nō inuiti sanè cōcedimus. At uerò prophetam David nobis opponis, qui cū talis esset ac tantus, Dei nō iudicium postulabat, sed misericordiam implorabat. Rectè. sed hanc orationem illi nō uirtutum suarū recordatio, sed uitiorum ac criminum, adulterii & homicidii cōsciētia extorquebat. Quod de Daniele producis, nihil ad causam; neq; enim illic aliud quicquam agitur, nisi de peccatis populi qui in Babylone captiuus detinebatur, pro quo

R      Propheta

Propheta preces fundens, illum ob sua patrumq. suorum scelera atque peccata meritò detineri fatetur. Quod autem post obitibus, nos inutiles esse seruos, id iam antè diluimus, Deoq. nos, non nobis inutiles esse mōstrauimus. Neque enim quisquā nostrorū unquam adeò insanus fuit, ut opera nostra Deo aliquid emolumēti adferre cōtenderet. Nobis igitur illa, nō Deo, proficiūt. Cæterū quòd cælorū regnū, antequā bona opera aggrediamur, nostrum esse somnias, nouum philosophiæ genus est, adeò non solum à uero, sed etiā à ueri similitudine abhorrēs, ut hoc uno omnia Stoïcorum paradoxa superētur. Quis enim unquā audiuit, à præmio laborem, quo præmiū quæritur, anteuerti? Quòd si te iam in cælo esse autumas, aut ego fallor, aut tu somnias. adhuc enim te nobiscū in hac miseriarū ualle uersantē uideo. Quid in Euangelica parabola?

*Matt. 20.* Nonne cultores antequam iis merces rependatur, mittuntur in uineam? Et seruus ille fidelis, ac prudens, num antè Domini uoce laudatur? num intrat in gaudiū Domini sui, antequam ad negotiandum, ad laborandū, ad sudandum talēta suscipiat? Quis unquā ante certamen coronatus est? Quis ante uictoriam triumphauit? Quòd si fortè mihi  
subtilem

subtilem illam spiritualis fidei uestræ, quæ  
tantas habet vires, ut etiã absentia repræsen-  
tet, distinctionem opponis, ut te ante pu-  
gnam habere uictoriam, & ante laborem te-  
nere mercedem doceas, nobisq. persuadeas,  
equidem existimo ante te in cælum hoc mo-  
do ingressum esse neminem. Quod autem  
abs te de diuina prædestinatione citatur ex  
Paulo ad Ephes. I. nihil omnino ad rē facit,  
ut te regni cælestis mercedem ante operum  
laborē accepisse demonstret. Repugnat si-  
quidē experientia, quæ te nō in cælo, sed in  
mundo esse, illamq. immortalitatis gloriam  
nondum consecutum esse demōstrat. Quæ  
cū ita sint, cū tuum orationis genus con-  
sidero, magnum denuò mihi timorem incu-  
tis. Nam si in hac insania perfidiaq. perstite-  
ris, magnoperè uereor, ne iã non Adonidis  
hortis, sed paradisi, iuxta tuam opinionem,  
deliciis perfruenti tibi, nihil præterea expe-  
ctandū sit: nisi fortè in rectū, quod deserui-  
sti, salutis iter redeas. Neque enim dubium  
est, quin hæreticus in æternæ beatitudinis  
regnum ingredi nullo modo possit. Te autē  
frater, te inquā, quod dolēs profero, Augu-  
stinus hæreticum esse pronunciat. Liberum  
enim, inquit, arbitrium quisquis negauerit,  
catholicus nō est. Quare mi frater, ne te ipse

decipias. abiice quæso illam infaniã, qua te  
cælestis regni beatitudinem iam cōsecutum  
esse somnias. Qui bona opera fecerint, soli

*Matt. 26.* Christo teste, regnū cōsequentur æternum;

*Hebr. 11.* qui mala, eos gehennæ ignis excipiet. Sine fide impossibile est placere Deo. fides autē catholica una est, quam te non habere, cū liberum uoluntatis arbitriū neges, perspicuū est. Quapropter à te peto frater, ut saluti tuę consulas, nec in suscepto contra catholicam fidem errore permanear. Abiice quæso istas opiniones à ueritate abhorrētes, ad paternā

*Luc. 15.* domum cū illo euangelico prodigo redi, ut nos omnes nō minore gaudio reuersus exhiberes, quàm recedens mærore cōfeceras. Nō est autem mihi dubiū, quin hæc uel præcipua erroris tui causa sit, quòd uerā rerū, de quibus in scripturis agitur, proprietatē atq; naturā minus attentē consideras; sed in hoc uno diligentiam tuam studiumq. consumis, ut disertus ac facundus esse uidearis. Atqui uerū de unaquaque re iudicium, non è uerborum sono, sed ex ipsius rei cognitione generatur. Ex quo intelligi potest, te de humana dignitate parū cogitauisse, ut minus mirū sit, te quid inter hominē, & cætera animantia intersit, nō uidere. Id autem est liberum uoluntatis arbitriū, quo neque animalia re-

liqua,

liqua, neque ullum uisibile corpus ornatur. Quæ enim alia potest esse causa, cur neque bobus, neque asinis, neq; equis, neque cæteris animantibus uitę præcepta dedit Deus? Cur neque Prophetarũ, neq; Apostolorũ, neque prædicatorũ quenquã ad eos misit? Cur iis neque disciplinam præscribit, neque quicquã aut pollicetur, ut illiciat, neque minatur, ut terreat? Solus homo est cui uitę ratio ac disciplina præscribitur, qui legibus uincitur, quẽ & Dei promissa sollicitet, & minæ terreant. ad hunc solũ & Dei uerba diriguntur, & Prophetæ Apostoliq. mittuntur. Si homo brutis animantibus similis, liberum non haberet arbitrium, nec aliqua lege tãquam freno coërcendus, nec promissis ullis aut minis sollicitandus certè fuit, sed hũc in cæterorum animantium numero habere Deus debuit; de quibus Paulus: Nunquid 1. Cor. 9. de bobus, ait, cura est Deo? Vnde hominem mundi ciuẽ, honestũ ac nobilẽ, qui à Deo non tanquã seruus à Domino, ui, minis atque imperio, sed tãquam in libera ciuitate politicè gubernetur, esse perspicuũ est. Mancipia ui ac uerberibus seruire coguntur, sed longè aliter agitur cum homine, nimirũ suasionibus, exhortationibus, promissis, minis. cætera omnia quadam necessitate ad agen-

dum impelluntur, homo nō seruili cōditione, sed libera, uolūtatis arbitrio ducitur, nō ulla necessitate compellitur. Vnde egregiè Bernardus: Volens, ait, Deus nobilē creaturam hominem errantem in uiam salutis reuocare, Si, inquit, inuitum coēgero, asinū habebo, non hominē. Num igitur asinis dabo regnum meum? Scio quid faciā. Vt ergo habeam uoluntarium; terrebo eum, si fortē conuertatur, & uiuat. Itaque cōminatus est acerbiora, quæ excogitari possunt, tenebras æternas, uermes immortales, ignem inextinguibilē. Cū autē nec sic homo reuocaretur, ait: Nō solū timidus, sed etiā cupidus est, promittā ei quod potissimū desiderabile uideatur. Desiderant homines aurū & argentū, & similia, & super hæc omnia uitā desiderant. Si, inquit, tantopere desiderant miserā hanc, laboriosā uitā, & momentaneā: quantū diligent uitā quietā, æternā, beatā? Promisit itaque uitā æternā, promisit quod nec oculus uidit, nec auris audiuit, nec in cor hominis ascendit. Ita Deus hominem hinc timore supplicii, inde amore præmii ad uirtutis studium reuocat. alioqui si uiagendū fuisset, nō minus asinis ac bobus, cæterisq. eiusmodi animantibus, quā homine uti potuisset Deus. Hūc enim noluit



noluit trahere repugnātem, quēadmodum illa frenis & capistris inuita trahi consueverunt. Nihil siquidem Deo placet, nisi uoluntarium; nihil Deū offendit, nisi uoluntariū. Quæ cū ita sint, hæc consideratio ad intelligendum, cur homo uoluntatis libertate sit præditus, reliqua uerò animantia eiusmodi facultate careāt, ualet plurimū. Illa enim neq; Deum, quem ignorant, colere, neque suum auctore amare, aut timere, neque ab illo boni aliquid ac felicitatis expectare ullo modo possunt. Vt ergo causam intelligamus, cur hominis opera meritoria sint aut demeritoria, animaduertēdū est, illa ab eius cōsilio ac deliberatione proficisci; ita ut de iis nō solum iudicare possit, uerū etiam illorū bonitatem malitiamve cognoscere. nam in uniuscuiusque mente boni maliq. cognitionem inseruit conditor Deus, atq; defixit. Perspicuum est autē mutas pecudes à Deo nec boni quippiam expectare, nec mali metuere. Neque enim illorum opera planè seruilia Deo curæ sunt. Itaque uiuat pecus in pascuis, ut uoluerit, imò ualuerit, oues lupus deuoret, homines leo, pullos uulpecula, nūquā apud Deum homicidii aut furti causam dicent. contrā equus per totā uitam in homine gestādo, laboret, asinus sarcinas portet,

bos aratrum trahat, nihil unquā mercedis à Deo, nihil præmij, præter id quod in hac uita ceperint, pro tantis laboribus consequentur. Hominis autē longē alia est causa. nam & laboris sui præmium certamq. mercedē, multoq. maius bonū, quā quod hic percipere uidetur, expectat, & peccati sui, quod ipsa conscientia reprehendit ac damnat, poenas timet. Quæro nunc ex istis qui uoluntatis libertatem negant, cur inter hominū pecudūq. facta tanta diuersitas est? Cur Deus hæc contemnit & præterit, illorū rationē habendam putat? cur ex iis alia præmio digna iudicat, alia supplicio destinat? cur homicidia, cur adulteria, cur furta tam acriter puniuntur? cur ob sui operis qualitatem homo nunc uituperatur, nunc laudatur? Tolle liberum uoluntatis arbitriū, & hæc omnia iaceant necesse est, nec quicquam inter hominis pecudisq. factum intererit.

Est aliud præterea consideratione dignissimum; Si homo suapte natura, illaq. mirabili constitutione nō ordinatur ad maius aliquod bonū, quā quod in pecudem cadere possit, ipsius naturæ auctor & conditor in illum sanē iniquus est, qui miserū hominem potius, quā pecudū genus præceptorum suorum sarcina grauandum putat. Illæ  
siquidem

siquidem nō Dei legibus edictisve terrētur. illæ Dei præcepta non audiunt, sed omni cura uacuae, non modò corpori seruiunt, sed etiam suauissimas ex ipso corpore hauriunt uoluptates. Certè si hominum opera sua ui atque natura, pecudum operibus meliora maioriq̃ue præmio digna non essent, haud sine iniuria graue molestumq̃ talium legū iugum illis esset impositū, cuius ea uis est, ut miseros homines metu perculsos & anxios, tranquillo quietoq̃. animo uoluptatem capere non sinat.

Quid? illud quale est? imò quid sibi uult, quòd hominis peccatū summo supplicio dignū ducitur, deuotionis obsequiū ueri boni præmio iudicatur indignū? Cur his qui Deū offendens, pœnam cōmeretur æternā, facere aliquid diuinitus adiutus nō possit, quod infinito præmio dignū esse uideatur? Infinitam autē esse hominis offensam, hinc facile probari potest, quòd in infinitā illā bonitatem, illamq̃. diuinæ maiestatis sublimitatē admittitur. Grauius est socium & æqualem uerberare, quàm seruum. Quid dominum pulsare? quid regem? nonne multò grauius est? nōne hoc facinus longè indignius iudicatur? Si igitur is qui digniorē. ac sublimiorem offendit, grauius peccare conuincitur, eum,

cum, cuius infinita maiestas est, offendere, nonne infinitum peccatum esse censebitur? Quemadmodum igitur uitiorū magnitudo ex illius qui offensus est, qualitate pensatur; ita uirtutis tum ex Spiritus sancti gratia & motione, tum ex illius, ad quem refertur, bonitate atq; natura, dignitas æstimatur. Itaq; ut Deum offendere culpa infinita est, sic eū colere eiq. obsequi, uirtutis est infinitæ. Et quemadmodū Dei odium pœnam committeretur æternam, ita eius amorē infinito præmio dignū æstimari necesse est. Alioqui quā iniquum esset, offensam infinitæ magnitudinis æstimare: obsequium autem offensionis culpæq. contrariū, parem gratiam non mereri? Si illa infinitis suppliciis meritò uindictatur, hoc paribus premiis destinatum nō iure censebitur? Itaque si bona opera nostra boni aliquid promereri negarem, mala æternum supplicium commereri, qua fronte defenderem? Quanquam enim ob primū illud Adæ grauissimūq. peccatum Dei ira in totū genus nostrum iustissimè excanduit, adeò ut etiam ij qui à Christi, sine cuius fide boni aliquid fieri nō potest, nomine alieni sunt, eternæ mortis supplicio iure plectantur; tamen iam per ipsius Christi mortem reconciliati Deo, nonne æquum est, ut quemadmodum

peccatis

peccatis nostris supplicia commeremur ; ita bonorum operum merito præmia consequamur ? Alioqui summum illud Christi beneficium, quo & redempti & reparati sumus, nobisq. tantum ad bona opera faciēda gratiæ, quātum in suæ creationis exordio acceptū, Adam per peccatū amiserat, restitutum esse credimus atq; confidimus, quomodo intelligemus ? Vim illam reparationis nostræ atq; efficaciam qua in re quæso ponemus ? Vt ergo protoplastus iu naturæ suæ integritate statuq. innocentiae perseverans, aliquid præmio dignum facere poterat, ita de renatis in Christo Deiq. beneficio restitutis, iudicandum est eodem modo. Quid enim aliud nobis secunda natiuitas attulit ? quid præstitit, si in eadem qua cæteri, qui Deum nesciunt, imbecillitate miseriaq. uersamur ? si inter fidelem & infidelem nulla discretio est ? si in eodem quo & Iudæi & Gentiles luto uolutamur ? si una eademq. sententia fides perfidiaq. damnatur ? Igitur qui bonorū operum merita tollunt, nonne quantum in ipsis est, gratiam Christi mediatoris euacuāt ? nōne in ipsum redemptorem impia uoce blasphemant, dum inter fidelium infideliumq. opera nullum uolunt esse discrimen ? Nos uerò qui operum meritum ponimus, læti & grati

grati beneficium nostræ reparationis agnos-  
 scimus, idq. ad nos erigendos tantum uale-  
 re, quantum ad nos deiiciendos Adæ pecca-  
 tum ualuit, & sentimus & dicimus. Vt ergo  
 per illud originale peccatum meritorii ope-  
 ris facultatem amisimus, ita per Christi gra-  
 tiam non minus ad bona opera facienda ui-  
 rium, quàm in illo innocentiae statu proto-  
 plastus habuit, nos recuperasse credimus at-  
 que confidimus. Quare Christi beneficio fir-  
 ac munere (fremant licet isti) ut omni ten-  
 tationi non minus quàm protoplastus in illa  
 integritate naturæ, repugnare possimus. Vi-  
 res igitur nostras de Christi beneficio sum-  
 ptas tantum ualere credimus, ut nullo ten-  
 tationis genere inuiti ad peccatum impelli  
 cogiq. possimus. Vnde Apostolus: Fidelis,  
 inquit, est Deus, qui non patitur uos tenta-  
 ri supra id quod potestis, sed faciet cum ten-  
 tatione prouentum. Nihil igitur hic, quod  
 cum Dei uerbo pugnet, admitto. Tam clara  
 siquidem atque euidentis est illa Apostoli sen-  
 tentia, ut in alium sensum, quàm quem illi  
 attribuimus, detorqueri nullo modo possit.  
 Tu uero qui hominis facultatem ad bonum  
 tollis, nota quæso hæc Apostoli uerba: Non  
 patietur uos tentari Deus supra id quod po-  
 testis. Est igitur inter tentationē nostramq.

facul-

1. Cor. 10

facultatem certa proportio. Nouit itaque Apostolus hominem qui ad peccatum inuitus impelli cogiq. non possit, absque aliqua facultate potentiaq. non esse.

Sed quoniam rerum naturam pleriq. nō intelligunt, imperitia fluctuant, atque hærētes in uado, dum se ex illis controuersia fluctibus explicare nō possunt, fidei naufragiū faciunt. Ita inter quasdam naturæ gratiæque Symplegades periclitātur, dum hæc duo inter se concurrere, nec ullo modo conciliari posse existimāt. Qui si illud, quod sit ex parte per gratiam, quodam modo per naturam fieri, nō incōgruē dici intelligerēt, facilē corū ex illis fluctibus enauigaret oratio. Quod ergo gratiæ proprium est, id meritis quoq; nostris adscribi potest. Quid? qđ in Psalmo cū de redemptionis nostræ mysterio Propheta loqueretur, misericordiam cū ueritate, iustitiam cum pace coniunxit? Nimirum ut non unam aliquā in nostra reparatione, sed omnes simul ostēderet fulgere uirtutes. Illud ergo notandum est, nihil esse magis nostrum, quā quod nobis donatum est, si is qui dedit, donandi habuit potestatem. Nam ut ait Iurisconsultus, res quæ unius erat, donatione transferuntur in alterius potestatem, adeo ut quod mihi donatū est, hoc propriē sit



fit meum. Res multis modis ab hoc ad illū iure transfertur, ut emptione, ut donatione, ut hæreditate, ut lucro, quod aut labore, aut negotiatione comparatur, quorum omnium donatio quæ liberaliter facta est, primas obtinet. In hac enim est gratia, primū cū datur, sed quod semel datum est, ei qui accepit, sine iniuria eripi nō potest; nisi fortè hic doni conditiones uiolauerit. Quicquid igitur eo donandi genere ad tuas manus peruenit, id proprie tuū est. In donatione gratia ostenditur, iustitia cū id quod per gratiā acquisitum est, tibi integrum sanūque seruetur. Nihil nobis datum est, si nihil nostrum est. Alia enim est doni, alia mutui ratio. Hoc siquidem usum tantū adfert; illud rei datæ non solum usum, uerū etiam possessionē. Cū igitur de Dei donis sermo est, aliquid liberè, & gratis datum atque in hominis ius possessionemq. translatum, intelligi necesse est. Quo posito, si queratur cur id homini datum sit, quiq. sit ipsius doni finis, illud reperiatur, ideò datum esse, ut in suam utilitatē & commodum utens, lucrum homo faciat. Neque. n. donum est, si nullus illius est usus. Illud autem lucrū, quod ex eo dono nostra peperit industria, propriè nostrū est; quod sine iniuria nobis eripi non potest. Sic ignis

urendi

urendi uim ex se nō habet, sed ex Deo; quā  
 etsi à Deo sumptam, meritò tamen illi pro-  
 priam dicimus. Hominem igitur Christia-  
 nū dicimus omni tentationi repugnare pos-  
 se, propterea quòd gratiæ diuinæ robur ac-  
 cepit; iuxta illud quod Apostolo Paulo, ut  
 à se stimulus carnis auferretur, rogāti respō-  
 sum est: Sufficit tibi gratia mea. Quasi dice<sup>2. Cor. 12.</sup>  
 ret: Per gratiam meam illum carnis stimulū  
 non modò retundere, sed etiam uincere po-  
 teris. Quod cū post expertus esset, confi-<sup>1. Cor. 10</sup>  
 denter aiebat: Fidelis est Deus, qui non pa-  
 tietur uos tentari supra id quod potestis, sed  
 faciet cum tentatione prouētum. Quæ cū  
 ita sint, non habet excusationis locum Chri-  
 stianus, si à tentatione uincatur, sicut nec  
 Adamus habuit, cū uxori assentiens, Dei  
 præceptum transgressus est.

Sed ut ad propositum reuertamur, dico  
 gratiam Dei nostrā esse, ex quo bona opera,  
 quæ à nobis eius auxilio fiūt, & quicquid in  
 iis meriti, dignitatis, excellentiæ est, propriè  
 nostrum esse perspicuū est; operibus enim  
 nostris ab ipsa tantum dignitatis attribui cre-  
 dimus, eaq. in tam sublimem gradum suble-  
 uari, ac si in ipso Adamo, eoq. in statu in-  
 nocentiæ constituto inuenirentur. Quid igitur?  
 Nū hoc orationis genere gratiæ Dei in-  
 iuriam

Rom. 5.

iuriam facimus? Minimè uerò. Imò, si uerū  
dicendum est, uos ipsi gratiæ contumeliam  
facitis, uos eam minuitis atque deprimitis,  
cū opera, quæ ab illius auxilio tāquam ex  
fonte profisciscuntur, non solū meritoria  
esse negatis, sed etiam imperfectionis ac sor-  
dium accusatis. Quid igitur sibi uult illud  
gratiæ præsidium? Quid Apostolus Paulus  
cū Romanis scribens: Vbi enim abūdauit  
delictū, inquit, superabūdauit & gratia? Cre-  
de Apostolo Paulo asseueranti, peccatum  
Adæ non tantū ad nostrū interitum, quā-  
tum Christi gratiam ad nostram reparatio-  
nem salutemq. ualuisse; Deiūque beneficia  
quanti facienda sint, nō ex errore sacrilego,  
sed ex ipsa ueritate cognosce. Quod ut rectè  
intelligas, boni patris, qui filiis suis auri cer-  
ta talenta ad negotiādum ea lege distribuit,  
ut illorum sit totum lucrum atq; emolumen-  
tum, tibi ante oculos uersetur exemplum:  
Quid? an iis pecuniam suam pater tradere  
tenebatur? Minimè uerò. Sola igitur in fi-  
lios pietas atque ille paternus affectus, quo  
illos prosequabatur, iis talenta illa, quibus  
opes sibi quærerent, dare coëgit. Ita Dei in-  
dulgentissimi patris benignitas, nobis gratiæ  
sue munera & talenta cōcedit, ut bonorum  
operum, quæ illius auxilio præsidioq. freti  
gesseri-

gesserimus, meritò cēlestes nobis diuitias cōparemus. Et quemadmodum ii quod acceptis illis talentis adiecerunt, suoq. studio atque industria quęsierunt, iure suum dicunt; ita bonorum operum merita propriè nostra sunt. Quanquam enim illorum uis & dignitas ex illo gratiæ Dei fonte præcipuè manat & profluit, tamen hæc iure nostra dicuntur, propterea quòd Dei patris beneficio ac munere ipsa quoq; gratia nostra est. Quicquid igitur eius auxilio gerimus, id iure nostrum est. Ita in opere nostro Dei munus & gratia cum æquitate, iustitiâque coniuncta, concurrat & fulget, ideoque Deus unicuique iuxta suorum operum qualitatem dicitur redditurus, ipsa uerò opera nostra esse scriptura pronunciat. Porro qui patris sui talentū aucebat, aut improuidè stulteque consumit, is iure punitur. Vnde Apostolus, ne gratiam Dei in vacuum recipiamus, hortatur. id est, ut ea utamur, eam in opus conferamus, & dum bene agendi tēpus nobis Dei benignitate conceditur, eius auxilio meritorum thesaurum nobis acquiramus. Molestum tibi videbatur quæstus vocabulum, sed ex his quæ modò ostendimus, quàm rectè gloriā æternam regnumq. cēleste nostris operibus quęrere dicamur, perspicuum est. Quòd si ad eò

morosus es & acerbus, ut hoc orationis ge-  
 nus nisi ipsum quæstus uocabulum in diui-  
 3. *Tim.* 6. nis literis esse monstremus, fastidias, quære  
 ex Apostolo Paulo, quid sibi uelit cum ait:  
 Est autem quæstus magnus pietas cum suffi-  
 cientia. quære, inquam, ex Paulo, qui fieri  
 possit, ut quæstus magnus sit pietas? quære  
 quid ipsa sit pietas? Quid? Nonne alio lo-  
 co idem Apostolus clarissima uoce pronun-  
 6. *Gal.* 5. ciat: In Christo enim Iesu neque circumci-  
 sio aliquid ualet, neque præputium, sed fides  
 quæ per dilectionem operatur? Hoc nimirum  
 est pietas, hoc magnus ille quæstus. Qualis  
 quæstus? Num auri uel argenti? Nihil mi-  
 nus. In eodem enim capite auaritiam atque  
 cupiditatem eiusmodi rerum Paulus oppugnat.  
 Atqui magnus, ait, quæstus est pietas. Quid  
 igitur, dic mihi Apostole, quid inquā nobis  
 hic quæstus? quid hæc pietas conferet, si neque  
 aurum, neque argentum, neque huiuscemodi  
 opes adfert? Quid? certè coronam, inquit,  
 iustitiæ, quā Deus in cælo reponit & seruat,  
 non solum mihi, sed etiam iis omnibus, qui  
 aduentum eius expectant. Sic igitur nos in-  
 struit Apostolus, ac docet, quibus gradibus  
 ascendamus in cælum, illamque immortalita-  
 tem ac æternū, quod iustitiæ corona signifi-  
 cat, gloriæ præmium consequamur. quam

alibi pro bonorum operum, quæ quis in hac  
 uita seminauerit, ratione meti dicit, nostra-  
 que opera sementi, quæ fructuum redun-  
 dantiâ adferens, eum qui seminauit, ditare *1. Cor. 9.*  
 solet, comparat. Qui parcè seminat, inquit,  
 parcè & metet; & qui seminat in benedi-  
 ctionibus, de benedictionibus & metet. Et  
 Dominus in Euangelio: In qua mensura *Marc. 4.*  
 mensi fueritis, inquit, remetietur uobis; ut  
 lucri magnitudinem operû nostrorum men-  
 sura monstraret. Cum hæc igitur Apostoli,  
 cum ipsius Domini uerba sint, quibus opera  
 nostra perspicuè quæstiosa esse dicuntur,  
 eritne quisquâ adeò furiosus ac demens, ut  
 ea uana, falsa, futilia esse autemet? Atqui  
 ipsa opera gratiæ Dei adscribuntur. Sed quo-  
 niam ipsa Dei gratia nostra est, nobisq. con-  
 cessa diuinitus, consequens est, tû opera no-  
 stra esse, quemadmodum superius ostendi-  
 mus; tum etiam ipsam gratiam, cui nostrû  
 laborem industriamq. adiungimus, à nobis  
 rectissimè collocari. Ita ne gratiam in ua-  
 cuum recipiamus, studiosè cauemus.

Porro si deposita pertinacia satis docilem  
 te uiderem, quæ cum de meritis, tum de  
 mercede præmioq. nostris operibus debito,  
 fidei nostræ sit ratio, pluribus explicarem.  
 Illud certè in præsentia obiter dixerim, ex

æterni præmij qualitate nostrâ quoque animam æternam esse, ac proinde nostrû agno-  
theten ac munerarium, non modò æter-  
num, uerûm etiam omnipotentem intel-  
ligi necessariò. Solus enim ille mercedem,  
quâ bonis operibus diuina æquitate bene-  
ficientiaque constituit, nobis integram æter-  
na illa infinitaque potestate conseruat. Sed  
quoniam & hæc lôgior est oratio, & tu ipse  
rationibus tecum agi non uis, rem totam in  
alium locum differemus, uidelicet cùm tam  
multis Dei uerbis atq; sententiis, ex quibus  
opera nostra meritoria, magnisque præmiis  
destinata esse perspicuum est, fidem habue-  
ris. Hoc enim fundamento posito, quod re-  
stat, doctrinæ culmen me impositurum esse  
confido; qua salubriter imbutus, omni ho-  
mini petenti rationem, de fide, ac spe, quam,  
uti speramus, Dei benignitas animo tuo in-  
feret atque defiget, reddere ualeas. Interea  
quoniam argumentorû scopulos totq. dis-  
criminum tempestates emensa, ad finem  
tanquam in portum festinat oratio, colligen-  
da sunt uela, & ad epilogi tutiora compen-  
dia dirigendus est cursus. Ex ijs igitur quæ  
à me hætenus dicta sunt, facilè intelligis fra-  
ter, quàm impium ac detestabile sit illud  
doctrinæ genus, quod in tuis literis propu-  
gnare.



gnare tuerique conatus es. Quod autem in illum tuum Deum, imò monstrum atque portentum, quod Caluini finxit impietas, ita liberè inuectus sum, forsitan molestè feres. Sed non in uerum illum summumque Deum, quo nihil beatius, nihil melius cogitari potest, sed in prodigium quoddam, imò uero idolum, quo nihil uanius est, agendum putauì. Quod si uehementior fuisse tibi uideor, cogitare debebis, me illo orationis genere usum esse necessariò, ut impietatis stultitiæque crimina deprecarer, atque à meo capite depellerem. Quid enim me stultius esset, si tuam sententiã atque opinionẽ secutus, tam inepta, stulta, absurda de Deo existimarem? Quid magis impium, si tam impia de summo illo Deo nostro deliramenta, quæ erroris in liberum arbitrium uestri absurdissima cõfinxit impietas, pro ueritate complecterer? Illa illa igitur tam putrida doctrinæ uestre oua frangi oportuit, ut abominabilis ille fætor, qui intus latebat inclusus, ex illistenebris productus erumperet, ac proinde agnitum atque conspicuum omnes detestarentur ac fugerent, neque solum ipsa oua, uerum etiam illos impietatis auctores, qui hæc à se posita & inuenta, eloquentiæ suæ nitore fouerunt. Elaborandũ

itaque fuit, ne simplices Christianorum ærudes animæ, deinceps illo imbuerentur ueneno, sed potius ut impium illud ac sacrilegum doctrinæ genus, tanquam ab iis architectis, qui in reprobum sensum inciderunt, quique se sapientes esse dicentes, stulti facti sunt, excogitatum, uelut pestem atque perniciem fugiant. Qui quales sint, latere te nolui, ut intelligeres istos non minus, quam antiquos illos Romanorum philosophos, in reprobum sensum esse delapsos. Cur autem illi in reprobum sensum traditi, in passionem ignominie & execrandas turpitudines inciderunt? Vtique quod cum Deum cognouissent, non sicut Deum honorificauerunt, aut gratias egerunt. Quid de istis dicemus, qui tantum illos impietate superarunt, ut quantum in iis fuit Deum, quem iniquum, crudelem, immanem esse confingunt, summis ignominijs contumelijsque lacerarint?

Quæ cum ita sint, illud in primis mirum mihi uideri solet, cum tot diuinæ scripturæ locis adeò multa dicantur, quæ ad Dei gloriam pertinent, eiusque *φιλανθρωπία* ac beneficentiam ostendunt, cur isti loca quædam obscura, in quibus Deus quodammodo reprehendi uideretur, amplecti ac mordicus retinere maluerint, quam ea in quibus Dei bonitas

nitasiure laudatur. Et quāquā cōpluribus  
in locis diuinæ literæ nihil in Deo mali esse  
non obscurè testentur & clamēt, aduersarij  
tamen sententiam atque opinionem suam,  
quam ex illis tenebris eruere se putant, imò  
uerò quā illis obscuris locis impudenter at-  
tribuunt, tanta contentione, pertinacia, im-  
portunitate defendunt, ut Deo quicquid  
mali fingi potest, contra tot testimoniorum  
auctoritatem & fidem adscribere non dubi-  
tent. Hinc Deum & crudelem & humani  
generis inimicum, & iniquitatis amatorem  
atque fautorē faciunt, qui quæ homines ad  
peccata non modò sollicitet & impellat, ue-  
rùm etiam cogat, atque inuitos in ipsa pec-  
cata præcipitet. Quicquid igitur mali de  
diabolo dici potest, hoc isti Deo adscribunt.  
Sed quoniam hoc impietati parum uideba-  
tur, hoc egerunt aduersarij, ut Deus qui po-  
testate superabat, etiam calliditate malitiāq.  
uincere uideretur. Nam cū diabolus eo  
nomine detestemur, quòd homines ad pec-  
cata sollicitet, nullum tamen aliud illi cri-  
men adscribimus: ita lenones & lenas, & si  
qui sunt eiusmodi, detestantur omnes boni,  
quòd matronarum ac uirginum pudicitiam  
tentant: easque in libidinis turpitudinisq.  
uoraginē præcipitare conantur. Hoc igitur

uno nomine diabolum odimus, hac de causa illum humani generis hostem antiquum esse sentimus & dicimus. Quid igitur aduersarij? certè ea omnia ob quæ & diabolū & eius imitatores ac satellites execramur, Deo suo attribuunt. imò uerò longè peiora de Deo suo, quàm de diabolo prædicāt. Hunc enim ad peccata quidē sollicitare dicunt, sed non cogere quenquā, aut impellere inuitum. nullum etenim uincit, nisi uolentem. Ab illo autem Deo suo non solum ad peccata sollicitari homines atq; tentari, uerum etiam cogi. Quæ si illi perpetrare noluerint, ipsum Deum ea in illis efficere contendunt. Sic aduersariorum Deus ab ijs laudatus, sic ornatus incedit. Et quāquam apertissima sit scripturæ sententia: Similiter odio sunt Deo impius & impietas eius. itē: *Sap. 14.* Deus intentator malorū est. Ipse enim neminem tentat, neminem ad peccata sollicitat, isti tamen sententiam suam, quam ex obscuris quibusdā scripturæ locis eruisse se iactant, in quibus Deum in nobis peccata facere affirmari uidetur, contra uerbi Dei auctoritatem scripturæque clarissimam lucem tanta cōtentione pertinaciaque defendunt, ut ab errore deduci nullo modo possint. Quæ cum ita sint, nonne ista in susce-

pto errore pertinacia magno argumēto est, aduersarios in reprobum sensum incidisse, mentemque corruptam & pessimo quodam humore infectam habere? Si aut satanæ, aut cuiusquam hominis uis & improbitas illos ad peccandum coëgisset, nonne culpam omnem in eum qui uim attulisset, reiciendam putarent? Quanquam enim à dæmone non cogantur, sed tantū sollicitentur ad malum, cū tamen sese excusare conantur, culpam in eum reicere consueuerunt, ut quod sua sponte commiserint, ab eo circumuenti & impulsī admisisse uideantur. Hic uerò longè aliter. Cū enim hominem à Deo ad peccandū nō modò sollicitatum & impulsū, uerū etiam coactum fuisse dicant, culpam omnem misero homini, quem licet inuitum peccasse contendunt, non ei qui illum peccare coëgit, adscribunt. Illum ob peccata quæ in eo Deus fecit, nō qualicumque supplicio, sed æterno; non hoc aut illo pœnæ genere, sed morte perpetua, iure, meritoq. puniri. O crudelem & immanem Deum, qui cū in homine sit auctor fabricatorque peccati, in opus suū tam immaniter sæuit! Quis cū hoc Phalaris? quis Nero? quis Antiochus cōferēdus? Quanquā enim hi insontes non nunquā morte plectebant, ipsa tamen mors

eos,

eos, in quos illi sæuiebant, illorum manibus liberabat, nec illa crudelis immanitas nisi ad tempus, & in solum corpus quicquam poterat. ille autem non solum corpus, sed etiam animam, neque solum ad tēpus, uerū etiam in æternum suppliciorum acerbitate discruciat. Cū aliquis etsi nocentissimus lento igni ctematur, aut brachiis cruribusque fractis diu cum morte luctatur, quis spectatorum adeò durus ac ferreus, qui illud supplicij sæuitiæque genus non perhorrescat? Quid de eo dicemus, qui non lento, sed maximo igni, non ad tempus, sed in æternum; non solum corpus, sed & corpus & animam peccatoris excruciat? Certè si, ut aduersarij dicūt, ipse Deus peccati auctor est, si hominem ad peccatum impellit & cogit, nihil eo crudelius dici, nihil immanius cogitari potest. Sed absit à fidelibus tanta dementia. Paulus siquidē Apostolus, ueritus ne ex iis quæ alibi fortassis obscurius dixerat, aliquis talem Deum, qualem isti faciunt, esse suspicaret, manifestissimè dicit: Fidelis est Deus qui non patietur uos tentari supra id quod potestis. Sic Apostolus de Deo sentit & loquitur; isti uerò longè aliter. homines enim à Deo ita tentari, & ad peccatum tanta ui impelli uolunt, ut ei resistere nullo modo possint.

possint . Quis enim hominum resistat Deo ?  
quis eius potentiae repugnet ? Ille Deum fa-  
cturum cum tentatione prouentū haud ob-  
scure pronunciat , ut intelligamus hanc ho-  
minis utilitati proficere , contrā isti tentatio-  
nem uimq. diuinam ad solam hominis æter-  
namq. perniciem ualere contendunt . Quæ  
cū ita sint , quis aduersarios , qui contra ra-  
tionis uerbiq. Dei clarissimum lumen , in ip-  
sum Deum tam contumeliosa , impia , indi-  
gna confingunt , à Deo derelictos , in repro-  
bum sensum incidisse iam dubitet ?

Olim Euangelio coruscāte , superstitionis  
ex orbe terrarū depulsæ sunt tenebræ , tristis  
Saturnus , mœchus Iupiter , Mars cruentus ,  
Venus meretrix , cæteraq.ue portenta nō nu-  
mina , tanquam diuinitatis nomine indigna ,  
propter criminum turpitudinem vulgò re-  
iecta . Quibus exhibitis Deus ille , qui unus  
& uerus est , quiq. sapiētissimus , optimus , po-  
tentissimus , hominumq.ue præcipuus ama-  
tor est , ab omnibus colebatur ; nunc extite-  
runt isti qui nouis dogmatibus , imò parado-  
xis non solū illorum falsorum deorum stu-  
pra , adulteria , incestus , cædesq.ue , sed etiam  
quicquid flagitiorum ac scelerum toto orbe  
terrarum geri potest , uero Deo adscribant .  
Hunc itaque non φιλέωμεν , hominumq.ue

amato-



amatorem, sed inimicum, sed hostem, ipso quoque eorum iurato hoste dæmone seuio rem. Horresco referens eiusmodi errorem, impietatem, blasphemiam in Deum à nostri sæculi Christianis excogitatum esse. Qui negant in nobis esse liberum uoluntatis arbitrium, ij omnes illas abominationes atque blasphemias, quas ex erroris sui pestilenti ouo Lutherus exclusit, uno impietatis inuolucro tegunt. Quid autem de illius temeritate audaciaq. dicemus, qui & Dauidis adulterium, & Iudæ proditionem non minus, quam Pauli conuersionem opera Dei esse dicere, nec dubitauit, nec erubuit? O portentum in solas terras deportandum! Cuius uestigiis præclare Caluinus insistit, cum omnibus eloquentiæ suæ uiribus, hominem ad peccatum à Deo impelli & cogi, persuadere conatur. Illam igitur impietatem & insaniam, quæ liberi arbitrij negatione celata continebatur, istorum ex illis tenebris educit oratio; quam qui legit aut audit, neque tamen perhorrescit, tamq. sacrilegam & impiam detestatur insaniam, hunc in reprobū sensum iam incidisse, perspicuum est. Quis ergo adeò cæcus est, ut nō uideat ab istis Deum non modò non glorificari ut Deum, sed potius omni contumeliæ genere affici? Deus enim per suorū propheta-  
tarum

earum ora sepe testatus est, se non esse talem  
 qualem eum isti faciunt, sed potius homi-  
 num amatorem, qui hinc omnes saluos fieri  
 uellet, inde mortem peccatoris nollet; quiq.  
 ita & peccati odio & amore iustitiæ teneret,  
 ut nullū nisi ob sua peccata puniret, sed po-  
 tius bonum & misericordē, qui perditionis  
 cuiusquam hominis causa non esset, sed po-  
 tius sine acceptione personarum, omnium sa-  
 lutem optaret. Vnde igitur tanta istorum in-  
 quitas & impietas, ut contra tam perspicua  
 scripturarum testimonia, quibus Deus opti-  
 mus, iustissimus, misericordiæque plenus  
 ostenditur, propter obscura quædam scriptu-  
 rarum loca; quæ tamē non bene intelligunt,  
 illum pessimum, crudelissimum, iniquissimū  
 facere, quàm illorum locorum, quos produ-  
 ximus, aliorumque innumerabilium perspi-  
 cuitati fidem adhibere malint? Quod euidē-  
 tius reprobī sensus corruptæque mentis &  
 euersæ argumentum adferri potest? Apосто-  
 lus certē philosophos illos qui suis errori-  
 bus uanisque dogmatibus uerum Dei cul-  
 tum ac religionem adulteratā, in falsam de-  
 nique cōmutarunt, in reprobū sensum me-  
 ritō incidisse demonstrat, quid de istorū im-  
 pietate dicemus, qui Dei cultum non adul-  
 terare, sed funditus euertere; qui religio-  
 nem

Prouer 8

1. Tim. 2.

Ezec. 18.

Ps. 5. C

10.

Ps. 105.

Act. 13.

Rom. 2.

Rom. 1.

nem non corrumpere, sed penitus abolere conantur? Qui cum tā absurda, iniqua, crudelia de Deo, qualia sunt ea, quæ ex erroris sui in liberū uoluntatis arbitrium fonte hauriētes, Deo adscribunt, hominū generi persuaferint, an non tādem illud efficient, ut quibus de causis iilum Iouis, Martis, Veneris, Herculis, cæterorumque non deorum, sed idolorū cultum ac superstitionē orbis quondam reiecit ac respuit, ueram quoque religionem, si tamen uera esse potest, quæ talē, qualem illum isti esse confingunt, Deum collit, iisdem adductus repudiet? Illi igitur ueram religionem in falsam commutarunt; hi peregrinis atq; paradoxis opinionibus suis nullum ueræ religioni locum relinquunt.

*Rem. 1.* Sed ad alterum reprobationis istorum argumentum ueniamus. Illi philosophi à Deo derelicti corpora sua cōtumeliis affecisse dicuntur. Isti autem cum hominem ex homine tollentes, eum pecudem esse dicunt, & quidem omnium miserrimā; non solum corporibus, sed animabus suis, toti que humano generi dedecus adferunt. Nam qui liberum tollit arbitrium, is homini id quo à pecudibus differt, adimit; quo sublato, quid inter hominem & pecudem interest? Profectò nihil. sed operæpretium est animaduertere, quibus

contu-

contumeliis hominē afficiant. Arbores, plantas, lapides cæteraque huiusmodi fructum aliquem adferre nec otiosa, sed potius alicui esse usui consentientur, solus homo, inquit, nihil nec agit, nec agere potest, non aliquem fructum adferre, non bona opera producere ualet. Neque eo dedecore contumeliaque contenti, qua hominem racha, id est uanū & inutilem dicūt, cum non modò fatuum, sed etiam perniciosum ac malum faciunt, cum cum nihil nisi malū agere, neque aliud quicquam, nisi in quo & sibi & cæteris noceat, posse pronunciant. Sed quoniā hæc omnia iis leuia uidebantur, illud etiam adiiciendum putarunt, ut hominem sui ipsius suæque animæ facerent parricidam, dum illum aliquid, qđ sibi utile sit ac meritorium, facere posse negant, sed quicquid tandem molitur aut agit, id totum ad solam animæ suæ æternāque perniciem ualere dicunt, tantumque abesse, ut aliquid boni possit, ut omnibus operibus, factisque suis, nihil aliud quàm suam miseriam, calamitatem, interitum augeat atque promoueat. Quæro iam an de cæteris animalibus eiusmodi aliquid dicant? Nonne s. *De Fic* cum Cicerone loquuntur & sentiunt, simul *nib.* atq; natū sit animal, ipsum sibi conciliari & commendari ad se conseruandum, alienari autem

autem ab interitu, iisque rebus, quæ interitum videntur adferre? Si quis homini manus daret esse diceret, non quibus uteretur, sed quibus se ipsum occideret, oculos quibus non pericula declinaret, sed ad precipitum duceret, dentes quibus nihil aliud nisi artus suos ipse laniaret, eius absurdissima videretur oratio. Sed longe absurdus est dicere hanc solam homini facultatem esse concessam, ut nihil aliud possit, nisi in singulis operibus factisque suis animam suam ipse iugulare. Nonne tolerabilius erat minusque miserabile, homini eam vim esse ac facultatem, ut corpus suum, quam ut animam suam proptio mucrone iugularet? Nam si manus sibi, id est corpori suo adferre omni parricidio grauius iudicatur, quid de illa, quæ suam animam occidit, uoluntate dicemus? Quid igitur de humana conditione grauius, quid odiosius dici potest? Hominem itaque iplis demonibus atque damnatis miseriorem faciunt. hi enim quemadmodum nihil boni deinceps agere, ita damnationem suam atque supplicia augere non possunt: miser autem homo, ut isti uolunt, nihil quidem boni, quemadmodum nec ille facere potest, suam tamen damnationem & interitum nihilominus per singula momenta augeat. Cum hæc & alia eiusmodi aduersarii loquantur,

loquantur, & sentiant, quis eos in reprobū sensum incidisse iam dubitet? Quanta autē ingratitudo, quanta impietas in Deum id ab illo datum negare, quo isti ad sua commoda semper utuntur, & sine quo nihil possunt? Si quis negaret se corpus aut linguam habere, is cæcus aut insanus iudicaretur; qui liberū uoluntatis arbitrium habere se negat, æque cæcus atque amens habendus est. id enim in se esse negat, quod in illo experientia rerū magistra perspicuè esse demonstrat, quodq. ipse quotidie experitur & sentit. Negat igitur præcipuam sui partem, qua Deum suum intelligere, amare, colere potest. Quæro nunc ab aduersariis, si liberum non habent uoluntatis arbitriū, quænam est illa uis, quæ potentia, qua Deum amant & colunt, quod cætera animantia, quia libero priuantur arbitrio, nullo modo possunt.

Sed uidentur mihi aduersarii non cæcis & amentibus, sed ipsis bestiis furore ac rabie percitis similes. Ut enim rabidus canis quoduis obuium animal ipsumq. dominum suū mordet, ac tandem se ipsum dilaniat & occidit; & quemadmodum homo furiosus artus suos mordet ac rodit, seq. uel præcipitio uel laqueo necat, uel in profluentem insilit, feseq. submergit, aut certè suos filios, uxores,

T

rem,



re, propinquos, amicos crudelissimè occidit: ita isti qui ingenium suum atque omne studiū eò conferunt, ut ipsum Deum rodant ac mordeant, seseq. ipsos ac omne hominū genus, quātū in ipsis est, crudelissimè occidāt, nō minus mihi furiosi uideri solent. Quod si illos nō solū horrere cōsueuimus, uerū etiam uinculis & catenis ligare cōpellimur, quid his, quorū & impietas in Deum, & crudelitas in homines redūdat, facere æquū esset? Sed ut ad propositū reuertamur, illud tenendum est, homini à Deo nihil, nisi quod illius utilitati salutique proficeret, esse concessum; quo si in suam perniciem abutatur, eum contra naturā facere. Homo, exempli causa manus & brachia accepit, ut iis ad utilitatem & conseruationē sui, cū res postulat, uti possit, quod si se ipse sua manu occidit, suisq. membris in suam perniciem abutitur, omnium sicariorū immanitatē suo facinore uincit, contraq. naturam facit. ita ingenij facultatem accepimus, ut ea in nostrum commodum utamur: quam si quis eò detorserit, ut aliquid, ex quo nullus fructus, nulla utilitas consequatur, aut neget, aut asseueret, is in uanum accepit animam suā, porro si hāc ingenij uim ita deprimit & abiicit, ut contra seipsum aliquid aut asseueret

aut



aut neget, quemadmodum fit cùm liberum negatur arbitrium, animam suã ille iugulat & occidit, ipsamq. naturam uiolat, dum se nobilissima præcipuaq. animæ parte, sine qua nec anima ipsa rationis est particeps, priuat & spoliat. Quẽadmodũ igitur eos, qui corpori suo manus adferũt, furiosos dicimus, & amentes; ita eos, qui animas suas ipsimet iugulant, liberumq. negantes arbitrium, ueram illam uitam sibimet eripiunt, insanos, furiosos, amentes existimare debemus. Sunt hæc quidẽ grauissima suo pondere, sed illud longẽ grauius, quod isti omnem ingenij facultatem eò conferunt, ut Dei, quẽ peccati & iniquitatis auctorem facere non dubitãt, bonitatem atque iustitiam negent è medioque tollant. Cùm enim tam sacrilegum dogma impia uoce defendunt, nonne in ipsum uniuersi auctorem Deum, illumq. benignissimum parentem generis humani impetum faciunt, eumque quantum in ipsis est, perdere atque exterminare conantur? Et dubitabit aliquis istos qui tam impiẽ suis ingenijs abutũtur, qui dentes suos in sua uiscera acuerunt, qui linguas suas in ipsam naturam armarunt, qui toti humano generi pestem atque interitum adferre conãtur, qui in ipsum quoque Deum adeò nefariẽ impetũ fa-

ciunt, esse furiosos? Quod insanix, furoris, amentix genus cum hoc conferri potest? & istos adhuc sanę, ac non potius emotę mentis arbitraberis frater? Neque uerò hæc eò pertinent, ut iis conuiciũ faciam, sed ut eorum cæcitatem, furorem, insaniam tibi mi frater ostendam; qua perspecta, cui hominũ generi fidem haberes, & quorum sacrilegũ sequereris errorem, dum liberum negas uoluntatis arbitriũ, intelligeres, quod impium dogma, quantam blasphemiarũ, iniquitatis, malorumq. omnium lernam in se completatur atque contineat, planum faciundum fuit, ut exclusis illis ouis, esset omnibus perspicuum, quanta sub hoc uno dogmate, quo liberum uoluntatis negatur arbitrium, lateret impietas, quam detectam & cognitam mũdus detestaretur ac fugeret. Vnde intelligi potest, quò illorum cõsilia spectent, imò quid per illorũ fraudes & imposturas Satanas efficere conetur, nimirum ut nobis scripturę sanctę lumen eripiat, ut fidem ipsam ac religionẽ euertat, ut Deum ipsum e medio tollat, ut humanũ genus funditũs perdat. O miseros homines! imò furiosos & insanos, qui se ita Satanae ministerio dediderũt, ut ex illius imperio atque pręscripto linguas suas nõ solum in humani generis pestẽ

atque

atque perniciē, sed etiā in ipsius Dei contumeliam sacrilegio impiæ uocis armauerint. Miserabilis quidem primus ille serpens, cuius opera Satanas ad protoplastos decipendos atque fallendos quondā abusus est. Maior tamen istorū calamitas, quos instar colubri terrę defixit affectus. Repunt igitur humi, nec unquā à terra, in quā omnem spem atque fiduciam abiecerunt, oculos erigunt, sed pecudum more uiuētes, imò pecudibus deteriores, nullam iustitiæ mercedē, nullū præmium expectant. Ita homini tanquam pecudi nihil nisi corporis uoluptatem esse propositam existimāt, hanc illius esse felicitatem, hoc propè summū bonum. Mentior, nisi quotidie uidemus maiorē gregis uestri partem humi repentem terræque defixā in Atheorum, & Epicureorum castra transire, ac fidei desertores cælestibus bonis terrena præferre. Non est igitur mirum, si homines mentē capti planeq. furiosi, in tantū crudelitatis ac sæuitiæ proruperunt. Primū immanitatis tyrociniū illis fuit, in ipsum Deū caninā exercere facundiā. Hinc ne sibi quidem pepercit impietas, exinde in nos quondam suos fratres, amicos, propinquos, socios, cõtubernales omni sæuitiæ genere bacchantur. Ita gradatim in omne hominum

Rom. I.

genus processit immanitas, quam omnium uitiorum facinorumque licentia ubique comitatur, adeò ut si philosophos illos gentiles, quos Apostolus in reprobū sensum traditos fuisse dicit, cū istis cōferas, boni atque integri illi fuisse uideantur. Istis enim homines, & quidē insones, crudelissimè occidere, uel uirtus, uel ludus est. Quid de rapinis? quid de sacrilegiis tēplorūq. direptionibus dicā, quas isti pietatis loco ducunt? Inter catholicos uitia quædā esse non nego, sed nemo est adeò furiosus ac demens, ut cædes, furta, rapinas, seditiones, & in magistratus rebelliones uirtutis loco ducat, aut cuiquā honestū licitū uel aliquid eiusmodi esse dicat, & sentiat. De uestre scholæ putidissimis fontibus ista manarūt. Hæc uestri ministri cōtra uerbi Dei auctoritatē atque sententiā, quo furta, cædes, rapinæ, seditiones, & omne cupiditatis genus apertè prohibetur, docēt atque defendunt. De quibus quid aliud dicā, quàm id, quod Apostolus de quibusdā grauissimè seuerissimeq. pronunciat? Qui cū iustitiam, inquit, Dei cognouissent, non intellexerunt, quoniam qui talia agunt, digni sunt morte; non solum qui ea faciunt, sed etiam qui consentiunt facientibus. Quid? quòd istorum eò usque processit audacia, ut

quos

Rom. I.

quos huiuscemodi facinoribus criminibusq;  
 deditos ultimo supplicio affici æquum erat;  
 eos solos pios, eos religiosos, reformatos,  
 Dei denique filios dicunt. Sed cuius Dei,  
 ipsi uiderint, certè ueri illius Dei, qui cælum  
 creauit, & terrâ, qui solem suû oriri facit su-  
 per bonos & malos, qui ut est optimus, mise-  
 ricors, hominumq; præcipuus amator, ita  
 furta omnia, rapinas, latrocinia, seditiones,  
 iniusta bella, cæteraq; eiusmodi, quæ uestri  
 symmystæ palàm exercent, summopere de-  
 testatur, filios esse non posse certû est. Cum  
 enim & in Deum, & in hominem tam impiè  
 contumelioseque iam dixerint, quid aliud  
 restat, quàm ut ij tanquam desperati, in om-  
 nium facinorum scelerumq; licentia & fu-  
 rore bacchêtur? Rectè ait Sapiens: Impius  
 cùm in profundum peccatorû uenerit, con-  
 temnit. Neque enim ulla exhortatione mo-  
 uetur, neque ullo sermonis genere, quo ut  
 peccatum suum deserat, admonetur, ab im-  
 pietate reuocatur. Si essent Dei filij, certè  
 bonitatis ac misericordiæ illius sequerentur  
 exēplū. si essent Dei Apostoli, profectò per  
 eadem humanitatis, modestiæ, humilitatis,  
 mansuetudinis uestigia graderentur. Quæ  
 cùm ita sint, cæcus est qui illius factionis at-  
 que doctrinæ, ex qua tanquã ex equo Tro-

Prou. 18.

iano tanta malorū turba processit, malitiam impietatemque non uidet. Quid enim Dei uerbo tā repugnans atque contrariū, quā illorum dogmata? quid Christianæ fidei ac religioni tam inimicū & aduersum, quā illius perditissimæ factionis improbitas? Cum igitur tantā malorū omnium lernam in ipso uestre cōtra liberum arbitrium doctrinæ sinu foueri intelligam, eamque non solum cum Dei uerbo, sed etiam cū ratione, experientia, fide sanctorum, antiquitate sententiarūq. doctorum pugnare perspiciam, ignosce mihi, si adeò fatuus ac demens esse non possum, ut tam impium nefariumq. doctrinæ genus pro ueritate amplectar. tu quoque si sapis frater, eam deseres, atq; ex illis fluctibus eoq. naufragio, quo tā multi pereunt, enatabis. Veniat tibi quæso illud in mentē, quā turpe tibi sit, id de Deo meo dicere, quod sine horrore audire, sine pudore referre nō possum, Deum auctorem esse peccati, Deū adeò iniquum esse, ut hinc peccata seuerissimè puniat, inde uirtutibus præmia nulla constituat. Quæ cum ex te audio, quanto putas me propter impiæ uocis audaciā pudore suffundi? Quid cū tuam infusceptæ sententiæ, qua immortale uirtutibus atque pietati bellum indixisti, pertinaciam



tiam improbitatemque confidero? Quid opus erat de operum merito ac dignitate contendere, orbemque terrarum tanta contentione turbare? Nonne satis erat bona opera meritoria esse intelligere, hominique non solum utilia, sed etiam necessaria esse cognoscere? Tanta certè, si scripturæ fidem habemus, eorum utilitas est, ut iis, qui ea fecerint, Deus præmium reddat æternum. Quid mihi opus est scire, utrum ea tanti æstimanda sint, an pluris minorisue, quàm ipsum cælum, cum nō ignorem, iis qui ea fecerint, regnum cælorū esse promissum? Quid mea refert, num Deus iis tantam mercedem assignans, ultra iusti pretij dimidiū decipiatur an non, cum hoc pactum atque conuentū illi placere cognoscā? ea certè opera, pro quibus tantam mercedem se redditurum Deus esse promisit, homini debent esse carissima. Cum igitur quempiam uidero uirtute præstantem, eum tanquam in cælo paulò post regnaturū, iure meritoque suspiciā. Quapropter illas cōtentiones & rixas prætermittere facillimū nobis erat frater, si eo, quod è purissimo scripturarū fonte haustum ab Ecclesia sumpsimus, uoluissimus esse cōtenti, neque tantæ litis, quæ ad solā bonorū morum euersionē pertinet, turbinem excitassemus.

Nostra



Nostra certè ecclesia huiuscemodi contentionem detestatur ac dānat . Fides nostra simplex est ac facilis intellectu , neque quicquā est, quod uos ab illius susceptione impediat & retardet, nisi sola incredulitas uestra. Hęc enim uos omnia Dei uerba, omnesq. scripturæ sententias amplecti nō patitur . hæc agit, ut ea tātum quæ uestris opinionibus affectibusq. conueniunt , approbetis . Porro si nō ex parte, sed ex toto Christianus esse uis frater , à te peto ut totum intellectum tuum in obsequium fidei Christianæ captiues, eiūque subiicias . Itaque cū scriptura hominē & appetitui suo dominari, & uoluntatis suæ potestatem habere pronūciat, noli repugnare, sed tantæ auctoritati cedens, liberum uoluntatis arbitrium confitere . Cū hinc liberi arbitrij uires ad boni operis executionē absque Dei gratia non sufficere , inde credenti cum gratiæ Dei auxilio nihil impossibile esse scriptura denūciat, crede, utrāque verā esse sententiam , hominēq. tali auxilio subleuatū, aliquid boni præstare posse ne dubites . Rursus cū audis tantam carnis spiritui repugnantis esse uim, tantos impetus, ut hominem ad peccatum uideatur impellere , uerū id esse persuasus, Deū ut tibi auxilio esse dignetur ne in tentationē incidas, roga . Contra

trà cùm adeò fidelem esse audis, ut neminē  
tētari patiatur supra id quod potest; hoc ita  
se habere intelligens bono animo sis. Porro  
cùm hinc opera nostra futuræ gloriæ condi-  
gna nō esse, inde iis qui ea fecerint, maximū  
in cælo præmium repositum esse intelligis;  
sic utriusque sententiæ ueritatem amplecte-  
re, ut & Pharisaicum supercilium fugiēs, de  
bonis operibus ac uirtute nō efferaris, & ad  
ea gerēda lætus atque alacer spirituales illas  
verasq. diuitias tibi studiosissimè compares.  
Et quemadmodum omnibus fidei Christia-  
næ articulis assentiris, fidemq. habes, ita si-  
mul omnia Dei uerba complectere, ut nō ex  
parte sed ex toto Christianus ac fidelis esse  
uidearis. Noli igitur hunc diuinæ scripturæ  
locum, ut illi fidem habeas, euertere, sed po-  
tius utrumque concilia, quemadmodū nos  
facere consueuimus. Quod si feceris, in ne-  
gotio fidei inter nos ilicō pax sequetur. Sin  
minus, cōciliari nullo modo possumus. Con-  
ditiones pacis æquissimas adfero. Nihil enim  
aliud postulo, nisi ut Dei uerbis omnibus  
credas: hoc solū à te peto, ut Deū bonū, iu-  
stum, misericordem, hominum amatorem,  
non peccati authorem, non mali causam esse  
fatearis. Hoc si de Deo credas, ecclesiæ ca-  
tholicæ quondā matris tuæ fidem scripturæ  
sanctæ

sanctæ auctoritati non repugnantem & contrariâ, quemadmodû impostores illos tuos secutus antè dicebas, sed & rationi cōsentaneam, & Dei uerbo cōgruentem, & ipsa ueritate subnixam esse censebis.

Sed quoniam è uadosis locis enauigauit oratio, & aduersariorum fraudibus, mendaciis, erroribusque detectis, ueritatis lumen ostendimus, redi quæso in uiam, damnatoq. errore in arcam Noë, id est, in ecclesię Romanæ ipsiusque Apostoli Petri domicilium regredere. Vt enim eos omnes qui extra illā arcā olim inuenti sunt, cataclysmus absumpsit; ita hoc errorū inundante diluuiο, quo nunc propè demersa sunt omnia, quicūque catholicæ ecclesiæ tutissimam nauem deseruerint, ij fluctibus illis obruti pereāt necesse est. Hęc enim sola inter procellas ac turbines mundi multorumq. naufragia iactari potest, obrui nō potest. Hęc sola nō modò tyrannorū impetus uimq. perfregit, sed etiam hæreticorū calliditatem fraudesq. deuicit. Quæ cum ita sint, etsi pro huius ecclesiæ defensione nonnulla tibi in superioribus literis scripsi, illud tamen me rectissimè additurum esse confido, Romanam ecclesiā, eamque solam, Christi ecclesiā esse, quæ in æternum mansura est. Quam enim aliam dabis,

quæ

quæ in una eademq. fidei regula semper immobilis atque inconcussa permanferit? Obganniant licet illæ uestrorū impostorū uulpeculæ, latrēt ut uidebitur illi uestri Scyllæi canes, ipsa certè experiētia rerum magistræius æternitatem ostendit, quā usque ad nostram ætatem circumlatrantibus omnibus illius inimicis stare perspicimus. Hæc sola iam amplius mille quingentis annis stetit immobilis. Quis hanc quæ inter tot procellas ac turbines, inrer illos fluctus, & maximas tempestates, quibus tot sæculis iactata est, tā diu stare potuit, supra firmissimam petram fuisse fundatam, quis optimè extructam esse iam dubitet? Apostolus certè Paulus me in huius ecclesiæ fide obediētiaq. ualde cōfirmat, cū illius ad Romanos epistolam legens, in primis illum Deo gratias agere animaduerto, quòd Romanæ ecclesiæ fides toto terrarū *Roms. i.* orbe percrebuit. Quod de nulla alia ecclesia Paulus scripsit aut dixit. Non solum autem Apostolus Romanæ ecclesiæ fidem mirabiliter laudat & prædicat, uerū etiā illā ecclesiā singulari amore prosequitur. Inde sunt illa beneuolentiæ dilectionisq. plenissima: Testis est mihi Deus, cui seruiο in spiritu meo in euangelio filij eius, quod sine intermissione memoriam uestri facio semper in oratio-

orationibus meis. Non ignoro ministros ue-  
stros. Geneuenses hoc loco, Apostoli corru-  
pisse sententiam, dum ita distinguunt, ut hu-  
ius uersus extremum sequentis exordiū esse  
uideatur, ne fateri cogantur Apostolum pro  
ecclesia Romana, quam illi tam immortali  
odio prosequuntur, orasse. Sed duo ultima  
huius epistolæ capita legant, & quàm arden-  
ter Paulus non solum huius ecclesiæ preces  
ambiat, sed etiam pro ea Dominum depre-  
cetur, intelligent.

Sed fortè tum Paulus ita faciebat, nunc  
autem alia ratio est. Imò uerò quoniā cha-  
ritas neque deficit neque decrescit in iustis  
ubi ad cælestem gloriam euolarint, Apostoli  
in Romanam ecclesiam, quam suo sanguine  
rigauit, amorem ac beneuolentiam nulla ex  
parte mutatam aut diminutā esse arbitror.  
Quapropter illū assiduè pro illa preces fun-  
dere existimo, non minus quam Apostolum  
Petrum, quem Clemens illius discipulus ac  
successor ante mortem pollicitum esse se iu-  
gem illius in suis orationibus memoriam ha-  
biturum, memoriæ prodidit. Quòd si uera  
est illa Christi sentētia, qua Apostolis quic-  
quid à Deo patre petiissent futurum pol-  
licebatur: quis relictus est dubitandi locus,  
quin in his duobus Apostolorū coryphæis  
cuius

eius sententiæ ueritas impleatur? Illorū igitur quas non modò tum fuderunt, sed etiā adhuc fundunt, à Deo preces audiuntur, illorum etiam nunc plurimum ualet oratio. Itaque cū ab Apostolo nō solum ecclesiæ Romanæ laudetur fides, uerū etiam illa ecclesia tam ardenti ametur affectu, ut is assiduas pro ea preces fundat, nonne prudentius faceres si tanti Apostoli, cui Deum locutum esse non dubium est, potius quam Caluini, qui à quo missus sit obscurū est, (Hoc ironicè dico, scio enim a diabolo missum eum esse) sequereris exemplum? Illud certè concedes, inter hos duos minimè cōuenire. Ille siquidem ecclesiam Romanam singulari amore, hic immortalī odio prosequitur. Ille pro ea preces fundit, hic eam conuiciis appetit. Ille Romanam fidem laudat & prædicat, uos Caluinum secuti, eam uelut falsam impiamq. damnatis. Quæ cum ita sint, longè æquius esse arbitror, tantæ auctoritati credentem me in huius ecclesiæ castris perseuerare, quàm transfugam factum perditæ factioni, quæ quod Apostolico ore laudatum est, uituperat, me adiungere. Cū igitur fidem nostram cum diuinis literis omni ex parte congruere satis copiosè monstraui-  
mus, quàm impiè nefarieque eam oppugnas  
tuis literis, quantoq. in errore, ac ueritatis  
ignorant-



ignoratione uerferis, perspicuum est. Itaque restat ut palinodiam canas, omnibusq. mendacijs, conuicijs, blasphemijs, quibus sanctum ecclesiæ nomen infamare conatus es, tuo ore damnatis, ad salutare illius gremiū redeas, eam matrē agnoscas, ei pareas, eius legibus libenter obtemperes, ut de cæteris quoque controuersijs, quibus adhuc illam aduersarij oppugnāt, salubriter instrui possis. De libero autem uoluntatis arbitrio, & meritis operum satis multa iam diximus, ex quibus quæ sit hac in re nostræ fidei ueritas, facile intelliges. Quod si aut tu aut quisquā uestrorum ministrorum aliquid contra dicendum putat, facessant conuicia, ut humanitatis ac mansuetudinis specie ueritatē nos inuestigare doceamus. Idem quoque quem hic obseruauimus, ordo seruetur, ne rerum sententiarumq. confusio tenebras pariat. Id si ita factum abs te fuerit, me tibi responsurum esse polliceor. Sed sat scio nihil ab illis melius, nihil probabilius adferri posse ijs quæ tuis exposita literis pro nostra mediocritate deteximus, in lucemq. prolata commutauimus. Quod si fortè illorum sophismata, captiunculas, argumentandiq. uicia statim uidere non potes, hæc nostra sæpius lege, & tandem fieri non poterit, quin illorū caliditatem fraudemq. perspicias. Qua per-

specta



specta & cognita, si illos impostores adhuc  
sequeris, illiq. adhibes fidē, uerisimile est te  
esse mentis emotæ, à Deoq. derelictum in  
reprobū sensum incidisse. Certē fraternus  
amor me in hac responsione tantum laboris  
subire coegit, ut tibi familiariter & fidei no-  
stræ ueritatem, & erroris tui uanitatē osten-  
derem. Quod si tibi persuadere nō possum  
liberū in nobis esse uoluntatis arbitrium,  
nihil opus est ut mihi de cæteris rebus, quæ  
in fidei negotio inter nos controuertuntur,  
aliquid scribas, quod te in extremis tuis li-  
teris facturum esse promittis. Nam si mihi  
deest liberū uoluntatis arbitrium, nō mihi  
sed Deo scribe, illiq. me libero arbitrio pri-  
uatum esse persuade, ut is operetur atque  
efficiat in me & uelle & perficere. Nam ei  
qui liberū non habet uoluntatis arbitriū,  
superuacuum est scribere, & quicquam per-  
suadere conari. O quā miseret me tui fra-  
ter, cū te sublatō libero uolūtatis arbitrio  
hæc scribere & polliceri uideo, illudq. quod  
uerbo negas, factō per totam epistolā tacitē  
confiteri, nec ad extremū uenire potuisti,  
quā liberū arbitriū, quod tota illa epistola  
tua conabar is euertere, confitereris. O ma-  
gna uis ueritatis, quæ ex aduersarij sui pe-  
ctore nonnunquam erumpit, illumq. ad sui

APPENDIX

V

confessio-

confessionem impellit. Magno id quidem argumento mihi est te, mi frater, esse seductum, ac intellectus tui oculos ita fascinatos esse, ut quæ à cæco facile uiderentur, ea tu uidere nō possis. Quare tanto maiore in te misericordia moueor, Deumq. Opt. Max. precor ut hoc uelū ab oculis cordis tui sua benignitate remoueat, ut ea quæ tibi uersantur in manibus, sine continuo quorum experimento ne momento quidem temporis hæc uita duci potest, perspicere queas. Hæc mi frater tibi de iis duobus quæ in tuis literis refellenda sumpisti, rescribenda existimaui. Laborem nostrum boni consule: quæ si aliquid profecisse intellexero, de alijs in negotio fidei cōtrouersijs tibi scribere nō grauabor. Interea dū tuas literas expecto, ex quibus quantum istius libri lectione profeceris intelligā, Deū quotidianis precibus oro, ut mentem tuam clarissimo spiritus sui lumine illustret, quo agnita ueritate rectum salutis iter teneas, & ad illā sion cælestem Christi beneficio peruenias, eoq. tandem modo tanquam fratres eadem fidei & dilectionis unitate concordescum angelis cæterisque beatis spiritibus Deum Opt. Max. perpetuò laudare meremur. Amen.

FINIS

APPEN-

APPENDIX AD  
LECTOREM.



Et theologicis omnibus cōtro-  
uersiis qui recte iudicare uol-  
let, eum oportet non solum  
allegare scripturas, uerum  
etiam rationis, quā ut senten-  
tiā, quā in quæstionem uenit, qualitatem  
rite examinemus, Deus in cordibus nostris  
accendit, lumen adhibendum est. Quan-  
quam enim ab utraque parte scripturarum  
sententiæ proferantur, neque solum nostri,  
uerum etiā aduersarii se uerbi Dei auctori-  
tate niti uideri uelint, cōclusiones tamē, quæ  
scripturæ uerbis atque sententiis utraq; pars  
probare conatur, inter se pugnat suntq; con-  
trariæ. De quibus recte iudicandi uiam satis  
planam, expeditamq; rationem in hoc libro  
tibi ostendi. Cum igitur aliqua sententia,  
cui probandæ scripturarum profertur aucto-  
ritas, in Dei siue contumeliam siue blasphe-  
miam uergit, non est dubium quin a mali-  
gno spiritu antitheo illo erroris atq; impie-  
tatis auctore profecta sit. Nec mirum est si  
aduersarii errores suos scripturarum allega-  
tione prætexunt. Quo enim alio modo fieri

posset ut inter Christianos aliquid noui probaretur? Finis igitur ac scopus, propter quē scriptura profertur, totum negociū euerit. Quare scopū quem sibi allegator ille præfixit, & quid ex eo sequatur, diligenter attende. Vt uerbi causa, si quē dixeris iniustē eadē admisisse, sequitur illū esse homicidā; si quis prodidit ciuitatem, eum proditorem; si fecit iniuriam, iniustū esse cōsequens est. Ita si cades illa quā Dauid admisit, Deo attribuitur, Deum homicidam esse dicemus, si Deus ea quæ fieri nullo modo possunt, homini præcipit, & eū qui imperata nō fecerit, nihilominus supplicijs afficit sempiternis, magnū in illū crudelitatis ac sæuitiæ crimen admittit. Consequens est igitur Deum esse crudelem, tyrannum, immanem, ac trucem. Qui itaque scripturarum uerbis atque sententijs eo abutitur, easque ad hoc profert ut Deum in homines talem esse probet, qualē eum isti faciunt, is in Deum impia uoce blasphemans diuinas literas nō bene intelligit, sed ad suam impietatem perfidiamque detorquet. Talis est in liberum arbitriū error, talis impietas. Sed fortē nimis urgeo. Neque enim hic aduersarii in Deum aperta libertate blasphemant. Est illis adhuc nonnihil uerecundiæ: Non dicunt Deum esse iniustū, crude-

crudelem, tyrannum, sicarium, adulterum, proditorē. Fateor uerbo ista non ponunt, ca-  
tamen & dicunt & docent, ex quibus aduer-  
sus Dei nomen, & gloria eiusmodi blasphe-  
miae consequuntur. Quae igitur quae post ab  
alijs excludantur, infecta, putrida, uenena-  
ta ponunt. Antecedentia siquidem ex qui-  
bus impiæ conclusiones inferuntur, expo-  
nunt principale, ex quo accessorium nullo  
negocio elici possit, in medium proferunt.  
Quae cum ita sint, impietate sanè suam atq;  
blasphemias quae uidebitur arte uerborum  
inuoluant, quocunque orationis genere te-  
gāt aduersarii, studiosissimeq. uel celent, uel  
etiā defendāt. Negent se in Deum esse bla-  
sphemos, quorū blasphemias nemo tam ca-  
cus est qui uidere nō possit. Quare ne se uer-  
bis purgatos putent qui rebus urgentur. An  
nos usque adeo stupidos arbitrantur, ut non  
intelligamus mendacem dici quem dixerint  
sæpius esse mentitū? sicarium, qui hominem  
sica confoderit? qui furatus sit, furē? quem  
proditionem admisisse dicant, eum prodito-  
rē uocari? Quae omnia si de pecudibus fun-  
gisve dicantur, conuicti loco fortasse non ha-  
beant; hominem certè, qui cum aut menti-  
tus se non mendacem, aut furatus esse dice-  
retur, se non furē dici intelligeret, adhuc

uldi neminem. Isti uerò, si Deo placet, nos  
adeò bardos ac stupidos esse uolunt, ut cum  
& adulteriū eademq; Dauidis, & Iudæ pro-  
ditionē nihilominus quàm Pauli Apostoli  
conuersionē esse opera Dei dixerūt, Deum  
ab ijs aduſum, ſicarium, proditorem dici  
nō putemus. Cum peccata in nobis à Deo  
fieri, nos tamen ob ea ipſa iure puniri, cum  
Dei præcepta nullo modo fieri, nulla ratio-  
ne impleri poſſe, nos tamen quod ijs nō ob-  
tēperauerimus, ſupplicijs affici ſempiternis  
docuerint, cum hæc, inquā, omnia ſic ſe ha-  
bere contenderint, num erit quiſquā adeò  
tæcus ut Deum ab ijs tyrannū, ſæuum, iniu-  
ſtū, crudelē dici non uideat? tam demens  
ut illius diuinæ maiestatis nomen & gloriā  
impia uoce blaſphemari, infamariq; non  
ſentiat? Quis aduerſariorum adeò facilis ac  
patiens, ut quibus illi criminibus Deum ac-  
cuſant, dum eum faciunt omnis iniuriæ, pec-  
cati, ſæuitiæ, crudelitatis auctorem, ea in ſe  
retorqueri æquo animo ferret? Nemo pecca-  
tum ſuū libenter agnoſcit. Latrones propè  
in ipſo facinore deprehenſi negant, & quod  
libenter admiferint, fatentur inuiti, atque  
inter ungulas & tormenta carnicum uix  
ad criminum ſuorum confeſſionē adigi poſ-  
ſunt, propterea quòd intelligunt, ſi cades



ac furta quorum accusari sunt, à se admissa  
 esse fateantur; se tanquam fures ac sicarios  
 iudicū sententia esse damnandos. Quæ igitur  
 crimina postquam improbi homines per-  
 petrarunt, fateri erubescunt; imò uerò per-  
 sinacissimè negant; ea nunc ipsi Deo quo ni-  
 hil iustius, nihil melius; cū ab aduersarijs  
 adscribantur, ij se pios, religiosos, fideles,  
 Dei seruos nō solum haberi uolens, sed etiā  
 dicere audebunt? Cui iam dubium esse pos-  
 sit quin eorum omnium, qui tam impia, tam  
 sacrilega, tam nefaria dogmata, in quibus  
 tantæ in Deum ipsum inuolutæ blasphemix  
 latitant, patienter audiunt, oculos atque in-  
 telligentiam Dei æmulus ille cæcauerit? At  
 uerò latrocinium isti à se admissum confite-  
 buntur, se tamen non esse latrones, sedi-  
 tionem à se concitatam; se tamen seditiosos  
 non esse, hominem à se iugulatum; se ta-  
 men non esse sicarios. Cū magnā mundi  
 partem in tantam cæcitatem, & insaniam, ut  
 ista pro ueris habeant, deuolutā esse perspi-  
 cio, ipse præ stomacho propè insanio. Nescio  
 quis illorum oculis puluis iniectus sit, certè  
 nihil uidet. Quare illis quos ita cæcauit im-  
 pietas, te amice lector, cordatiorem esse ne-  
 cesse est, ne in illos blasphemix laqueos inci-  
 das. Quid igitur ab unoquoq; nostrum hic



dicatur, & quid ex nostra oratione sit cōsequens, diligenter attenteq. considera. Res hic nō uerba quæruntur. Equidem mei officij esse existimo in hoc elaborare, ut isti sua sponte cæcati tandē aliquando clausos oculos aperiant, & quid iis impostores illi persuadere, imò uerō falsa religionis speciei in quantum impietatis ac blasphemiae barathrum eos præcipitare conentur, aspiciant. Si regulas à nobis superius expositas obseruare uolueris, omnibus argumētis, quæ aduersus liberum uoluntatis arbitrium, & bonorum operum meritum obiici possunt, facillè respōdebis, ut cū aduersarii scripturæ diuinæ auctoritatē obiiciunt, quæ cor Pharaonis à Deo induratū fuisse dicitur, ueniat tibi in mentem alio scripturæ loco dici Pharaonem ipsum indurasse cor suum. Quare utrūque locum suscipiens & amplectens, in hac obduratione Deum & hominem cooperari crede, Pharaonem ut causam efficientem, Deum ut permittentem, illique ob admissa peccata gratiā suam iustissimè subtrahentem. Cur autē ad hunc modū scripturā interpretamur? Videlicet ne aduersariorum uestigiis insistentes, in diuini nominis blasphemiam incurramus. Quod haud obsecrē fieret, si in Plurationis Pharaonis præcipuam

puam atque efficientem causam diceremus Deum. Vtri autem scripturam melius interpretentur, nosne an aduersarij, ipse nunc iudica. Scriptura hinc Pharaonem accusat, quòd cor suum obduraueit, (contrà Deus clamat, & ne cor nostrum obduremus hortatur) inde cor Pharaonis à Deo induratum fuisse pronunciat. Quæro nunc utrū è duobus magis sit gloriæ Dei consentaneum atque conueniens, cum hanc cordis obdurationem utrique tam Deo quàm Pharaoni scripturæ adscribat auctoritas, Deum an hominem tanti mali causam existimare præcipuam. Qui Pharaonis causam agunt, Deū primam atque præcipuam, Pharaonem secundam huius mali causam fuisse contendunt. Ita non solum Deo improbum atque impium hominem anteponunt, sed etiam ut huius improbitatem excusent, Deum accusant. Quare aduersariorum furorem & insaniam, qua improbissimo homini, populi Dei inimico & persecutori non obscure fauent, imò hominē impurissimum Deo præferunt, iure meritoq. detestor, nec dubium est quin omnes boni mecū idem sentiāt. Illi ergo ut Pharaonē purgēt, Deū accusant: nos contrà Dei gloriæ seruientes, Pharaonē accusare malimus, nec improbum hominem melio-

melio<sup>re</sup>m Deo facimus. Pharaonem igitur  
primum ac precipuum suæ obdurationis au-  
ctorem fuisse, Deum secundam illius mali  
causam dicimus. Ita neque in Deum impie  
contumeliosi sumus, neque scripturâ euer-  
timus, quæ Deum negat auctorem & tenta-  
tore esse peccati. Illas ergo regulas si seque-  
ris, omnibus eorum allegationibus facile re-  
spondebis.

Accipe alterum exemplum. Aduersarii  
ut liberum tollant uoluntatis arbitrium, Dei  
prædestinationē nobis opponunt. Sed quā  
vanum ac sophisticum sit eorum argumen-  
tum, hinc intelligitur, quod eodem mo-  
do probari potest, neque protoplastum, ne-  
que angelos, neque Christum, neq; Deum  
ipsum libero arbitrio præditum esse. Cui  
enim dubium est, quin & Adæ peccatum,  
& quicquid angeli egerunt, & quod ipse  
Christus fecit, & quicquid Deus ab omni  
æternitate disposuit, ipse præscierit? Ex quo  
secundum istos consequens est, libero in  
iis omnibus arbitrio nihil relinqui loci. At  
id falsum est. Viciofa igitur est illorum ar-  
gumentatio. Quid quod ipsi sententiam  
suam oppugnant & euertunt? Adamum  
enim ante primum illud & originale pec-  
catum libero arbitrio præditum fuisse non  
negant,

negant, sed tum demum cum ille peccauit, amissum fuisse contendunt. Quod si ille minimè peccasset, integram, ut isti dicunt, liberi arbitrij facultatem retineremus. At qui tum Deus rerum futurarum non fuisset ignarus. Prædestinatio igitur liberum non tollit arbitrium. Quis cæcam istorum non miretur insaniam, qui cum sententiam nostram oppugnare se existimant, euerunt suâ? Sed ut unde digressa est, eò reuertatur oratio, duas illorum qui liberum arbitrium negât, illustres animaduërto sententias. Prima Lutheri est, qui nos pecudû in morè, omni liberi arbitrij parte ita priuat & spoliât, ut neque boni neq; mali quicquam facere possimus. Sed ei Calvinus obsistit, qui illud ad peccatum solum ualere contendens, quodammodo diuidit. Atqui si id agit prædestinatio, ut liberi arbitrij uis ad bonum nihil ualeat, ne ad malum quidem aliquid potest. Nisi fortè bona opera præuidere Deus potuit, mala non potuit. Vides igitur aduersariorû argumentatione sophisticam esse? Atq; utinam omnes ad examinandas illorû opiniones, argumentationes, errores, hac ratione uiq; procederent. Nulla enim scientia solidior, nulla cognitio certior ea quæ arte & methodo comparatur & nititur. Hæc siquidem

dem

dem animum hominis, cuius pabulum est  
ueritas, quiq. simulac ad ueritatis adytū, cer-  
ta ratione uiaque peruenit, singulari gaudio  
effertur, naturali quadā iucunditate perfun-  
dit. Ego uerò ut tibi quod sentio simpliciter  
ingenuèq. cōfitear, hanc uiam atque ratio-  
nem, quæ mihi tantum profuit, ut ex illis quæ  
per eam didici, maiore quam ex aliis omni-  
bus quæ antè didicera, coeperim uolupta-  
tem, tibi commostrandam putari. Neque  
uerò ullius libri lectione mihi opus fuit, ut  
ea omnia quæ ad refellendas aduersariorū  
argumētationes, & elidendos illos errores, à  
nobis in nostra confutatione prolata sunt,  
quasi aliunde haurirem, ac mutuo sumerē.  
Illa enim ars ac methodus quam sequebar,  
singulis aduersarij siue argumentis, siue scri-  
pturarum allegationibus admota, maiorem  
mihi quam uellem argumentorum copiam  
subministrabat. Nullo igitur libro mihi opus  
fuit, nisi tum, cum antiquorum patrū testi-  
monia, sentētiæq. produxi. Mirantur sanè  
nonnulli me, quod aliis familiare est, librorū  
meorū marginem scripturæ diuinæ citatio-  
nibus, patrumq. nominibus non refecire:  
sed in componēdis libris nihil mihi uidetur  
molestius, nihil grauius, quam cum eiusmodi  
citationes, quibus colligendis alij nō mo-  
dò

dū satis elaborarūt, uerum etiā propè omnia  
referferunt, mihi hincinde sumendæ sunt.  
Itaque Lectori plus utilitatis & cōmodi me  
allaturum esse confido, cū ei rationem ac  
uiam qua non solum de citatione sententiāq;  
scripturæ rectè iudicet, uerum etiam illa be-  
ne exponat, ostendo, quā si sexcētas eius-  
modi sententias tantū in medium produ-  
cerem. Et sanè una scripturæ sentētia rectè  
prolata, & à rationis lumine non abhorrens,  
plus ad illustrandam ueritatem ualet, quā  
plurimæ rhapsodiarum in morem sine iudi-  
cio temerè hinc inde collectæ. Neque uerò  
hæc eò dicta sint, ut aliorum labores uitupe-  
rem, studiumq. reprehendam. Sed tamen  
hæc cū ad docendum, tum etiam ad per-  
suadendū nō solum expeditior uia, sed etiā  
efficacior ratio uisa est, ut artem quādam ac  
methodū secuti, quod ē scripturarum fonte  
proferimus, rectè atque ordine collocemus.  
Sic enim accepta uel una sentētia ad aliarū  
omnium intelligentiam non modò uiā mu-  
nit, sed etiam de iis rectè iudicandi suggerit  
facultatem. Vnde autem existimamus inter  
scribentium allegationes, nouatorumq. sen-  
tētiarū ueritatem inuolutam latere, & quasi  
Labyrintho inclusam exire nō posse? Certe  
ab utraq; parte scripturarū testimonia pro-  
feruntur.



ferantur. Nō ergo de scripturæ sententiis error nascitur, sed de iis cōclusionibus, quæ ex scripturæ sententijs nō rectè sumuntur. Magna uerò & pœnè tota uis in eo sita est, cum aliquid inferre uelis, intelligere utrum id ex scripturæ sententia necessario inferri possit an nō. Hoc opus, hic labor est. Qui hoc præstare potest, is per omnium allegationum labyrinthos, ut alter Dædalus, absque ullo impedimento saluus euadet. Nec sanè minoris aut laboris, aut difficultatis est, sese ex istis hæreticorum argumentationibus extricare, quam olim ex illis Labyrinthi mæandris euadere. Hoc igitur est quod lectorem in his nostris libris discere cupio, hoc unum illius menti imprimendū puto, ut hanc artē atque rationē intelligens, eā commodè possit uti. Hæc in nostris opusculis Lector inueniet, facessat inuidia. Neque enim hæc a nobis cōdicta sunt, ut nos ipsos iactare, cæterisq; præferre uideamur, sed ut lectore ad eā artē ac methodum, qua passim uti possit, sibi cōparandam hortemur. Mens hominis non nisi certis rebus potest esse cōtēta. Quapropter illum in omni argumēto atq; materia, quid cum certo rationis ac probationis necessario concludentis fundamēto dici possit, uidere necesse est. Equidem nisi eiusmodi rationes



occurrant, acquiescere nullo modo possumus  
quæ cum occurrunt, eas audacter lanè defen-  
do. Sed hæc hætenus. Aliquādo enim, si Do-  
minus uitam dederit, de hac arte ac metho-  
do, qua dudum uti sumus, & adhuc utimur,  
librum nos edituros esse confidimus. Sylva  
iam cæsa est, ac parata materia, neque nunc  
aliud ad ædificium extruendū nisi tempus  
atq; ocium quærimus. Duas igitur argumen-  
tandi rationes habemus, quarum una è scri-  
pturæ fontibus, altera ex ipsa naturæ ratio-  
nisq; demonstratione sumitur. Huic philoso-  
phiæ Christianæ, illi priorem ipsius artis li-  
brum dedicauimus. Id enim nobis hoc tem-  
pore propositum est, ut ea colligamus quæ  
ad illustrandam naturalibus rationibus fi-  
dem, illaque quæ Christiana fides Dei uer-  
bo nixa tradit ac docet, naturaliter com-  
probanda, quoquo modo ualere possunt.  
Audax facinus, dicet aliquis. Nostrum ta-  
men studium irritum non fuit. Multæ liqui-  
dem eiusmodi rationes atque optimæ nobis  
occurrunt. Quarum ut tibi gustum aliquem  
demus, illud hoc loco planum faciemus, ex  
bonorum operum natura, non solum ani-  
mæ immortalitatem, uerum etiam remun-  
erationem nostram, ac præmium, esse ui-  
tam æternam ac beatam, Deumque ipsum  
immor-

immortalem, æternum, omnipotentē ostendi. Quæ omnia tamen diuinæ literæ tradūt, in quibus luculēter & iustis æterna uita promittitur, & uia qua ad æternam illam beatitudinem perueniri potest, præceptorū Dei obseruatio esse monstratur, & Deus immortalis, æternus, impassibilis prædicatur, ea tamen quibus diuinæ literæ nihil apertius prodiderunt, quidā ex aduersariis confiteri nolunt. Melanchthon enim & Caluinus, eorūque discipuli, contra clarissimā uerbi Dei lucem, bonū aliud nescio quod, siue corporale siue spirituale uirtuti suæ propositum præmium esse finxerunt. Qui cum innumerabilibus scripturæ testimoniis, ex quibus superius nonnulla produximus, conuicti, mercedem quandam bonis operibus deberi negare non possint, quæ sit illa merces, quod præmium, non exponunt. Ita illi quidem hærent in uado.

Nobis autem nō modò scripturarum testimonia, uerumetiam certæ rationes sunt, quibus demonstramus planumq. faciamus, bonorum hominis operū æternam esse mercedem, alias numquam futurum eum beatū, & quemadmodum æterna mala suppliciaque peccatis, ita æterna infinitaq. bona operibus constituta esse uirtutum. Sed mirum est

est aduersarios (qui Dei misericordiam atq;  
bonitatem adeò prædicant & extollunt, ut  
illius seueritatē ac iustitiam aut tollere, aut  
certè obscurare uelle uideātur) hic esse tam  
timidos, ut quod scripturis manifestissimè  
proditum est, dubitent confiteri: præser-  
tim cum Deum, quem adeò misericordem,  
ac benignum faciunt, in peccata tam seue-  
rum, ut improbos supplicijs afficiat, sempi-  
ternis, esse fateantur. Sed hæc iam missa fa-  
ciamus, nostrasque demonstrationes ordi-  
ne collocemus.

Virtutis præmium aliud quàm uitā, gau-  
dium, bonaq. æterna esse non posse, natu-  
ralibus argumentis probatur. Quæ ut faci-  
lius Lector intelligat, mathematicorum in-  
morem, propositionibus explicantur.

### PRIMA PROPOSITIO.

**B**ona opera ei qui illa fecerit, utilia esse  
necesse est. Alioqui uana essent, & illo  
nomine indigna.

Consequens est igitur, quoddam præmiū  
tanquam fructum, propositum esse uirtuti.  
Vt enim ex arbore poma nascuntur, ita ex  
uirtute fructum aliquem, illi à quo uirtutis  
æctus producit, profuturum nasci existi-  
mandum est.

3 Virtutis autem fructum nō modò bonū,  
sed etiam optimum esse necesse est.

4 Quod autem uerè bonum est, cū in quo  
est, suapte natura, & conditione lætitiā  
animiq. tranquillitatem adfert.

5 Quod enim suapte natura tristitiā ani-  
miquē ægritudinem adfert, id uerè bonum  
appellari non potest, sed potius malum.

6 At quicquid uerè bonū est, id natura ap-  
petendum est. Vt enim ait Aristoteles, ho-  
mines naturaliter omnes bonum appetunt.  
Homini igitur uerum bonum naturaliter  
appetendum est.

7 Omnis autem aut uerus aut falsus timor  
amittendi, uerum ac nostrum bonum quod  
amamus, suapte natura dolorem parit.

8 Quicquid igitur eiusmodi metum indu-  
cit, non solum boni nomine indignum, sed  
etiā odio prosequendū, atque fugiendū est.

## CONCLUSIO.

EX his omnibus necessariò sequitur, nul-  
lum bonum quamuis magnum & excel-  
lens, nisi æternum sit, uirtuti respondens  
& plenum præmium esse posse.

PRÆQ.

## PROBATIO.

**O**Mne siquidem transitorium bonū amittendi sui certum timorem parit. quod cui uenit in mentem, is securo, tranquilloq. animo esse nunquam potest. Quanto autem maius id bonum est, tanto maiorem, ne aliquando amittatur, metum ingenerat. Verum autem bonum expetendum est. Porro quod mordaces curas, anxiamq. sollicitudinē parit, id non est expetendū. At temporale transitoriumque bonū cum appetitur, continuam sollicitudinē, ne amittatur, ingenerat. Cui enim exploratū est, se quod habet, semper habiturum? Cæterum, ut Gregorius ait, non perditur sine dolore, quod cum amore possidebatur. Nihil autem exploratius est, quam ista temporalia bona nobis aliquando uelimus uolumus auferenda esse. Unde mortis recordatio iis qui huius sæculi diuitias amant, acerbissima est. Omors, ait sapiens, quàm amara est memoria tua homini pacem habenti in substantia sua! Quæ amara itudo inde nascitur, quod per mortem homines ab iis quas amant, diuitiis separantur. Bonum igitur temporale, ac transitorium, propter hanc ipsam recordationem quæ suapte natura parit, secumque trahit, verum bo-

num haberi non debet. Virtutis ergo præ-  
mium esse, nullo modo potest. Itaque qui  
beatitudinem æternitati negant esse coniu-  
ctam, ij toto cælo aberrant, propterea quod  
hoc felicitatis ac beatitudinis genus, eā ob-  
tinenti nihil aliud nisi dolorem, animique  
ægritudinem adfert, ipsamq; beatitudinis  
definitionem lancinat. Est enim, vt ait Au-  
gustinus, beatitudo, status omnium bono-  
rum aggregatione perfectus. Magnum autē  
bonum est æternitas. Cum igitur omnia bo-  
na in vnum, vt beatitudinem efficiant, vn-  
diq; confluunt, si desit æternitas, magnum  
perfecto bonum deest, sine quo nihil ple-  
num bonum dicendum est. Quapropter ita  
existimo, si mihi maximum quod in cælo est  
gaudium concederetur, ea tamen lege, vt  
tanto illo bono non amplius quàm vno aut  
altero die frui possem, quanto illud gaudiū  
maius esset, tanto mihi, propterea quod tam  
celeriter me illo priuandum esse scirē, ac rio-  
rem dolorem adferret. Quid enim miseri-  
us est, quàm fuisse felicem? Quantam animi  
ægritudinem sentiebat ille, cuius hæc verba  
sunt, fuimus Troes, fuit Ilium, & ingens glo-  
ria Teucrorum? Miserrimum verbum est,  
fuimus. Rectè igitur Boetius: Quid me fe-  
licem toties iactastis amici? Qui cecidit, sta-  
bili



bili non erat ille gradu.

Manifestum est igitur id bonum, quod humanæ virtutis futurum est præmium, æternum esse debere, quod possidenti non metum atque cruciatum, sed gaudium adferat sempiternum. Verum enim bonum stabilis ac perfecta lætitia sequatur necesse est. Illud etiam est consequens, eam hominis partem, quæ tanto bono perfructur, æternam esse. Non enim minus is qui interitum veretur, animo cruciatur, & dolet, quàm is qui ne bona sua eripiantur, timet. Imò verò mallet ille fortunis omnibus exui bonisque privari, quam interire, tantum malum est interitus. Igitur qui sempiterni boni futurus est particeps, is æternus & immortalis sit, necesse est.

Ex hac supputatione illa summa nascitur, non solum illud bonum quod humanæ virtutis futurum est præmium, æternum esse debere, verumetiam ipsum hominem, qui tanti boni futurus est particeps, æternum atque immortalem esse, ut eterno bono non ad tempus, sed in æternum perfrui possit. Alioqui minima suspicio ac metus, ne is a tanto bono aliquando separaretur, facile eam vim haberet, ut tantum bonum illi malum potius videretur, animique dolorem & ægritudi-



nem adferens, boni naturam atque nomen amitteret. Illud quoque consequens est, quia homo ex se tantum bonum neque sibi comparare, neque conseruare potest, cum in cuius obsequio illud acquirit, & sibi comparat, non solum immortalem & æternum, verum etiam tanta potentia præditum esse, ut & illud bonum ab interitu immune, non ad tempus, sed in æternum conseruet & vendicet, & ne quis hominem, quò minus eo bono placide ac securè perfruatur, impediat. Quam potentiam sine dubio infinitam esse necesse est.

21 Hoc igitur modo, & naturali demonstratione ex ipsa rerum natura sumpta, virtutis humanæ præmium esse uitam atque lætitiā sempiternam, fierique nullo modo posse ut bonum aliquod atque commodum temporale virtutis præmium sit, doceri potest. Quod argumentum in nostris de Philosophia Christiana libris, si Dominus vitam & facultatem illius operi absoluendi dederit, plenius vberiusque tractabimus. Hac interim demonstratione, ex qua mercedem virtutis ac præmium cum beatæ vitæ immortalitate coniunctum atque æternum esse intelligitur, fieri non posse ut quoduis aliud bonum huius præmij magnitudini naturæque respon-

respondeat, directè concluditur, vtendum  
putauimus, vt omnibus esset perspicuū quā  
consentanea sit fides nostra non solum Dei  
verbo, sed etiam rationi atque naturæ. Cum  
enim in euangelio quidam adolescens quæ-  
siuisset à Christo: Quid faciam vt vitam æ-  
ternam obtineam? Ille respondit; Si vis ad  
vitam ingredi, serua mandata. Quæ cum ita  
sint, non est dubiū quin aduersariorum theo-  
logia nihil aliud sit nisi bene loquendi scien-  
tia, quæ ad ipsam rerum naturam atque ra-  
tionem non penetrat, sed tantum in sermo-  
nis nitore pompaque versatur. Qui autem  
scripturam sacram rectè intelligere cupit, is  
res ipsas de quibus sermo est, exactè cogno-  
scat necesse est, alioqui rectam diuinarum li-  
terarum intelligentiam cōsequi non potest.  
Quod etiam in alijs artibus ferè fit, in qui-  
bus qui ita studium ponunt vt solam verbo-  
rum quæ cuiusque artis propria sunt, signi-  
ficationem teneant, eos in multos errores  
incidere videmus. Sed te, amice Lector, in  
hac nostra appendice, quam huic operi adie-  
cimus, vt si quid à nobis prætermisum esset,  
quod contra liberum voluntatis arbitrium  
obiici posset, expeditam illud refellendi ra-  
tionem ad manum haberes, diutius non te-  
nebo. Quam rationem ac methodum si se-

DE LIBERO ARBITRIO.  
quaris, quicquid ab aduersariis contrà ad  
ferri potest, nullo negotio refutabis. Vale,  
& nostrum studium ac laborem tuis oratio-  
nibus subleua.

FINIS.



# RERVM INSIGNIVM

## QVÆ HOC OPERE CONTINENTVR, INDEX.



**A**BSVRDA quæ ex errore contra liberum arbitrium, & dicentium quod Deus omnia sine ulla nostra operetur cooperatione, sequuntur. pag. 160.  
Adiungunt scripturæ hæretici. 172. 173. & seq.  
Additiones suas ad scripturam sacram, Dei verbum appellant hæretici. 175. 178.

Adonidis hortuli. 181.

Adiutoris natura. 29. 93. 94. 95. & 168.

Aduersarij Christum cum Apostolo committunt. 171.

Agonothetes noster Deus. 176.

Albigenses. 251.

Ambrosij laus. 74. testimonia, ibidem, & seq. & 251.

Amor Dei infinito premio dignus. 266.

Ananiz exemplum sacrilegos terrere debere. 41.

Apostolorum coryphæi Petrus & Paulus. 170.

Arca Noë ecclesia Romana. 300.

Argumentum vitiosum quale. 184.

Assentatio vitiorum adiutrix. 203.

Athanasij laus. 77. testimonia, ibidem, & seq.

Athei sunt hæretici. 293.

Atheismi authores hæretici. 70. 71.

Augustinus ostendit, quale sit liberum arbitrium. 17. 18. & seq.

Augustini testimonia. 93. & seq.

Ayulium Dei non tollit, sed confirmat liberum arbitrium. 88. 89. 123. & seq. & 189.

**B** Ardesanes Valentinianus. 251.

Basilij magni laus & testimonia. 87. & seq.

Beatitudo quid. 324.

Beatitudo æternitati coniuncta. 324.

Bernardi egregia sententia. 262.

Bellij rabie percitis similes hæretici. 289.

Bonis operibus cur hæretici tam insens. 193. & seq.

Bonorum operum fons, fides iecta. 207.

Bonorum operum fructus. 216. 217.

Bonum temporale & transitorium virtutis præmiū esse non potest. 322. 323. & 324.

**C** Aluini Deus crudelissimus. 12. & iniustus. 67. & seq. & 181.

Caluini hæretica fide patrum testimonia citat. 19.

Caluini Deus ab hominibus non colendus. 165. 166.

Caluini Deus monstrum atque portentum. 277.

Caluini impietas è tenebris euenda, orbique monstranda. 277. & seq.

Caluini cur non simus. 135.

Catholici

Catholici scriptura loca quæ pugnare videntur, inter se conciliant, heretici contra inter se component. 145. 146.

Censoriam virgulam sibi sumunt hæretici. 31. 175.

Christus non habet liberum arbitrium iuxta hæreticorum sententiam. 176.

Christi beneficium quo redempti & reparati sumus quibus in rebus creditur. 287. & 291.

Chrysippus fati defensor sententiam mutare cogitur. 8. 9.

Chrysippus stultæ antesignanus insaniz. 80. 61.

Chrysostomi locus egregius, quo liberum demonstrat arbitrium. 6.

Chrysostomi testimonium. 9. & seq.

Cimmeriæ tenebras mentis hominum offendunt hæretici. 117.

Cogere & compellere quid in scriptura significant. 176. 177.

Cogitur etiam Deus ab homine. 178.

Confessio fidei hæret. in concilio Possiensi. 73.

Confutationes sententiarum hæreticarum. 115. & seq.

Conuerti ad Deum. 185.

Cor in scriptura significat voluntatem. 16.

Corporis afflictiones. 200.

Cypriani testimonium. 152.

Cyrilli testimonium. 81. & seq.

Damasii testimonium. 91.

Deus, ut aiunt hæretici, peccat in homine. 66.

Deus vult omnes saluos fieri, exponitur. 74. 75.

Deus & natura nihil frustra faciunt. 161.

Deum trucem & iniustum faciunt hæretici. 211.

Deus punie citra condignum, & remunerat vltra condignum, theologorum sententia. 229.

Deum diabolo peiorem esse fingunt hæretici. 180.

Deus verus quæritur. 284. 285.

Dei potentia infinita. 316. (reiecta. 183.)

Deorum portenta non numquam olim euangelio corruscantes cur vulgæ.

Diaboli studium. 279.

Doctorum ecclesiæ mirabilis consensus. 97. 98.

Doctrina Dei constans, Diaboli inconstans. 113.

Donationis vis & proprietas. 269. & seq.

Doni & mutui differentia. 270.

Ecclesiæ catholicæ. 138. 239. & seq.

Ecclesiæ catholicæ fides. 299. 300.

Ecclesiastici liber in canone scripturæ sacræ. 31. 32.

Epicuri castra. 181.

Errore nihil fecundius. 62.

Erroris aduersus donorum operum mercedem absurditas ostenditur. 221. & seq.

Erroris aduersus liberum arbitrium qui auctores. 250.

Experientia docet liberum arbitrium nobis inesse. 3.

Faures ampliandi. 223.

Festi dies à Christianis ob quorundam iudicium improbitatem im-

pune violantur. 34.

Fides catholica de libero arbitrio verbo Dei consentanea, inter hæreticos

reiecta.

reiecta.

reiecta.

reiecta.

reiecta.

reiecta.

extrema tanquam inter Scyllam & Carybdim cautè procedit. 17.  
Fides recta bonorum operum fons. 207.  
Fides nostra scripturis maxime consentanea. 237.  
Fides nostra simplex ac sacris intellectus. 298.  
Fides nostra quam consentanea sit Dei verbo, ipsique rationi & naturæ demonstratur. 237.  
Fons ex quo hæreticorum doctrina contra liberum arbitrium & operum merita manat & profluit. 203. 204.  
Furiosi qui liberum arbitrium negant. 289.  
**G** Radus ad Archemum. 70.  
Gratus quibus ascendimus in celum. 274.  
Gratia & merces differunt. 225.  
Gratiæ Christi vis & energia. 271. 272.  
Gratiæ Christi contumeliam faciunt hæretici, ibidem.  
Gratia Dei nostra. 275.  
**H** Hæretica fides. 19. hæretica licentia. 141.  
Hæretici cur quosdam libros de canone tollunt. 36.  
Hæretici simul aiunt & negant. 64.  
Hæreticorum argumenta in ipsos retorquentur. 116. 117.  
Hæretici ex una eademq. sacre scripturæ sententia contraria inferunt & concludunt. 125. & seq.  
Hæretici in principes sermones suos grati. 131. 132.  
Hæretici Iuliano & Porphyriano similes. 141.  
Hæretici, quomodo scripturæ verba producant. 144.  
Hæretici se solos fideles vocant. 182.  
Hesiodi sententia de uirtute. 181. 182.  
Hæretici argumentantur ab auctoritate negatiue. 184.  
Hæreticorum doctrina contra bonorum operum merita, quæ perniciofa sit. 196.  
Hæreticorum temeritas & inscitia. 237. 238. & 246.  
Hæretici cur uirtutem non laudant. 241.  
Hæretici se iam in cælo esse somniant. 258. 259.  
Hæreticorum ministri omnem omnium philosophorum impietatem superantes in reprobum sensum traditi. 278.  
Hæreticorum ministri Deum diabolo peiorem faciunt. 280.  
Hæreticorum ministri religionem Christianam funditus euertere conantur. 285. 286.  
Hæreticæ impietatis gradus. 293. 294.  
Hæretica schola quid doceat. 294. & seq.  
Hæretici quomodo in Deum blasphemant. 308.  
Hæreticorum Theologia nihil aliud nisi bene loquendi scientia. 327.  
Hieronymi testimonium. 91. & 252.  
Hilarij laus. 70. testimonium. 188. & 252.  
Hominem mortalem peioris conditionis faciunt hæretici, quam damnatum. 63. 164. & 279.  
Hominis cuiusvis est errare. 74.  
Hominem aliquid posse & aliquid facere. 160. 161.  
Hominem qualem hæretici faciunt. 161. 162.  
Homo cooperator Dei. 171. 172. & seq. & 180. 181.



Hominis ingenuitas & dignitas. 166. 167. & seq.  
 Hominem ad peccatum à Deo impelli fingunt heretici. 179. & seq.  
 Hominem ex homine tollunt heretici. 286.  
 Honoris multa genera in scripturis. 144. 145.  
 Hyperbole in scripturis frequens. 109. & seq.  
**I**llecebra peccandi impunitatis spes. 131.  
 Ingenii vis homini data. 290.  
 Infanti & furiosi qui liberum negant arbitrium. 195.  
 Interitus maximum malum. 325.  
 Inutiles serui cur merito dicimur. 231. 232.  
 Inuites serui sumus Deo, non nobis. 247.  
 Ioannes VVicleff. 251.  
 Irenæi testimonium. 35.  
 Irenæi in hereticos. 40. 41.  
 Iudicium de vnaquaque re verum vnde petendum. 160.  
 Ius bibe regula. 141.  
**L**iberum arbitrium quid. 62. 63.  
 Liberum arbitrium qui negat, catholicus non est Augustini sententia. 18. 19. & 251.  
 Liberum arbitrio sublato, nullus legibus locus. 5. 6. & 63.  
 Liberum arbitrium post originale peccatum quale. 17. 18. & seq.  
 Liberum arbitrium iuxta aduersariorū sententiam, neque Christus neque angeli habent. 176.  
 Liberum arbitrium distinguit hominem à pecude. 181. & seq.  
 Liberalitas & iusticia Dei. 221.  
 Librorum sacrorum multitudo cur eradita. 455.  
**M**achometi legi hæretis similis. 203.  
 Maiores nostri sacre scripturæ diligentissimi lectores. 219.  
 Manichei liberi arbitrii hostes. 251.  
 Melancthon de libero arbitrio palinodiam canit. 53.  
 Membrorum officia cur homini data. 290.  
 Mendacij natura. 32.  
 Merces & meritum inter se confunditur. 217.  
 Mercedem bonis operibus deberi duobus modis consideratur. 18.  
 Mercedem bonis operibus promittit Deus. 217. & seq.  
 Mercedis varietas. 225. & seq.  
 Mercede boni operis sublata, homo pecude inferior. 264.  
 Meriti vis in scriptura, tamen numen haberi falso negetur. 220.  
 Meritum quid dicatur à nostris. 228.  
 Metaphysica. 184.  
 Methodus qua solida scientia comparari potest. 315.  
 Ministri hereticorum cur pudiciæ hostes. 47. 48.  
 Ministri hereticorum quomodo principes decipiunt. 18. & seq.  
 Ministri heret. se sub ore condemnant. 134.  
 Ministri scripturæ verbis scripturam oppugnant. 141. & seq.  
 Ministri hæret. Deum diabolo peiorem esse fingunt. 220.  
 Ministri Geneuenses Apostolicæ sententiæ corruptiores. 30.  
 Monstra que vincunt, sibi aduersarij fingunt. 222.  
 Miserum quod fuisse felicem. 324.



Mortis recordatio diuitias amantibus acerbissima . 323 .

Munerarius siue agnosthetes noster Deus . 276 .

Natura gratiaque symplegades . 269 .

Negans te habere liberum circū iudicandus . 289 .

Negantiū liberū arbitriū duę illustres sententię Lutheri & Caluini . 315 .

Negligentię humanę patroni hæretici . 296. 297 .

Nemo ante uictoriam triumphat . 258 .

Nemo ad peccatum cogi potest . 268. 269 .

Nemo peccatum subm. libenter agnoscit . 310 .

Nihil uerbo Dei adiciendum . 286 .

Nihil magis nostrum , quam quod nobis datum . 269 . & seq .

Nihil Deo uerbo magis contrarium , quam hæretica doctrina . 296 .

Nihil plene bonum sine eternitate . 324 .

Nobilitas hominis in dedicatoria , & fo. 160. 161. & 160. 161 .

Non amittitur sine dolore , quod cum amore possidebatur . 324 .

Nouum philosophiæ genus sub hęcencia somniatum . 258 .

Opera sine fide facta æternę salutis meritoria non sunt . 207 . & seq .

Opera bona nostra in scripturis nusquam enuclea dicuntur . 232 .

Opera nostra cur meritoria inre dicuntur . 236 .

Opera bona non debent immunda dici . 248 . & 254 .

Opera impūda quę . 255. 256 . & seq .

Opera nostra bona nobis , non Deo profunt . 258 .

Opera nostra sententię comparantur . 275 .

Origenis testimon . 85. 86 .

Orpheus filius & s. x. quomodo traheretur . 277 .

Otiosum nihil in mundo . 160. 161 .

Pactus est Deus cum homine . 229 . & seq .

Paulus Apostolus liberū arbitriū clarissimè ostendit . 44. 45 . & seq .

Pauli sententiā ecclesia optime intelligit . 46 .

Pauli & Caluini Antithesis . 47 .

Pauli epistolę obscurę . 140 .

Pauli spes de æquitate subnixa . 230 .

Pauli Apostoli in ecclesiam Romanam amor . 301 .

Pauli & Caluini dissonantia . 303 .

Peccatum voluntarium malum . 11 .

Peccata non esse paria , ut Stoici somniant . 25 .

Peccatum humanę naturę maximè contrarium . 200 . & seq .

Peccata sua homines libenter excusant . 201. 202 .

Peccata unde . 202 .

Peccatorum gradus & differentia . 265 .

Petrus Apostolus se iugem in orationibus suis ecclesię Romanę memo-

riam habiturum esse promissit . 302 .

Petrus Abelardus . 254 .

Phaëo quomodo induratus à Deo . 312. 313 . & 314 .

Pharaonis patroni hæretici Deum accusant . 313 .

Philosophorum opera qualia . 207 .

Postulatio æquissima . 133 .

Præcepta iustitię amara . 203 .

Prædestinationē Dei nobis opponunt , ut liberū arbitriū tollant . 314 .

Principes quidam hæreticorum lepones . 251 . 252 .  
Priscillianistæ . 251 .

Pseudoprophetæ cur semper grati & iucundi . 201 . 202 .

**Q** Valem hæretici hominem faciunt . 286 . 287 .

Quando sensus in tuto est , non est de verbo laborandum . 214 .

Quæstus vocabulum hæreticis molestum . 272 . 274 .

Quæstus quid apud Paulum , ibidem .

Quibus machinis cælum expugnetur , Christus ostendit . 244 .

**R** Apina felix . 244 .

Rationes quæ probant liberum arbitrium . 36 . & seq .

Regulæ rectè explicandi scripturæ . 101 . & seq .

Regula generalis ex qua omnia scripturæ loca , in quibus de humanis operibus agitur , rectè intelligi possint . 197 . 198 .

Remunerator & remunerabile correlativa . 214 .

Remunerator Deus . 215 .

In remuneratione bonorum duo spectantur . 213 .

Reparationis humanæ vis . 269 .

Res ipsæ de quibus sermo est , exactè cognoscendæ . 327 .

Romana ecclesiæ fluctibus agitari potest , obrui non potest . 300 .

Romanæ ecclesiæ signa . 300 . 301 .

Romanæ ecclesiæ fidem Paulus laudat , ibidem .

**S** Anctorum hominum moderatio & humilitas . 157 .

Saraxæ illud in evertenda scriptura debent . 236 .

Saraxæ studium per hæreticos . 292 .

Scopus hæreticorum notandus , ut eorum impietas intelligi possit . 302 .

Scylli canes hæretici in virtutes latrant . 241 . & seq . in ecclesiâ  
irant . 302 .

Scripturæ sacræ testimonia pro libero arbitrio . 20 . & seq .

Scripturæ sacræ non tantum alicui eius parti , fides habenda . 151 .  
179 . 181 .

Scripturæ nihil de nostro adiiciendum . 151 .

Scripturæ sacræ non simul traditæ . 154 .

Scripturæ sacræ consuetudo . 157 .

Scripturæ corrigendæ , si adversariorum opinio de seruo arbitrio vera  
esset . 168 . 169 .

Scripturæ ad bona opera nos incitant . 198 .

Scripturæ sententias allegare parum prodest , nisi rationis lumen  
adhibeatur . 307 .

Simile a medicis . 216 .

Sophismata quomodo detegantur . 112 . 119 . 120 . & 149 .

Spes unde generatur . 230 . & seq .

Stoicorum nova paradoxa . 250 . 251 .

Supercilium Pharisæicum quomodo fugiendum . 292 .

Sulannæ laus . 36 . 37 .

**T** à πρὸς 71 . 214 .

Talentum homini à Deo datum . 372 .

Talenti usus & fructus ibidem & seq .

Temeritate periculum , ad incognitum appropriare . 190 .

Terulliani testimonium . 84 .

Theophili Alexandrini testimonium. 92.  
 Thelaurum in celo recondere quid sit. 245.  
 Timor in bonis numerari non potest. 322.  
 Trahere seu cogere in scriptoris quid sit. 176. 177.  
 Trahit sua quemque voluptas. 177.  
 Veritas odium cur parit. 203.  
 Veritas apum pabulum. 316.  
 Veritatis via. 4. 138. & 203.  
 Veritatis lumen qui videre non possunt. 210.  
 Vitium uirtutis inimicum. 204.  
 Virtus ardua iuxta Hesiodum. 182. 183.  
 Virtutis iter contrarium. 201.  
 Virtutis dignitas unde. 266.  
 Vitam aeternam nos acquirere recte dicimus. 233.

FINIS.

Errata.

Correcta.

*Prior manus paginam, alter lineam indicat.*

pagina 17. linea 1 f. & r. cupiditatis.	lege cupiditates.
pag. 11. lin. 9. appetui.	1. appetitui.
pag. 29. lin. 9. inclina.	1. inclinavi.
pag. 33. lin. penult. sorte.	1. sorte.
pag. 34. lin. 18. portetis.	1. portetis.
pag. 70. lin. 23. nulla.	1. multa.
pag. 73. lin. 3. consiliorum.	1. conciliorum.
pag. 81. lin. 15. Psal. 18.	1. Psal. 118.
pag. 82. lin. 5. libere.	1. libera.
pag. 88. lin. 3 & 4. improbis malis.	1. improbos, malos.
pag. 83. lin. 26. sumtum.	1. sumptum.
pag. 213. lin. 14. in illo est.	1. est in illo est.
pag. 229. lin. 19. testamento.	1. testamento.
pag. 251. lin. 1. Soicorum.	1. Stoicorum.
ibidem lin. 4. sustulerunt.	1. sustulerunt.
pag. 279. lin. 2. illi.	1. illi.
pag. 288. lin. 23. nec ille.	1. nec illi.
pag. 312. lin. 1. accusari.	1. accusari.
pag. 25. lin. 10. nep.	1. nep.

Cum licentia Superiorum.

# R E G E S T U M.

\*\*\* A B C D E F G H I K.  
L M N O P Q R S T V X.

Omnes sunt quaterniones, præter \*\*\*  
qui est duernio.



R O M A E,  
*Apud haredes Antonij Bladij Im-  
pressores Camerales.*

M D L X X V I.





RESTAURO del LIBRO ANTICO  
Cav. G. DI GIACOMO  
PESCARA  
1973



